


**INTERMEDIATE
BENGALI SELECTIONS**

INTERMEDIATE BENGALI SELECTIONS



SECOND EDITION
(*Thoroughly Revised*)

PUBLISHED BY THE
UNIVERSITY OF CALCUTTA
1925

1st Edition, 1924—E

2nd Edition, 1925—L

PRINTED BY BHUPENDRALAL BANERJEE

AT THE CALCUTTA UNIVERSITY PRESS, SENATE HOUSE, CALCUTTA.

Reg. No. 168B, November, 1925—L

প্রথম সংস্করণের

ভূমিকা

কলিকাতা বিশ্ববিদ্যালয়ের সিণ্ডিকেট সভার অনুমোদনক্রমে এই রচনা-সংগ্রহ প্রকাশিত হইল। কিন্তু আজ আমাদের বিশেষ দুঃখ এই যে, বাঁহার আগ্রহে, যত্নে ও উৎসাহে এই সংগ্রহ-কার্য আরম্ভ হইয়াছিল, আমরা তাঁহাকে ইহা দেখাইতে পারিলাম না।

রচনা-সংগ্রহের বিশেষ সুবিধা এই যে, ইহার ভিতর দিয়া ছাত্রগণের প্রখ্যাত-নামা লেখকগণের বিশেষ বিশেষ লেখার সহিত সহজেই পরিচয় ঘটে এবং তাঁহাদের অগ্ণাত রচনা পড়িবার আকাঙ্ক্ষা তাহাদের মধ্যে স্বতঃই স্কুরিত হয়। তদ্ব্যতীত, একই পুস্তকে নানা বিষয়িণী রচনার সমাবেশ থাকায় ভাব-সম্পাদ-বুদ্ধিরও বিশেষ সুবিধা ঘটে। এই উদ্দেশ্যের প্রতি লক্ষ্য রাখিয়া এই রচনা-সংগ্রহ সম্পাদিত হইল। ইহাতে বঙ্গ-সাহিত্যের বিখ্যাত লেখকগণের রচনা যথাসম্ভব মুদ্রিত হইয়াছে এবং কয়েকটি রচনার এমন অংশ প্রদত্ত হইয়াছে যে, উক্ত রচনাগুলি পাঠকালে যেন মূল পুস্তক পড়িবার স্পৃহা জাগরিত হয়।

পরিশেষে এই পুস্তকে যে সমস্ত রচনা গৃহীত হইয়াছে, তৎসমস্ত স্বত্বাধিকারী আমাদের কাছে রচনাগুলি প্রকাশের অনুমতি দিয়াছেন, তাঁহাদিগকে আমরা বিশ্ববিদ্যালয়ের পক্ষ হইতে আন্তরিক ধন্যবাদ প্রদান করিতেছি।

সূচীপত্র

গভাংশ

রচয়িতা ও বিষয় যে পুস্তক হইতে গৃহীত পত্রাঙ্ক
অক্ষয়কুমার দত্ত—

*রাজা রামমোহন রায়	...	ভারতবর্ষীয় উপাসক- সম্প্রদায়	...	১
*স্বপ্ন-দর্শন—ভ্রায়-বিষয়ক	...	চারুপাঠ, ৩য় ভাগ	...	১০
*শিক্ষিত ও অশিক্ষিত লোকের স্থখের তারতম্য	...	চারুপাঠ, ৩য় ভাগ	...	২৩

ভূদেব মুখোপাধ্যায়—

*হিন্দুসমাজ ও কৃপমগ্নকতা	বিবিধ প্রবন্ধ	...	৩৩	
✓জাতীয় ভাব—উপক্রমণিকা	সামাজিক প্রবন্ধ	...	৩৮	
✗জাতীয় ভাব—ইহার উপাদান	...	সামাজিক প্রবন্ধ	...	৪৩
*দলাদলি	...	পারিবারিক প্রবন্ধ	...	৪২

ভারতশঙ্কর তর্করত্ন—

চক্রাপীড়ের দেহত্যাগ	...	কাদম্বরী	...	৫২
----------------------	-----	----------	-----	----

রাজনারায়ণ বসু—

সেকাল আর একাল	...	সেকাল আর একাল	...	৭১
---------------	-----	---------------	-----	----

* তারকা-চিহ্নিত অংশগুলি স্বাধিকারীর অমুমতিক্রমে মুদ্রিত।

সূচীপত্র—গত্যাংশ

রচয়িতা ও বিষয়

যে পুস্তক হইতে গৃহীত . পত্রাঙ্ক

কেশবচন্দ্র সেন—

✓*অগ্নিমন্ত্রে দীক্ষা ... জীবন-বেদ ... ৮১

রমেশচন্দ্র দত্ত—

✓*হলদীঘাটার যুদ্ধ ... রাজপুত্র জীবন-সন্ধ্যা ... ৯০

*ভ্রাতৃঘ্ন ... ঐ ... ৯৫

বঙ্কিমচন্দ্র চট্টোপাধ্যায়—

✓*একা ... কমলাকান্তের দপ্তর ... ৯৭

✓*আমার দুর্গোৎসব ... ঐ ... ১০২

! *মল্লযুদ্ধ কি ? ... বিবিধ প্রবন্ধ ... ১০৬

*কপালকুণ্ডলা (স্তূপশিখরে) ... কপালকুণ্ডলা ... ১১২

*কপালকুণ্ডলা (সমুদ্রতটে) ... ঐ ... ১১৫

কালীপ্রসন্ন ঘোষ—

*ঐহিক অমরতা ... নিভৃত চিন্তা ... ১২০

রজনীকান্ত গুপ্ত—

*বঙ্গালীর বীরত্ব ... ভারত-কাহিনী ... ১৩২

অক্ষয়চন্দ্র সরকার—

*হেমচন্দ্র ও মধুসূদন ... কবি হেমচন্দ্র ... ১৪২

পাঁচকড়ি বন্দ্যোপাধ্যায়—

*ভ্রাতৃবিতীর্ণা ... সারথি (মাসিক পত্র) ... ১৫০

* তারকা-চিহ্নিত অংশগুলি স্বত্বাধিকারীর অনুমতিক্রমে মুদ্রিত।

রচয়িতা ও বিষয়

যে পুস্তক হইতে গৃহীত

পত্রাঙ্ক

শ্রীঅক্ষয়কুমার মৈত্রেয়—

✓*সেকালের স্মৃতিচিহ্ন ... সিরাজদৌলা ... ১৫৮

শ্রীযোগীন্দ্রনাথ বসু—

*মধুসূদনের কাব্যাহুর্জি ... মাইকেল মধুসূদন-
দত্তের জীবনচরিত ... ১৬৬

স্বামী বিবেকানন্দ—

✓স্বদেশ-মন্ত্র ... ১৭৩

সার আশুতোষ মুখোপাধ্যায়—

*বঙ্গ-সাহিত্যের ভবিষ্যৎ ... দশম বঙ্গীয় সাহিত্য-
সম্মিলনের সভাপতির
অভিভাষণ ... ১৭৪

সখারাম গণেশ দেউস্কর—

*সমর্থ রামদাস স্বামী ... সাহিত্য (মাসিক পত্র) ১৮২

শ্রীপ্রফুল্লচন্দ্র রায়—

*বঙ্গসাহিত্যে বিজ্ঞান ... দ্বিতীয় বঙ্গীয় সাহিত্য-
সম্মিলনের সভাপতির
অভিভাষণ ... ১৯০

শ্রীঅরবিন্দ ঘোষ—

✓কমার আদর্শ ... ধর্ম (পাক্ষিক পত্র) ... ২০২

* তারকা-চিহ্নিত অংশগুলি স্বত্বাধিকারীর অনুমতিক্রমে মুদ্রিত।

রচয়িতা ও বিষয়	যে পুস্তক হইতে গৃহীত	পত্রাঙ্ক
চন্দ্রনাথ বসু—		
*সিদ্ধিধাতা গণেশ	... ত্রি-ধারা	... ২০৬
রামেন্দ্রসুন্দর ত্রিবেদী—		
*ঈশ্বরচন্দ্র বিদ্যাসাগর	... রচনা-সংগ্রহ	... ২১২
শ্রীদীনেশচন্দ্র সেন—		
✓*লক্ষণ	... রমায়ণী কথা	... ২৩৪
ধিজেন্দ্রলাল রায়—		
*চন্দ্রশুপ্ত	... চন্দ্রশুপ্ত	... ২৫৪
*চন্দ্রশুপ্ত ও চাণক্য	... ঐ	... ২৬০
শ্রীঈশানচন্দ্র ঘোষ—		
*ফাল্গুন রাষ্ট্রবিপ্লব	... ইংলণ্ডের সংক্ষিপ্ত ইতিহাস	... ২৬২
শ্রীবিজয়চন্দ্র মজুমদার—		
*মধ্যাহ্ন-সঙ্গীত	... বিজ্ঞপ	... ২৬৭
শ্রীশরৎচন্দ্র চট্টোপাধ্যায়—		
✓*শ্রীকান্তের নিলীধ অভিযান	... শ্রীকান্ত	... ২৭৪
বলেন্দ্রনাথ ঠাকুর—		
✓*অশ্রুজল	... বলেন্দ্র-গ্রন্থাবলী	... ২৮৫

রচয়িতা ও বিষয়	যে পুস্তক হইতে গৃহীত	পত্রাঙ্ক
শ্রীরবীন্দ্রনাথ ঠাকুর—		
* কাব্যের উপেক্ষিতা	... প্রাচীন-সাহিত্য	... ২২১
শ্রীরাজেন্দ্রনাথ বিজ্ঞানভূষণ—		
* আশ্বেষ গিরি	... শ্রীকৃষ্ণ	... ৩০৩
ঈশ্বরচন্দ্র বিজ্ঞানসাগর—		
✓ সাতার বনবাস (ষষ্ঠ পারচ্ছেদ)	সাতার বনবাস	... ৩১০
স্বামী বিবেকানন্দ—		
* প্রহ্লাদ-চরিত	... মহাপুরুষ-প্রসঙ্গ	... ৩২১

পঞ্চাংশ

ঈশ্বরচন্দ্র গুপ্ত—

প্রার্থনা	... কবিতা-সংগ্রহ	... ৩৩১
স্বদেশ	... ঐ	... ৩৩২

মাইকেল মধুসূদন দত্ত—

✓ বঙ্গভাষা	... চতুর্দশপদী কবিতালালী	... ৩৩৫
কাশীরাম দাস	... ঐ	... ৩৩৬
✓ কালিদাস	... ঐ	... ৩৩৭
দশরথের প্রতি কেকয়ী	... বীরভদ্রনা কাব্য	... ৩৩৮
লক্ষ্মণ ও ইন্দ্রজিৎ	... মেঘনাদবধ কাব্য	... ৩৪৩

* তারকা-চিহ্নিত অংশগুলি স্বত্বাধিকারীর অনুমতিক্রমে মুদ্রিত

রচয়িতা ও বিষয়	যে পুস্তক হইতে গৃহীত	পত্রাঙ্ক
বিহারীলাল চক্রবর্তী—		
হিমালয়	... সারদা-মঞ্জল	... ৩৫৩
গিরিশচন্দ্র ঘোষ—		
*সিদ্ধার্থের বৈরাগ্য	... বুদ্ধদেব	... ৩৫৭
হেমচন্দ্র বন্দ্যোপাধ্যায়—		
পদ্মের যুগল	... কবিতাবলী	... ৩৬৪
ভারত-সঙ্গীত	... ঐ	... ৩৭০
নবীনচন্দ্র সেন—		
*সিদ্ধান্তট	... প্রভাস	... ৩৭৭
শ্রীযোগীন্দ্রনাথ বসু—		
*মহম্মদ ঘোরীর মন্ত্রণা-সভা	... পৃথ্বীরাজ	... ৩৭৯
শ্রীরবীন্দ্রনাথ ঠাকুর—		
*অহল্যার প্রতি	... বিশ্ব	... ৩৮৬
*হিমালয়	... চয়নিকা	... ৩৮৯
*শেষ থেয়া	... ঐ	... ৩৯০
*বৈরাগ্য	... লোকালয়	... ৩৯২
*ভারতলক্ষ্মী	... স্বদেশ	... ৩৯৩
কাশীরাম দাস—		
সমুদ্রমহানে শিব	... বঙ্গসাহিত্য-পরিচয়,	
	১ম ভাগ	... ৩৯৪

* তারকা-চিহ্নিত অংশগুলি স্বত্বাধিকারীর অনুমতিক্রমে মুদ্রিত।

সূচীপত্র—পঞ্চাংশ

১৩

রচয়িতা ও বিষয়	যে পুস্তক হইতে গৃহীত	পত্রাঙ্ক
মাইকেল মধুসূদন দত্ত—		
প্রমীলার চিতারোহণ	... মেঘনাদবধ কাব্য	... ৪০২
হেমচন্দ্র বন্দ্যোপাধ্যায়—		
বৃত্ত-সংহার (ষষ্ঠ সর্গ)	... বৃত্ত-সংহার	... ৪১৩
গিরিশচন্দ্র ঘোষ—		
* পাণ্ডব-গৌরব (শ্রীকৃষ্ণ ও ভীম)	পাণ্ডব-গৌরব	... ৪২৮
অক্ষয়কুমার বড়াল—		
বঙ্গভূমি ৪৩৫
যতুগোপাল চট্টোপাধ্যায়—		
* স্নাত্তীপান্না	... পদ্মপাঠ, ৩য় ভাগ	... ৪৩৮
যমুনা	... ঐ	... ৪৪১
শ্রীকামিনী রায়—		
* পুণ্ডরীক	... আলো ও ছায়া	... ৪৪৪
দ্বিজেন্দ্রলাল রায়—		
* স্বদেশ আমার ৪৫০
* ভারতবর্ষ	... গান	... ৪৫১
* বঙ্গভাষা	... ঐ	... ৪৫৩
শ্রীনবকৃষ্ণ ভট্টাচার্য—		
শেষ	... প্রচার (মাসিক পত্রিকা)	... ৪৫৪

* তারকা-চিহ্নিত অংশগুলি স্বত্বাধিকারীর অনুমতিক্রমে মুদ্রিত।

রচয়িতা ও বিষয়	যে পুস্তক হইতে গৃহীত	পত্রাঙ্ক
শ্রীভুজঙ্গধর রায়চৌধুরী—		
*ব্যোম	... ছায়াপথ	... ৪৫৫
সত্যেন্দ্রনাথ দত্ত—		
*কয়াধু	... বিদায় আরতি	... ৪৫৯
*স্বাগত	... অন্ন আবীর	... ৪৬৫
শ্রীকালিদাস রায়—		
*হর্ষাসা ৪৭০
শ্রীবিজয়চন্দ্র মজুমদার—		
*লক্ষ্যপথে	... হেঁয়ালি	... ৪৭২
শ্রীঅমৃতলাল বসু—		
বিজয়া	বঙ্গবাণী (মাসিক পত্রিকা)	... ৪৭৪
চিত্তরঞ্জন দাশ—		
অস্তর্যামী ৪৭৭
দীনবন্ধু মিত্র—		
*গঙ্গার কলিকাতা-দর্শন	... সুরধুনী কাব্য	... ৪৭৮
গোবিন্দচন্দ্র রায়—		
ষমুনা-লহরী ৪৮৬
শ্রীবনোয়ারীলাল গোস্বামী—		
*স্মার আশুতোষ ৪৯৩

* তারিখা-চিহ্নিত অংশগুলি স্বত্বাধিকারীর অমুমতিক্রমে মুদ্রিত।

পাঠের প্রথম পঙক্তির সূচী

(অকারাদিক্রমে সঙ্খিত)

	পত্রাঙ্ক
অগ্নি ভুবনমনমোহিনা !	... ৩৯৩
অসৌম নীরদ নয়,	... ৩৫৩
আজি গো তোমার চরণে, জননি ! আনিয়া	
অর্ঘ্য করি মা দান ;	... ৪৫৩
“আর ঘুমাইও না দেখ চক্ষু মেলি	... ৩৭০
এ কি কথা শুনি আজি মছরার মুখে,	... ৩৩৮
এ কি ভীষণ আকার সম্মুখে আমার !	... ৩৫৭
এস ভাই, এস বৃকোদর !	... ৪২৮
কবিতা-নিকুঞ্জে তুমি, পিককুল-পতি !	... ৩৩৭
কহিল গভীর রাত্রে সংসায়ে বিরাগী—	... ৩৯২
কার তরে এই শয্যা দাসী, রচিস্ আনন্দে ?	... ৪৫৯
কি স্বপ্নে কাটালে তুমি দীর্ঘ দিবানিশি,	... ৩৮৬
কোথা যান্ত্রিক আজি অজ্ঞানে ভুলেছ নিত্যযাগ	... ৪৭০
খুলিল পশ্চিম-দ্বার অশনি-নিনাদে ।	... ৪০২
গোকুলে মধু ফুরায়ে গেল অঁধার আজি কুঞ্জবন ।	... ৪৫৪
গৌরবে, যমুনে ! তুমি কলকল স্বনে,	... ৪৪১
চন্দ্রচূড়-জটাজালে আছিল। যেমতি	... ৩৩৬
জাননা কি জীব তুমি, জননী জনমভূমি,	... ৩৩২
অলঙ্ঘ্যোতি কলাযুতা শেমুধী কার,	... ৪৯৩
বশ মাস গর্ভে তোরে করেছি ধারণ,	... ৪৩৮

	পত্রাঙ্ক
দিনের শেষে ঘুমের দেশে ঘোমটা-পর্য্য ঐ ছায়া	... ৩৯০
দৈন্ত্র যদি আসে, আশ্রুক, লজ্জা কিবা তাহে ?	... ৪৭২
ধ'রে মাহুঘের দেহ মাহুঘে করিয়ে স্নেহ	... ৩৩১
"নগরী-ভিতরে, মাতা, অতি চমৎকার,	... ৪৭৮
নিশ্চল আনন্দরাশি, নিশ্চল আনন্দ হাসি,	... ৩৭৭
নিশ্চল সলিলে, বহিছ সদা,	... ৪৮৬
পদ্মের যুগল এক সুনীল হিল্লোলে ;	... ৩৬৪
প্রণমি তোমারে আমি, সাগর-উথিতে	... ৪৩৫
বিনামেঘে বজ্রাঘাত,	... ৪৭৪
বিশাল ক্ষীরোদ সরঃ পদ্মসমাকুল,	... ৪৪৪
বিস্ময়ে কহিলা শূর,—“সত্য যদি তুমি	... ৩৪৩
বেষ্টিয়াছে ইন্দ্রপুরী দেব-অনৌকিনী,	... ৪১৩
যখনি দেখিতে নারি, অন্ধকার আসে,	... ৪৭৭
যে দিম সুনীল জলধি হইতে উঠিলে জননি ! ভারতবর্ষ !	... ৪৫১
সম্বোধিয়া দূতগণে জিজ্ঞাসিলা ঘোরী,	... ৩৭৯
সুরাসুর যক্ষ রক্ষ ভুজঙ্গ কিন্নর ।	... ৩৯৪
স্বদেশ আমার ! নাহি করি দরশন	... ৪৫০
স্বাগত বঙ্গ-মনীষি-সজ্জ ভূষিত অশেষ মানের হারে !	... ৪৬৫
হে আকাশ ! হে বিরাট ! হে মহান্ ! হে অনন্ত ব্যোম !	... ৪৫৫
হে নিস্তরু গিরিরাজ, অভ্রভেদী তোমার সঙ্গীত	... ৩৮১
হে বঙ্গ ! ভাণ্ডারে তব বিবিধ রতন ;—	... ৩৩৫

ଗଢ଼ାଂଶ

INTERMEDIATE BENGALI SELECTIONS

রাজা রামমোহন রায়

ধন্ত রামমোহন রায় ! যে সময়ে ভারতবর্ষ অন্ধকারে আচ্ছন্ন ছিল, বলিলে হয়, সেই সময়ে তোমার সতেজ বুদ্ধিজ্যোতিঃ যে ঘোরতর অজ্ঞানরূপ নিবিড় জলদ-রাশি বিদীর্ণ করিয়া এতদূর বিকীর্ণ হইয়াছিল এবং তৎসহকায়ে তোমার সুবিমল স্বচ্ছ চিত্ত যে নিজ দেশে ও নিজ সময়ে প্রচলিত সকল প্রকার কুসংস্কার নির্বাচন করিয়া পরিত্যাগ করিয়াছিল, ইহা সামান্য আশ্চর্য্য ও সামান্য সাধুবাদের বিষয় নয়। তখন তোমার জ্ঞান ও ধর্মোৎসাহে উৎসাহিত হৃদয় জঙ্গলময় পঙ্কিলভূমি-পরিবেষ্টিত একটা অগ্নিময় আগ্নেয়গিরি ছিল ; তাহা হইতে পুণ্য পবিত্র প্রচুর জ্ঞানান্নি সতেজে উৎস্কিপ্ত হইয়া চতুর্দিকে বিক্ষিপ্ত হইতে থাকিত। তুমি বিজ্ঞানের অনুকূল-পক্ষে যে সুগভীর রণবাণ্য বাদন করিয়া গিয়াছ, তাহাতে যেন এখনও আমাদের কর্ণকুহর ধ্বনিত করিতেছে। সেই অতুল্য গভীর তুর্ধ্যধ্বনি অত্থাপি বার বার প্রতিধ্বনিত হইয়া এই অযোগ্য দেশেও জয়-সাধন করিয়া আসিতেছে। তুমি

স্বদেশ ও বিদেশ-ব্যাপী ভ্রম ও কুসংস্কার সংহার-উদ্দেশ্যে আততায়ি-স্বরূপে রণ-হুন্দর বীর পুরুষের বিক্রম প্রকাশ করিয়াছ, এবং বিচার-যুদ্ধে সকল বিপক্ষ পরাণ্ড করিয়া নিঃসংশয়ে সম্যক্রূপে জয়ী হইয়াছ। তোমার উপাধি রাজা। জড়ময় ভূমিখণ্ড তোমার রাজ্য নয়। তুমি একটা সুবিস্তর মনোরাজ্য অধিকার করিয়া রাখিয়াছ। তোমার সমকালীন ও বিশেষতঃ উত্তরকালীন সুমার্জিত-বুদ্ধি শিক্ষিত সম্প্রদায়ে তোমাকে রাজ-মুকুট প্রদান করিয়া তোমার জয়ধ্বনি করিয়া আসিতেছে। ষাঁহারা আবহমান কাল হিন্দুজাতির মনোরাজ্যে নির্বিবাদে রাজত্ব করিয়া আসিয়াছেন, তুমি তাঁহাদিগকে * পরাজয় করিয়াছ। অতএব তুমি রাজার রাজা। তোমার জয়-পতাকা তাঁহাদেরই স্বাধিকার মধ্যে সেই যে উত্তোলিত হইয়াছে, আর পতিত হইল না, হইবেও না, নিয়তই একভাবেই উড্ডীয়মান রহিয়াছে। পূর্বে যে ভারতবর্ষীয়েরা তোমাকে পরম শত্রু বলিয়া জানিতেন, তদীয় সন্তানেরা অনেকেই এখন তোমাকে পরম বন্ধু বলিয়া বিশ্বাস করিতেছেন, তাহার সন্দেহ নাই। কেবল ভারতবর্ষীয়দের বন্ধু কেন, তুমি জগতের বন্ধু। †

এক দিকে জ্ঞান ও ধর্ম-ভূষণে ভূষিত করিয়া জন্মভূমিকে উজ্জ্বল করিবার যত্ন করিয়াছ, অপর দিকে সঙ্কটময় স্বগভীর সমুদ্রসমূহ উত্তরণপূর্বক বৃটিশ রাজ্যের রাজধানীতে উপস্থিত হইয়া নানা বিষয়ে

* প্রচলিত হিন্দুধর্ম-ব্যবস্থাপকদিগকে।

† “The promotion of human welfare and especially the improvement of his own countrymen, was the habit of his life.”
—Rev. Carpenter.

“An ardent well-wisher to the cause of freedom and improvement everywhere.”—Miss Lucy Aikin’s letter to Dr. Channing.

রাজশাসনপ্রণালীর সংশোধন ও শুভ-সাধনার্থ প্রাণপণে চেষ্টা পাইয়াছ। * সে সময়ের পক্ষে এ কি কাণ্ড ! কি ব্যাপার ! স্বাভাবিক শক্তির এতই মহিমা ! তুমি ইংলণ্ডে গিয়া অধিষ্ঠান করিলে, তথাকার সুপণ্ডিত সাধু লোকে তোমার অসাধারণ গুণগ্রাম দর্শনে বিস্ময়াপন্ন হইয়া যায়। তোমার সাক্ষাৎকার লাভ করিয়া, একবার তথাকার কোন সজ্জন-সমাজে

* স্বদেশের কল্যাণসাধন ও বিশেষতঃ ভারতবর্ষীয় রাজ্য-শাসন-প্রণালীর সংশোধনই রামমোহন রায়ের ইংলণ্ড গমনের প্রধান উদ্দেশ্য ছিল। প্রচলিত হিন্দুধর্ম-পক্ষপাতী ব্যক্তির সহমরণ-নিবারণ-বিষয়ক রাজনিয়মের প্রতিকূল পক্ষে ইংলণ্ডে আবেদনপত্র প্রেরণ করেন, সেই বিষয়ের সুবিচার-সম্পাদন-উদ্দেশ্যে, ও ইষ্ট ইণ্ডিয়া কোম্পানির চার্টার পরিবর্তন সময়ে তৎসংক্রান্ত বিচারে লিপ্ত হইয়া যদি ভারতবর্ষীয়দের হিতসাধন করিতে সমর্থ হন এই অভিপ্রায়ে, এবং বিশেষতঃ ইউরোপীয় বিভিন্ন জাতির আচার ব্যবহার ধর্মাদি বিষয়ের অনুসন্ধানার্থ তিনি ইংলণ্ডে গমন করেন। দিল্লীর বাদসাহ একটি মোকদ্দমার ভারার্ণণ করিয়া তাঁহাকে তথায় পাঠাইয়া দেন ; ইহাতেই তাঁহার মনোরণ পূরণের সুবিধা ও সত্বপায় ঘটিয়া উঠে। তিনি যত দিন তথায় অবস্থিতি করেন, তত দিনই ঐ সকল মহৎ ব্যাপার সাধনার্থই ব্যস্ত ও চিন্তিত ছিলেন। তিনি রাজস্ব ও বিচার প্রণালী-সংক্রান্ত অনেকগুলি প্রবন্ধ লিপিয়া বোর্ড অব্ কন্ট্রোল নামক রাজকীয় কার্যালয়ে অর্পণ করেন এবং সেই কার্যালয়ের অধ্যক্ষেরা হোস অব্ কমন্স নামক সভায় সেই সমস্ত পাঠাইয়া দেন। তন্মিত্ত তিনি রাজপুরুষদের অনুরোধক্রমে পার্লামেন্ট ভবনে নিজে বারংবার উপস্থিত হইয়া শাসন-প্রণালী-সংক্রান্ত আপন অভিপ্রায় প্রকাশ ও সংপরামর্শ প্রদান করেন এবং ভারতবর্ষীয় রাজকীয় ব্যাপারের গুণাগুণ বিচার ও উত্তরকালীন শাসন-পদ্ধতি-বিষয়ক নানাবিধ প্রস্তাব, যুক্তি ও পরামর্শ লিপিয়া বিভাগাদির নক্সা-সম্বলিত একখানি পুস্তক প্রস্তুত করেন। ঐ সমুদয় ব্যতিরেকে, হিন্দুদের দায়াদিকার ও ভারতবর্ষীয় বিচার-প্রণালী-সংক্রান্ত অগাধ পুস্তকও রচনা করেন।

চমৎকার-সম্বলিত এইরূপ একটী অপূৰ্ণ ভাবের আবির্ভাব হয়, যেন সাক্ষাৎ প্লেটো, সক্রেটিস্ বা নিউটন্ ধরণী-মণ্ডলে পুনরায় উপস্থিত হইলেন।* তুমি আপন সময়ের অতীত বস্তু। কেবল সময়েরই কেন? আপন দেশেরও অতীত। ভারতবর্ষ তোমার যোগ্য নিবাস নয়। এক ব্যক্তি বলিয়া গিয়াছেন, এরূপ দেশে এরূপ লোকের জন্ম-গ্রহণ অবনী-মণ্ডলে আর কখনও ঘটিয়াছিল বোধ হয় না।†

তিনি উল্লিখিত সমুদয় গ্রন্থ ও প্রবন্ধানির মধ্যে ভারতবর্ষীয় লোকের পদবৃদ্ধির জন্ত অনুরোধ ও ব্যাকুল চিন্তে কৃষিজীবীদের দুঃখ-হরণার্থ প্রার্থনা করেন।

সেই সময়ে পালিএমেণ্টে ভারতবর্ষের শাসন-সংক্রান্ত নূতন নিয়মাবলী প্রস্তাবিত হয়; তিনি তদর্থে এত চিন্তিত থাকিতেন যে, অনেকে স্বার্থ-সাধন বিষয়েও তত চিন্তিত থাকে কি না সন্দেহ।

তাহার ঐ পুস্তক ও প্রবন্ধগুলি অল্প উপকারী হয় নাই। বৃটিশ-রাজ-পুরুষেরা তাহার অভিপ্রায়ানুসারে ক্রমে ক্রমে অনেক কার্য করিয়াছেন ও তদ্বারা বিশেষ উপকারও দর্শিয়াছে তাহার সন্দেহ নাই।

“They” (Ram Mohun Roy's Communications to British Legislature) “show him to be at once the philosopher and the patriot. They are full of practical wisdom; and there is reason to believe that they were highly valued by our Government, and that they aided in the formation of the new system.”—Dr. Carpenter.

* “Monthly Repository” of June, 1831.

†. যে সময় গুরুপাঠশালায় শুভঙ্করী অঙ্ক ও কচিং পার্সী কারুদা (১) শিক্ষাবধি সর্বসাধারণ বিষয়ী লোকের বিদ্যাশিক্ষার চরম সীমা ছিল, সেই সময়ে যিনি পৃথিবীর প্রাচীন ও অপ্ৰাচীন বহুতর প্রধান প্রধান ভাষা প্রভৃতি দশ ভাষায়

(১) পার্সী ব্যাকরণ।

সহমরণ-নিবারণ, ব্রাহ্মধর্ম-সংস্থাপন, দেশীয় লোকের পদোন্নতি-সাধন ইত্যাদি তোমার কত জয়ন্তন্ত ও কীর্তিস্তন্ত জাজ্জল্যমান ও বিবিধ বিজ্ঞানে স্বীয় অধিকার বিস্তার করেন (২) ; যিনি ভিন্ন ভিন্ন নানা ভাষায় স্বদেশের কল্যাণকর বিবিধ পুস্তক প্রস্তুত করেন, আপনার দেশ ভাষায় রীতিমত গদ্য-গ্রন্থ-রচনার পথ প্রদর্শন করেন, সেই ভাষায় ব্যাকরণ-রচনাদি-দ্বারা তাহার শিক্ষা-প্রচলনের উপায়ানুষ্ঠান করেন (৩) এবং যেক্রপ শিক্ষায় লোকের বুদ্ধি মার্জিত ও কুসংস্কার বিনষ্ট হইয়া বিশুদ্ধ জ্ঞান-পথে প্রবৃত্তি জন্মে, ইংরাজী বিদ্যালয় সংস্থাপনাদি-দ্বারা স্বদেশে সেইরূপ শিক্ষা-প্রণালী প্রচলিত করিবার জন্ত যথোচিত চেষ্টা পান, যে সময়ে তাহার যোরতর অজ্ঞান ও অশেষ প্রকার কুসংস্কারে অন্ধ হইয়াছিল, সেই সময়ে যিনি আপনার বুদ্ধি, বিদ্যা ও তেজস্বিতা-প্রভাবে সমুদায় কুসংস্কার পরিত্যাগপূর্বক স্বদেশের আচার, ব্যবহার, ধর্মাদি সংশোধন করিতে কৃতসঙ্কল্প হন, ও সে বিষয়ে হুনিপুণ ও কৃতকার্য হইবার উদ্দেশ্যে স্থল-পথে ও সমুদ্র-পথে কত কত অতিদূর-স্থিত দুর্গম দেশ পরিভ্রমণ করিয়া নানা জাতির ধর্ম, কর্ম, রীতিনীতি প্রভৃতি বিবিধ বিষয়ের সবিশেষ অন্বেষণ করেন (৪) ; যিনি স্বদেশীয় স্ত্রীলোকের ব্যাধায় ব্যথিত ও কারুণ্য-রসে অভিবিজ্ঞ হইয়া তদীয় শিক্ষা-বিষয়ে সমুচিত যুক্তি প্রদর্শন ও নিতান্ত সামুকুল ভাব প্রকাশ করেন, বহুবিবাহ-রীতি ও বর্তমান দায়াদিকার বিষয়ক ব্যবস্থা

(২) “The wide field over which his acquirements spread comprising sciences and languages, which individual knowledge rarely associates together.”—W. J. Fox.

(৩) রামমোহন রায় বাঙ্গালা ভাষায় গোড়ীয় ব্যাকরণ ব্যতিরেকে খগোল ও জ্যাগ্রাহী নামে জ্যোতিষ ও ভূগোল বিদ্যা-বিষয়ক অপর দুইখানি শিক্ষা-পুস্তক প্রস্তুত করেন।

(৪) ভোট দেশে তিন বৎসর ও ইউরোপে সার্ব্ব দুই বৎসর অবস্থিতি করেন। সে সময়ে নানাবিধ দুর্গম দেশে পরিভ্রমণপূর্বক ভোট দেশ পর্য্যন্ত গমন করা সহজ ব্যাপার ছিল না।

রহিয়াছে। না জানি কি কল্যাণময়ী মহীয়সী কীর্তি-সংস্থাপন-উদ্দেশে অর্ধ-ভূমণ্ডল অতিক্রম করিতে * কৃতসংকল্প ও প্রতিজ্ঞারূঢ় হইয়াছিলে। তাদৃশ স্বদূরস্থিত ভূখণ্ড-বাসী সুপ্রতিষ্ঠিত সাধু লোকেও তোমার অসামান্য মহিমা জানিতে পারিয়া প্রত্যাগমন-পূর্বক তোমাকে সমাদর করিবার জন্ত অতিমাত্র ব্যগ্র ছিল। মনে মনে কতই শুভ সঙ্কল্প সঞ্চারিত ও কতই দয়াশ্রোত প্রবাহিত করিয়াছিলে। কিন্তু ভারতের কপাল মন্দ! সে সমুদয় কর্ম-

তাহাদের অশেষ ক্লেশের মূল ও অনেক অনর্থের কারণ বলিয়া প্রচার করেন, অসঙ্গত নিগ্রহ সহ্য করিয়াও প্রাণপণে সহমরণরূপ বিষময় প্রথা নিবারণ করেন এবং দেশময় এই জন-প্রবাদ প্রচলিত হয় যে, ইংলণ্ড হইতে প্রত্যাগমন করিয়া বিধবা-বিবাহ প্রচলনের উদ্যোগ পাইবেন এইরূপ ইচ্ছা ব্যক্ত করেন; যে সময়ে স্বদেশীয় লোকে সাধারণ হিতানুষ্ঠান-ধর্মের মর্ম-গ্রহণ করিতেই পারিত না, সেই সময়ে যিনি ঐ ধর্মটী আপনার চিরজীবনের একমাত্র নিত্যব্রত-স্বরূপ অবলম্বন করেন ও তাহাদের বিষম বিদ্বেষ ও ঘোরতর প্রতিকূলতা অতিক্রম করিয়া তাহাদেরই দুঃখ-হরণ, সুখ-বর্দ্ধন ও সর্বপ্রকার উন্নতি-সাধন করিতে নিরন্তর প্রতিজ্ঞারূঢ় থাকেন; কেবল স্বজাতির শুভান্বেষণ নয়, যিনি ভূমণ্ডলের অন্তান্ত প্রধান প্রধান ধর্ম-সংশোধন ও অশুভ দেশীয় লোকের হিতানুষ্ঠান-বিষয়েও উৎসাহ ও যত্ন প্রকাশ করেন; কেবল ধর্মাদির পরিবর্তন নয় যিনি স্বয়ং স্বাধীন দেশের অধিবাসী ও রাজপুরুষের মধ্যে পরিগণিত না হইলেও নিজের বুদ্ধি বিদ্যা ও ক্ষমতা প্রভাবে রাজ্যশাসন-প্রণালীর সংশোধন ও উন্নতি সাধন করিয়া স্বদেশীয় লোকের দুঃখহরণ ও জীবুদ্ধি সম্পাদনার্থ অতিশয় সাহসিকতা প্রদর্শনপূর্বক কার্যমনোবাক্যে চেষ্টা পান, অসাধারণ বুদ্ধি-গৌরব, রাজ-নীতিজ্ঞতা, অধ্যবসায় ও উপচিকীর্ষী প্রকাশপূর্বক ঐ সমস্ত অসামান্য বিষয়ে চিরজীবন অমুরক্ত থাকিয়া সে সময়েও আপনার জীবিত-কাল-মধ্যে যতদূর সম্ভব কৃতকার্য হন, এবং যিনি উল্লিখিত রূপ মহৎ ক্রিয়ানুষ্ঠান, সর্বহিতৈষিতা

* আমেরিকা গমন করিতে।

ক্ষেত্রে আসিয়া আবিস্কৃত হইল না। বৃস্টল!—বৃস্টল! * তুমি কি সর্বনাশই করিয়াছ! আমাদিগকে একেবারেই অনাথ ও অবসন্ন করিয়া রাখিয়াছ! যাহাতে অশেষরূপ অমৃত-স্বাদ ফল-রাশি উৎপন্নমান হইয়াছিল, সেই অলোকসামান্য বৃক্ষমূলে সাম্বাতিক কুঠার প্রহার করিয়াছ! সেই বিপদের দিন কি ভয়ঙ্কর দিনই গিয়াছে! আমাদের সেই দিনের মৃত্যুশৌচ অষ্টাপি চলিতেছে ও চিরকালই চলিবে! সেই দিন ভারত-রাজ্যের কল্যাণ-শিরে বজ্রাঘাত হইয়াছে! এদেশীয় নব্য সম্প্রদায়! সেই দিন তোমরা নিরাশ্রয় ও নিঃসহায় হইয়া রণজিৎ-শূত্র শিক্ সৈন্তের অবস্থায় পতিত হইয়াছ! দুঃখজীবী কৃষিজীবীগণ যে সময়ে তোমরা স্বদেশ ও বিদেশের জ্ঞাত অপর্যাপ্ত অন্ন প্রস্তুত করিয়াও নিজে স্বচ্ছন্দমনে ও নিরঞ্জনমনে অত্যাপকৃষ্ট তণ্ডুল-গ্রাসও গ্রহণ করিতে পাও নাই, সেই সময়ে সদাশয়তা শিষ্টাচার ও মিষ্টালাপগুণে সর্বোৎকৃষ্ট সুসভ্য জাতীয় বিশিষ্ট লোকের শ্রীতি-পাত্র ও ভক্তি-ভাজন হইয়া যান, তাঁহার সদৃশ উত্তরূপ অসাধারণ বহুতর গুণালঙ্কারে অলঙ্কৃত ব্যক্তি ভূমণ্ডলে এবং বিশেষতঃ এইরূপ অযোগ্য দেশে আর কখনও জন্মগ্রহণ করিয়াছেন এ প্রকার দেখিতে পাওয়া যায় না। একাধারে এরূপ অশেষ প্রকার অসামান্য-বিষয়িণী অলোক-সামান্য বুদ্ধি, ক্ষমতা ও হিতৈষিতার একত্র সংযোগ আর কখনও ঘটে নাই বোধ হয়।

“Strange is it that such a man should have been given by India to the world. * * * Strange it is—but he was not of India, so much as for India.”—Rev. W. J. Fox’s Sermon.

“Such an instance is probably unparalleled in the history of the world.”—Mary Carpenter.

* ইংলণ্ডের অন্তর্গত বৃস্টল নামক স্থানে রামমোহন রায়ের মৃত্যুও সমাধি হয়।

যিনি এই হুঃসহ হুঃখ-রাশি পরিহার করিয়া তোমাদের সন্তপ্ত হৃদয় শীতল করিবার জন্ত ব্যাকুল ছিলেন, এবং তজ্জন্ত বৃটিশ রাজ্যের রাজধানীতে অধিষ্ঠানপূর্বক তোমাদের অজ্ঞাতসারে প্রত্যেক রাজপুরুষের নিকট স্বহস্তে লিখিয়া বিশেষরূপ কাতরতা প্রকাশ করেন,* সেই দিনে তোমরা সেই করুণাময় আশ্রয়ভূমির আশ্রয়লাভে চিরদিনের মত বঞ্চিত হইয়াছ! ভারতবর্ষীয় চির-নিগ্রহ-ভাজন অবলাগণ! তোমাদের অশেষরূপ হুঃখ-বিমোচন ও বিশেষরূপ উন্নতি-সাধন যাহার অন্তঃকরণের একটি প্রধান সঙ্কল্প ছিল, এবং যে হৃদয়-বিদীর্ণ-কারী ব্যাপার স্মরণ হইলে শরীরের শোণিত শুষ্ক হইয়া হৃৎকম্প উপস্থিত হয়, যিনি নিতান্ত অযাচিত ও অশেষরূপ নিগৃহীত হইয়াও তোমাদের সেই নিদারুণ আত্মঘাত-ব্যবস্থা + ও তন্নিবন্ধন স্বজনবর্গের শোক-সন্তাপ, আর্তনাদ ও অশ্রুবর্ষণ সমস্তই নিবারণপূর্বক ভারতমণ্ডলের মাতৃহীন অনাথ বালকের সংখ্যা হ্রাস করিয়া যান, সেই দিনে তোমরা সেই দয়াময় পরম বন্ধুকে হারা হইয়াছ। বিবিধ পীড়ায় প্রপীড়িত জননী ভারত-ভূমি! যে আশা নরলোকের জীবন-স্বরূপ সেই দিন তোমার সেই আশাবল্লী বুঝি নিমূল হইয়াছে!

পূর্বতন শোক-সংবাদ নবীভূত হইয়া উঠিল! অশ্রুধারা-নিবারণে একেবারেই অসমর্থ হইয়া পড়িতেছি। এ সময়ে বিষয়াস্তর স্মরণ করিয়া উহা বিস্মৃত হওয়া আবশ্যক। একটি প্রবোধের বিষয়ও আছে। আমাদের রাজা একেবারে নির্ঝাঁপ হইবার বস্তু নন।

* Appendix to the Report from the Select Committee of the House of Commons on the affairs of the East India Company, published in 1831.

+ সহস্রগণ-প্রথা

তিনি ভূ-লোক হইতে অন্তর্হিত হইয়াছেন তথাচ চিরাবলম্বিত হিত-ব্রত উদ্বাপন করিয়া যান নাই। তদীয় সমাধি-ক্ষেত্র হইতে কতবার কত পরম শ্রদ্ধেয় সুপবিত্র মহানাদ বিনির্গত ও প্রতিধ্বনিত হইয়া কতই হিতোৎসাহ-উদ্দীপন ও কতই শুভ সঙ্কল্প-সম্পাদন করিয়া আসিয়াছে! অতএব তিনি প্রাণত্যাগ করিয়াও আমাদের পরিচয় করেন নাই; জীবৎ-কালের সদভিপ্রায়-বলে ও নিজ চরিতের দৃষ্টান্ত-প্রভাবে মৃত্যুর পরেও উপকার-সাধন ও উপদেশ-প্রদানপূর্বক আমাদের ভক্তি ও কৃতজ্ঞতা-ভাজন হইয়া রহিয়াছেন। কেবল আমাদের নয়, ইয়ুরোপ ও অমেরিকাও ভক্তিশ্রদ্ধা-সহকারে তাঁহাকে চিরস্মরণীয় করিয়া রাখিয়াছে। *

অক্ষয়কুমার দত্ত।

* “ ‘ Being dead, he yet speaketh’ with a voice to which not only India but Europe and America will listen for generations.” —Fox’s Sermon.

“ ‘ Though dead, he yet speaketh ;’ and the voice will be heard impressively from the tomb, which in his life, may have excited only the passing emotions of admiration or respect.”—Dr. Carpenter’s Sermon.

স্বপ্ন-দর্শন,—হ্রায়-বিষয়ক

আমি বৃন্দাবন, কুরুক্ষেত্র, হরিদ্বার, কনখল প্রভৃতি পশ্চিমোত্তর-প্রদেশীয় বহুতর স্থান পর্য্যটন করিয়া, শীত-ঋতুর উপক্রমেই বিদ্যাচলে আসিয়া উপস্থিত হইয়াছি। এ প্রদেশে শীতের অত্যন্ত প্রাচুর্য্য। প্রাতঃকালে চতুর্দিক্ মেঘাবৃতবৎ ঘনতর কুস্মাটিকাতে আচ্ছন্ন থাকে ; অতি শীতল পশ্চিম-বায়ু প্রবাহিত হইয়া কলেবর কম্পমান করে ও বৃক্ষপত্রের শিশির-বিন্দু-সমুদায় ঝরঝর শব্দে পতিত হইয়া, তলস্থ ভূমিকে অল্প অল্প আর্দ্র করিতে থাকে। সূর্য্য-বিশ্ব সর্ব্বদা স্নানমুর্ত্তি ; গগন-মণ্ডলে বহু দূর উজ্জ্বল হইলেও নীহার-প্রভাবে চন্দ্র-বিশ্বের হ্রায় অতি মৃদুভাবে প্রকাশ পায়, এবং মধ্যাহ্ন-কালেও তদীয় কিরণ-জাল পরম-সুখ-সেব্য বলিয়া অনুভূত হয়। সায়াংকালে ও রজনীতে গৃহের বহির্ভূত হওয়া, অত্যন্ত দুষ্কর ; তৎকালে দ্বাররোধ করিয়া অগ্নিসেবন করাই পরম প্রীতিকর বোধ হয়। গত দিবস যামিনী-যোগে যোগমায়ার মন্দিরের সমীপবর্ত্তী গৃহে কতকগুলি উদাসীনের সহিত একত্র উপবেশনপূর্ব্বক অগ্নি-সেবন ও পরস্পর কথোপকথনে মহাস্নাত্রে কালযাপন করিতেছিলাম। আমার বামপার্শ্বে এক বিমর্ষ-ভাবাপন্ন মৃদু-ভাষী তরুণ-বয়স্ক সন্ন্যাসী উপবিষ্ট ছিলেন ; কথা-প্রসঙ্গে তাঁহার পরিচয় জিজ্ঞাসা করিয়া অবগত হইলাম, তিনি বাঙ্গালাদেশীয় এক ব্রাহ্মণের পুত্র। তাঁহার পিতার পরলোক-যাত্রার পরে তাঁহার পিতৃব্য-পুত্রেরা প্রতারণা করিয়া, তাঁহাকে পৈতৃক বিষয়ে বঞ্চিত করিয়াছে। তিনি অতি নির্ব্বিরোধ মনুষ্য ; বিবাদ-বিসংবাদে কোন ক্রমে প্রবৃত্ত হইতে

চাহেন না ; তথাপি আত্মীয়-স্বজনের পরামর্শক্রমে রাজদ্বারেও ইহার প্রতীকার চেষ্টা করিয়াছিলেন ; কিন্তু প্রতিপক্ষের সহায়-সম্পত্তি-বল অধিক ছিল, একারণ কৃতকার্য্য হইতে পারেন নাই ; অবশেষে মনোহুংখে সংসার-বিরক্ত হইয়া সন্ন্যাসাশ্রম গ্রহণ করিয়াছেন ।

তাঁহার বাক্যাবসান না হইতেই আমার সম্মুখবর্ত্তী আর এক সুশীল শাস্ত্র-স্বভাব ধর্ম্মপরায়ণ উদাসীন, “হা নারায়ণ !” বলিয়া দীর্ঘনিশ্বাস-পরিত্যাগ-পূর্ব্বক কহিলেন,—“ভাই ! তোমার দারুণ হুঃখের কথা শুনিয়া, আমি মহা-খেদান্বিত হইলাম ; এক্ষণে আমার দুর্দ্দশার বিষয় কিছু শ্রবণ কর । আমি কোন রাজ-সংক্রান্ত সম্ভ্রান্ত পদে নিযুক্ত ছিলাম এবং নির্ঝিল্লি কর্ম্ম নির্বাহ করিয়া, যশোভাজন হইয়াছিলাম ; ইতিমধ্যে আমার উপরিতন অধ্যক্ষের মৃত্যু-ঘটনা হইলে, অত্র এক ব্যক্তি তৎপদে অভিষিক্ত হইলেন । প্রথমাবধি তাঁহার আচরণ দেখিয়া বোধ হইল, রাজ-কোষের সর্ব্বস্ব হরণ-সঙ্কল্প করিয়াই তিনি এ কর্ম্ম গ্রহণ করিয়াছেন । আমাকে তাঁহার অল্পগামী করিবার নিমিত্ত বিস্তর কৌশল করিলেন ; কিন্তু কোন ক্রমেই মানস পূর্ণ করিতে না পারিয়া, অবশেষে আমাকে পদ-চ্যুত করিবার নিমিত্ত চেষ্টা করিতে লাগিলেন এবং ক্রমাগত তিন বৎসর শঠতা, মিথ্যাকথন ও নানাপ্রকার প্রতারণার অল্পষ্ঠান-দ্বারা চরিতার্থ হইয়া আপনার কোন প্রিয়-পাত্রকে আমার পদে নিযুক্ত করিলেন । প্রধান প্রধান রাজপুরুষেরা অনেকেই তাঁহার দুষ্ট ব্যবহার ও আমার নির্দোষ চরিত্র জ্ঞাত ছিলেন ; কিন্তু তাঁহারা কেহই মনোযোগ করিলেন না । এ সকল বিষয়ের যেরূপ চরম ফলাফল দেখিয়া,

আসিতেছি, তাহাতে আমার নিশ্চয় বোধ হইল, ইহার প্রতীকার করা এক প্রকার অসাধ্য। অতএব নিতান্ত অল্পপায় ভাবিয়া সংসারাশ্রমে দিক্কার দিয়া, এই পথের পথিক হইয়াছি।

এই সমুদায় শোচনীয় ব্যাপার শ্রবণ করিয়া, আমি বিষাদ-সমুদ্রে মগ্ন হইলাম এবং দয়া, ক্ষোভ ও ক্রোধ পর্যায়ক্রমে আমার অন্তঃকরণকে ব্যাকুলিত করিতে লাগিল। সাংসারিক লোকের এই সকল অত্যাচারণ ভাবিতে ভাবিতে, সে রজনীতে আমার সুন্দররূপ নিদ্রা হইল না; কারণ, চিন্তাকুল-চিন্তে সুচারু সুযুপ্তি-সমাগম সম্ভব নয়। পরে রাত্রিশেষে কিঞ্চিৎ নিদ্রাকর্ষণ হইতেই আমি কি অপূর্ব ব্যাপার সকলই দর্শন করিলাম! সে সমুদায় আমার এরূপ হৃদয়ঙ্গম হইয়া রহিয়াছে যে, স্বপ্ন কি বাস্তবিক, সহসা অনুভব করা যায় না। আমি জন-সমাজের যে প্রকার বিপর্যয় দেখিয়াছি, তাহা সবিশেষ বর্ণনা করা দুঃসাধ্য। তবে তাহার স্থূল তাৎপর্য ও স্বদেশসম্বন্ধীয় যৎকিঞ্চিৎ যাহা দৃষ্টি করিয়াছি, তাহাই যথার্থবৎ বর্ণন করি। কিন্তু স্বপ্নের সর্বাংশে সম্পূর্ণ সামঞ্জস্য না থাকিলেও না থাকিতে পারে।

আমার বোধ হইল, যেন কোন তিমিরাবৃত রজনীতে ভ্রমণ করিতে করিতে, অকস্মাৎ আকাশ-মণ্ডলের পশ্চিমাংশ দাব-দাহ-তুল্য অসামান্য জ্যোতিঃপূর্ণ দেখিয়া, সাতিশয় বিস্ময়াপন্ন হইলাম। সেই আশ্চর্য্য তেজোরাশি দ্রুতবেগে অধোদিকে আগমন করিতে লাগিল। অনুভব হইল, যেন সূর্য্য-মণ্ডল কোন অনির্দেশ্য অনির্বচনীয় কারণবশতঃ স্থান-ভ্রষ্ট হইয়া, পতিত হইতেছে। কিঞ্চিৎ সমীপস্থ হইলে, তাহার অভ্যন্তরে এক পুরুষচ্ছায়া প্রত্যক্ষবৎ আভাসমান হইল। তাহার কিছুকাল পরে, স্পষ্ট

দেখিলাম—শুভ্রকাস্তি, শুভ্রমালাদি-বিশিষ্ট শুভ্রালঙ্কার-ভূষিত কোন তেজঃপুঞ্জ পুরুষ এক মণিময় দণ্ডহস্তে * পৃথিবীতে অবতরণ করিতেছেন। সেই দণ্ডের শিরোভাগে ‘শ্রায়’ এই অক্ষরদ্বয় অঙ্কিত ছিল এবং দিবসে যেমন বিদ্যুৎ প্রকাশ পায়, সেই তেজোমণ্ডল-মধ্যে শ্রায়-দণ্ডের প্রভা সেইরূপ প্রকাশ পাইতে লাগিল। ফলতঃ সেই পুরুষের সমস্ত লক্ষণ দৃষ্টি করিয়া, আমার নিশ্চয় প্রতীতি হইল, ইনি ধর্ম্ম-পুরুষ; শ্রায়দণ্ড হস্তে করিয়া ভূ-লোক শাসনার্থ আগমন করিতেছেন। অনেকেই তাঁহার প্রথর প্রভা সহ্য করিতে না পারিয়া, ভীত-চিত্ত হইল; আর গিনি সহিষ্ণুতা-প্রভাবে তাঁহাকে স্তম্ভরূপ নিরীক্ষণ করিতে পারিলেন, তাঁহার নিকটে তিনি পরম রমণীয় রূপে প্রকাশিত হইলেন। এক কাণেই তিনি ভয়ঙ্কর জ্রাভঙ্গি-দ্বারা কাহাকেও ভয়ে কম্পমান করিলেন, কাহাকেও বা প্রসন্ন-বদনে স্তম্ভুর-হাস্ত-প্রকাশ-দ্বারা পরমানন্দ-নীরে নিমগ্ন করিতে লাগিলেন। যখন তিনি ভূ-মণ্ডলের সমীপবর্তী হইয়া, মনুষ্যের দৃষ্টিপথের অন্তর্গত হইলেন, তখন চতুর্দিকে কতকগুলি মেঘাবলি বিস্তার-দ্বারা আপনার মহামহিমাম্বিত জ্যোতিঃপূর্ণ মূর্ত্তি আবৃত করিয়া, তৎপরিবেশ-স্বরূপ আলোক-ঘটা নানাবর্ণভূষিত ও সর্বলোকের সুখ-দৃশ্য করিয়া, বিকীর্ণ করিলেন। ইতিমধ্যে যাবতীয় লোক বিশ্বয়াপন্ন ও শঙ্কাকুল হইয়া, এক বিস্তীর্ণ প্রান্তরে সমাগত হইল। বোধ হইল, যেন সমুদায় মনুষ্য একত্র উপস্থিত হইয়াছে। অকস্মাৎ “সত্যের জয়! সত্যের জয়!” বলিয়া ঘন ঘন আকাশ-বাণী হইতে লাগিল। পরে সেই মহামহিমাম্বিত পুরুষ মেঘাভ্যন্তর হইতে

* পুরাণে ধর্ম্মের এইরূপ মূর্ত্তি আছে।

কহিতে লাগিলেন,—“মানবগণ ! রাজ্যের অবিচার-নিবারণার্থে আমার আগমন হইয়াছে ; তোমরা আপন আপন প্রাপ্য বিষয় প্রাপ্ত্যর্থ প্রস্তুত হও ।” এই আকস্মিক দৈবধ্বনি শ্রবণ করিয়া, জন-সমাজ ভয়, আশা, হর্ষ ও খেদে যে প্রকার বিচলিত হইল, তাহা বর্ণন করা যায় না ।

তদনন্তর ধর্ম অন্বেষিত করিলেন,—“প্রথমতঃ বিষয়াধিকারের বিষয় সমাধা করিতে প্রবৃত্ত হইলাম । যে ধনে বাহার স্বত্ব আছে, তিনি তাহা এই দণ্ডেই প্রাপ্ত হইবেন । অতএব বাহার যত লেখ্যপত্র আছে, সমস্ত উপস্থিত কর ।” ইহা শুনিয়া যাবতীয় লোক স্ব স্ব স্বত্বাধিকার সপ্রমাণ করিবার নিমিত্ত বিবিধ-প্রকার লেখ্যপত্র, আহরণ করিলেন । কি আশ্চর্য্য ! তাহাদের উপর শ্রায়দণ্ডের জ্যোতিঃ পতিত হইবামাত্র, তাহাদের বথার্থ তত্ত্ব প্রকাশিত হইল সেই দণ্ডের এ প্রকার আশ্চর্য্য গুণ যে, তদীয় কিরণ-স্পর্শমাত্র যাবতীয় কৃত্রিম পত্র দগ্ধ হইয়া গেল । দহমান পত্রের প্রজ্জ্বলিত অগ্নি, সমুদায় লাক্ষাদ্রব ও অনর্গল ধূমোদগম-দ্বারা সে স্থান অতি ভয়ানক ও পরম বিষ্ময়কর হইয়া উঠিল । কোন কোন পত্রের দুই চারি পঙ্ক্তি ও কোন কোন পত্রের কেবল কতিপয় প্রেক্ষিপ্ত অক্ষর নষ্ট হইয়া, তাহার অগ্নি নির্ঝগ হইয়া গেল । কিন্তু শত শত মুদ্রার ষ্ট্যাম্পপত্র সকল দাবানল-দগ্ধ মহারণ্যের শ্রায় ভস্মীভূত হইয়া, পরিত্যক্ত হইল । সেই লক্ষ-লক্ষ-মণিময় দণ্ডের জ্যোতিঃ কত কত পরম গুহ্য স্থানে প্রবিষ্ট হইয়া, অলক্ষিত, অপহৃত ও সংগোপিত লেখ্য-পত্র প্রকাশ করিয়া ফেলিল । ইতিমধ্যে আর এক অদ্ভুত ব্যাপার দর্শন করিলাম । প্রধান প্রধান বিচারাঙ্গারের সহস্র সহস্র অনুজ্ঞা-পত্র দগ্ধ হইল, ইনসালবেন্ট কোর্টের শ্রায় সমস্ত নিষ্কৃতি-পত্র

ভস্মীভূত হইয়া গেল, ও যে সকল সজ্জমশালী ভাগ্যবান ব্যক্তি তাহার আশ্রয় গ্রহণ করিয়া, নির্মুক্ত পুরুষের শ্রায় বিহার ও ব্যবহার করিতেছিলেন, তাঁহারা তৎক্ষণাৎ বন্দী হইয়া, দণ্ডায়মান হইলেন। ইতিমধ্যে উৎকোচ, অপহরণ, প্রতারণা ও বলপ্রয়োগ-দ্বারা যাবতীয় ধন উপার্জিত হইয়াছিল, তৎসমুদায় পর্কত-প্রমাণ রাশীকৃত হইয়া মেঘমণ্ডল স্পর্শ করিল। তখন ধর্ম্মপুরুষ ঘোষণা করিয়া দিলেন—
“এই ধনরাশি হইতে যাহার যত শ্রায় ধন আছে, গ্রহণ কর।”

উহাতে লোক-সমাজের কি বিষয় বিপর্যায় ঘটয়া উঠিল! সহস্র সহস্র ব্যক্তি অপূর্ব-বেশভূষণ ধারণপূর্বক পরম-রমণীয় রথারোহণ করিয়া, মহাবেগে গমন করিতেছিলেন, তাঁহারা তৎক্ষণাৎ অবতরণ-পুরঃসর গাত্র হইতে সমস্ত বস্ত্রাভরণ উন্মোচন করিয়া, এক সামান্য বসন পরিধান-পূর্বক পদব্রজে চলিলেন। কোন স্থানে দেখিলাম, লক্ষপতি বা কোটিপতি ধনাঢ্য ব্যক্তি পরমশোভাকর অট্টালিকায় বহুমূল্য অতুল্য আসনে উপবিষ্ট হইয়া, বন্ধু-বান্ধব-দিগের সহিত আমোদ-প্রমোদে পরমসুখে কাল-হরণ করিতেছিলেন, ইতিমধ্যে একজন সামান্য গৃহস্থ অকস্মাৎ উপস্থিত হইয়া, তাঁহাকে আসনচ্যুত করিয়া দিল, এবং তিনি তৎক্ষণাৎ তথা হইতে নির্গত হইয়া, অতি পুরাতন বৃক্ষ-মূল-বিদ্ধ ভগ্ন গৃহে গিয়া বাস করিলেন। কুত্রচ দৃষ্টি করিলাম, যে সকল ধনাসক্ত, মহামাত্র মনুষ্য সমধিক ধনাগম করিয়া, অতি উদার-ভাবে ব্যয় ব্যসন করিয়া আসিতে-ছিলেন, ও অতিশয় আড়ম্বর-সহকারে নিত্য-নৈমিত্তিক ক্রিয়াকলাপ সম্পন্ন করিয়া বিপুল কীর্ত্তি-লাভ করিতেছিলেন, সহসা তাঁহাদের সামান্যরূপ উদরান্ন আহরণ করাও কঠিন হইল এবং কতকগুলি

নিরন্ন-নির্ব্বিষয় ব্যক্তি আসিয়া, তাঁহাদের সমুদায় সম্পত্তি বিভাগ করিয়া লইল। তন্নিম্ন ধনাধিকার-বিষয়ে যে সকল অল্প অল্প পরিবর্তন হইল, তাহার বিবরণ করিয়া শেষ করা যায় না। জাগরিত হইয়া যাহা দেখিতেছি, তখন তাহার বিস্তর অশ্রুতাব্য দৃষ্টি করিয়াছিলাম।

এবস্থত অদ্ভুত কাণ্ড সমুদায় অবলোকন করিয়া, বিশ্বয়-সাগরে মগ্ন হইতেছিলাম, ইতিমধ্যে অপর এক পরম কোতূহল-জনক অত্যাশ্চর্য্য মহোপকারী ব্যাপার উপস্থিত হইল। ধর্ম্মপুরুষ মেঘান্তরে অবস্থান পূর্ব্বক পূর্ব্বোক্ত তাবৎ কার্য্য সমাধা করিয়া, আদেশ করিলেন,—“অবনী-মণ্ডলে কেহ অশ্রায় মানসম্মত লাভে সমর্থ হইবে না, অত্যাধি সকলেই নিজ নিজ গুণানুসারে পদ প্রাপ্ত হইবে।” এই অতুল হিতকর অনুমতি শ্রবণ করিয়া, লোক সকল যৎপরোনাস্তি উৎকণ্ঠা-পর্য্যাকুল হইল। রূপবান্, বলবান্ ও ধনবান্ মনুষ্যেরা সর্বাগ্রে ধর্ম্মদেবের সম্মুখবর্ত্তী হইয়া দণ্ডায়মান হইয়াছিলেন; কিন্তু তাঁহার শ্রায়-দণ্ড-জ্যোতিঃ সহ্য করিতে না পারিয়া, অবিলম্বে পরাস্থ হইলেন। তিনি কেবল তাঁহার সর্ব্বগুণময় শ্রায়-দণ্ডের কিরণ বিকীর্ণ করিয়া, সকলকে পরীক্ষা করিতে লাগিলেন। উহাতে যাহাদের বিশিষ্টরূপ ধর্ম্ম, বিদ্যা বা বিষয়-বুদ্ধি আছে, তন্নিম্ন আর তাবতেই দণ্ড-জ্যোতিঃ দর্শনমাত্র বিমুখ ও শঙ্কাতুর হইয়া রহিলেন। সেই সকল মহাত্মারা পর্য্যায়ক্রমে তিন শ্রেণীতে বিভক্ত হইয়া দণ্ডায়মান হইলেন। পরম হিতৈষী পুণ্যবান্ লোকেরা প্রথম শ্রেণীতে, বিদ্যাবান্ লোকেরা দ্বিতীয় শ্রেণীতে ও বিষয়-নিপুণ ব্যক্তি সকল তৃতীয় শ্রেণীতে নিবিষ্ট হইলেন। প্রথম শ্রেণীর শোভা দেখিয়া

মন মোহিত হইল। তাঁহাদের কি প্রফুল্ল বদন, করুণ নয়ন ও সুমধুর বচন! কি সৌজত্ব, কি কারুণ্য-স্বভাব! তাঁহাদিগের পরম পবিত্র জ্যোতিঃ-পূর্ণ মুখশ্রী অবলোকন করিলে, অন্তঃকরণ প্রেমাম্বত-রসে আর্দ্র হইতে থাকে। কতকগুলি হীন-জাতীয় এবং অজ্ঞাত-কুলশীল মনুষ্যকেও এই শ্রেণীভুক্ত দেখিয়া বিস্ময়াপন্ন হইলাম। জাগ্রৎকালে যাহাদের অঙ্গ স্পর্শ করিয়া, আপনাকে অণুচি বোধ করিয়াছিলাম, তখন দেখিলাম, তাহারা কত শত সদ্বংশজ ভদ্র-সন্তানের অপেক্ষা উৎকৃষ্ট পদ লাভ করিয়াছে, এবং যাহাদিগকে পরম তপস্বী ঋষিতুল্য বোধ করিতাম তাঁহারা এই শ্রেণীতে যৎকিঞ্চিৎ স্থানও প্রাপ্ত হইলেন না। কত কত দীর্ঘ-পুণ্ড্রধারী দান্তিক ব্রাহ্মণপণ্ডিত ও প্রধান প্রধান বিদ্যালয়ের শত শত আত্মাভিমानी বহুভাবী ছাত্র, এই শ্রেণীতে ভুক্ত হইবার নিমিত্ত বিস্তর বাগ্বিতণ্ডা করিলেন। অবশেষে যখন দর্পহারী ধর্মপুরুষ তাঁহাদের মুখমণ্ডলোপরি শ্রায়-দণ্ড চালনা করিয়া, তদীয় প্রচণ্ড জ্যোতিঃ বিস্তীর্ণ করিলেন, তখন তাঁহারা তাহা সহ করিতে না পারিয়া লজ্জায় অধোমুখ হইয়া, তথা হইতে নিজ্রাস্ত হইলেন।

দ্বিতীয় শ্রেণীর সংস্থাপনের সময় বিধম বিবাদ উপস্থিত হইল। যত লোক সে শ্রেণীর অধিকারী, সকলেই নিজ নিজ গুণাপেক্ষা উৎকৃষ্ট পদ প্রাপ্তির নিমিত্ত সাতিশয় ব্যগ্র হইলেন। তাঁহাদিগের এইরূপ অবিহিত অলুচিত জিগীষা দেখিয়া ধর্মপুরুষ দণ্ডহস্তে স্বয়ং অগ্রসর হইয়া, সকলের স্ব স্ব গুণোচিত সন্মান প্রদান করিলেন এবং সর্বোত্তম ধী-শক্তি-সম্পন্ন ব্যক্তিসমুদায়কে সর্বোত্তম স্থাপিত করিলেন। যাহাদের তাদৃশ স্বকীয় শক্তি নাই, যাহারা কেবল

পরিচিতি গ্রন্থ-পাঠ-দ্বারা বিজ্ঞাবিষয়ে পারদর্শী হইয়াছে, তাহা-
 দিগকে তৎপরে স্থাপিত করিলেন। যাহাদিগের অনেকানেক
 গ্রন্থ পাঠ হইয়াছে, কিন্তু তাদৃশ বিচারশক্তি নাই, তাহারা
 সর্বশেষে থাকিল। এইরূপে আধুনিক যুগের প্রত্যেক বিজ্ঞাবান্
 ব্যক্তি ইহার কোন না কোন স্থানে নিবিষ্ট হইলেন, ফলতঃ কি
 বিপর্যয়ই দেখিলাম। যাহাদের বিজ্ঞাবিষয়ে বিলক্ষণ খ্যাতি আছে,
 তন্মধ্যেও অনেকানেক ব্যক্তি অধম স্থানে সংস্থাপিত
 হইলেন। কতকগুলি বাঙ্গালা-গ্রন্থকর্তা এই শ্রেণী-ভুক্ত
 হইয়া লগ্নায়মান হইয়াছিলেন; কিন্তু আক্ষেপের কথা
 কি কহিব, ধর্ম্মপুরুষ তাঁহাদিগকে নিতান্ত অনধিকারী
 বিবেচনা করিয়া, তথা হইতে বহিষ্কৃত করিয়া দিলেন। সে
 শ্রেণীতে কোন স্থানে তাঁহাদের স্থান হইল না। তাঁহাদের এই
 দারুণ ছরবস্থা দর্শন করিয়া, আমার অন্তঃকরণ হঃসহ হঃখ-তাপে
 তাপিত হইতে লাগিল। ভাবিলাম, এই সকল অবোধ মনুষ্য যে
 বিষয়ে যশঃ-সৌরভ লাভের বাসনা করে, অধিকারী না হইয়া,
 তাহাতে কেন প্রবৃত্ত হয়? তবে প্রবোধের বিষয় এই যে, তিনি
 তাহাদিগকে শ্রেণী-বহির্ভূত করিয়া কহিলেন,—“তোমরা প্রতিপত্তি-
 লাভ ও স্বদেশোপকারের উৎকৃষ্ট পথ অবলম্বন করিয়াছ। স্বদেশীয়
 ভাবার অনুশীলন ব্যতিরেকে কখন কোন দেশে জ্ঞানের প্রচার ও
 প্রাচুর্য্য হইতে পারে না। তোমরা কিছুকাল পঠদশায় থাক,
 পরে মনোরথ পূর্ণ হইলেও হইতে পারে। তোমরা যে সকল
 প্রস্তাব লিখিয়া থাক, তাহার পূর্বাপর ঐক্য থাকে না, ভাষের
 প্রগাঢ়তা থাকে না এবং রচনাও পরিপাটি-শুদ্ধ হয় না, বিশেষতঃ
 যিনি যে বিষয় রচনা করেন, তিনি তাহা নিয়মিতরূপে শিক্ষা ও

তদ্বিষয়ে সবিশেষ তত্ত্বানুসন্ধান না করিয়াই তাহাতে প্রবৃত্ত হইল। আর অনেকে যৎকুৎসিত অল্পপ্রাসের অল্পরোধে তাৎপর্যের ব্যাঘাত করেন। ইত্যাকার সমস্ত দোষ সংশোধন-পূর্বক অভীষ্ট বিষয়ে পারদর্শী হইতে পারিলে, অবশ্য কৃতকার্য হইবে।” যাহারা ভাষান্তরে সামান্তরূপ কথোপকথন শিক্ষা করিয়া, বিভ্রাতিমান প্রকাশ করে, যাহাদের কোন বিজ্ঞান-শাস্ত্রে কিছুমাত্র ব্যুৎপত্তি হয় নাই, তাহাদের অপমান দেখিয়া, হৃদয় বিদীর্ণ হইতে লাগিল। তাহারা ধর্মপুরুষের বিস্তর সাধ্য-সাধনা করিয়া তথায় যৎকিঞ্চিৎ স্থান প্রাপ্ত হইল না। আর কতকগুলি ব্রাহ্মণপণ্ডিতের ছরবহার বিষয় কি বলিব ! তাহারা নিরুপবীত হীনজাতীয় শত শত ব্যক্তিকে আপনার অপেক্ষা উচ্চ পদাভিষিক্ত দেখিয়া, অতিশয় সন্তুষ্ট হইলেন। আহা ! কত কত গুরুদেব ঐ শ্রেণী হইতে বহিস্কৃত হইয়া, লজ্জায় অধোমুখ হইলেন, এবং তাঁহাদের শিষ্যেরা তাঁহাদের অপেক্ষা উৎকৃষ্ট স্থানে অবস্থিতি করিয়া, তাঁহাদের দারুণ হৃদশা দর্শন করিতে লাগিলেন।

এই শ্রেণীর লোক-সংস্থাপন সমাপ্ত হইলে, ধর্মপুরুষ বিষয়ী-দিগকে আহ্বান করিলেন। তাহা শুনিয়া, চতুর্স্পার্শ্ববর্তী প্রতাপাধ্বিত মানগর্ভিত শত শত ব্যক্তি সবিশেষ-উৎসাহ-সহকারে সদর্প পাদ-বিক্ষেপপূর্বক আগমন করিলেন। ধর্মদেব শ্রায়-দণ্ডের সুবিমল প্রভায় তাঁহাদের প্রকৃত স্বরূপ অবলোকন করিয়া কহিলেন,—“তোমরা এ বিষয়ে উপযুক্ত বটে ; তোমরা উত্তোগী, পরিশ্রমী ও কর্মদক্ষ ; তোমাদের বিলক্ষণ বিষয়জ্ঞান আছে, কিন্তু ধর্মরক্ষায় যত্ন নাই ; তোমরা স্বার্থ-পরবশ হইয়া, পরগীড়াদায়ক উৎকোচাদি গ্রহণ কর, এবং স্বীয় প্রভুর অপচয় কর। এ সকল

কুব্যবহার পরিত্যাগ না করিলে, কোন প্রকারে তোমাদের সম্মত-জনক পদলাভে অধিকার জন্মিবার সম্ভাবনা নাই।” এই কথা বলিয়া, তাহাদের মধ্যে শতকে এক বা দুই জনকে গ্রহণ করিয়া, অপরাপর সকলের আবেদন অগ্রাহ্য করিলেন। তদনন্তর তিনি সংসারের বিষয়কার্য্য-সম্পাদনার্থে পূর্বোক্ত দুই শ্রেণীর কতক লোককে আহ্বান করিয়া দেখিলেন, তাঁহাদের মধ্যে অনেকেই যেমন জ্ঞানসম্পন্ন ও ধর্ম্মশীল, বিষয়কার্য্যে সেরূপ অভিজ্ঞ ও অল্পরক্ত নহেন। তবে যে কয়জন ত্রি-গুণ-সম্পন্ন, সূতরাং তিন শ্রেণীতে উপযুক্ত ও পদগ্রহণে সম্মত ও অভিলাষী হইলেন, তাঁহাদিগকে অত্যুৎকৃষ্ট সম্ভ্রান্ত পদসমুদায় সমর্পণ করিলেন, এবং তৎক্ষণাৎ ঘোষণা করিয়া দিলেন, ভূ-মণ্ডলে ইহারাই সর্ব্বমাত্ত, পরম পূজ্য প্রধান মনুষ্য। তৎপরে অনেক ভাবিয়া চিন্তিয়া, যাহারা দুই গুণসম্পন্ন তাহাদিগকে তদপেক্ষা অপকৃষ্ট পদে স্থাপন করিলেন এবং অবশেষে যাহাদের কেবল বিষয়-কার্য্যে নৈপুণ্য আছে, তাহাদিগকে অতি অপকৃষ্ট ক্ষুদ্র ক্ষুদ্র পদে নিযুক্ত করিলেন, আর উৎকোচগ্রাহী পরপীড়ক পাপাত্ম্য অপহারী-দিগকে তথা হইতে বহিস্কৃত করিয়া দিলেন। তন্মধ্যে দেখিলাম, পূর্বে যাহারা রাজ-সংক্রান্ত উন্নত পদে নিযুক্ত ছিলেন, তাঁহাদের অনেকে এইরূপ মানচ্যুত ও তিরস্কৃত হইয়া, সে স্থান হইতে প্রস্থান করিলেন। পূর্বে তাঁহারা যাহাদিগকে মনুষ্য বলিয়া গণ্য করিতেন না, তাহারা পদস্থ হইয়া, তাঁহাদের এইরূপ বিষম হৃদশা দর্শন করিতে লাগিল। কতিপয় ইংরেজ-জাতীয় রাজকর্ম্মচারীর অপমানের কথা কি কহিব! তাঁহারা ক্রমাগত নানা হুঁচকরণ করিয়াও একাল পর্য্যন্ত কেবল সহায়-বলে ও বুদ্ধি-কৌশলে সমুদায় প্রচ্ছন্ন রাখিয়াছিলেন, এক্ষণে ধর্ম্মগুরুষের আয়রূপ

দণ্ডজ্যোতিঃ সহ করিতে না পারিয়া, লজ্জিত ও অপমানিত হইলেন, এবং কতিপয় বিচক্ষণ ব্যক্তি তাঁহাদের পদে অভিষিক্ত হইয়া যশস্বী হইতে লাগিলেন।

কিন্তু ইহাতেও বিস্তর মান্ত্য পদ শূন্য থাকিল দেখিয়া, ধর্ম্মপুরুষ প্রথম ও দ্বিতীয় শ্রেণীর কতকগুলি জ্ঞানবান্ শাস্ত্র-স্বভাব পরিশ্রম-বিমুখ ব্যক্তিকে যথোচিত সংবর্দ্ধনা করিয়া মৃদুভাবে মধুরস্বরে কহিতে লাগিলেন,—“তোমারা বিদ্যাবান্ ও ধর্ম্মশীল বটে ; কিন্তু এ প্রকার গুণসম্পন্ন হইয়া, আলস্যের বশীভূত থাকা উচিত নয়। কতকগুলি পুস্তক-সমভিব্যাহারে বিরলে কাল যাপনার্থে বিদ্যার সৃষ্টি হয় নাই, এবং সংসারের শুভাশুভ তাবৎ বিষয়ে উপেক্ষা করিয়া, অল্পসাহে কালক্ষেপণ করাও ধর্ম্মের উদ্দেশ্য নয়। ভূ-মণ্ডলে জন্মগ্রহণ করিয়া, যদি সংসারের কার্য্যই না করিলে, তবে জীবন ধারণের ফল কি ? অজিজ্ঞিত বিদ্যাকে যদি জগতের উপকারার্থে নিয়োগ না করিলে, তবে সে বিদ্যার প্রয়োজন কি ? যদি সকলেই তোমাদের শ্রায় বৃথা কাল হরণ করে, তবে এক দিবসেই লোক-যাত্রার উচ্ছেদ-দশা উপস্থিত হয়। তোমরা বলিয়া থাক, আমরা আকাশ্কার হস্ত হইতে উত্তীর্ণ হইয়া, সম্ভাব্য অবলম্বন করিয়াছি ; কিন্তু তোমাদের যে প্রকার হীন অবস্থা দেখিতেছি, তাহাতে এরূপ নিশ্চেষ্ট থাকা উচিত নয়। তোমরা কোনক্রমে প্রাণ ধারণ করিয়া রহিয়াছ ; সমুচিত অন্ন-বস্ত্রাদি আহরণেও সমর্থ নহ। যথেষ্ট উপাদেয় অন্ন, স্বচ্ছন্দ-পরিধেয় পবিত্র বস্ত্র, প্রশস্ত পরিষ্কৃত বাটী এবং অত্যন্ত আবশ্যক দ্রব্যভাবে তোমাদের পরিবারেরা ক্লিষ্ট ও পীড়িত হইয়া অশেষপ্রকার দুঃখ পাইতেছে ; তাহাদের রোগ হইলে ব্যয়সাধ্য-প্রযুক্ত তাহার

যথোচিত চিকিৎসা হয় না, স্বচ্ছন্দভাবে তোমাদের সন্তানদিগের শরীরপুষ্টি ও মনঃস্ফূর্তি হয় না এবং ধনাভাবে তাহারা উৎকৃষ্ট শিক্ষাও প্রাপ্ত হয় না। ইহাতে তোমাদের দ্বারা বিবিধ-মতে পরমেশ্বরের নিয়ম লঙ্ঘন করা হইতেছে। ক্ষমতা সত্ত্বে এ প্রকার অবস্থায় তৃপ্ত থাকিয়া, এই সমস্ত দুঃখ-নিরাকরণে যত্ন না করা, অবশ্যই দুষণীয় বলিতে হয়। আমার অঙ্গ-স্বরূপ যে সন্তোষ, তাহার এরূপ স্বভাব নয়। আপন আপন ক্ষমতানুযায়ী অবস্থাতে তৃপ্ত থাকা এবং যে দুঃখ নিবারণের উপায় নাই, তাহাতে ব্যাকুলিত না হইয়া, ধৈর্য্যাবলম্বন-পূর্ব্বক প্রসন্ন-ভাবে সংসার-যাত্রা নির্বাহ করাই প্রকৃত সন্তোষের লক্ষণ। এইরূপ সন্তোষে পুণ্য ও প্রতিষ্ঠা দুইই আছে। অতএব তোমাদের আত্ম-হিত ও সংসারের উপকারার্থে সচেষ্ট হওয়া সর্ব্বতোভাবে বিধেয়; তাহা হইলে, তোমরাই এই সকল সম্ভ্রান্ত পদের অধিকারী হইতে পার।”

ধর্ম্মের এই সকল মধুর উপদেশ শ্রবণ করিয়া, আমি অনির্ব্বচনীয় আনন্দ প্রাপ্ত হইলাম, এবং সাতিশয় শ্রদ্ধাবিষ্ট হইয়া মনে মনে পরমেশ্বরকে ধন্যবাদ দিলাম। এমন সময়ে উদাসীন-দিগের স্থানান্তর-যাত্রার্থ উদ্যোগ-ধ্বনি শুনিয়া, আমার স্বপ্ন ভঙ্গ হইল। তখন আমি সাতিশয় বিস্ময়াপন্ন হইয়া উঠিলাম এবং এই পরম-রমণীয় স্বপ্নব্যাপার সম্পূর্ণ সফল হউক বলিয়া, বার বার প্রার্থনা করিলাম।

অক্ষয়কুমার দত্ত ।

সুশিক্ষিত ও অশিক্ষিত লোকের

সুখের তারতম্য

জ্ঞানের কি আশ্চর্য্য প্রভাব ! বিজ্ঞান কি মনোহর মূর্তি !
বিজ্ঞানহীন মনুষ্য মনুষ্যই নয় । বিজ্ঞানহীন মনের গৌরব নাই ।
মানব-জাতি পশু-জাতি অপেক্ষা যত উৎকৃষ্ট, জ্ঞান-জনিত বিপুল
সুখ ইন্দ্রিয়-জনিত সামান্য সুখ অপেক্ষা তত উৎকৃষ্ট । পৌর্ণমাসীর
সুধাময়ী গুরুযামিনীর সহিত অমাবস্তার তামসী নিশার বৈরূপ
প্রভেদ, সুশিক্ষিত ব্যক্তির বিজ্ঞানলোক-সম্পন্ন সুচারু চিন্তা-প্রাসাদের
সহিত অশিক্ষিত ব্যক্তির অজ্ঞান-তিমিরাবৃত হৃদয়-কুটারের
সেইরূপ প্রভেদ প্রতীয়মান হয় । অশিক্ষিত ব্যক্তি নিকৃষ্ট সুখে ও
নিকৃষ্ট কার্যে নিবৃত্ত থাকিয়া, নিকৃষ্ট-সুখাধিকারী নিকৃষ্ট জীবের
মধ্যে গণনীয় হয়, সুশিক্ষিত ব্যক্তি জ্ঞান-জনিত ও ধর্মোৎপাদিত
পরিপূর্ণ সুখ-সন্তোষ করিয়া, আপনাকে 'ভূ-লোক' অপেক্ষা
উৎকৃষ্টতর ভুবনাধিবাসের উপযুক্ত করিতে থাকেন । এই উভয়ের
মনের অবস্থা ও সুখের তারতম্য পর্যালোচনা করিয়া দেখিলে,
উভয়কে এক জাতীয় প্রাণী বলিয়া প্রত্যয় হওয়া সুকঠিন ।

অশিক্ষিত ব্যক্তির অন্তঃকরণ আবাল-বান্ধব প্রায় অধম কর্মে
নিযুক্ত থাকে । তাহাকে উদরার আহরণার্থ নিকৃষ্ট প্রবৃত্তি
পরিচালনপূর্ব্বক শারীরিক পরিশ্রমে প্রবৃত্ত হইতে হয় ; কিন্তু
তাহার প্রধান মনোবৃত্তি-সমুদায় চির-নিদ্রায় নিদ্রিত থাকিয়া,
অথবা অযথা বিধানে পরিচালিত হইয়া, অকর্ম্মণ্য ও দোষাধিত

২৪ সুশিক্ষিত ও অশিক্ষিত লোকের সুখের তারতম্য

হইতে থাকে। জীবিকাসংক্রান্ত কার্যই তাহার পক্ষে প্রধান কার্য এবং প্রায়ই বর্তমান কাল ও সন্নিহিত বিষয়মাত্র তাহার আলোচনার বিষয়। এরূপ ব্যক্তি স্বদেশ ব্যতিরিক্ত সর্বদেশের সকল বিষয়েই প্রায় অনভিজ্ঞ। হয়ত, অবনীমণ্ডলকেই অসীম বলিয়া বিশ্বাস করে। পৃথিবীর আকৃতি কি প্রকার ও আয়তন বা কত, তাহার জল-স্থলের অবস্থাই বা কীদৃশ, তাহার অন্তঃপাতী কোন্ দেশের কিরূপ শোভা, কোন্ দেশে কিরূপ লোকের অধিবাস, তাহাদিগের আচার-ব্যবহার এবং ধর্ম ও রাজনীতিই বা কি প্রকার, নদ, হ্রদ, সমুদ্র, সরোবর, দ্বীপ, প্রায়োদ্বীপাদিই বা কিরূপ ব্যবস্থায় ব্যবস্থাপিত, এবং কিয়দ্-গুণাবলম্বী কত প্রকার ভূচর, খেচর ও জলচর প্রাণীতেই বা পরিপূর্ণ এ সকল বিষয়ে সে ব্যক্তি বন-চারী সিংহ ও শাখারূঢ় বিহঙ্গ অপেক্ষা অধিক অভিজ্ঞ নয়। মানব-সমাজ কীদৃশ সামাজিক নিয়মে নিয়মিত হইতেছে, পূর্বাধি পৃথিবীতে সংগ্রাম-সজ্জটন, ধর্মপরিবর্তন, রাজ-বিপ্লব-সংঘটন প্রভৃতি কত কত মহানর্থকর ঘটনা সজ্জটিত হইয়া আসিয়াছে, এবং মানব-জাতি বিজ্ঞানের কিরূপ প্রভাব ও শিল্প-কার্যের কিরূপ উন্নতি-সম্পাদন করিয়া, উত্তরোত্তর অলক্ষিতপূর্ব অসাধারণ শ্রীবৃদ্ধি-সোপানে আরোহণ করিয়াছেন, সে ব্যক্তি তাহার কিছুই অবগত নয়। সে স্বকীয় নিবাস-ভূমি ভূমণ্ডলের বিষয়ে যেমন অজ্ঞ, অপরিণীত গগন-মণ্ডলের বিষয়ে ততোধিক অজ্ঞ। পৃথিবীর অপেক্ষা বহু সহস্র ও বহু লক্ষ গুণ বৃহত্তর যে সমস্ত জ্যোতিষ্মান গোলক নভোমণ্ডলে প্রচণ্ড-বেগে নিয়ত পরিভ্রমণ করিতেছে, তাহার বিষয় কিছুই জ্ঞাত নয়। তৎসমুদায় জানিবার নিমিত্ত, তাহার অন্তঃকরণে একবারমাত্রও কৌতূহল-শিখা উদ্দীপ্ত হয় না।

দীপশিখা-সদৃশ প্রতীয়মান নক্ষত্র-সমুদায় ক্ষুদ্র হউক আর বৃহৎ হউক
দূরস্থ হউক আর সমীপস্থ হউক, সে বিষয়ে অনুসন্ধান করা তাহার
নিতান্ত অকিঞ্চিৎকর বোধ হয়। এ সকল বিষয়ে তাহার
ক্রক্ষেপও নাই। বিশ্বপতির বিশ্ব-রচনাসংক্রান্ত যে সমস্ত পরম
আশ্চর্য্য বিষয় নিরূপিত হইয়াছে, যে সমস্ত পরম কল্যাণকর
প্রাকৃতিক নিয়ম নির্দ্বারিত হইয়াছে, এবং যাবতীয় প্রাকৃতিক
বিজ্ঞান যাদৃশী শ্রী-বৃদ্ধি হইয়াছে, ও কি ভৌতিক, কি শারীরিক,
কি মানসিক, সর্বশাস্ত্র-সম্বন্ধীয় যে সমস্ত অভিনব তত্ত্ব দিন দিন
উদ্ভাবিত হইয়া, বিশ্ববিধাতার যশঃসৌভ বিস্তার করিতেছে, সে
সমুদায় সে ব্যক্তির গোচর ও হৃদয়ঙ্গম হইবার সম্ভাবনা নাই।
নৈসর্গিক বস্তু ও নৈসর্গিক নিয়মের অমুশীলনে যে কিরূপ
অত্যাশ্চর্য্য আনন্দের অনুভব হয়, সে জন্মাবচ্ছিন্নে তাহার
স্বাদগ্রহণ-করণে সমর্থ হয় না। সুশিক্ষিত ব্যক্তি বুদ্ধিবৃত্তি মার্জিত
ও বর্দ্ধিত করিয়া পরম পবিত্র সুখার্দ্ৰ-হৃদয়ে যেরূপ পরমাত্মত
পরিপূর্ণ জ্ঞানারণ্যে বিচরণ করেন, অশিক্ষিত ব্যক্তি স্বপ্নেও
একবার তথায় পদার্পণ করিতে পারগ হয় না। সে ব্যক্তি বিজ্ঞা-
মন্দিরের দ্বারস্বরূপ ব্যাকরণ-বিজ্ঞাকেই যথার্থ বিজ্ঞা বোধ করে ;
জন্মপত্রিকা-রচনা ও শুভাশুভ দিনক্ষণ গণনাকেই প্রকৃত জ্যোতির্বিজ্ঞা
বলিয়া প্রত্যয় করে ; অশৌচব্যবস্থা ও প্রায়শ্চিত্ত-বিধানকেই
বাস্তবিক ধর্মোপদেশ বলিয়া বিবেচনা করে এবং মনঃকল্লিত
পৌরাণিক ইতিহাসকেই ভুলোকের যথার্থ ইতিহাস বলিয়া
প্রত্যয় করে। স্বদেশীয় শাস্ত্রে যে বিষয়ে যেরূপ
নিয়ম নির্দিষ্ট আছে এবং স্বদেশ-মধ্যে যে কার্য্যে যেরূপ রীতি
প্রচলিত আছে, তাহাই সর্বোৎকৃষ্ট বলিয়া বিশ্বাস করে।

২৬ সুশিক্ষিত ও অশিক্ষিত লোকের সুখের তারতম্য

পিতৃ-পিতামহাদি পূর্বপুরুষেরা যে প্রাচীন পথ অবলম্বন করিয়া চলিতেছেন, তাহাই সেই ব্যক্তির মতে সর্বোত্তম। তাহা নিতান্ত যুক্তি-বিরুদ্ধ ও একান্ত অসঙ্গত হইলেও, তাহার অভিপ্রায় পরিবর্তন-সহ নয়। স্বজাতির দোষদর্শন ও অপর জাতির গুণাবলোকন-বিষয়ে তাহার নিমীলিত নেত্র উন্মীলিত হইবার নয়। তাহার মতামুসারে আমাদের বুদ্ধিরও আর উন্নতি হইবে না, বিচারও আর উন্নতি হইবে না, ধর্মেরও আর উন্নতি হইবে না, সুখেরও আর উন্নতি হইবে না। তাহার বিশ্বাস এই, আমরা সর্বাপেক্ষা অপকৃষ্ট যুগে জন্মগ্রহণ করিয়াছি, অতএব উত্তরোত্তর অধোগতি প্রাপ্ত হইতে থাকিব।

করুণাময় পরমেশ্বর বিশ্বরাজ্য-পরিপালনার্থ যে সমস্ত মঙ্গলময় নিয়ম সংস্থাপন করিয়া সর্বত্র প্রচার করিয়া রাখিয়াছেন, অশিক্ষিত ব্যক্তি সে সমুদায় অবগত নয়। তাহার অজ্ঞানাবৃত অন্তঃকরণ সর্বস্থানেই নানা বিভীষিকা কল্পনা করে। ভূত, প্রেত, পিশাচ ইত্যাদি অবাস্তবিক পদার্থ তাহার হৃদয়-ক্ষেত্রে নিরন্তর বিচরণ করে। সে ব্যক্তি সদাই শঙ্কিত, নিয়তই উৎকণ্ঠিত এবং কতপ্রকার কুসংস্কারপাশে বদ্ধ হইয়া থাকে। শুভাশুভ দিন-করণ তাহাঁর কতই আশঙ্কা ও কতই উদ্বেগ উৎপাদন করে। বিহঙ্গ-বিশেষের স্বর-বিশেষই বা কত ভ্রাস ও কত উৎকণ্ঠা উপস্থিত করে। আশ্চর্যের বিষয় এই যে, সমস্ত অসত্য বিষয়ে তাহার যেরূপ বিশ্বাস আছে, তাহা কদাচ বিচলিত হইবার নয়; কিন্তু বিজ্ঞানের অনুশীলন-দ্বারা যে সমস্ত যথার্থ বিষয় নিরূপিত হইয়াছে ও যে সকল অভিনব তত্ত্ব উদ্ভাবিত হইয়াছে, তাহাতে তাহার প্রত্যয় জন্মান সুকঠিন কর্ম। লঙ্কাধীপ মনুষ্যের নিবাস-ভূমি ও সকলেরই গম্য স্থান, ভূ-মণ্ডলের

যে ভাগে আমাদিগের বাস, তাহার বিপরীত ভাগেও অন্য লোকের বসতি আছে, অবনি-মণ্ডল শূণ্ণেতেই অবস্থিত, জন্তু-বিশেষ বা বস্তু-বিশেষের উপর অধিষ্ঠিত নয়, পৃথিবীর স্থলভাগ জলময় সমুদ্রে পরিবেষ্টিত বটে, কিন্তু ক্ষীর-সমুদ্র, সুরা-সমুদ্র, ইক্ষু-সমুদ্র প্রভৃতি পুরাণোক্ত সপ্তসমুদ্রের অস্তিত্ব-ঘটিত যত উপাখ্যান প্রচলিত আছে তাহা সর্বৈব মিথ্যা ; চন্দ্র সজীব পদার্থ নয়, এবং নিজে তেজোময় নয়, উহার উপর সূর্যের আলোক পতিত হয় বলিয়া, তেজোময় বোধ হয় ; চন্দ্রমণ্ডলের যে সমস্ত কলঙ্ক দেখিতে পাওয়া যায়, তাহা হরিণশিশু নয়, অত্যন্ত গভীর গহ্বর ; সেই সকল গহ্বরে সূর্যের রশ্মি প্রবেশ করিতে পারে না ; সূর্য্যমণ্ডল ভূ-মণ্ডল অপেক্ষা ১৪,০০,০০০, চৌদ্দ লক্ষ গুণ বৃহৎ, রথোপরি স্থাপিত নয়, অশ্ব-কর্তৃকও আকৃষ্ট হয় না ; সূর্য্যকে যে প্রতিদিন পৃথিবী প্রদক্ষিণ করিতে দেখা যায়, তাহা বাস্তবিক সূর্যের গতি নয়, পৃথিবী নিয়ত ঘূর্ণিত হইতেছে, এই নিমিত্ত সূর্যের ঐরূপ গতি প্রতীয়মান হয় ; সূর্য্য পৃথিবীকে প্রদক্ষিণ করে না, পৃথিবী প্রতিঘণ্টায় প্রায় ত্রিশ সহস্র ক্রোশ ভ্রমণ করিয়া এক বৎসরে একবার সূর্য্য-প্রদক্ষিণ করে, ইত্যাদি অবধারিত তত্ত্ব-সমুদায় অশিক্ষিত ব্যক্তির হৃদয়ঙ্গম হওয়া অসাধ্য বোধ হয় । এই সমস্ত বিষয় অবাস্তবিক উপাখ্যান অপেক্ষাও তাহার অসম্ভব বোধ হয় । যাহার অন্তঃকরণ ঘোরতর অজ্ঞান-তিমিরে একরূপ আচ্ছন্ন রহিয়াছে, জ্ঞানোৎপাত্ত পরমাদ্বৃত্ত বিগুদ্ধ সুখসম্ভোগে তাহার অধিকার হইবার সম্ভাবনা কি ? বিশ্বপতির বিশ্বরচনা-মধ্যে তাঁহার অচিন্ত্য শক্তি, আশ্চর্য্য কৌশল, অপার মহিমা ও অনন্ত করুণার অসংখ্য নিদর্শন দর্শন করিয়া পরমেশ্বর-পরায়ণ জ্ঞানবান্ ব্যক্তির হৃদয়মধ্যে যেরূপ চমৎকার-সংবলিত

২৮ সুশিক্ষিত ও অশিক্ষিত লোকের সুখের তারতম্য

আনন্দ-রসের সঞ্চার হয়, অশিক্ষিত অজ্ঞানাবৃত ব্যক্তির সে রসের স্বাদ-গ্রহণে সমর্থ হইবার সম্ভাবনা কি ?

কিন্তু সুশিক্ষিত সচ্চরিত্র ব্যক্তির প্রশস্ত হৃদয় পরম পরিশুদ্ধ বিদ্যালোক লাভ করিয়া কি অত্যাশ্চর্য্য অনির্বচনীয় শোভায় শোভিত হইয়া থাকে ! তাঁহার অন্তঃকরণ অকারণে শঙ্কিত ও সঙ্কুচিত হইবার নয় ; তিনি বিশ্ব-পতির বিশ্ব-রাজ্যের কৌশল-চক্রের মৰ্ম্মাবধারণ করিয়া তদীয় কার্য্য-প্রণালী নিঃসংশয়-চিত্তে সুস্পষ্ট দেখিতে পান। তিনি ভৌতিক, শারীরিক, মানসিক স্বতন্ত্র স্বতন্ত্র নিয়মের স্বতন্ত্র স্বতন্ত্র কার্য্য নির্দ্ধারণ করিয়া, যে কার্য্যের যে কারণ, তাহা সুন্দররূপে অবগত হইয়া, অকুণ্ঠিতহৃদয়ে সুখে কালহরণ করেন। তিনি আর দেব-বিশেষকে রোগবিশেষের অধিপতি বলিয়া প্রত্যয় করেন না, মানব-দেহকে প্রেতবিশেষের আশ্রয় বলিয়া বিশ্বাস করেন না, ব্যক্তি-বিশেষের অভিসম্পাতকে অপর ব্যক্তির অনিষ্টপাতের হেতু বলিয়া স্বীকার করেন না, এবং অগ্নি-দীপন, বারি-বর্ষণ ও বায়ু-সঞ্চারণের স্বতন্ত্র স্বতন্ত্র অধিষ্ঠাত্রীও কল্পনা করেন না। ঐ সমস্ত কার্য্য পরমেশ্বর-প্রতিষ্ঠিত বিভিন্ন প্রকার নিয়মামুসারেই সম্পন্ন হইয়া থাকে এবং সেই সকল নিয়ম জগতের কল্যাণমাত্র সাধনার্থেই তাঁহাকর্তৃক প্রবর্তিত হইয়াছে, ইহা দেদীপ্যমান দেখিয়া অসঙ্কুচিত-চিত্তে জীবনযাত্রা নির্বাহ করেন। অকারণ উৎকণ্ঠা, অমূলক আশঙ্কা তাঁহার অন্তঃকরণ স্পর্শ করিতে পারে না। প্রসাদরূপ পবিত্র সমীরণ তাঁহার চিত্তে সতত সঞ্চরণ করিতে থাকে।

এতাদৃশ বিদ্যালোক-সম্পন্ন সুশিক্ষিত ব্যক্তির অন্তঃকরণ অসংখ্য বিষয়ের অসংখ্যভাবে নিরন্তর পরিপূর্ণ। যে সমস্ত অদ্ভুত

বিষয় ও মনোহর ব্যাপার তাঁহার বোধ-নেত্রের গোচর থাকে, তৎসম্বন্ধে চিন্তা করিলে বোধ হয়, তিনি নর-লোক-নিবাসী হইয়াও, কোন চমৎকার-জনক সূচক স্বর্গ-লোকে বিচরণ করিতেছেন। তাঁহার অন্তঃকরণে নিরন্তর যে সকল ভাবের আবির্ভাব হয়, তাহা অশিক্ষিত লোকের কদাচ অল্পভূত হইবার বিষয় নয়। তিনি আপনার মানস-ক্ষেত্রে এককালে সমগ্র ভূ-মণ্ডল পর্য্যবেক্ষণ করিতে পারেন। মহার্ণব-পরিবৃত স্থলভাগ, সমুদ্রস্থিত দ্বীপ-পুঞ্জ, চতুর্দ্দিগ্‌বাহিনী নদী ও উপনদী, স্থানে স্থানে নীরদধারিণী পর্বতশ্রেণী, কন্দর ও ভৃগুদেশ, শৃঙ্গ ও প্রস্রবণ, মহারণ্য ও মরুভূমি, জল-প্রপাত, উষ্ণ প্রস্রবণ, তুষার-শৈল, তুষার-দ্বীপ, গন্ধক-দ্বীপ, প্রবাল-দ্বীপ ইত্যাদি ভূ-তলস্থ সমস্ত পদার্থ পর্য্যালোচনা করিয়া প্লবিত হইতে পারেন। তিনি কল্পনা-পথ অবলম্বন করিয়া, অগ্নিময় আগ্নেয়-গিরির শৃঙ্গ-দেশে আরোহণ করিতে পারেন, তৎসংক্রান্ত ভূগর্ভ-বিনির্গত গভীর গর্জ্জন শ্রবণ করিতে পারেন, এবং তদীয় শিখর-দেশ হইতে অগ্নিময়ী নদীস্বরূপ ধাতু-নিঃস্রব নির্গত হইয়া চতুর্দ্দিগ্‌ দক্ষ করিতে দৃষ্টি করিতে পারেন; তিনি মানস-পথে পর্য্যটন-পূর্বক হিমগিরি-শিখরে উত্তীর্ণ হইয়া, নতনয়নে নিরীক্ষণ করিতে পারেন, আপনার চরণতলে বিদ্যমানতা জলিত হইতেছে, মেঘাবলি ধ্বনিত হইতেছে, জলপ্রপাত ঝরিত হইতেছে এবং প্রচণ্ড ঝড়বাত উৎপন্ন হইয়া, অরণ্য-সমুদায় উৎপাটন করিতেছে ও সমুদ্র-সলিলে করালতম কল্লোল কোলাহল উৎপাদিত করিয়া, ত্রাস ও সঙ্কট উপস্থিত করিতেছে। সর্বকালের সমস্ত ঘটনাই তাঁহার অন্তঃকরণে জাগরুক রহিয়াছে। তিনি মনে মনে কত রাজ্য ও রাজার সংসার দেখেন, কত বীর ও বিগ্রহের বিষয় বর্ণন করেন এবং কত স্থানের কত

৩০ সুশিক্ষিত ও অশিক্ষিত লোকের সুখের ভারতম্য

প্রকার রাজনীতি ও ধর্মনীতির পরিবর্তন পর্যালোচনা করিয়া সুখী থাকেন। যে সময়ে তিনি মিত্রগণের সহিত সহবাস ও সদালাপ করেন, তখন দেশ-বিদেশের জল, বায়ু, শীত, গ্রীষ্ম, গ্রাম, নগর, আচার, ব্যবহার, ধর্ম, শাসন, বিত্তা, ব্যবসায়, সুখ, সভ্যতা, পশু, পক্ষী, উদ্ভিদ, ধাতু প্রভৃতির বিষয় পর্যালোচনা করিয়া, পূলকে পরিপূর্ণ হইতে থাকেন। যে সময়ে তিনি গ্রাম ও গহন ভ্রমণ করেন, তখন বৃক্ষ, লতা, গুল্মাদির কেবল পরমাশ্চর্য্য সৌন্দর্য্য সন্দর্শন করিয়াই সন্তুষ্ট থাকেন না, তাহাদের মূল, স্কন্ধ, শাখা, পত্র, পুষ্প, ফলাদির অভ্যস্তরে কীদৃশ কৌশল বিद्यমান রহিয়াছে ও কতপ্রকার আশ্চর্য্য ক্রিয়াই বা নির্বাহিত হইতেছে, উদ্ভিদের মধ্যে কোন্ কোন্ জাতি কি কারণে কোন্ শ্রেণীতে বিনিবিষ্ট হইয়াছে, এবং কোন্ জাতি দ্বারা কিরূপ উপকারই বা উৎপন্ন হইতে পারে, তৎসমুদায় পর্যালোচনা করিয়া, চমৎকার-সংবলিত সুখামৃতরসে অভিষিক্ত হন, এবং প্রত্যেক বিষয়ের অল্পশীলন করিবার সময়ে করুণাময় পরমেশ্বরের পরমাদ্বুত কৌশল প্রতীতি করিয়া, কৃতজ্ঞ-হৃদয়ে মনের সহিত ধন্যবাদ করেন। যে তিমিরাচ্ছন্ন নিশীথ-সময়ে অজ্ঞ লোকেরা অশেষবিধ বিভীষিকা ভাবনা করিয়া ভীত হইতে থাকে, সে সময়ে তিনি নিভৃত স্থানে অবস্থানপূর্ব্বক গগন-মণ্ডলে নয়নদ্বয় নিয়োজন করিয়া, অসীম বিশ্ব-ব্যাপারের অল্পশীলনে অমুরক্ত হইতে পারেন। আমরা যে প্রকাণ্ড ভূমিখণ্ডের উপর অধিষ্ঠিত রহিয়াছি, তাহা গিরি, কানন, পশু, পক্ষী, মেঘ ও বায়ু-সংবলিত অপরিমিত আকাশ-মার্গে প্রচণ্ডবেগে ঘূর্ণায়মান হইতেছে, ইহা চিন্তা করিয়া, অস্তঃকরণ বিকসিত করিতে পারেন। তিনি কল্পনা-বশে চন্দ্র-মণ্ডলে উপনীত হইয়া, উচ্চ

পর্বত, গভীর গহ্বর, উন্নত শিখর, গিরিচ্ছায়া, বহুর ভূমি ইত্যাদি অবলোকন করিতে পারেন। ক্রমশঃ উর্দ্ধদিকে উথিত হইয়া, চন্দ্র-চতুষ্টয়-পরিবৃত বৃহস্পতি, বৃহত্তর চন্দ্রাষ্টক ও বিশাল-বলয়-ত্রয়-পরিবেষ্টিত শনৈশ্চর, চন্দ্র-ষট্‌ক-পরিবৃত হর্শেল গ্রহ এবং চন্দ্রদ্বয়-সংবলিত নেপচ্যুন-নামক অপূর্ব ভুবন দর্শন করিয়া পরম-পুলকিত-চিত্তে বিচরণ করিতে পারেন। পরে গ্রহ-মণ্ডলী-পরিবেষ্টিত প্রচণ্ড সূর্য্য-মণ্ডল পশ্চাত্তাগে পরিত্যাগ-পূর্ব্বক সহস্র সহস্র কোটি কোটি নক্ষত্র-লোক অবলোকন করতঃ অশৃঙ্খল-বদ্ধ ও অক্লিষ্টপক্ষ বিহঙ্গের স্থায় অসীম আকাশ-মণ্ডল পর্য্যটন করিতে পারেন। গগন-মণ্ডলের যাবতীয় ভাগ দূরবীক্ষণ-সহকারে মানব-জাতির নেত্র-গোচর হইয়াছে, তদূর্দ্ধ সমস্ত নভঃপ্রদেশ সংখ্যাতিরিক্ত পবুমান্বিত জীবলোকে পরিপূর্ণ বলিয়া প্রতীতি করিতে পারেন, এবং অপার মহিমার্ণব মহেশ্বরের অথও রাজত্ব সর্ব্বত্র প্রচারিত দেখিয়া, ভক্তি-রসাভিষিক্ত-পুলকিত-হৃদয়ে অর্চনা করিতে পারেন।

তিনি কখনও বা গগন-মণ্ডলস্থ ভূরিসংখ্য বৃহদাকার পদার্থ দর্শনে পরিতৃপ্ত হইয়া, সূক্ষ্ম পদার্থ পর্য্যবেক্ষণ-বাসনায় ধরাতেলে অবতীর্ণ হইতে পারেন, এবং অণুবীক্ষণ-প্রদর্শিত অশেষবিধ অতি সূক্ষ্ম বস্তুর অশেষবিধ শোভা সন্দর্শন করিয়া চমৎকৃত হইতে পারেন। একরূপ সৌভাগ্যশালী বিজ্ঞাবান্ ব্যক্তি জীবের শরীরে ও বৃক্ষের পল্লবে যেরূপ শোভা, যেরূপ শিল্প ও যেরূপ অদ্ভুত ব্যাপার অবলোকন করেন, অণুবীক্ষণের সৃষ্টি না হইলে, তাহা মানবজাতির দৃষ্টি-পথে কদাচ আবিস্কৃত হইত না। যে ব্যক্তি উক্ত যন্ত্র-সহকারে সে সমুদায় স্বচক্ষে প্রত্যক্ষ না করিয়াছেন, তাহা বর্ণন করিয়া তাঁহার হৃদয়ঙ্গম করাইবার সম্ভাবনা নাই। বিজ্ঞালোক-সম্পন্ন

৩২ সুশিক্ষিত ও অশিক্ষিত লোকের সুখের তারতম্য

সুশিক্ষিত ব্যক্তি এক এক জলবিন্দুতে কোটি কোটি জীবের অবস্থান ও সংস্কার দেখিয়া পুলকিত হইতে থাকেন। অনভিজ্ঞ ব্যক্তির যে স্থানে কিঞ্চিৎ কলঙ্ক-যুক্ত চিহ্নমাত্র বোধ হয়, তিনি সে স্থানে বৃহৎ অরণ্য দর্শন করেন। ইতর ব্যক্তির প্রজাপতির পক্ষ-সমূহে যে সমস্ত ক্ষুদ্ররেণু দৃষ্টি করে, তিনি তাহা বিহঙ্গগণের পক্ষ-সদৃশ সুরাগ-রঞ্জিত, সূচারু পক্ষ-সমূহ জানিয়া, অত্যন্ত আহ্লাদিত হইয়া থাকেন। অনভিজ্ঞ ব্যক্তি রাজ্য-বিশেষের রাজধানী-বিশেষ যেরূপ জনাকীর্ণ বোধ করে, তিনি কণা-প্রমাণ স্থান তদপেক্ষা অধিকসংখ্যক জীবে পরিপূর্ণ দেখিয়া বিস্ময়াপন্ন হন। অশিক্ষিত ব্যক্তি যে স্থান জীব-শূন্য অকর্মণ্য বোধ করে, তিনি সে স্থান জ্ঞান ও ক্রীড়া, রাগ ও বাসনা, সুখ ও সন্তোষের আধার বলিয়া প্রতীতি করেন এবং প্রত্যেক অণু-প্রমাণ স্থান পরমেশ্বরের অত্যাশ্চর্য্য অনির্বচনীয় অভাবনীয় কীর্তিতে পরিপূরিত দেখিয়া, ভক্তি-সহকৃত পরমানন্দ-রসে অভিষিক্ত হইতে থাকেন।

যে মহাত্মার অন্তঃকরণ এতাদৃশ অতি মনোহর সুখরাজ্যে বিচরণ করিতে পারে, তাহার অনুভূত সুখ অজ্ঞানাবৃত অশিক্ষিত ব্যক্তির সুখাপেক্ষায় অশেষগুণে উৎকৃষ্ট, তাহার সন্দেহ নাই। যদি মার্জিত-বুদ্ধি-পরিচালনে সুখোদয় হয়, যদি ক্ষুদ্র ও বৃহৎ এবং সূক্ষ্ম ও মহৎ অশেষবিধ পদার্থ-চিন্তনে সুখ-সঞ্চার হয় এবং যদি মহিমার্ণব পরমেশ্বরের অচিন্ত্য শক্তির ও অপার মহিমার অসংখ্য নিদর্শন-দর্শনে প্রগাঢ় সুখের উদ্ভব হয়, তবে জ্ঞানালোক-সম্পন্ন বিশুদ্ধচিত্ত সুশিক্ষিত ব্যক্তির পরমোৎকৃষ্ট নিরুপম সুখের উপমা দিবার আর স্থল নাই, এ কথা অবশ্য স্বীকার করিতে হইবে।

অক্ষয়কুমার দত্ত।

হিন্দুসমাজ ও কুপমণ্ডুকতা

হিন্দু সমাজের প্রতি এই একটা দোষারোপ হইয়া থাকে যে, ইহার শাসনে থাকিয়া হিন্দুরা কখন স্বদেশের বাহির হইতে পান না এবং সেই জন্ত স্বদেশ বহির্ভূত কোন ব্যাপারই শিথিতে বা বুঝিতে পারেন না, নিতান্ত সঙ্কীর্ণ বুদ্ধি ও সঙ্কীর্ণ-হৃদয় হইয়া থাকেন। কুপ-মণ্ডুকতা দোষ বই কি—কিন্তু অপরাপর লোকের পক্ষে উহা যত দোষ হিন্দুর পক্ষে তত দোষ না হইতে পারে। হিন্দুর বাসভূমি সমুদয় পৃথিবীমণ্ডলের প্রতিকৃতি স্বরূপ। এই বাসভূমির বিভিন্ন ভাগে বিভিন্ন পুণ্যতীর্থ—তীর্থ দর্শন করা শাস্ত্রের বিধি, আর হিন্দুরা সেই বিধি পালনপূর্বক পর্বের পর্বের তীর্থ পর্য্যটন করিয়া বেড়ান। অতএব স্থলদৃষ্টিতে হিন্দুদিগকে যত বদ্ধভাবাপন্ন বলিয়া বোধ হয়, প্রকৃত প্রস্তাবে ইহারা তত বদ্ধভাবাপন্ন নহে।

হিন্দুদিগের সমুদ্রগমন নিষেধ চিরকালের অবস্থা নহে। হিন্দু বণিকেরা অনতিদীর্ঘকাল পূর্বে যে সিংহল দ্বীপে বাণিজ্যার্থ গমন করিতেন তাহার ভূরি পরিমাণ উল্লেখ সামান্য কাব্য-গ্রন্থে এবং কিশদন্তীতে প্রাপ্ত হওয়া যায়। যবদ্বীপ, বালিদ্বীপ, এবং লঙ্ক দ্বীপে যে হিন্দুদিগের উপনিবেশ সকল সংস্থাপিত হইয়াছিল তাহার অতি সুস্পষ্ট চিহ্ন সকল স্রুদুর সাগর-মধ্যস্থ সেই সকল স্থানে বিদ্যমান রহিয়াছে। অজ্ঞাপি সেই সকল স্থানে রামায়ণ মহাভারতাদি গ্রন্থ প্রাপ্ত হওয়া যায়। বিশেষতঃ লঙ্ক দ্বীপের রাজা হিন্দু, সেখানে

যজ্ঞাদি ক্রিয়ার অনুষ্ঠান হইয়া থাকে। মুসলমান ইতিবৃত্তেও দৃষ্ট হয় যে, সিদ্ধুদেশ হইতে বাঙ্গালা পর্য্যন্ত ভারতবর্ষের সমুদয় উপকূল-ভাগের লোক সামুদ্রিক বাণিজ্য করিত। আরব বোম্বেটদিগের দৌরাণ্যেই ঐ বাণিজ্য শৃঙ্খলা বিচ্ছিন্ন এবং বিলুপ্ত হইয়া যায়। আবার ভারতে সামুদ্রিক বাণিজ্য প্রবর্তিত হইয়াছে এবং যদিও এদেশীয়দিগের মধ্যে সেই বাণিজ্য-কার্য্যে মুসলমানেরাই প্রধান, তথাপি হিন্দু জাতীয় বিভিন্ন শ্রেণী সম্প্রদায়ও নিতান্ত পশ্চাৎপদ নহে। মাল্ভাজ অঞ্চলের “নাডগোট” নামক স্থানের চেটী বা শ্রেট্টীরা যবদ্বীপের সহিত বাণিজ্যে যথেষ্ট লাভ করিয়া থাকেন। মদুরাধিষ্ঠাত্রী দেবী “মিনাচি” বা “মীনাক্ষীর” নামে তাঁহাদের ঈশ্বরের নামকরণ হইয়াছে। সমুদ্রগমনে জাতিপাত যদিও লোকের মুখে শুনিতে পাওয়া যায় বটে, কিন্তু লোকের আচারে তাহা দেখিতে পাওয়া যায় না বাল্লেই হয়। অতি বিচক্ষণ কোন একটা মহারাষ্ট্রীয় ব্রাহ্মণকে জিজ্ঞাসা করিয়াছিলাম, “আপনার স্বজাতীয় বিলাতফেরৎদিগের সহিত কিরূপ ব্যবহার করেন?” তিনি বলিলেন, “আমরা ও-বিষয় লইয়া কোন বিচার-বাহুল্য করি না। যিনি বিলাত হইতে আসিলেন, তিনি বিনা আড়ম্বরে প্রায়শ্চিত্ত ও কেশাদি সংস্কার করিয়া কয়েকদিন পরে স্বজাতীয় পরিচ্ছদ ধারণ করিয়া আত্মীয় স্বজনের সহিত দেখা সাক্ষাৎ করেন, তাঁহাদিগের স্বজনেরাও তাঁহাদিগের বাটীতে যান। চলন বলন দেশীয় রীতি-ক্রমেই হয়; ক্রমে তাঁহাকে ছই একটা ক্ষুদ্রভোজে নিমন্ত্রণ করি, তিনি আসিয়া ভোজনাদি করিয়া যান। অনন্তর বৃহৎ বৃহৎ ভোজ্যাদিতে তাঁহার নিমন্ত্রণ চলে, এবং পরিশেষে তিনি নিমন্ত্রণ করিলে সকলে গিয়া তাঁহার বাটীতে ভোজন করি। আমাদের

প্রণালী এই ; আমরা বিলাত যাওয়া লইয়া কোন গোলযোগই করি না ।”

অতএব দেখা যাইতেছে যে, হিন্দুজাতীয় ব্যক্তি, বিনা সমাজ-
ত্যাগে সমুদ্রগমন এবং বিদেশে পরিভ্রমণ করিতে পারেন। তবে
আত্মসমাজের প্রতি ষাঁহাদের ভক্তি এবং মমতা আছে, তাঁহারা
ওরূপ পারেন। ষাঁহারা একেবারে আত্মগৌরব পরিশূন্য হইয়া
নিজ সমাজের প্রতি অবজ্ঞা প্রদর্শন করিতে ভালবাসেন এবং
সমাজের নিকট নতভাব ধারণ না করিয়া তাহার প্রতি তামিহা
করেন, তাঁহারা সমাজ-মধ্যে পুনর্ব্বার গৃহীত হইতে পারেন না,
সেই স্থলেই প্রায় প্রায়শ্চিত্তাদির কথা উত্থাপিত হইয়া থাকে।
মহারাষ্ট্রীয়দিগের মধ্যে আত্মগৌরব এবং সমাজগৌরব আছে।
প্রকৃত কথা এই যে, যদি বিদেশ গমনের তাদৃশ প্রয়োজন এবং
যথাযোগ্য উপায় থাকে, তবে বিদেশ গমনে হিন্দুসমাজ বিশেষ বাধা
প্রদান করেন বলিয়া বোধ হয় না। স্পর্দ্ধা করিয়া সমাজের প্রতি
অবজ্ঞা প্রদর্শন না করিলে কোন সমাজই কখন ক্রুদ্ধ হয় না। হিন্দু-
সমাজ বিনয়-ব্যবহার মাত্র চাহেন। এই সমাজ উদ্ধত হুর্ভুদিগেরই
প্রতি দণ্ড করেন। অত্যাচার সমাজে কোন ব্যক্তি যদি প্রচলিত
মতবাদ হইতে অপর কোন মতবাদ গ্রহণ করিতেন তাহা হইলে
তাহার প্রাণদণ্ড হইত। হিন্দু সমাজে ওরূপ কখনই হয় নাই, পরধর্ম্ম-
বিষে কুপমণ্ডকতার প্রধান লক্ষণ—তাহা হিন্দুসমাজে আজিও
নাই, কল্পিত আছে ছিল বলিয়া বোধ হয় না। কথিত আছে,
ভগবান শঙ্করাচার্য্যের সময়ে কোন কোন বৌদ্ধের তুহানল হইয়াছিল।
কিন্তু তৎসম্বন্ধে ইহাও কথিত আছে যে, ঐ প্রায়শ্চিত্ত সমাজকর্তৃক
আদিষ্ট হয় নাই। যে পণ করিয়া বিচার হয়, সেই পণরক্ষা মাত্র।

যাহা হউক, কুপমণ্ডুকতার সম্বন্ধে আর একটা কথা বলা আবশ্যক। স্বদেশ হইতে বাহির না হইলেই যে মানুষের কুপমণ্ডুকতা জন্মে আর বাহির হইলেই যে ঐ দোষ একেবারে ঘুচিয়া যায়, একথাও প্রকৃত কথা নহে। কত ইংরাজের সহিত আলাপে দেখা যায়, অনেকানেক দেশ পরিভ্রমণ করিয়াও তাহারা সেই সেই দেশের প্রকৃতি কিছুই বুঝিতে পারেন নাই। আর অনেকেই লক্ষ্য করিয়া থাকিবেন ইংরাজ রাজকর্মচারীদের মধ্যে কেহ পনর, কেহ বিশ, কেহ ত্রিশ বৎসর এদেশে কাটাইয়াও এদেশের অতি সাধারণ বিষয় সকলেও ঘোর মূর্খ থাকিয়া যান।

ঐ সকল লোককে দেখিলে একটা রুসীয় ভদ্র সন্তানের সহিত মহাত্মা পীটারের যেরূপ কথোপকথন হইয়াছিল বলিয়া লিখিত আছে, সেই কথা মনে পড়ে। মহাত্মা পীটার স্বয়ং সাম্রাজ্যাধিকার প্রাপ্ত হইয়া অনেকানেক ইউরোপীয় রাজ্যে গিয়াছিলেন। তিনি ফিরিয়া আসিয়া বড় বড় জমীদারদিগের সম্মানদিগকে ইউরোপের নানা দেশে প্রেরণ করিলেন। একজনকে ইটালী যাইতে অনুজ্ঞা হইল। স্বদেশবৎসল রুসীয় সম্রাট লোকেরা তখন পরদেশে পদার্পণ করাও দোষ মনে করিত। যে ব্যক্তি ইটালী যাইতে আদিষ্ট হইল, সে নিজ ব্যয়ে একটা স্ত্রবহন যান প্রস্তুত করিল; এবং তাহারই ভিতর রান্না খাওয়া প্রভৃতি সকল কাজ চলে এরূপ বন্দোবস্ত করিয়া লইল। সে ঐ যান-মধ্যে রহিল, ভূত্যেরা উহা ইটালী দেশের প্রধান নগর রোম পর্য্যন্ত লইয়া গেল এবং তথা হইতে ফিরাইয়া আনিল। সে ইটালী হইতে প্রত্যাবৃত্ত হইয়াছে শুনিয়া সম্রাট পীটার তাহাকে ডাকিলেন এবং সে আসিলে জিজ্ঞাসা করিলেন, “ইটালী দেশ কেমন দেখিলে?” ** “আজ্ঞে দেশ দেখি নাই।” **

“দেশ দেখে নাই কি—এই সে দিনমাত্র তথা হইতে আসিলে না?”
 “আজ্ঞে তা বটে—কিন্তু দেশ দেখি নাই।” * * “গেলে এলে
 কেমন ক’রে?” “আজ্ঞে একটা বড় গাড়ী করিয়া গিয়াছিলাম,
 একবারও বাহির হই নাই।”—পীটার আশ্চর্যান্বিত হইয়া রহিলেন।

অনেকানেক ইউরোপীয়ের, বিশেষতঃ কোন কোন ইংরাজের,
 ঐরূপ এক একটা যান সমভিব্যাহারেই থাকে—উঁহারা কখন
 তাহার ভিতর হইতে বাহির হয়েন না। ঐ যান কাষ্ঠ-বিনির্মিত
 নয়—উহা অহঙ্কার, দান্তিকতা, পরজাতির প্রতি ঘৃণা এবং বিদ্বেষ-
 বিনির্মিত, উহা চর্ম্মচক্ষুর অগোচর পদার্থ—ইংরাজ উহারই ভিতরে
 বসিয়া সকল দেশ ভ্রমণ করেন এবং ভারতবর্ষে চাকুরি করিয়া ঘরে
 ফিরিয়া যান। আমাদের সমাজ ওরূপ কৃপমণ্ডুকতার সৃষ্টি করিতে
 পারে না।

ভূদেব মুখোপাধ্যায়

জাতীয় ভাব—উপক্রমণিকা

কয়েক বৎসর হইল, বিশেষ শ্রদ্ধাতাজন একটা ইউরোপীয়ের সহিত আমার নিম্নলিখিতরূপ কথোপকথন হইয়াছিল।

তিনি বলিলেন, স্বাধীনতা হারাইয়া জাতীয় ভাব পরিবর্তনের চেষ্টা বিড়ম্বনা মাত্র।

আমি বলিলাম, কোন জিনিস হারাইলে তাহা ত পাইবার জন্ত খুঁজিতে হয়—জাতীয় ভাব পরিবর্তনের যে চেষ্টা, তাহাই কি ঐ হারান জিনিসটার অনুসন্ধান নয়?

তিনি। কথাটা বেশ হৃদয় করিয়াই বলিলে বটে। ও কথাই কোন সাক্ষাৎ উত্তর নাই—কিন্তু যাহা অতল জলে পড়িয়া গিয়াছে, অথবা যাহা কখনই হাতে ছিল না, তাহা খুঁজিতে যাওয়া কি বৃথা পরিশ্রম এবং সময় নষ্ট করা নয়? ওরূপে আয়াস করা অপেক্ষা অন্তরূপ চেষ্টা করা ভাল বলিয়াই বোধ হয়।

আমি। অত্ৰ কোন্ দ্রব্যের জন্ত অথবা অত্ৰ কোন্ প্রকার চেষ্টা করিতে বলেন, তাহা বলুন, শ্রদ্ধাযুক্ত হইয়াই শুনিব। কিন্তু আমরা যাহা খুঁজিতেছি, তাহা যে অতল জলে পড়িয়াছে, তাহা ত জলে নামিয়া না দেখিলে নিশ্চয় হইতে পারে না। আর যে জিনিসটা হারাইয়া গিয়াছে মনে করিতেছি, তাহা যে পূর্বে হাতে ছিল না, তাহাই বা কেমন করিয়া মনে করিব। ও জিনিসটা এমন যে, উহা হারাইয়াছে, মনে করিলেই, উহা যে হাতে ছিল, তাহার প্রমাণ হয়।

তিনি। তোমায় আমায় আর ওরূপ হেঁদো কথায় কাজ নাই। আমি নিজ জীবনবৃত্তের কিঞ্চিৎ বলিতেছি, তাহা শুনিলেই আমার মনের সকল ভাব বুঝিতে পারিবে। আমার জন্মস্থান আয়ারল্যান্ড দ্বীপ—আমার পিতা রোমান ক্যাথলিক ধর্মাবলম্বী ছিলেন—আমি ডব্লিন নগরে একটা কলেজে শিক্ষা লাভ করিয়াছিলাম—১৮৪৮ অব্দে সমুদয় ইউরোপ ব্যাপক যে রাষ্ট্র বিপ্লব হইয়াছিল, সেই বিপ্লবের একটা ঢেউ আয়ারল্যান্ডে আসিয়া লাগে এবং তথায় উপদ্রব জন্মায়। আমি কয়েকজন সমাধায়ীর সহিত ঐ উপদ্রবে যোগ দিয়াছিলাম। আমাদের মনে জাতীয় ভাবের অত্যধিক উদ্রেক হইয়াছিল। ইংরাজ গবর্ণমেন্ট ঐ উপদ্রব শাস্ত করিলেন। আমি জেলে গেলাম। পরে জেল হইতে পলাইয়া ফরাসিদিগের দেশে আশ্রয় লাভ করিয়া বহু বৎসর ঐ দেশে বাস করিয়াছিলাম। অনন্তর ইংলণ্ডে আসিয়া কেম্ব্রিজ বিশ্ববিদ্যালয়ে প্রবিষ্ট হই, এবং বয়োবৃদ্ধি-সহকারে আমার এই প্রতীতি জন্মে যে, আমার হৃদয়স্থিত সংকীর্ণ আইরিস জাতীয় ভাবটী, সুবিস্তীর্ণ ব্রিটিশ জাতীয়ভাবে পর্য্যবসিত হওয়াই উচিত। এখন তাহাই হইয়াছে, এবং তাহা হইয়াছে বলিয়াই বলিতেছি যে, তোমাদিগেরও এই উখানোমুখ ভারতবর্ষীয় ভাব ব্রিটিশ জাতীয়ভাবে পর্য্যবসিত হওয়া বিধেয়।

আমি। আপনার জীবনবৃত্তের যে ব্যাপারগুলি শুনিলাম, তাহাতে দুইটা তথ্য উপলব্ধ হইল। এক তথ্য এই যে, আপনি আমাদের মনের ভাব অনেকটা বুঝিতে পারিবে। দ্বিতীয় তথ্য এই যে, অনেকটাই বুঝিতে পারিবে না। বুঝিতে পারিবে যে, আমরা বাঁচিয়া থাকিতে চাই, একেবারে ইংরাজের জিনিস হইয়া

মাইতে চাহি না। বুঝিতে পারিবে না যে, আমরা ইংলণ্ড হইতে স্বাভাবিকতা চাহি না, অন্ততঃ বহুকালের জন্ত তাহা চাহি না। তোমাদের মনে যেমন জাতীয় ভাবের উদ্রেক হয়, অমনি তোমরা ইংরাজের বিরুদ্ধে বিদ্রোহ করিয়া বৈস। আমাদের মনে জাতীয় ভাবের উদ্রেকে আমরা রাজবিদ্রোহ করিতে চাই না।—আমরা বেশী করিয়া ইংরাজী শিখি, বেশী করিয়া সংস্কৃতির সমাদর করি, কাজকর্ম এমন যত্ন এবং শ্রম-সহকারে নির্বাহ করিবার চেষ্টা করি, যাহাতে ইংরাজ রাজপুরুষেরাও আমাদের দ্বারা পরাস্ত হইয়েন। স্বজাতীয় কোন মনিবের অধীনে থাকিয়া যদি চাকুরি করিতে হয়, তাহা বিশেষ যত্ন এবং পরিশ্রমসহকারে নির্বাহ করি। মুসলমানকে নেড়ে বলিয়া পশ্চিমে লোককে মেড়ুয়া বলিয়া দক্ষিণাঞ্চলবাসীদিগকে কদাকার বলিয়া অশ্রদ্ধা করা অতিশয় দুষ্কর্ম মনে করি—আর সম্মান-সম্মতিকে দৃঢ়কায়, পরিশ্রমী, বিদ্বান্ এবং স্বধর্মনিষ্ঠ ও স্বজাতির মুখাপেক্ষী করিবার নিমিত্ত নিরন্তর প্রাণপণ যত্ন করি।

তিনি। ঐগুলি ত অতি সাধারণ কাজ বলিয়াই বোধ হয়। স্বজাতিবৎসল না হইলে কেহ স্বদেশবৎসল হইতে পারেন না। ঐ সকল কাজে জাতীয় ভাব বর্দ্ধনের উপায় হয় বটে, কিন্তু জাতীয় ভাব উৎপাদনে উহাদিগের তেমন বিশেষ উপযোগিতা নাই। রাজনীতিক বিষয়ে বিচার করিবার জন্ত সভা স্থাপন করা—প্রকাশ্যে বক্তৃতা করা—পুস্তিকা বিরচন করা, এই সকল কার্যের প্রতি তুমি কি আস্থাশূন্য?

আমি। ও সকল কাজে আমার আস্থা নাই, এমত নহে, তবে ওগুলির প্রতি আপনাদিগের যতটা আস্থা আছে বলিয়া

মনে করি, আমার আস্থা, বোধ হয় তত অধিক নয়। ওগুলি ইংরাজাধিকারে ইংরাজী শিক্ষার অবশ্যস্বাবী ফল, এবং নিরবচ্ছিন্ন অমুচিকীর্ষা-প্রসূত, এই জ্ঞাত কিয়ৎ পরিমাণে অবশ্যই অন্তঃসারশূন্য। আমি দুইটা দৃষ্টান্ত-দ্বারা দেখাইতেছি, বক্তৃতা-দ্বারা আন্দোলনের ফল কিরূপ হয়। প্রথমটা সফল আন্দোলনের দৃষ্টান্ত। কোন সময়ে ইংরাজ-ভূম্যধিকারিগণের পক্ষপাতী ব্যবস্থার বলে ইংলণ্ডে বৈদেশিক শস্তের আমদানী বন্ধ ছিল। সেই ব্যবস্থা রহিত করিলে ইংলণ্ডের প্রজাসাধারণের উপকার হইবে, এই কথা প্রতিপন্ন করিবার জ্ঞাত কব্‌ডেন সাহেব সভা সংস্থাপন, প্রকাশ্যে বক্তৃতা প্রদান, এবং পুস্তিকা রচনা-দি করাইয়া যৎপরোনাস্তি প্রয়াস পাইয়াছিলেন। পরিশেষে হুভিন্স উপস্থিত হওয়াতে মজিদল অগত্যা তাঁহার মতামুবর্তনে প্রবৃত্ত হইয়াছিলেন। এ স্থলে ইংরাজে ইংরাজে কথা, অর্থাৎ লাভের ভাগীও ইংরাজ, আর লোকসানের ভাগীও ইংরাজ—আবার তাহাতে একটা হুভিন্সের সমাগম। যদি এরূপ মণিকাঞ্চনযোগ উপস্থিত না হইত, তাহা হইলে কি কব্‌ডেন সাহেবের কৃত আন্দোলনের কোন ফল দর্শিত? দ্বিতীয় দৃষ্টান্তটা একটা বিফল আন্দোলনের। এই আন্দোলনের ক্ষেত্র আপনায়ই জন্মভূমি আয়ল'ণ্ড। এই আন্দোলনের কর্তা কব্‌ডেনের অপেক্ষাও শতগুণে শ্রেষ্ঠ—বাগ্‌মির ওকোনেল সাহেব। আয়ল'ণ্ডের কাথলিক সম্প্রদায়ভুক্ত আবালবৃদ্ধবনিতা যাবতীয় ব্যক্তি ওকোনেলকে দেবতুল্য ভক্তি করিত—দুই দিন চারি দিন, দশ দিনের পথ হইতে তাঁহার বক্তৃতা শুনিতে আসিত; তিনি হকুম করিয়া পাঠাইলেই কাথলিক যাজকদল চতুর্দিক হইতে লোক সংগ্রহ করিয়া সমভিব্যাহারে আনিত, ও লইয়া যাইত। তাঁহার

অল্পচরের এবং পারিষদের কোন অভাব ছিল না।—তিনি সমস্ত আয়লণ্ডের একাধিপতির স্বরূপ হইয়াছিলেন। কিন্তু তৎকৃত রাজনীতিক আন্দোলনের ফল ক হইল? পুলিশ হইতে যেমন পরওয়ানা বাহির হইল, অমনি লোকসমাগম থামিল—রাজ্যের উপদ্রাবক বলিয়া মহাত্মা ওকোনেল আদালতে অভিযুক্ত হইলেন—তিনি জেলে গেলেন—কয়েকবর্ষ সেইখানে থাকিতে থাকিতেই তাঁহার বল, বুদ্ধি, স্থৈর্য্য, গাভীর্ঘ্য, বাগ্মিতা সকলই বিলুপ্ত হইয়া গেল—তিনি পরে দেশত্যাগী হইয়া বন্ধুবান্ধববিহীন পররাজ্যে দেহত্যাগ করিলেন।

তিনি। ওকোনেল নিজের দোষেই সকল হারাইয়াছিলেন। তিনি যেমন বাগ্মিপ্রধান যদি তেমনি কার্য্যকুশল হইতেন, তবে আর দেশের লোকেরা তাঁহাকে পরিত্যাগ করিত না। আয়লণ্ড অবশ্য স্বাধীনতা লাভ করিত।

এই কথাগুলি বন্ধুদের কিছু ব্যগ্রতা-সহকারে এবং একটু উচ্চৈঃস্বরে বলিয়া ফেলিলেন। কিন্তু কথাগুলি তাঁহার মুখ দিয়া বাহির হইবামাত্র বুঝিতে পারিলেন যে, এখনও তাঁহার নিজের মন হইতে জাতীয় ভাবটা অপনীত হয় নাই। সেই যৌবনাবস্থার—সেই ৪৮ অব্দের অগ্নি এখনও নির্বাপিত হয় নাই—উহা এত দিনের পর ধক্ করিয়া জলিয়া উঠিল।

ভূদেব মুখোপাধ্যায়

জাতীয় ভাব—ইহার উপাদান

পূৰ্বে প্রবন্ধে যে সরলচেতা, সাধুশীল, সত্যবাদী ইউরোপীয় মহাশয়ের উল্লেখ করিয়াছি, তিনি মনে করিয়াছিলেন যে, তাঁহার জাতীয় আইরিস ভাবটী, তাঁহার জাতীয় ব্রিটিস ভাবে মগ্ন হইয়া গিয়াছে। কিন্তু তিনি সরল মনে কথা কহিতে কহিতে স্বয়ং বুঝিতে পারিলেন যে, তাঁহার হৃদয়ের অন্তস্তলে প্রকৃত জাতীয় ভাবের মূলটী অক্ষুণ্ণ রহিয়াছে—উপরে যতই চাপা পড়ুক, ভিতরে স্বদেশের এবং স্বজাতির প্রতি অনুরাগ কিছুমাত্র ন্যূন হয় নাই।

বস্তুতঃ স্বদেশের এবং স্বজাতির প্রতি অনুরাগ কাহারই কখন একেবারে যাইতে পারে না। অন্তঃকরণ বৃত্তির সংগঠন ইঞ্জিয়-দ্বারা সংগৃহীত বাহ্যবস্তুনিচয়ের বিভূতি সমবায়ের জন্মে। সকল দেশেরই বাহ্যবস্তু সমূহের প্রকৃতিতে এক একটী বিশেষ লক্ষণ আছে। একদেশজাত এবং একদেশপালিত ব্যক্তিদিগের পক্ষে, বাহ্য প্রকৃতি একরূপ হওয়াতে এবং একদেশজাত জনগণ পরস্পর সংস্পৃষ্ট থাকাতে তাঁহাদিগের অন্তঃকরণবৃত্তিও একরূপ হইয়া যায়। এই একরূপতাই স্বদেশের এবং স্বজাতির প্রতি ভালবাসার গূঢ় কারণ এবং সেই কারণ, পুরুষপরম্পরাক্রমে কার্যকারী হওয়াতে জাতীয় ভাবটী মনুষ্যের অন্তরাত্মাকে অতি গূঢ়তর রূপেই অধিকার করিয়া থাকে।

উল্লিখিত কারণসমূহ মৌলিক জাতীয় ভাবটী জনগণের অন্তঃকরণ-গঠনের বিশিষ্টতায় এবং নানা বাহ্য সাদৃশ্যে প্রকট

হয়। তাহার মধ্যে (১) আকার এবং রূপ-সাদৃশ্য, (২) ধর্ম এবং আচার-সাদৃশ্য, (৩) ভাষা এবং উচ্চারণ-সাদৃশ্য, (৪) রাজ্য-শাসন এবং সামাজিক প্রণালীর সাদৃশ্য—এই কয়েকটি অতি প্রধান। তত্ত্বিন্ন পরিচ্ছদে, গৃহনির্মাণে, গৃহোপকরণে, ভোজনাদি বিবিধ অল্পাধানে একজাতীয় লোকের মধ্যে অনেক প্রকার সাদৃশ্য উপলব্ধি হয়। এই সকল প্রধান এবং অপ্রধান উভয় প্রকার সাদৃশ্যের উপলব্ধি এবং তজ্জনিত একটা বিশেষ সহানুভূতি, যে সকল লোকের মধ্যে দৃষ্ট হয়, সেই সকল লোকের হৃদয়ে জাতীয় ভাব বিশিষ্টরূপই প্রকটিত হইয়া আছে, বলা গিয়া থাকে।

এস্থলে আর একটা কথা আছে। সাদৃশ্যের উপলব্ধি দুই প্রকারে হয়। উহা বিধিমুখেও হয় আর নিষেধমুখেও হয়। অমুক অমুকের সদৃশ, একরূপে সাদৃশ্য জ্ঞান হইতে পারে; আর অমুক অমুক হইতে বত বিসদৃশ, অমুক তত বিসদৃশ নয় একরূপেও সাদৃশ্যের উপলব্ধি হইতে পারে।

এখন এই ভারতভূমির প্রতি উল্লিখিত সূত্রগুলি প্রয়োগ করিয়া দেখা যাউক, এতদেশবাসীদিগের জাতীয় ভাবে, ঐ সূত্রগুলি খাটে কি খাটে না এবং কতদূর খাটে।

প্রথমতঃ দেখা যাইতেছে যে, ভারতবর্ষ একটা মহাদেশ। ইহাতে সমুদ্র এবং পর্বত, উষ্মভূমি এবং উর্বরভূমি, উপত্যকা এবং অধিত্যকা, জলময় প্রদেশ এবং জলহীন প্রদেশ, সর্বপ্রকার প্রাকৃতিক ভেদ লক্ষণে লক্ষিত স্থান সকল আছে—ভারতবর্ষ সমস্ত পৃথিবীর প্রতিকৃতি স্বরূপ। ফলতঃ এইটাই ভারতবর্ষ দেশের বিশিষ্টতা এবং এই জন্তই এতদেশবাসীদিগের হৃদয়ে অনন্যদেশ-সাধারণ একটা বিশিষ্ট ভাবের অধিষ্ঠান হইয়া আছে। ইহার

সংকীর্ণনা হয় না, ইহাদের প্রকৃতি সহজেই অতি উদারভাবসম্পন্ন হয়। ভারতবর্ষের বিভিন্ন প্রদেশবাসী জনগণের মধ্যে অপর যতই পার্থক্য থাকুক, ইহার সকল ভাগেরই লোকদিগের চিত্তে একটা চমৎকার উদারতা আছে। ইহারা পৃথিবীর অপর সকল জাতীয় লোক অপেক্ষা পরকে আপনায় করিয়া লইতে পারে। ইহাদিগের সর্ব প্রদেশেরই সুপ্রসিদ্ধ কবিগণ ভেদবুদ্ধির দোষ এবং উদারতার গুণকীর্তন করেন। এই জন্যই ভারতবর্ষীয়েরা সর্ব প্রদেশেই এমনি আতিথেয় যে, এক কপর্দকও পাথেয় সম্বল না লইয়া বিদেশীয়েরাও এই মহাদেশের সর্বত্র পরিভ্রমণ করিতে পারেন।

ভারতবর্ষীয়দিগের এই মৌলিক বিশিষ্টতার বিকাশ, তাঁহাদিগের অত্যুদার ধর্ম-প্রণালীতে অতি সুস্পষ্টরূপেই দৃষ্ট হয়। ভারতবর্ষীয়দিগের শাস্ত্রে পরধর্মের প্রতি বিদ্বেষভাব একেবারেই নিষিদ্ধ হইয়া আছে, এবং অধিকারিভেদের ব্যবস্থার দ্বারা ধর্মসম্বন্ধীয় সর্ব প্রকার গোলযোগের মূল পর্য্যন্ত একেবারে নিরাকৃত হইয়া আছে। অপর কোন দেশের ধর্মপ্রণালীতে অধিকারিভেদের উল্লেখ নাই। ভারতবর্ষীয়দিগের ধর্মসম্বন্ধীয় বিশিষ্টতার এই চরম দৃষ্টান্ত।

মূল দৃষ্টিতে দেখিলে, আচার লইয়া ভারতবর্ষীয়দিগের মধ্যে বড়ই আঁটা আঁটি এবং ঝগড়া ঝাঁটি দেখা যায় বটে, কিন্তু ছুই একটা ক্ষুদ্র প্রদেশ ভিন্ন ইহার কোন বিস্তৃত ভাগের প্রচলিত আচারের সহিত অত্র বিস্তৃত ভাগের প্রচলিত আচারের তুলনা করিলে উভয়ের মধ্যে বিলক্ষণ সাদৃশ্য দেখিতে পাইবে। ইহাদিগের পরস্পরে যতই আচারভেদ থাকুক, অপর জাতীয়দিগের সহিত যত, আপনাদিগের মধ্যে কুত্সাপি তত নয়।

ভারতবর্ষের মধ্যে অনেকগুলি ভিন্ন ভিন্ন ভাষা প্রচলিত আছে সত্য, কিন্তু যখন সংস্কৃত-ভাষী আর্যেরা সমস্ত দেশে ব্যাপক হয়েন নাই তখন ভারতবর্ষে যত ভাষাভেদ ছিল এখন আর তত নাই। এখনও যাহা আছে, তাহার প্রতি এক সংস্কৃত ভাষার শক্তি অক্ষুণ্ণ প্রযুক্ত হইতেছে, এবং তদ্বারা প্রদেশীয় বিভিন্ন ভাষাগুলিকে ক্রমশঃ পরস্পরের সন্নিহিত করিতেছে। কোন একখানি নব্য মহারাষ্ট্রীয়, কি তেলুগু, কি হিন্দি, কি বাঙ্গালা, কি উড়িয়া পুস্তক লইয়া দেখ, সকল ভাষাই এক সংস্কৃত হইতে আপনাপন উপজীব্য শব্দ সকল গ্রহণ করিতেছে, এবং সকল-গুলিই ভারতবর্ষীয় মাত্রের আশু বোধগম্য হইয়া আসিতেছে। উচ্চারণ প্রণালী সকল ভারতবর্ষীয় লোকেরই যে একবিধ, তাহার অপর প্রমাণের প্রয়োজন নাই—এই বলিলেই হইবে যে সংস্কৃত বর্ণমালাতে ভারতবর্ষের সকল ভাষাই লিখিত হয়; তামিল ভাষাতে সকল বর্ণের ব্যবহার হয় না বটে, প্রতি বর্ণের আন্তরঙ্গ-দ্বারা তত্ত্বগীর্ণ সকল বর্ণের কার্য্যসিদ্ধি হয়, কিন্তু তাহাতে, উচ্চারণের যেমন পার্থক্য বুঝায়, তাহা তেমন মৌলিক পার্থক্য নহে, স্মৃতরাং কালক্রমে সে পার্থক্যও বিলুপ্ত হইবার সম্ভাবনা। মুসলমানদিগের কতক শব্দের উচ্চারণ এরূপ যে সংস্কৃত বর্ণমালায় সেগুলি অবিকল লিখিত হয় না। কিন্তু থ এবং জ এই দুইটা মাত্র বর্ণ সৃষ্টি হওয়াতে সে ক্রটি আর লক্ষিত হয় না। আর বঙ্গদেশীয় মুসলমানদিগের কাব্য গ্রন্থাদিতে ঐ ক্রটি তাঁহাদিগের নিকটেও ধর্ম্মব্যবহৃত নাই।

সমস্ত ভারতবর্ষের রাজ্যশাসন এক্ষণে সর্ব্বতোভাবে এক হইয়া উঠিয়াছে। ইংলণ্ডের অধীশ্বরী এখন ভারতেশ্বরী হওয়াতে আমরা সকল ভারতবর্ষীয় এক সম্রাটের অধীনে এক মহাসাম্রাজ্যবাসী বলিয়া

আপনাদিগকে সুস্পষ্টরূপেই জানিতেছি। এক্ষণে আমাদের সাধারণ সুখ, দুঃখ, আশা, ভরসা, আকাঙ্ক্ষা এবং নৈরাশ্য, এক-স্থূত্রে সম্বন্ধ হইয়া উঠিয়াছে। পূর্বে পূর্বে এতদূর না হউক, কখন কখন ভারতবর্ষের অতি সুবিস্তৃত ভূমিভাগ সকল একচ্ছত্রের অধীন হইত—মাক্কাতা, শ্রীরামচন্দ্র, যযাতি, যুধিষ্ঠির, বিক্রমাদিত্য, অশোক প্রভৃতি আর্য্য নরপালগণ সাম্রাজ্য সংস্থাপন করিয়া-ছিলেন—আর আকবর সাহ প্রভৃতি কয়েকজন মুসলমান সম্রাটও ভারতভূমির অনেকানেক প্রদেশ আপনাদিগের করতলস্থ করিয়া রাখিয়াছিলেন। তাঁহাদিগের সেই সকল সাম্রাজ্য স্থাপনের ফলে ভারতবর্ষের বিভিন্ন ভাগের পরস্পর সম্মিলনোপায় অনেক দূর সুসিদ্ধ হইয়াছিল। তাহার উপর এক্ষণে যে অচ্ছেদ্য, অভেদ্য আয়সশৃঙ্খলে ভারতবর্ষের সমস্ত প্রদেশ দৃঢ়সম্বন্ধ হইল—ইহার ফল আরও অনেক অধিক হইবে এবং সম্বরেই ফলিবে।

সামাজিক রীতি নীতি, আচার প্রণালীর দ্বায়, ভারতবর্ষের সর্বত্রই যে সমপ্রকৃতিক তাহা অপর জাতিদিগের রীতি পদ্ধতির সহিত তুলনা করিলেই স্পষ্টরূপে প্রতীত হয়। অপর জাতিদিগের সহিত আমাদের সকলেরই পার্থক্য যত অধিক—নিজেদের মধ্যে পৃথক্ ভাব তত নয়। ভারতবর্ষের যেখানেই যাইবে, সর্বত্রই ঘর দ্বারের শ্রীহাদ, খাওয়া দাওয়ার পারিপাট্য, ক্রিয়া কলাপের রীতি পদ্ধতি মোটামুটি একই প্রকার দেখিতে পাইবে।

অতি সুবোধ এবং বহুদশী কোন ইউরোপীয়ের সহিত ১৮৬০ অব্দে, এই সকল বিষয়ে, আমার কথা হইয়াছিল। তিনি বলিয়াছিলেন—“ভারতবর্ষীয়দিগের মধ্যে পরস্পর যেরূপ পৃথক্ ভাব আছে, তাহা কোন্ বৃহৎ সাম্রাজ্যে নাই?—রুসিয়ার

ভিতরে, স্রষ্টার ভিতরে ইহা অপেক্ষা অধিক না ইউক, ন্যূন নয়। এখন মৌলিক বর্ণভেদের পার্থক্য ধরিয়া ইউরোপে জাতি সংঘটনের কতক চেষ্টা হইতেছে। ফরাসী সম্রাট তৃতীয় নেপোলিয়ন্ লাটিন বংশীয় স্পেনীয় এবং ইটালীয়দিগকে ফরাসীদিগের সহিত ঐক্যমত অবলম্বন করাইতে চাহেন—রুস সম্রাট শ্লাভ বংশীয় সকল লোককে রুসের সহিত সম্মিলিত হইতে বলেন—টিউটন্ বংশীয় জার্মানেরা প্রুসিয়ার অধিনায়কতা স্বীকার করিয়া ডেনমার্ক এবং হলণ্ডের প্রতি অতি লোলুপ দৃষ্টিপাত করিয়া থাকেন। বিভিন্ন জাতীয়দিগের স্ব স্ব বর্ণাত্মকতা লইয়া অনেকটা লড়াই ঝগড়া, মারামারি, কাটাকাটি হইবে এবং ইউরোপীয়দিগের জাতি সংঘটনে কতকটা বর্ণাত্মকতা সংসাধিত হইবে সন্দেহ নাই। কিন্তু জাতীয় ভাব বর্ণাত্মকতাতেই নিবদ্ধ নয়। দেখ, মাদ্রাজ প্রদেশীয় লোকেরা তোমার বর্ণের লোক নহে, সে বিষয়ে তাহাদের অপেক্ষা আমার সহিত তোমার মিল অধিক। কিন্তু মাদ্রাজীদের সহিত তোমার ধর্মে মিল, সামাজিক রীতিতে মিল, আর সর্বাপেক্ষা প্রধান, আর একটা বিষয়ে মিল।” আমি জিজ্ঞাসা করিলাম, সে সর্বপ্রধান বিষয়টি কি? তিনি বলিলেন—“লোক সকলের মধ্যে সকল প্রকার বিভেদকে নষ্ট করিয়া সম্মিলন এবং একতা জন্মাইবার অমোঘ উপায়, এক রাজার শাসন এবং এক শাসনপদ্ধতি—এই উপায়ের দ্বারা বিভিন্ন প্রকৃতিক, বিভিন্ন ভাষাভাষী, বিভিন্ন বর্ণসম্মত জনগণের মধ্যেও জাতীয় ভাব জন্মে, কারণ, এক শাসনপদ্ধতির অবশ্রম্ভাবী ফল, জনগণের সমসুখদুঃখতা বা সহানুভূতি; এবং তাহাই জাতীয় ভাব জন্মিবার সর্বপ্রধান কারণ, এবং ঐ ভাবের সর্বপ্রধান লক্ষণ।”

তিনি যাহা যাহা বলিয়াছিলেন, তাহার কতকটা অবিকল ফলিয়াছে। তাঁহার কথা যে ইউরোপ সম্বন্ধে আরও ফলিবে, তাহার অনেক চিহ্ন স্পষ্টরূপে দেখা যাইতেছে। তিনি ভারত-বর্ষীয়দিগের সম্বন্ধে যাহা বলিয়াছিলেন তাহাও কি অসিদ্ধ হইবে না? তাহারও কি অস্ফুট লক্ষণ দেখা যাইতেছে না? আমার বোধ হয় ভারতবর্ষীয়দিগের মধ্যে জাতীয় ভাব গ্রহণের প্রকৃত অধিকারীর সংখ্যা ক্রমশঃ বদ্ধিত হইবে, ইহাদিগের পরস্পর সহানুভূতি দিন দিন বাড়িতে থাকিবে, এবং তাঁহার অনুমান ঠিক হইয়া দাঁড়াইবে।

ভূদেব মুখোপাধ্যায়।

দলাদলি

প্রত্যেক পরিবার এক একটি ক্ষুদ্র রাজ্য। সেই ক্ষুদ্র রাজ্যগুলি একটি বৃহত্তর রাজ্যের অন্তর্ভুক্ত। সেই বৃহত্তর রাজ্যের নাম সমাজ। অতএব সমাজের শাসন মানিয়া তাহার অঙ্গীভূত পরিবারগুলিকে চলিতে হয়। যে সকল দেশের রাজায় এবং সমাজে ভিন্ন ভাব নাই, প্রত্যুত রাজা এবং তাঁহার প্রতিনিধি রাজপুরুষেরাই সমাজের নেতা এবং রক্ষক, সে সকল দেশেও রাজশাসন ভিন্ন একটি সমাজশাসন থাকে। কিন্তু সেখানে রাজশাসনে এবং সমাজশাসনে ব্যাপ্য-ব্যাপক ভেদ মাত্র দেখা যায়। সেখানে রাজশাসন যে যে বিষয় গ্রহণ করে, সমাজশাসন সেগুলিকে ত গ্রহণ করেই, তন্নিম্নে অপর অনেকানেক ব্যাপারেও সমাজশাসনের হস্ত বিস্তৃত হয়। চুরির নিষেধ রাজশাসন হইতেও হয়, আর সমাজশাসন হইতেও হয়। কিন্তু ‘এই এই প্রকার বজ্র পরিধান করিবে’ ইত্যাদি কথা সমাজশাসনের মুখে শুনা যায়, রাজশাসন এমন সকল বিষয়ে বিশেষ কিছুই বলেন না। বস্তুতঃ রাজশাসন অপেক্ষা সমাজের শাসন অধিকতর ব্যাপক। কিন্তু তাহা হইলেও এই বঙ্গদেশে সমাজশাসনের গৌরব বড় অল্প নহে। যে দেশে রাজায় এবং সমাজে ভিন্ন ভাব, সে দেশে রাজা এবং রাজপুরুষেরা সমাজের রক্ষক এবং নেতা না হইয়া তাহার প্রতি উদাসীন বা তচ্ছিন্ন অথবা স্বর্ণা কিম্বা বিষেব-সম্পন্ন,

সেখানে সমাজশাসনের বল কুণ্ঠিত হইয়া থাকে। সমাজশাসন কুণ্ঠিত হইলে ক্রমশঃ জাতীয় ভাবও বিনুগ্ধ হইয়া যায়, জনগণের মধ্যে পরস্পর সহানুভূতির ন্যূনতা জন্মে এবং ধর্মবুদ্ধির মূল অশক্ত হইয়া পড়ে।

আমাদের এই পরাধীন দেশে এখন ঐরূপ হইতেছে। আমাদের রাজা ভিন্ন-জাতীয়, ভিন্ন-ধর্মাবলম্বী; এবং অনেক-স্থলেই আমাদের সামাজিক নিয়মের এবং শাসনের বিচ্ছেদ। কোন অপরাধের জন্ত কাহার ধোপা নাপিত হাঁকা বন্ধ করা, তাহাকে একঘরিয়া করা প্রভৃতি সামাজিক শাসনের সহিত রাজপুরুষেরা সহানুভূতি প্রকাশ করিতে পারেন না। বরং বাহার প্রতি ঐরূপ সমাজশাসন বিহিত হইয়াছে, সে ব্যক্তি যদি রাজদ্বারে যাইয়া নালিশ করে, তবে কোনরূপে দণ্ডবিধি আইনের মধ্যে ফেলিয়া উক্তরূপ সামাজিক শাসন-বিধানকারী সমাজের নেতৃবর্গকে দণ্ডিত করিতে পারা যায় কি না, সেই দিকেই যেন প্রথমে রাজপুরুষদিগের দৃষ্টি যায় বলিয়া অনেকেরই বিশ্বাস। “আক্রমণ” “ভয় প্রদর্শন” “মিথ্যাপবাদ রটন” প্রভৃতি অপরাধ-সম্বন্ধে ইংরাজী দণ্ডবিধি আইনের ধারাগুলি এমনি দুরব্যাপী যে, কাহাকেও সমাজশাসনে শাসিত করিবে অথচ দণ্ডবিধি আইনের এইরূপ কোন একটি ধারার মধ্যে পড়িয়া দণ্ডনীয় হইবে না, এরূপ হওয়া একেবারে অসম্ভব বলিলেও চলে। তবে যদি সমগ্র সমাজের লোক একজোট হয়, যদি প্রকৃত প্রস্তাবে অপরাধীর প্রতি সকলেরই ঘৃণার উদ্রেক হয়, তাহা হইলে, অপরাধীর সহিত সমাজস্থ সকলের বাক্যালাপ পর্যন্ত বন্ধ হইয়া যাওয়ার সকল বিঘ্ন বিপত্তি অতিক্রম করত

সমাজশাসন অপ্রতিহত প্রভাবে কার্যকারী হইতে পারে। তখন অগত্যা তাহাকে সমাজের পায়ে পড়িয়া সমাজ কর্তৃক বিহিত হিন্দু ধর্ম্মানুমোদিত প্রায়শ্চিত্তাদিরূপ শারীরিক ও আর্থিক দণ্ড গ্রহণ করিতে বাধ্য হইতে হইবে এবং সেই দণ্ডের দৃষ্টান্তে অপরেও অনেকটা আত্মসংযম শিক্ষা করিবে—ওরূপ অপরাধ করিতে আর সাহসী হইবে না। কিন্তু ফলে আর এখন সেরূপ হয় না। দেশমধ্যে ধর্ম্মভাবের ন্যূনতা ঘটায় অপরাধী ব্যক্তিকে আর আজকাল একক হইয়া পড়িতে হয় না। অর্থবল থাকিলে অথবা সমাজের নেতাদিগের পরস্পরের মধ্যে যে ঈর্ষ্যা ও বিদ্বেষভাব আছে, কৌশলপূর্ব্বক বিশিষ্টরূপে তাহার উদ্বেক করিয়া ফেলিতে পারিলে, সকল অপরাধী ব্যক্তিই একটা দলাদলি বাধাইয়া ফেলিতে পারে।

(১) “উনি একঘরে কর্বেন বলেছেন, কেন উনি সমাজের ষোল-আনা নাকি ! আমিও ব্রাহ্মণ-সজ্জনকে দু দশ টাকা দিয়া থাকি ; আমারও লোকবল আছে। দেখি গুঁর দলেই বা কজন হয়, আমার দলেই বা কজন থাকে।” (২) “তুমি যখন আমার কাছে আসিয়া পড়িয়াছ, তখন তোমার কোন চিন্তা নাই। দেখি কাহার সাধ্য তোমাকে একঘরে করে। আপনার বেলা এক রকম, অপরের বেলা অন্য নিয়ম ! আহা ! কি সাধু পুরুষ রে ! নিজের দোষগুলি একবার স্মরণ করিয়া দেখুন না।” (৩) “তোমাকে একঘরে করিবে বলিয়া শাসাইয়াছে ? কাল যার বাপ গামছা কাঁধে ক’রে বাজার ক’রে মাসে আড়াই টাকা রোজগার করিত, আজ ঠিকেদারীর চুরিতে তার কিছু টাকা হয়েছে বলে সে বা ইচ্ছা তাই করবে নাকি ? শর্ম্মা বেঁচে থাকতে ত তা

হচ্ছে না ! এখনও মগের মুলুক হয় নাই !”—এরূপ কথার প্রয়োগ এবং তদনুরূপ ব্যবহার অনেক স্থলেই লক্ষিত হয় !

সমাজ-মধ্যে ধনলোভ এবং ঈর্ষ্যা বিষেষ বৃদ্ধি পাইয়া অধর্মের প্রতি লোকের ঘৃণা কম হইয়া পড়িতেই এদেশে সমাজের শাসন ক্রমেই দুর্বল হইয়া পড়িতেছে এবং দলাদলিরও প্রাচুর্য বাড়াইতেছে । অপরাধীর পক্ষ গ্রহণ করিতে কাহারও আর লজ্জা-বোধ বা সঙ্কোচ হইতেছে না । সমাজের মধ্যে ঠাঁহারা প্রধান ঠাঁহারা আর তত পর কালের ভয় করেন না । দূরদর্শন অভাবে সমাজে নৈতিক শাসনের জ্ঞাও ঠাঁহারা আর তত একাগ্র নহেন । সুতরাং সমাজের এক অংশ দুষ্টির দমন ইচ্ছা করিলে অপর এক অংশ আগ্রহসহকারে অপরাধীর সাহায্যে প্রবৃত্ত হয় ! দলাদলি একবার প্রকৃত প্রস্তাবে বাধিয়া গেলে স্বপক্ষীয় দুষ্টির পালনই যেন পরম ধর্ম বলিয়া প্রতীত হইতে থাকে । দলাদলির আক্রোশে এতটা ধর্ম লোপ হয় যে, তজ্জন্ম কোথাও কোথাও জ্ঞাতিদিগের মধ্যে অশোচগ্রহণ এবং একত্র ঘাট কামান প্রভৃতি সনাতন ধর্ম্মানুযায়ী দেশব্যাপী প্রথা সকলেরও ব্যতিক্রম হইয়া নৈতিক অবনতির অতি শোচনীয় অবস্থা সৃচিত করে । অথচ ঐ দলাদলির মধ্যে কোন দুষ্টির দমনের উল্লেখ পর্য্যন্ত নাই । এখন অধিকাংশ দলাদলিই বিষয় সম্পত্তি লইয়া অথবা শুধু ধনগর্ভিত জ্ঞাতিদিগের মধ্যে ঈর্ষ্যা-সম্ভূত মনাস্তর হেতু গ্রামের মধ্যে পুরুষানুক্রমিক দলবন্ধন মাত্র । এই প্রকার দলাদলি একান্তই ধর্ম্মহানিকর । সাধারণ মানুষকে খাঁটি রাখিবার জ্ঞা সামাজিক শাসন একান্তই প্রয়োজনীয়, এবং পূর্বেই বলা গিয়াছে যে, দলাদলি ঘটিলে সামাজিক শাসনের কার্যকারিতা অনেক পরিমাণেই নষ্ট হয় ।

মহুশ্বের দুপ্রবৃত্তি দমন-জ্ঞাত সামাজিক শাসন ইংরাজদিগের মধ্যেও কমিতেছে বটে, কিন্তু এখনও বেশ প্রবল আছে। এক সময়ে উহারা ধর্মমতবাদ-সম্বন্ধেও সমাজের শাসন প্রয়োগ করিতেন। রোমান কাথলিকেরা এবং প্রোটেস্ট্যান্টেরা উভয়েই সমাজ-মধ্যে প্রতিপক্ষীয় মতাবলম্বীদিগের স্থান দিতে চাহিতেন না—সকলেই কাথলিক হয় বা সকলেই প্রোটেস্ট্যান্ট হয়, বলপ্রয়োগপূর্বক সেরূপ চেষ্টা করিতেন। কাথলিকে এবং প্রোটেস্ট্যান্টে বিবাহাদি এমন কি আহালাদি পর্যন্ত সমাজশাসনে বন্ধ ছিল। কাথলিক ধর্মাবলম্বিনীর গর্ভজাত সন্তান ইংলণ্ডের রাজাসন পাইবে না আজও সেই প্রাচীনকালের দলাদলিপ্রসূত ব্যবস্থা প্রবল রহিয়াছে। এখন মতবাদাদি সম্বন্ধে উহাদের মধ্যে সামাজিক শাসন ওরূপ প্রকট নাই বটে, কিন্তু আচার ব্যবহার বেশভূষা সম্বন্ধে শাসন খুবই আছে। অনেক গুরুতর নৈতিক দোষকে ইংরাজেরা সামাজিক দোষ বলিয়াই ধরেন না বটে, এবং অনেক সময়ে স্বজাতীয়ের পক্ষপাতিতা জ্ঞাত সমস্ত নীতির উপর পদাঘাত করাই উহারা উচিত মনে করেন বটে, কিন্তু যাহা উহাদের সমাজ-মধ্যে দোষ বলিয়া স্থির আছে, তজ্জ্ঞাত সামাজিক শাসন বেশ দৃঢ়রূপেই প্রযুক্ত হইয়া থাকে। স্তার চার্লস ডিলকি, পার্গেল প্রভৃতি বিশিষ্টরূপ উচ্চপদস্থদিগের চরিত্র-সম্বন্ধীয় অপরাধ ইংরাজ সমাজে মার্জ্জনীয় বোধ হয় নাই; এবং সমাজের শাসনে উভয়ে অনেকটা উপযুক্তরূপেই কষ্ট পাইয়াছেন। ভ্রাতান্ধায় নির্বিশেষে সকল অবস্থায় ইংরাজের পক্ষসমর্থন না করিলে উহারা আপনাদের মধ্যে সামাজিক দণ্ড প্রয়োগ করেন এবং সেই দণ্ডের প্রয়োগ হইলে উহাদের সমাজে কি ধরণে কার্য্য চলে তাহা

লর্ড রিপণের ইলবার্ট বিল, জাষ্টিস হোয়াইট কৃত ইংরাজহত্যাকারীর প্রাণদণ্ড এবং লর্ড লিটনের ফুলার মিনিট সম্বন্ধে দেশীয় ইংরাজদিগের ব্যবহার এবং ঐ দণ্ডের ভয়ে কি হয় তাহা ডিফেন্স আসোসিয়েশন, নানাস্থানে ইউরোপীয় অপরাধী সম্বন্ধে ইউরোপীয় জুরীদিগের বিচার ও ইংরাজ সদস্ত নির্বাচন সমিতি সমূহের ব্যবহারাদি শ্রবণ করিলেই সুস্পষ্টরূপে বুঝা যাইবে। উহারাও এক ঘরে করেন—সামাজিক দণ্ডে দণ্ডিত ব্যক্তিদিগকে অভিনন্দনাদি করেন না, “ক্লাবে” লয়েন না। এদেশে ইংরাজ রাজপুরুষেরা অনেকটা প্রকাশ্য ভাবেই আপনাদের মধ্যে সামাজিক দণ্ড প্রয়োগে সাহায্য করিয়া থাকেন। সুতরাং উহাদের সমাজের একেবারে অপ্রতিহত ক্ষমতা! তবে ছুষ্ঠাচারের বিরুদ্ধে ঐ ক্ষমতার প্রয়োগ কম হয়, “দল ছাড়াই” উহাদের মধ্যে সর্বপ্রধান অপরাধ বলিয়া গণ্য।

একটি কথা এই যে, সহর অঞ্চলে পরস্পরের কার্য সম্বন্ধে বেক্রপ একেবারে ওঁদাসীন্ত জন্মিতেছে তাহা কোন অংশেই হিতকর নহে। ইহা অপেক্ষা পল্লীগ্রামের দলাদলিও ভাল। উহা সমাজের ভগ্নাবস্থার স্তোতক। সহরের ব্যাপার সমাজের একেবারে অস্তিত্ব লোপের সূচনা করে! দলাদলিতে তবুও কতকটা শাসন থাকে; সুতরাং লোকের কতকটা চক্ষুলজ্জাও থাকিয়া যায়। প্রকাশ্য আন্দোলন উপেক্ষা করিবার উপযোগী নির্লজ্জতা তা আর সকলের নাই; এবং সকল অপরাধীর জন্তই তা বহু অর্থ ব্যয়ে দলাদলির সৃষ্টি হয় না। সেই জন্ত দলাদলি সম্বন্ধে এখনও পল্লীগ্রামে অনেক স্থলে অপরাধীর প্রকৃত শাসন হয়।

ঘোল-আনা সমাজ লইয়া একমাত্র দল এবং ছুষ্ঠাচারের শাসনে সমস্ত সামাজিক বল প্রযুক্ত—এই অবস্থাই একান্ত প্রার্থনীয়।

দলাদলির প্রাবল্যে ক্ষমতাপন্ন অপরাধীর সুবিধা এবং নিরীহ ভদ্রলোকদিগের কষ্ট হয় এজন্ত উহা বড়ই মন্দ জিনিস ! সমাজের ষাঁহারা নেতা তাঁহাদের স্বরণ রাখা উচিত যে, সামান্য ঈর্ষ্যাষেষ-জনিত দলাদলির পোষণ-দ্বারা তাঁহারা নিজ নিজ পরিবারের মধ্যে ভবিষ্যতের জন্ত অশান্তির অব্যর্থ বীজ বপন করেন । দলাদলিপ্রধান গ্রামে পারিবারিক শাসন ও ভ্রাতৃবাৎসল্যাদি গুণ কমিয়া যায় । “বরে আশুন দিব, বহিঃশত্রুকে বা ভিন্নজাতীয় লোককে—বাড়ীর অংশ বেচিব”—এ সকল ছুশ্রবুস্তির মূল দলাদলি । ইতিহাস সাক্ষ্য দিতেছে যে, ইহাই ভারতবর্ষের সর্বনাশের কারণ । অভিমান ছাড়িয়া বিনীত হইয়া এমন কি সাধারণে যাহাকে প্রথম প্রথম হীনতা বলিবে—তাহাও স্বীকার করিয়া দলাদলি মিটাইয়া ফেলা উচিত । যিনি তাহা করিতে পারেন তিনিই মহৎ । সাধারণে তাঁহাকে অবশেষে মহৎ বলিয়া জানিবে । আমরা জানি কোন গ্রামে দুই দল ছিল । একদলের যিনি প্রধান তিনি অপর দলের প্রত্যেক লোকের বাড়ী বাড়ী গিয়া বলিলেন যে, “কর্তাদের আমল হইতে আমাদের মধ্যে দুই দল চলিয়া আসিতেছে । আপনারা ভিন্ন গ্রাম ভুক্তদিগের দলে । কিন্তু কি জন্ত তখন দলাদলি হইয়াছিল এখন তাহা অনেকের জানাও নাই । আমরা এখন এক গ্রামে দুই দল হইয়া থাকি কেন ?”—বলা বাহুল্য যে সে গ্রামে আর দলাদলি নাই ।

আর এক ব্যক্তি গ্রামের মধ্যে কোন দলাদলিতেই যোগ দিতেন না । তাঁহার সহিত ষাঁহাদের ভোজ্যান্নতা ছিল তাঁহাদের মধ্যে দলাদলি বাধিলেও তিনি সকলের সহিতই পূর্বের মত সম্বন্ধ রাখিতেন । তিনি সকল দলেই যাইতেন । সকল দলের লোকই

তাহার বাড়ীতে আসিতেন। তিনি দলাদলির বাহিরেই রহিলেন। দলাদলিতে ঢুকিতে না চাহিলে অবস্থাপন্ন ব্যক্তিদিগকে দলাদলিতে সহজে পড়িতে হয় না। তাহার কথা বলিতেছি তিনি কখন মিউনিসিপাল ইলেকশনে কাহার জন্ত “ভোট” দেন নাই। তিনি বলিতেন—“আমাদের নিজেদের দলাদলিতেই যথেষ্ট সর্বনাশ হইয়াছে, আর বিলাতী দলাদলির আমদানী করিবার প্রয়োজন নাই।”

অন্ত বর্ণের দলাদলি নিজেদের মধ্যেও অনেকে জানেন। বিলাত ফেরতদিগকে লইয়া এখন একটা দলাদলির প্রধান কারণ হইয়াছে। দেখা যাইতেছে যে, বিলাত ফেরত বৈজ্ঞ, কায়স্থ, তিলিকে উপলব্ধ করিয়া সর্ব বর্ণের মধ্যে দলাদলি উপস্থিত হয়। সেটা যে কতটা মূৰ্খতা তাহার বর্ণনা করা যায় না। কোন বৈজ্ঞ বা কায়স্থ প্রায়শ্চিত্ত করিয়া জাতিতে উঠিবে তাহাতে ব্রাহ্মণদিগের মধ্যে দলাদলি কেন হয়? যদি বৈজ্ঞ এবং কায়স্থ-সমাজের কতক অংশও তাহাকে জাতিতে লয় এবং সে উপযুক্ত প্রায়শ্চিত্তাদি করে, তবে আর সে পতিত থাকিবে কেন? উপযুক্ত প্রায়শ্চিত্ত করিলে—এবং প্রকৃতরূপে দীনতা স্বীকার করিলে সমাজের কর্তব্য অপরাধের মার্জনা করা। “মার্জনা নাই” এরূপ অহিন্দু ভাব পোষণ করিতে নাই।

এইরূপ বুঝিয়া চলিলে সমাজের নেতৃবর্গ এবং সম্ভ্রান্ত ব্যক্তিগণ অনেক দলাদলি মিটাইয়া এবং সকল দলাদলির তীব্রতা অনেকটা কমাইয়া ফেলিতে পারেন। কিন্তু সময়ে সময়ে এমন ঘটনা উঠে যে, একটা না একটা দলে না পড়িয়া সাধারণের ঝাঁচিবার উপায় নাই। কোন দলে যাইব না মনে করিলেও আত্মীয়কুটুম্বদিগের দলাদলি ক্রমে নিজের উপর আসিয়া পড়ে। আজকাল লোকের

নীচতাও এত অধিক হইয়াছে যে যজ্ঞমানেরা অস্ত্রায় কার্যে নিজ নিজ পুরোহিতদিগের মত পাইবার প্রার্থনা করিতে সাহস করে এবং তাহা ত্রাসাত্রাস নিৰ্বিশেষে অনেকস্থলে পাইয়াও থাকে ! পুরোহিতদিগের মধ্যে ধর্ম ও শাস্ত্রচর্চার ক্রটি এবং সামান্য ধনলোভ এই শোচনীয় অবস্থার মূল । অনেকে অধীন, অনুগত, প্রজ্ঞা এবং খাতকদিগকে বলপূর্ব্বক দলাদলির মধ্যে ফেলে । এমন কি দলাদলির পাণ্ডারা একস্থানে পুরুষানুক্রমিক কোন দেবমন্দিরের পূজারীকেও শুধু দলাদলির খাতিরে হতবুদ্ধ করিতে ভীত হয় নাই । এ সকল অধর্ম ও অত্যাচারের ভিতরে প্রত্যেক পরিবারের কি কর্তব্য ? ধীরভাবে উৎপীড়ন সহ্য ভিন্ন অত্র কোন উপায় দেখা যায় না । সকল অবস্থাতেই ত্রায়পক্ষে দৃঢ় থাকা ভিন্ন অত্র কোন উপদেশই গ্রহণ করিতে নাই । উহাতে ঐহিক কিছু কষ্ট হইলেও পরকালের উপকার হয় এবং পরিবার-মধ্যে বিগত আত্মপ্রসাদ লাভ দ্বারা ইহকালেও পুত্রাদির চরিত্রোৎকর্ষ সম্বন্ধে যে মহৎ উপকার আছে, তাহাতে সন্দেহ নাই ।

ভূদেব মুখোপাধ্যায় ।

চন্দ্রাপীড়ের দেহত্যাগ

আশার কি অপরিসীম মহিমা ! চন্দ্রাপীড় অজ্জোদন্তীরে বন্ধুকে দেখিতে না পাইয়া ভাবিলেন, একবার মহাশ্বেতার আশ্রম দেখিয়া আসি। বোধ হয়, মহাশ্বেতা সন্ধান বলিতে পারেন। এই স্থির করিয়া ইন্দ্রায়ুধে আরোহণপূর্বক তথায় চলিলেন। কতিপয় পরিচারকও সঙ্গে সঙ্গে গেল। আসিবার সময় মনোরথ করিয়াছিলেন মহাশ্বেতা আমার গমনে সাতিশয় সন্তুষ্ট হইবেন এবং আমিও আহ্লাদিত চিত্তে তাঁহার সহিত সাক্ষাৎ করিব। কিন্তু বিধাতার কি চাতুরী ! ভবিতব্যতার কি প্রভাব ! মনুষ্যেরা কি অন্ধ এবং তাহাদিগের মনোরথ কি অলীক ! চন্দ্রাপীড় বন্ধুর বিরোগে ছঃখিত হইয়া অনুসন্ধানের নিমিত্ত ঝাঁহার নিকট গমন করিলেন, দূর হইতে দেখিলেন, তিনি শিলাতলে উপবিষ্ট হইয়া অধোমুখে রোদন করিতেছেন। তরলিকা বিষণ্ণ বদনে ও ছঃখিত মনে তাঁহাকে ধরিয়া আছে। মহাশ্বেতার তাদৃশ অবস্থা দেখিয়া চন্দ্রাপীড় যৎপরোনাস্তি ভীত হইলেন। ভাবিলেন, বুঝি কাদম্বরীর কোন অত্যাহিত ঘটনা থাকিবেক। নতুবা পত্রলেখার মুখে আমার আগমনবার্তা শুনিয়াছেন, এ সময় অবশ্য হুটুচিহ্ন থাকিতেন। চন্দ্রাপীড় বৈশম্পায়নের অনুসন্ধান না পাওয়াতে উদ্ভিগ্ন ছিলেন, তাহাতে আবার প্রিয়তমার অমঙ্গলচিন্তা মনোমধ্যে প্রবেশ করাতে নিতান্ত কাতর হইলেন। শূন্য হৃদয়ে মহাশ্বেতার নিকটবর্তী হইয়া শিলাতলের এক পার্শ্বে বসিলেন ও তরলিকাকে মহাশ্বেতার শোকের হেতু

জিজ্ঞাসিলেন। তরলিকা কিছু বলিতে পারিল না, কেবল দীন নয়নে মহাশ্বেতার মুখ পানে চাহিয়া রহিল।

মহাশ্বেতা বসনাঞ্চলে নেত্রজল মোচন করিয়া কাতরস্বরে কহিলেন, মহাভাগ! যে নিরুৎসাহ ও নির্লজ্জা পূর্বে আপনাকে দারুণ শোকবৃত্তান্ত শ্রবণ করাইয়াছিল, সেই পাণ্ডীয়াসী এক্ষণেও এক অপূর্ণ ঘটনা শ্রবণ করাইতে প্রস্তুত আছে। একদা আশ্রমে বসিয়া আছি এমন সময়ে, রাজকুমারের সমবয়স্ক ও সদৃশাকৃতি স্নকুমার এক ব্রাহ্মণকুমারকে দূর হইতে দেখিলাম। তিনি এরূপ অশ্রুমনস্ক যে তাঁহার আকার দেখিয়া বোধ হইল যেন, কোন প্রগট বস্তুর অন্বেষণ করিতে করিতে এই দিকে আসিতেছেন। ক্রমে নিকটবর্তী হইয়া আমাকে পরিচিতের ভাষা জ্ঞান করিয়া, নিমেষশূন্য নয়নে অনেকক্ষণ আমার প্রতি দৃষ্টিপাত করিয়া রহিলেন। অনন্তর মুহূর্ত্তে বলিলেন, স্নন্দরি! এই ভূমণ্ডলে বয়স ও আকৃতির অবিসংবাদী কৰ্ম্ম করিয়া কেহ নিন্দাস্পদ হয় না। কিন্তু তুমি তাহার বিপরীত কৰ্ম্ম করিতেছ। এ সময় তোমার তপস্তার সময় নয়।

দেব পুণ্ডরীকের সেই দারুণ ঘটনাবধি আমি সকল বিষয়েই নিরুৎসুক ছিলাম। ব্রাহ্মণকুমারের কথা অগ্নিশিখার ভাষা আমার গাত্র দাহ করিতে লাগিল। তাহার কথা সমাপ্তি না হইতেই বিরক্ত হইয়া তথা হইতে উঠিয়া গেলাম। দেবতাদিগের অর্চনার নিমিত্ত কুসুমভুলিতে লাগিলাম। তথা হইতে তরলিকাকে ডাকিয়া কহিলাম, উহাকে বারণ কর, যেন আর এখানে না আইসে। যদি আইসে ভাল হইবে না। তরলিকা ভয়প্রদর্শন ও তর্জ্জন গর্জ্জন পূর্বক বারণ করিয়া কহিল, তুমি এখান হইতে চলিয়া

যাও, পুনর্বার আর আসিও না। সেই হতভাগ্য সে দিন ফিরিয়া গেল বটে, কিন্তু একদা নিশীথসময়ে চন্দ্রোদয়ে দিখলয় জ্যোৎস্নাময় হইলে তরলিকা শিলাতলে শয়ন করিয়া নিদ্রায় অচেতন হইল। গ্রীষ্মের নিমিত্ত গুহার অভ্যন্তরে নিদ্রা না হওয়াতে আমি বহিঃস্থিত এক শিলাতলে অঙ্গ নিক্ষেপ করিয়া গগনোদিত সুধাংশুর প্রতি দৃষ্টিপাত করিয়া রহিলাম। মন্দ মন্দ সমীরণ গাত্রে সুধারষ্টির ছায় বোধ হইতে লাগিল। সেই সময়ে দেব পুণ্ডরীকের বিস্ময়কর ব্যাপার স্মৃতিপথাক্রম হইল। তাঁহার গুণ স্মরণ হওয়াতে খেদ করিয়া মনে মনে কহিলাম আমি কি হতভাগিনী! আমার দুর্ভাগ্যবশতঃ বুঝি দেববাক্যও মিথ্যা হইল! কই! প্রিয়তমের সহিত সমাগমের কোন উপায় দেখিতেছি না। কপিঞ্জল সেই গমন করিয়াছেন, অত্মাপি প্রত্যাগত হইলেন না। এইরূপ নানা-প্রকার চিন্তা করিতেছি এমন সময়ে দূর হইতে পদসঞ্চারের শব্দ শুনিতে পাইলাম। যে দিকে শব্দ হইতেছিল, সেই দিকে দৃষ্টিপাত করিয়া জ্যোৎস্নার আলোকে দূর হইতে দেখিলাম, সেই ব্রাহ্মণ-কুমার উন্মত্তের ছায় দৌড়িয়া আসিতেছে। তাহাকে নিকটবর্তী দেখিয়া ক্রোধে আমার কলেবর কাঁপিতে লাগিল। নিশ্বাসবায়ুর সহিত অগ্নিস্ফুলিঙ্গ বহির্গত হইতে লাগিল। ক্রোধে তর্জ্জন গর্জ্জন পূর্বক ভৎসনা করিয়া কহিলাম, রে ছরাঅন্! এখনও তোর মস্তকে বজ্রাঘাত হইল না, এখনও তোর শরীর শত শত খণ্ডে বিভক্ত হইয়া গেল না? বোধ হয় শুভাশুভ কর্মের সাক্ষীভূত পঞ্চ মহাভূত দ্বারা তোর এই অপবিত্র অস্পৃশ্য দেহ নিশ্চিহ্ন হইয়া নাই। তাহা হইলে, এতক্ষণে তোর শরীর অনলে ভস্মীভূত, জলে আত্মাবিত, রসাতলে নীত, বায়ুবেগে শতধা বিভক্ত ও গগনের

সহিত মিলিত হইয়া যাইত। মনুষ্যদেহ আশ্রয় করিয়াছিল, কিন্তু তাকে তিৰ্য্যগ্জাতির ভ্রায় যথেষ্টাচারী দেখিতেছি। তোর হিতাহিত জ্ঞান ও কার্য্যাকাৰ্য্যবিবেক কিছুই নাই। তুই একান্ত তিৰ্য্যগ্জাতীক্ৰান্ত, তিৰ্য্যগ্জাতিতেই তোর পতন হওয়া উচিত। অনন্তর সৰ্কসাক্ষীভূত ভগবান্ চন্দ্রমার প্রতি নেত্রপাত করিয়া কৃতাজলিপুটে কহিলাম, ভগবন্! সৰ্কসাক্ষিন্! যদি আমার অন্তঃকরণ পবিত্র ও নিষ্কলঙ্ক হয়, তাহা হইলে, আমার বচন সত্য হউক অর্থাৎ তিৰ্য্যগ্জাতিতে এই পাগিষ্ঠের পতন হউক। আমার কথার অবসানে, জানি না, কি আশ্চর্য্যের দুর্ভিপাকবশতঃ, কি আমার পাপের সামর্থ্যে সেই ব্রাহ্মণকুমার অচেতন হইয়া হ্রিম্মূল তরুর ভ্রায় ভূতলে পতিত হইল। তাহার সঙ্গিগণ কাতর স্বরে হা হতোহস্মি! বলিয়া শব্দ করিয়া উঠিল। তাহাদের মুখে শুনিলাম তিনি আপনার মিত্র। এই বলিয়া লজ্জায় অধোমুখী হইয়া মহাশ্বেতা রোদন করিতে লাগিলেন।

চন্দ্রাপীড় নয়ন নিমীলনপূর্বক মহাশ্বেতার কথা শুনিতেছিলেন; কথা সমাপ্ত হইলে কহিলেন, ভগবতি! এ জন্মে কাদম্বরীসমাগম ভাগ্যে ঘটিয়া উঠিল না। জন্মান্তরে বাহাতে সেই প্রকল্প মুখার-বিন্দু দেখিতে পাই এরূপ যত্ন করিও। বলিতে বলিতে তাঁহার হৃদয় বিদীর্ণ হইল। যেমন শিলাতল হইতে ভূতলে পড়িতে-ছিলেন, অমনি তরলিকা মহাশ্বেতাকে ছাড়িয়া শশব্যস্তে হস্ত বাড়াইয়া ধরিল এবং কাতর স্বরে কহিল, ভর্তৃদারিকে। দেখ দেখ কি সৰ্কনাশ উপস্থিত! চন্দ্রাপীড় চৈতন্তশূন্য হইয়াছেন। মৃত দেহের ভ্রায় গ্রীবা ভগ্ন হইয়া পড়িতেছে। নেত্র নিমীলিত হইয়াছে। নিশ্বাস বহিতেছে না। জীবনের কোন লক্ষণ নাই। একি

হুর্দৈব !—একি সর্বনাশ ! এই বলিয়া তরলিকা মুক্ত কণ্ঠে রোদন করিয়া উঠিল। মহাশ্বেতা সসজ্জমে চন্দ্রাপীড়ের প্রতি চক্ষু নিক্ষেপ করিলেন এবং সেইরূপ অবস্থা দেখিয়া হতবুদ্ধি ও চিত্তিতের ছায় নিশ্চেষ্ট হইয়া রহিলেন। আঃ—পাপীয়সি, ছুষ্টাপসি ! কি করিলি, জগতের চন্দ্র হরণ করিলি, মহারাজ তারাপীড়ের সর্বস্ব অপহৃত হইল, মহিষী বিলাসবতীর সর্বনাশ উপস্থিত হইল, পৃথিবী অনাথা হইল ! হায় এত দিনের পর উজ্জয়িনী শূন্য হইল ! এক্ষণে প্রজারা কাহার মুখ নিরীক্ষণ করিবে, আমরা কাহার শরণাপন্ন হইব ? এ কি বিনা মেঘে বজ্রাঘাত ? চন্দ্রাপীড় কোথায় ? মহারাজ এই কথা জিজ্ঞাসা করিলে আমরা কি উত্তর দিব। পরিচারকেরা হা হতোহস্মি ! বলিয়া উচ্চৈঃস্বরে এই রূপে বিলাপ করিয়া উঠিল। ইন্দ্রায়ুধ চন্দ্রাপীড়ের প্রতি দৃষ্টিপাত করিয়া রহিল। তাহার নয়নযুগল হইতে অজস্র অশ্রুবারি বিনির্গত হইতে লাগিল।

এ দিকে পত্রলেখার মুখে চন্দ্রাপীড়ের আগমনবার্তা শ্রবণ করিয়া কাদম্বরীর আনন্দের আর পরিসীমা রহিল না। প্রিয়তমের প্রত্যুদগমন করিবার মানসে উজ্জল বেশ ধারণ করিলেন। মণিময় অলঙ্কারে ভূষিত হইয়া গাত্রে অঙ্গরাগ লেপনপূর্বক কণ্ঠে কুসুমমালা পরিলেন। সুসজ্জিত হইয়া কতিপয় পরিজনের সহিত বাটীর বহির্গত হইলেন। যাইতে যাইতে মদলেখাকে জিজ্ঞাসিলেন, মদলেখা ! পত্রলেখার কথা কি সত্য, চন্দ্রাপীড় কি আসিয়াছেন ? আমার ত বিশ্বাস হয় না। আমার হৃদয় কম্পিত হইতেছে, পাছে তাঁহার আগমন বিষয়ে হতাশ হইয়া বিষম চিন্তে ফিরিয়া আসিতে হয়। বলিতে বলিতে দক্ষিণ চক্ষু স্পন্দ হইল। ভাবিলেন

এ আবার কি ! বিধাতা কি এখনও পরিতুষ্ট হন নাই ? আবারও দুঃখে নিষ্কিণ্ট করিবেন ? এইরূপ চিন্তা করিতে করিতে মহাশ্বেতার আশ্রমে উপস্থিত হইলেন । দেখিলেন সকলেই বিষম, সকলের মুখেই দুঃখের চিহ্ন প্রকাশ পাইতেছে । অনন্তর ইতস্ততঃ দৃষ্টিপাত করিয়া পুষ্পশূত্র উত্তানের ত্রায়, পল্লবশূত্র তরুর ত্রায়, বারিশূত্র সরোবরের ত্রায়, প্রাণশূত্র চন্দ্রাপীড়ের দেহ পতিত রহিয়াছে, দেখিতে পাইলেন । দেখিবামাত্র মূর্ছাপন্ন হইয়া ভূতলে পড়িলেন, অমনি মদলেখা ধরিল । পত্রলেখা অচেতন হইয়া ভূতলে বিলুপ্তিত হইতে লাগিল । কাদম্বরী অনেক ক্ষণের পর চেতন হইয়া সম্পূর্ণ লোচনে চন্দ্রাপীড়ের মুখচন্দ্র দেখিলেন এবং ছিন্নমূলা লতার ত্রায় ভূতলে পতিত হইয়া শিরে করাঘাত করিতে লাগিলেন ।

মদলেখা কাদম্বরীর চরণে পতিত হইয়া আর্তস্বরে কহিল, ভর্তৃ-
দারিকে ! আহা তোমা বই মদিরা ও চিত্ররথের কেহ নাই !
তোমার হৃদয় বিদীর্ণ হইল, বোধ হইতেছে । প্রসন্ন হও, ধৈর্য
অবলম্বন কর । কাদম্বরী মদলেখার কথায় হস্ত করিয়া কহিলেন,
অগ্নি উন্নত ! ভয় কি ? আমার হৃদয় পাবাণে নিশ্চিহ্ন তাহা কি
তুমি এখনও বুঝিতে পার নাই ? ইহা বজ্র অপেক্ষাও কঠিন তাহা
কি তুমি জানিতে পার নাই ? যখন এই ভয়ঙ্কর ব্যাপার দেখিবা-
মাত্র বিদীর্ণ হয় নাই, তখন আর বিদীর্ণ হইবার আশঙ্কা কি ? হায়
এখনও জীবিত আছি ! মরিবার এমন সময় আর কবে পাইব ?
সমুদায় দুঃখ ও সকল সন্তাপ শাস্তি হইবার শুভ দিন উপস্থিত
হইয়াছে । সখি ! তুমি আবার সেই স্বণাকর, লজ্জাকর প্রাণ
রাখিতে অহুরোধ করিতেছ ! এ সময় স্নেহে মরিবার সময়, তুমি
বাধা দিও না ।

যদি আমার প্রতি প্রিয়সখীর স্নেহ থাকে ও আমার প্রিয়কার্য্য করিতে ইচ্ছা হয়, তাহা হইলে শোকে পিতামাতার যাহাতে দেহাবসান না হয়, বাসভবন শূণ্য দেখিয়া সখীজন ও পরিজনেরা যাহাতে দিগ্দিগন্তে প্রস্থান না করে, এরূপ করিও। অঙ্গনমধ্যবর্ত্তী সহকারপোতকের সহিত তৎপার্শ্ববর্ত্তিনী মাধবীলতার বিবাহ দিও। সাবধান, যেন মদারোপিত অশোকতরুর বাল পল্লব কেহ খণ্ডন না করে। কালিন্দী শারিকা ও পরিহাস শুককে বন্ধন হইতে মুক্ত করিয়া দিও। আমার প্রীতিপাত্র হরিণটাকে কোন তপোবনে রাখিয়া আসিও। নকুলীকে আপন অঙ্কে সর্ব্বদা রাখিও। ক্রীড়াপর্ব্বতে যে জীবজীবকমিথুন এবং আমার পাদসহচরী যে হংসশাবক আছে, তাহারা যাহাতে বিপন্ন না হয়, এরূপ তত্ত্বাবধান করিও। বনমামুখী কখন গৃহে বাস করে না, অতএব তাহাকে বনে ছাড়িয়া দিও। কোন তপস্বীকে ক্রীড়াপর্ব্বত প্রদান করিও। আমার এই অঙ্কের ভূষণ গ্রহণ কর, ইহা কোন দীন ব্রাহ্মণকে সমর্পণ করিও। বীণা ও অস্ত্র সামগ্রী যাহা তোমার রুচি হয় আপনি রাখিও। আমি এক্ষণে বিদায় হইলাম, আইস, একবার জন্মের শোধ আলিঙ্গন ও কণ্ঠগ্রহণ করিয়া শরীর শীতল করি। মদলেখাকে এই কথা বলিয়া মহাশ্বেতার কণ্ঠধারণপূর্ব্বক কহিলেন, প্রিয়সখি ! তুমি আশারূপ যুগতৃষ্ণিকায় মোহিত হইয়া ক্রমে ক্রমে মরণাধিক যন্ত্রণা অনুভব করিয়া স্নেহে জীবন ধারণ করিতেছ। এই অভাগিনীর আবার সে আশাও নাই। এক্ষণে জগদীশ্বরের নিকট প্রার্থনা, যেন জন্মান্তরে প্রিয়সখীর দেখা পাই। এই বলিয়া চন্দ্রাপীড়ের চরণদ্বয় অঙ্কে ধারণ করিলেন। স্পর্শমাত্র চন্দ্রাপীড়ের দেহ হইতে উজ্জ্বল জ্যোতিঃ উৎপন্ন হইল। জ্যোতির

উজ্জ্বল আলোকে ক্ষণকাল সেই প্রদেশ কোমুদীময় বোধ হইল।

অনন্তর অন্তরীক্ষে এই বাণী বিনির্গত হইল, “বৎসে মহাশ্বেতে ! আমার কথার আশ্বাসে তুমি জীবন ধারণ করিতেছ। অবশ্য প্রিয়তমের সহিত সাক্ষাৎ হইবে, সন্দেহ করিও না। পুণ্ডরীকের শরীর আমার তেজঃস্পর্শে অবিনাশি ও অবিকৃত হইয়া মদীয় লোকে আছে। চন্দ্রাপীড়ের এই শরীরও মত্তেজোময় অবিনাশি। বিশেষতঃ কাদম্বরীর করস্পর্শ হওয়াতে ইহার আর ক্ষয় নাই। শাপদোষে এই দেহ জীবনশূন্য হইয়াছে, যোগিশরীরের জ্বায় পুনর্বার জীবাত্মা-সংযুক্ত হইবে। তোমাদের প্রত্যয়ের নিমিত্ত ইহা এই স্থানেই থাকিল, অগ্নিসংস্কার বা পরিত্যাগ করিও না। যত দিন পুনর্জীবিত না হয়, প্রযত্নে রক্ষণাবেক্ষণ করিও।”

আকাশবাণী শ্রবণানন্তর সকলে বিস্মিত ও চমৎকৃত হইয়া চিত্রিতের জ্বায় নিমেষশূন্য লোচনে গগনে দৃষ্টিপাত করিয়া রহিল। চন্দ্রাপীড়ের শরীরোদ্ভূতজ্যোতিঃস্পর্শে পত্রলেখার মুচ্ছাপনয়ন ও চৈতন্যোদয় হইল। তখন সে উন্মত্তের জ্বায় সহসা গাত্রোথান করিয়া ইন্দ্রায়ুধের নিকটে অতি বেগে গমন করিয়া কহিল, রাজ-কুমার প্রস্থান করিলেন, তোমার আর একাকী থাকা উচিত নয়। এই বলিয়া রক্ষকের হস্ত হইতে বলপূর্বক বন্না গ্রহণ করিয়া তাহার সহিত অর্দ্ধোদসরোবরে ঝাম্প প্রদান করিল। ক্ষণকালের মধ্যে জলে নিমগ্ন হইয়া গেল। অনন্তর জটাধারী এক তাপসকুমার “সহসা জলমধ্য হইতে সমুথিত হইলেন। তাঁহার মস্তকে শৈবাল লাগাতে ও গাত্র হইতে বিন্দু বিন্দু বারি পতিত হওয়াতে প্রথমে বোধ হইল যেন, জলমাহুঘ। মহাশ্বেতা সেই তাপসকুমারকে

পরিচিতপূর্ব ও দৃষ্টপূর্ব বোধ করিয়া এক দৃষ্টিতে দেখিতে লাগিলেন। তিনিও নিকটে আসিয়া মুহূ স্বরে কহিলেন, গন্ধর্ব-রাজপুত্রি! আমাকে চিনিতে পার? মহাষেতা শোক, বিষয় ও আনন্দের মধ্যবর্তিনী হইয়া, সসম্মমে গাত্রোখান করিয়া সাষ্টাঙ্গ প্রণিপাত করিলেন। গদগদ বচনে কহিলেন, ভগবন্ কপিঞ্জল! এই হতভাগিনীকে সেইরূপ বিষম সঙ্কটে রাখিয়া আপনি কোথায় গিয়াছিলেন? এত কাল কোথায় ছিলেন? আপনার প্রিয় সখাকে কোথায় রাখিয়া আসিতেছেন?

মহাষেতা এই কথা জিজ্ঞাসা করিলে কাদম্বরী, কাদম্বরীর পরি-জন ও চন্দ্রাপীড়ের সঙ্গিগণ সকলে বিস্ময়াপন্ন হইয়া তাপসকুমারের প্রতি দৃষ্টিপাত করিয়া রহিল। তিনি প্রতিবচন প্রদান করিতে আরম্ভ করিয়া কহিলেন, গন্ধর্বরাজপুত্রি! অবহিত হইয়া শ্রবণ কর। তুমি সেইরূপ বিলাপ ও পরিতাপ করিতেছিলে, তখন তোমাকে একাকিনী রাখিয়া, “রে হুরাশ্বন্! বন্ধুকে লইয়া কোথায় যাইতেছি” এই কথা বলিতে বলিতে অপহরণকারী সেই পুরুষের সঙ্গে সঙ্গে চলিলাম। তিনি আমার কথায় কিছুই উত্তর না দিয়া স্বর্গমার্গে উপস্থিত হইলেন। বৈমানিকেরা বিস্ময়োৎফুল্ল নয়নে দেখিতে লাগিল। দিব্যাজ্ঞনারা ভয়ে পথ ছাড়িয়া দিল। আমি ক্রমাগত পশ্চাৎ পশ্চাৎ চলিলাম। তিনি চন্দ্রলোকে উপস্থিত হইলেন। তথায় মহোদয়নাম্নী সভার মধ্যে চন্দ্রকাস্তমণি-নির্মিত পর্য্যঙ্কে প্রিয় সখার শরীর সংস্থাপিত করিয়া কহিলেন, কপিঞ্জল, আমি চন্দ্রমা, জগতের হিতের নিমিত্ত গগনমণ্ডলে উদ্ভিত হইয়া স্বকর্ম্য সম্পাদন করিতেছিলাম। তোমার এই প্রিয় বয়স্ক বিরহবেদনায় প্রাণত্যাগ করিবার সময় বিনাপরাধে আমাকে এই

বলিয়া শাপ দিলেন, “রে ছুরাশ্বন্ ! যেহেতু তুই কর দ্বারা সন্তা-
 পিত করিয়া বলভার প্রতি সাতিশয় অনুরক্ত এই ব্যক্তির প্রাণ
 বিনাশ করিলি, এই অপরাধে তোকে ভূতলে বারংবার জন্ম গ্রহণ
 করিতে হইবেক এবং আমার ত্রায় অনুরাগপরবশ হইয়া
 প্রিয়বিশ্রোণে হুঃসহ যজ্ঞগা অনুভব করিতে হইবেক।” বিনাপরাধে
 শাপ দেওয়াতে আমি ক্রোধাক্ত হইলাম, এবং বৈরনির্ব্যাতনের
 নিমিত্ত এই বলিয়া প্রতিশাপ প্রদান করিলাম, “রে মৃঢ় !
 তুই এবার যেরূপ যাতনা ভোগ করিলি, বারংবার তোকে এইরূপ
 যাতনা ভোগ করিতে হইবেক।” ক্রোধ শাস্তি হইলে ধ্যান
 করিয়া দেখিলাম, আমার কিরণ হইতে অম্বরাদিগের যে কুল
 উৎপন্ন হয়, সেই কুলে গৌরীনাথী গন্ধর্বকুমারী জন্ম গ্রহণ করেন,
 তাঁহার হুহিতা মহাশ্বেতা এই মুনিকুমারকে পতিরূপে বরণ
 করিয়াছে। তখন সাতিশয় অনুরাগ হইল। কিন্তু শাপ দিয়াছি,
 আর উপায় কি ? এক্ষণে উভয়ের পাপে উভয়কেই মর্ত্যালোকে দুই
 বার জন্মগ্রহণ করিতে হইবেক, সন্দেহ নাই। যাবৎ শাপের
 অবসান না হয়, তাবৎ তোমার বন্ধুর মৃত দেহ এই স্থানে
 থাকিবেক। আমার স্পৃহাময় করস্পর্শে ইহা বিকৃত হইবেক না।
 শাপাবসানে এই শরীরেই পুনর্বার প্রাণসঞ্চার হইবেক, এই
 নিমিত্ত ইহা এখানে আনিয়াছি। মহাশ্বেতাকেও আশ্বাস প্রদান
 করিয়া আসিয়াছি। তুমি এক্ষণে মহর্ষি শ্বেতকেতুর নিকটে
 গিয়া এই সকল বৃত্তান্ত বিশেষ করিয়া তাঁহার সমক্ষে বর্ণন কর।
 তিনি মহাপ্রভাব, অবশ্য কোন প্রতিকার করিতে পারিবেন।

চন্দ্রমার আদেশানুসারে আমি দেবমার্গ দিয়া শ্বেতকেতুর
 নিকট যাইতেছিলাম। পথিমধ্যে অতি কোপনস্বভাব এক

বিমানচারীর উল্লঙ্ঘন করাতে তিনি ক্রকুটীভঙ্গীদ্বারা রোষ প্রকাশপূর্বক আমার প্রতি নেত্রপাত করিলেন। তাঁহার আকার দেখিয়া বোধ হইল যেন, তিনি রোষানলে আমাকে দগ্ধ করিতে উত্তত হইয়াছেন ! অনন্তর তিনি, “হুয়ায়ন্! তুই মিথ্যা তপোবলে গর্জিত হইয়াছিস্, তুরঙ্গমের ত্রায় লক্ষ প্রদানপূর্বক আমায় উল্লঙ্ঘন করিলি। অতএব তুরঙ্গম হইয়া ভূতলে জন্মগ্রহণ কর !” তর্জ্জন-গর্জ্জন-পূর্বক এই বলিয়া আমায় শাপ প্রদান করিলেন। আমি বাস্পাকুলনয়নে ক্লৃতাঞ্জলিপুটে নানা অহুন্নয় করিয়া কহিলাম, “ভগবন্! বয়স্তের বিরহ-শোকে অন্ধ হইয়া এই দুষ্কর্ম করিয়াছি, অবজ্ঞাপ্রযুক্ত করি নাই। এক্ষণে ক্ষমা প্রার্থনা করিতেছি। প্রসন্ন হইয়া, শাপ সংহার করুন।” তিনি কহিলেন, “আমার শাপ অন্ত্যথা হইবার নহে। তুমি ভূতলে তুরঙ্গমরূপে অবতীর্ণ হইয়া যাহার বাহন হইবে, তাহার মরণান্তে স্নান করিয়া আপনার স্বরূপ প্রাপ্ত হইবে।” আমি বিনয়পূর্বক পুনর্বার কহিলাম, “ভগবন্! শাপদোষে চন্দ্রমা মর্ত্যালোকে জন্মগ্রহণ করিবেন। আমি যেন তাঁহারই বাহন হই।” তিনি ধ্যান-প্রভাবে সমুদায় অবগত হইয়া কহিলেন, “হাঁ, উজ্জয়িনী নগরে তারাপীড় রাজা অপত্য প্রাপ্তির আশয়ে ধর্মকর্মের অমুষ্ঠান করিতেছেন। চন্দ্রমা তাঁহারই অপত্য হইয়া ভূতলে অবতীর্ণ হইবেন। তোমার প্রিয় বয়স্ত পুণ্ডরীক ঋষিও রাজমন্ত্রী শুকনাসের পুত্ররূপে জন্মগ্রহণ করিবেন। তুমিও রাজকুমাররূপে অবতীর্ণ চন্দ্রের বাহন হইবে।” তাঁহার কথার অবসানে আমি সমুদ্রের প্রবাহে নিপতিত হইলাম ও তুরঙ্গমরূপ ধারণ করিয়া তীত্রে উঠিলাম। তুরঙ্গম হইলাম বটে, কিন্তু আমার জন্মান্তরীণ সংস্কার

বিনষ্ট হইল না। আমিই চন্দ্রাপীড়কে কিন্নরমিথুনের অনুগামী করিয়া এই স্থানে আনিয়াছিলাম। চন্দ্রাপীড় চন্দ্রের অবতার। যিনি জন্মান্তরীণ অনুরাগের পরতন্ত্র হইয়া তোমার প্রণয়াভিলাষে এই প্রদেশে আসিয়াছিলেন ও তোমার শাপে বিনষ্ট হইয়াছেন, তিনি আমার প্রিয় বয়স্ক পুণ্ডরীকের অবতার।

তারাকঙ্কর তর্করত্ন।

সেকাল আর একাল

অন্তকার বহুতার বিষয় “সেকাল আর একাল।” ১৮১৬ খৃষ্টাব্দে হিন্দুকালেজ এই মহানগরে সংস্থাপিত হয়। ১৮৩০ সালে ঐ বিদ্যালয়ের প্রথম ফল ফলে। ঐ বৎসরে কতকগুলি যুবক ইংরাজীতে রুতবিদ্য হইয়া বিদ্যালয় পরিত্যাগ করেন। তাঁহারা সেই সময়ে ইউরোপীয় বিদ্যার আলোক লাভ করিয়া সমাজসংস্কারকার্যে প্রবৃত্ত হইলেন। সেই সময়ে একটি নূতন ভাব হিন্দুসমাজে প্রবিষ্ট হয়। ইংরাজী আমলের প্রথম হইতে হিন্দুকালেজ সংস্থাপন পর্য্যন্ত যে সময় তাহা “সেকাল” এবং তাহার পরের কাল “একাল” শব্দে নির্দ্ধারণ করিলাম।

সে কালের বিষয় বলিতে হইলে সে কালের সাহেবদের বিষয় অগ্রে বলিতে হয়। আপনারা জিজ্ঞাসা করিতে পারেন যে, বাঙ্গালীদের বিষয়ে বলিতে গিয়া সাহেবদের কথা প্রথমে বলা হয় কেন? তাহার বিশিষ্ট কারণ আছে। সাহেবেরা আমাদের শাসনকর্ত্তা ও তাঁহাদের সহিত আমাদের ঘনিষ্ঠ সম্বন্ধ। সাহেবদের সহিত আমাদের ঘনিষ্ঠ সম্বন্ধ থাকা জন্ত, সে কালের সাহেবেরা কি প্রকৃতির লোক ছিলেন ও সে কালের বাঙ্গালীদের সঙ্গে কিরূপ ব্যবহার করিতেন, তাহা না জানিলে সে কালের বাঙ্গালীদের অবস্থা ভাল জানা যাইতে পারে না, অতএব সে কালের সাহেবদিগের বর্ণনা করা কর্ত্তব্য। সে কালের সাহেবদিগের সর্ব্বাগ্রে বর্ণনা করা কর্ত্তব্য। সাহেবেরা আমাদের

রাজা। রাজার সম্মান অগ্রে রক্ষা করা কর্তব্য। সে কালে সাহেবেরা অর্ধেক হিন্দু ছিলেন। পূর্বে মুসলমানেরা এই ভারতবর্ষকে আপনাদের গৃহস্বরূপ জ্ঞান করিতেন। তাঁহাদের অমুরাগ এইখানেই বদ্ধ থাকিত। ইংরাজের আমলের প্রথম সাহেবেরা অনেক পরিমাণে ঐরূপ ছিলেন। তাহার এক কারণ এই, তখন বিলাতে যাতায়াতের এমন সুবিধা ছিল না। যাহারা এখানে আসিতেন, তাঁহাদের সর্বদা বাটী যাওয়া ঘটিয়া উঠিত না। আর এক কারণ এই, তাঁহারা অতি অল্প লোকই এখানে থাকিতেন; সুতরাং এখানকার লোকদিগের সহিত তাঁহারা অনেক পরিমাণে এ দেশীয়দের আচার ব্যবহার পালন করিতেন। তখন সকাল বিকাল কাছারী হইত, মধ্যাহ্নকালে সকলে বিশ্রাম করিত। মধ্যাহ্নকালে কলিকাতা দ্বিপ্রহরা রজনীর শ্রায় নিশ্চল হইত। তখনকার সাহেবেরা পান খেতেন, আলবোলা ফুঁকতেন, বাইনাচ দিতেন ও ছলি খেলতেন। ষ্টুয়ার্ট নামে একজন প্রধান সৈনিক সাহেব ছিলেন, হিন্দুধর্মের প্রতি তাঁহার বিলক্ষণ শ্রদ্ধা ছিল। তজ্জগৎ অস্ত্রাস্ত্র সাহেবেরা তাঁহাকে হিন্দু ষ্টুয়ার্ট বলিয়া ডাকিত। তাঁহার বাটীতে শালগ্রামশিলা ছিল। তিনি প্রত্যহ পূজারী ব্রাহ্মণের দ্বারা তাহার পূজা করাইতেন। বাল্যকালে গুনিতাম, কালীঘাটের কালীর মন্দিরে প্রথমে কোম্পানীর পূজা হইয়া, তৎপরে অস্ত্রাস্ত্র লোকের পূজা হইত। ইহা সত্য না হইতে পারে, কিন্তু ইহা দ্বারা প্রতীত হইতেছে যে, তৎকালের সাহেবেরা বাঙ্গালীদের সহিত এতদূর ঘনিষ্ঠতা করিতেন যে, তাঁহাদিগের ধর্মের পর্য্যন্ত অমুমোদন করিতেন। এ কালেও গবর্ণর জেনারেল লর্ড এলেনবরা সাহেব বাহাদুর আফগানিস্থানের

যুদ্ধে জয়ী হইয়া ফিরিয়া আসিবার সময় বৃন্দাবন, মথুরা প্রভৃতি স্থানের প্রধান প্রধান দেবালয়ে দান করিয়া আসিয়াছিলেন। সেকালের সাহেবেরা আমলাদের উপর এমন সদয় ছিলেন যে, শুনা গিয়াছে, তাঁহারা তাঁহাদের দেওয়ানদের বাটীতে গিয়া তাঁহাদের ছেলেদিগকে হাঁঠুর উপর বসাইয়া আদর করিতেন ও চন্দ্রপুলি খাইতেন। তাঁহারা অত্যাচ্ছ আমলাদের বাসায়ও যাইয়া, কে কেমন আছে, জিজ্ঞাসা করিতেন। এখন সে কাল গিয়াছে। এখনকার সাহেবদিগকে দেখিলে, তাঁহাদিগকে সেই সকল সাহেবদের হইতে এক স্বতন্ত্র জাতি বলিয়া বোধ হয়। ইহাদের আর এদেশীয়দের সহিত সেরূপ ব্যথার ব্যথিত্ব নাই, তাঁহাদের প্রতি তাঁহাদিগের সেরূপ স্নেহ নাই, সেরূপ মমতা নাই। অবশ্য অনেক সদাশয় ইংরাজ আছেন, যাহারা এই কথার ব্যতিচারস্থল স্বরূপ। কিন্তু আমি যে রূপ বর্ণনা করিলাম, এরূপ সাহেবই অধিক। পূর্বে যে সকল ইংরাজ মহাপুরুষেরা এখানে আসিয়া এদেশের যথেষ্ট উন্নতি করিয়া গিয়াছেন, তাঁহাদের নাম এদেশীয়দের হৃদয়ে অঙ্কিত রহিয়াছে। কোন উদ্ভট কবিতাকার হিন্দুদিগের প্রাতঃস্মরণীয় জীলোকদিগের নাম যে শ্লোকে উল্লিখিত আছে, তাহার পরিবর্তে সে কালের কতিপয় ইংরাজ মহাত্মার নাম উল্লেখ করিয়া একটি শ্লোক প্রস্তুত করিয়াছিলেন। আদর্শ ও নকল দুইটি শ্লোকই নিম্নে লিখিত হইল।

আদর্শ

অহল্যা দ্রৌপদী কুন্তী তারা মন্দোদরী তথা ।

পঞ্চকথাঃ স্মরেন্নিত্যং মহাপাতকনাশনম্ ॥ •

নকল

হেয়ার্ কবিন্ পামরশ্চ কেরি মার্শমেনস্তথা ।

পঞ্চগোরাঃ স্নরেন্নিত্যং মহাপাতকনাশনম্ ॥

এই সকল মহাপুরুষদিগের বিষয় মহাশয়েরা অনেকেই অবগত আছেন। ডেবিড হেয়ার এই দেশে ঘড়ীর ব্যবসায়-দ্বারা লক্ষ টাকা উপার্জন করিয়াছিলেন, তিনি তাঁহার স্বদেশ স্কটলণ্ডে ফিরিয়া না গিয়া সেই সমস্ত অর্থ এতদেশীয় লোকের হিতসাধনে ব্যয় করিয়া পরিশেষে দরিদ্রদশায় উপনীত হইয়াছিলেন। তাঁহাকে এতদেশীয়দের ইংরাজী শিক্ষার প্রথম সৃষ্টিকর্তা বলিলে অত্যুক্তি হয় না। তিনি হেয়ার-স্কুল সংস্থাপন করেন ও হিন্দু-কালোজ সংস্থাপনের একজন প্রধান উদ্যোগী ছিলেন। আমি একজন তাঁহার ছাত্র ছিলাম। আমি যেন দেখিতেছি, তিনি ঔষধ হস্তে লইয়া পীড়িত বালকের শয্যার পার্শ্বে দণ্ডায়মান রহিয়াছেন, অথবা যেখানে যাত্রা হইতেছে, তথায় হঠাৎ আসিয়া অভিনেতা বালককে নীচ আমোদক্ষেত্র হইতে বলপূর্ব্বক লইয়া যাইতেছেন। কবিন্ সাহেব এই কলিকাতা নগরের একজন প্রধান সওদাগর ছিলেন। তিনি অত্যন্ত পরোপকারী ও সদাশয় ব্যক্তি ছিলেন। তাঁহার পুত্র উত্তর-পশ্চিমাঞ্চলের লেফটেনেন্ট গবর্নর হইয়াছিলেন। তিনি সিপাইদের বিদ্রোহের সময় অনেক কষ্ট ভোগ করিয়া অকালে কালগ্রাসে পতিত হইয়াছিলেন। তিনিও একজন অতি দয়ালু ও সদাশয় ব্যক্তি ছিলেন। এতদেশীয়দের প্রতি তাঁহার বিলক্ষণ স্নেহ ছিল। জন পামরকে লোকে “Prince of Merchants” অর্থাৎ সওদাগরদের রাজা বলিয়া ডাকিত। তাঁহার মৃত্যুর পর তাঁহার গোরের উপরে

“Here lies John Palmer, friend of the poor.”—
 “এখানে দরিদ্র-জন-বন্ধু জন পামর আছেন,” কেবল এই বাক্যটি
 লিখিত হইয়াছিল। কেরি ও মার্শমেন সাহেব খৃষ্টীয় ধর্ম প্রচারক
 ছিলেন। তাঁহারা শ্রীরামপুরে বাস করিতেন। তাঁহারা বাঙ্গালা
 অভিধান, বাঙ্গালা সংবাদপত্র ও উন্নত প্রণালীর বাঙ্গালা পাঠ-
 শালার সৃষ্টিকর্তা ছিলেন। তাঁহারা অনেক প্রকারে বঙ্গদেশের
 মহোপকার সাধন করিয়া গিয়াছেন। সেকালের এই সকল
 মহদন্তঃকরণ সাহেবেরা চিরকাল বাঙ্গালীদিগের স্মৃতিক্ষেত্রে
 বিদ্যমান থাকিবেন তাহার সন্দেহ নাই।

অতঃপর সে কালের বাঙ্গালীদের বিষয় বলিতে প্রবৃত্ত হই-
 তেছি। সে কালের বিশেষ বিশেষ শ্রেণীর লোকদিগের বর্ণনা
 করিতে গেলে আমাদের দৃষ্টি গুরুমহাশয়ের উপর প্রথম পতিত
 হয়। গুরুমহাশয়দিগের শিক্ষাপ্রণালী উন্নত ছিল না এবং
 তাঁহাদের অবলম্বিত ছাত্রদিগের দণ্ডের বিধানটি বড় কঠোর
 ছিল। নাড়ুগোপাল অর্থাৎ হাঁঠু গাড়িয়া বসাইয়া হাতে প্রকাণ্ড
 ইষ্টক অনেকক্ষণ পর্য্যন্ত রাখানো, বিছুটি গায়ে দেওয়া ইত্যাদি
 অনেক প্রকার নির্দয় দণ্ড প্রদানের রীতি প্রচলিত ছিল। পাঁচ
 বৎসর বয়স হইতে দশ বৎসর বয়স পর্য্যন্ত তালপাতে; তার
 পর পনের বৎসর বয়স পর্য্যন্ত কলার পাতে; তার পর কুড়ি
 বৎসর বয়স পর্য্যন্ত কাগজে লেখা হইত। সামান্ত অঙ্ক কষিতে,
 সামান্ত পত্র লিখিতে ও গুরুদক্ষিণা ও দাতাকর্ণ নামক পুস্তক
 পড়িতে সমর্থ করা, গুরুমহাশয়দিগের শিক্ষার শেষ সীমা ছিল।
 গুরুমহাশয় অতি ভীষণ পদার্থ ছিলেন। আমার স্মরণ হয়,
 আমি যখন গুরুমহাশয়ের পাঠশালার পাঠ করিতাম, তখন

রামনারায়ণ নামে আমার একজন সহাধ্যায়ী ছিলেন। তিনি কোন দোষ করিলে, গুরুমহাশয় যখন রামনারায়ণ! বলিয়া ডাকিতেন, তখন তাঁহার ভয়সূচক একটি শারীরিক ক্রিয়া হইত।

গুরুমহাশয়ের পর আখন্জীর বর্ণনা করা কর্তব্য। আখন্জী অতি অদ্ভুত পদার্থ ছিলেন। মনে করুন হিন্দুর বাটার একটি ঘরে মুসলমানের বাসা। তিনি তথায় বৃহদাকার বদনা ও স্তূপাকার পেঁয়াজ লইয়া বসিয়া আছেন। সাগরেদ্রা নিয়ত বশবর্তী। চাকর দ্বারা জল আনয়ন কার্য্য করিয়া লওয়া আখন্জীর মনঃপূত হইত না। তাঁহার সাগরেদ্দিগকে কলসী লইয়া জল আনিয়া দিতে হইত। তখন পারশী পড়ার বড় ধুম। তখন পারশী পড়াই এতদেশীয়দিগের উচ্চতম শিক্ষা বলিয়া পরিগণিত হইত। এই পারশী ভাষা সকল আদালতে চলিত ছিল। ১৮৩৬ খৃষ্টাব্দে তাহার ব্যবহার আদালতে রহিত হয়। পন্দনামা, গোলেস্তা, বোস্তা, জেলেখা, আল্লামী প্রভৃতি পুস্তক সাধারণ পাঠ্য পুস্তক ছিল। কেহ কেহ আরবী ব্যাকরণ একটু একটু পাঠ করিতেন। আখন্জীরা পারশীর উচ্চারণ অতি বিকৃত করিয়া কেলিয়াছিলেন।

অতঃপর সে কালের ভট্টাচার্য্যগণ আমাদিগের বর্ণনার বিষয় হইতেছেন। তখনকার ভট্টাচার্য্যগণ অতি সরলস্বভাব ছিলেন। এখনকার ভট্টাচার্য্যগণ যেমন বিষয়বুদ্ধিতে বিষয়ী লোকের ঘাড়ে যান, সে কালের ভট্টাচার্য্যেরা সেরূপ ছিলেন না। তাঁহারা সংস্কৃত শাস্ত্র অতি প্রগাঢ় রূপে জানিতেন এবং অতি সরল ও সদাশয় ছিলেন। সে কালের রাজা কৃষ্ণচন্দ্রের সমকালবর্তী রামনাথ নামে একজন পণ্ডিত ছিলেন। তিনি

নববীপের নিকটস্থ একটি গ্রামে বাস করিতেন। তিনি রাজ-সভাবিচরণকারী চাটুকার ভট্টাচার্য্যদিগের শ্রায় সভ্যতার নিয়ম পরিজ্ঞাত ছিলেন না। এই জন্ত লোকে তাঁহাকে বুনো রামনাথ বলিয়া ডাকিত। এক দিন রাজা কৃষ্ণচন্দ্র অমাত্য-সমভি-বাহারে তাঁহার সহিত সাক্ষাৎ করিতে গেলেন। রাজা তাঁহার অবস্থা দেখিয়া তাঁহাকে কিছু অর্থ সাহায্য করিতে ইচ্ছুক হইলেন। কিন্তু তাঁহার কি প্রয়োজন তাহা জানিতে হইবে, এজন্ত ইঙ্গিতে জিজ্ঞাসা করিলেন, “মহাশয়ের কিছু অল্পপপত্তি আছে?” এখন, শ্রায়শাস্ত্রে অল্পপপত্তির অর্থ, যাহার কোন সিক্কান্ত হয় না। ভট্টাচার্য্য তাহাই বুঝিয়া লইলেন এবং বলিলেন, “কৈ না, আমার কিছুই অল্পপপত্তি নাই।” রাজা তাহা বুঝিতে পারিয়া অপেক্ষাকৃত স্পষ্ট করিয়া জিজ্ঞাসা করিলেন, “মহাশয়ের কিছু অসঙ্গতি আছে?” এখন, অসঙ্গতি শব্দের শ্রায়শাস্ত্রোন্নিখিত অর্থ অসম্বয়। ভট্টাচার্য্য বলিলেন, “না, কিছুই অসঙ্গতি নাই, সকলই সম্বয় করিতে সমর্থ হইয়াছি।” রাজা দেখিলেন, মহা মুঞ্চিল। তখন তিনি স্পষ্ট করিয়া জিজ্ঞাসা করিলেন, “সাংসারিক বিষয়ে আপনার কোন অনটন আছে?” ব্রাহ্মণ উত্তর করিলেন, “না, কিছুই অনটন নাই; আমার কয়েক বিঘা ভূমি আছে, তাহাতে যথেষ্ট ধাত্ত উৎপন্ন হয়, আর সম্মুখে এই তিস্তিড়ী বৃক্ষ দেখিতেছেন, ইহার পত্র আমার গৃহিণী দিব্য পাক করেন, অতি সুন্দর লাগে, আমি স্বচ্ছন্দে তাহা দিয়া অন্ন আহার করি।” আমি আশ্চর্য্য বোধ করি যে, এমন সরল সাধু সঙ্কটচিত্ত ব্যক্তিকে লোকে বুনো বলিত। ইনি যদি বুনো তবে সভ্য কে? আর এক ভট্টাচার্য্য

ছিলেন, তাঁহার জী ডাইল পাক করিতেছিলেন। তিনি স্বামীকে রন্ধনশালায় বসাইয়া পুষ্করিণীতে জল আনিতে গেলেন। এদিকে ডাইল উথলিয়া উঠিল। ভট্টাচার্য্য দেখিলেন, বিষম বিপদ। ডাইল উথলিয়া পড়া কি প্রকারে নিবারণ করিবেন, কিছুই স্থির করিতে না পারিয়া হাতে পইতা জড়াইয়া পতনোন্মুখ ডাইলের অব্যবহিত উপরিস্থ শূণ্ডে তাহা স্থাপন করিয়া চণ্ডীপাঠ করিতে লাগিলেন; কিন্তু তাহাতেও তাহা নিবারিত হইল না। এমন সময় তাঁহার ব্রাহ্মণী পুষ্করিণী হইতে ফিরিয়া আইলেন। তিনি কহিলেন, “এ কি? ইহাতে একটু তেল ফেলিয়া দিতে পার নাই?” এই বলিয়া তিনি ডাইলে একটু তেল ফেলিয়া দিলেন। ডাইলের উথলিয়া পড়া নিবারিত হইল। এই ব্যাপার দেখিয়া ভট্টাচার্য্য গললগ্নীবাস হইয়া করষোড়ে ব্রাহ্মণীকে বলিলেন, “তুমি কে আমার গৃহে অধিষ্ঠিতা বল; অবশ্য কোন দেবী হইবে, নতুবা এই অদ্ভুত ব্যাপার কি প্রকারে সাধন করিতে পারিলে?” যতপি এই গল্পে বাহুল্য-বর্ণনার স্পষ্ট চিহ্ন লক্ষিত হইতেছে, তথাপি উহা যে সে কালের ভট্টাচার্য্যদিগের অসামান্য সারল্যের পরিচয় প্রদান করিতেছে, তাহার আর সন্দেহ নাই।

ভট্টাচার্য্যদিগের অবৈষয়িকতার আর একটি সুন্দর গল্প আছে। এক জন ভট্টাচার্য্য পুথি পড়িতেছিলেন; পড়িতে পড়িতে অনেক রাত্রি হইলে তাঁহার তামাক খাইবার বড় ইচ্ছা হইল। তখন ভট্টাচার্য্য মহাশয় একখানি টাকা লইয়া বাটার বাহির হইলেন। দেখিলেন দূরে একটা পাঁজা পুড়িতেছে। তিনি আন্তে আন্তে সেই স্থানে টাকা ধরাইতে উপস্থিত হইলেন,

কিন্তু ঘরে যে প্রদীপ জলিতেছিল তাহা একেবারে ভুলিয়া গিয়াছিলেন।

অতঃপর সে কালের রাজকর্মচারীদিগের বর্ণনা করিতে প্রবৃত্ত হইতেছি। ইংরাজের আমলের প্রথমে আমলাদিগের বড় প্রাভুর্ভাব ছিল। এক এক জন আমলার উপর অনেক কর্মের ভার থাকিত। তাঁহারা অনেক টাকা উপার্জন করিতেন। এক এক জন দেওয়ান বিপুল অর্থ উপার্জন করিয়া গিয়াছেন। ঢাকা নগরের এক জন দেওয়ানের কথা এইরূপ শুনা যায়, তিনি আহারের সময় একটি প্রকাণ্ড ঘণ্টা বাজাইয়া দিতেন, নগরের সমুদায় বাসাড়ে লোক সেই ঘণ্টার রব শুনিয়া তাঁহার বাসায় আসিয়া আহার করিত। তখন ঐ সকল পদ এক প্রকার বংশপরম্পরাগত ছিল। এক জন দেওয়ানের মৃত্যু হইলে প্রায়ই তাঁহার সন্তান অথবা অন্ত কোন ঘনিষ্ঠ সম্পর্কীয় লোক দেওয়ান হইত। শুনা আছে, কলিকাতার নিকটবর্তী কোন গ্রামবাসী এক দেওয়ানের মৃত্যুর পর তাঁহার সপ্তদশ-বৎসর-বয়স্ক কনিষ্ঠ ভ্রাতা কাণের মাকড়ী ও হাতের বালা খুলিয়া দেওয়ানী করিতে গেলেন। সাহেবেরা তাঁহাদিগের দেওয়ানদিগের প্রতি কিরূপ ব্যবহার করিতেন, তাহা পূর্বে বলিয়াছি। সে সময়ে উৎকোচ লইবার বাড়াবাড়ি ছিল। শুদ্ধ বান্ধালীরা যে উৎকোচ লইতেন এমন নহে, বড় বড় সাহেবেরাও উৎকোচ লইতেন। এখন সেরূপ নহে। এ বিষয়ে অবশ্যই উন্নতি দেখিতেছি।

পরিশেষে সে কালের ধনী লোকদিগের বর্ণনা করা হইতেছে। ইহারা অত্যন্ত বদাশ্র ছিলেন। পুঙ্খরিণী খননাদি পূর্তকর্মে

তঁাহারা বিশেষ মনোযোগী ছিলেন। তঁাহারা সন্ন্যাসী ও দরিদ্রদিগকে বিলক্ষণ দান করিতেন। তঁাহারা অতিথিসেবায় তৎপর ছিলেন। তঁাহারা গুণী লোকদিগকে বিলক্ষণরূপে পালন করিতেন। ব্রাহ্মণ পণ্ডিত ও প্রসিদ্ধ গায়কদিগকে বিশিষ্ট অর্থানুকূল্য করিতেন। কোন কোন স্থলে উপযুক্ত পাত্রে তঁাহাদিগের দানশীলতা প্রযোজিত হইত না বটে, কিন্তু তঁাহারা যে অত্যন্ত বদাত্ত ছিলেন তাহার আর সন্দেহ নাই।

রাজনারায়ণ বসু ।

অগ্নিমন্ত্রে দীক্ষা

যদি জিজ্ঞাসা করি হে আত্মন! ধর্মজীবনের বাল্যকালে কি মন্ত্রে দীক্ষিত হইয়াছিলে? আত্মা উত্তর দেয়, অগ্নিমন্ত্রে। বাল্যকালাবধি আমি অগ্নিমন্ত্রের উপাসক, অগ্নিমন্ত্রেরই পক্ষপাতী। অগ্নির অবস্থাকে পরিত্রাণের অবস্থা জ্ঞান করি। অগ্নিমন্ত্র কি? শীতলতা কি বৃদ্ধিতে হইলে, উত্তাপ বৃদ্ধিতে হয়। আমি দেখিয়াছি, অনেক জীবনে শীতলতা থাকে, অগ্নি থাকে না; অনেক জীবনে অগ্নি থাকে, শীতলতা থাকে না। অনেকের শীতল স্বভাব; মনের ভিতরে শান্তি; তাঁহারা কার্যবিহীন, তাঁহাদের কার্যে অত্যন্ত ঠাণ্ডা ভাব। গতি নুহ, কথা অগ্নিবিহীন, হৃদয়ে তেজ অল্প, চক্ষু কোমল, এই সকল ব্যাপার দেখিলে, শৈত্যপ্রধান জীবন নির্ধারণ করি। পৃথিবীতে এমন অনেক লোক আছেন, তাঁহারা শীতলতা ব্রত বলিয়া সাধন করেন; তাঁহারা চলেন শীতলভাবে, কার্য করেন শীতলভাবে; সাধন যদি শেষ করিতে হয়, শেষ করেন শীতলভাবে। তাঁহারা শীতল প্রদেশেরই অন্বেষণ করেন; বাস করেন শীতল প্রদেশ নইয়া। তাঁহারা শীতল যোগ সাধন করিতে চান; শীতল মুক্তি পাইবার অভিলাষী হন। স্বর্গে সেখানেও শীতলস্থানে শীতলভাবে থাকিবার আশা করেন। যদি পৃথিবীতে তাঁহাদের সম্মুখে অগ্নি ও জল স্থাপন করা হয়, তাঁহারা অগ্নি ছাড়িয়া জলে প্রবেশ করেন। স্বর্গীয় অগ্নি ও জল যদি তাঁহাদিগকে দেওয়া হয়,

আশা ও ভক্তির সহিত তাঁহারা জলের দিকে দৃষ্টি করেন। কবে সেই জল পাইবেন, কেবল এই আশা করেন।

শীতলতা যদি প্রধান ভাব হয়, তবে তাহা নিস্তেজ করে মনুষ্যের স্বভাবকে; শিথিল করে স্বভাবের বন্ধনকে। তেজ যদি থাকে, তাহা নিস্তেজ হয়; শক্তি শক্তিহীন হয়; বীৰ্য্য, উত্তম অবসন্ন হইয়া পড়ে। জল আসিয়া সমস্ত অগ্নিকে নির্বাণ করে, ভীৰুতা আসিয়া সাহসকে গ্রাস করে; সহিষ্ণুতা, ধৈর্য্য আসিয়া উত্তম উৎসাহ বলিয়া যা কিছু উত্তেজক ভাব আছে, এক এক করিয়া সমুদয়কে নির্বাসিত করে। ধর্ম্ম ক্রিয়া পরিত্যাগ করিয়া শয্যাশায়ী হইবার উত্তোগ করে তাহারা, যাহারা শীতলতা ভিন্ন আর কিছুই চায় না। নিষ্ক্রিয় উপাসনা ও বিশ্রামের পক্ষপাতী হইয়া শৈত্য-প্রধান জীবন ক্রমে ক্রমে অবসন্ন হইতে থাকে। দুঃখ যেদিকে, সেদিকে তাহারা যাইবে না; যেখানে শান্তি, নির্ভয়, সেইখানে গিয়া লুকাইয়া থাকিবে। এ সমুদয়ের বিপরীত দিকে যা দেখিতে পাও, তৎসমুদয় অগ্নি। এ সকলের বিপরীত ভাব অগ্নি-প্রধান জীবনে দেখিতে পাইবে। এই ব্যক্তির জীবনে, গোড়া হইতে এ পর্য্যন্ত, এই উৎসাহ উত্তমের অগ্নি ক্রমাগত জলিতেছে। ইহা যে সাময়িক বীরত্বের ভাবে দেখা দিতেছে, তাহা নয়। কখনও কখনও দেখা যাইতেছে, তা নয়। ধর্ম্মের অভিধানে লেখা আছে, উত্তাপের অর্থই জীবন; উত্তাপের বিপরীত মৃত্যু। শরীর যদি সম্পূর্ণরূপে শীতল হইয়া পড়ে চিকিৎসকেরা সিদ্ধান্ত করিবেন, মৃত্যু। কিছুমাত্র অগ্নি নাই, একটুও উত্তাপ নাই, দেখিলেই বলিবেন, প্রাণ-অগ্নি নির্বাণ হইয়াছে। ধর্ম্ম জীবনেও উত্তাপ না থাকিলে মৃত্যু। এই জন্তই বাল্যকাল

হইতে আমি অগ্নির পক্ষপাতী ; অগ্নিমন্ত্রেই আমার দীক্ষা । একটু ঠাণ্ডাভাব দেখিলেই মন ছড়্‌ছড়্‌ করে ।

শরীরে হাত দিলেই ভিতরে জীবন কি মৃত্যু বুঝা যায় ; আত্মাকেও দেখিবামাত্র তেমনই জীবিত কি মৃত জানিতে পারা যায় । আমি পাপী কিনা বুঝিতে বরং সময় লাগে, কিন্তু জীবন আছে কিনা অতি সহজেই জানা যায় । কিসে ? উত্তপ্ত কি শীতল দেখিলেই তাহা নিষ্কারণ করা যায় । এই কারণেই প্রার্থনা করি, সাধন করি, কিসে আত্মা উত্তাপযুক্ত, সতেজ থাকে । অগ্নির ভিতরে জীবন থাকে বলিয়াই অগ্নিকে আমি বরণ করি, আলিঙ্গন করি ও অত্যন্ত ভালবাসিয়া থাকি । উত্তাপ দেখিলেই ভরসা হয়; আনন্দ হয়, উৎসাহ হয় । যদি দেখি, অগ্নির তেজ কমিতেছে, বুঝি, এবার এ লোক জলে ঝাঁপ দিয়া মরিবে । যদি দেখি পাঁচ বৎসরের উৎসাহের পর কেহ ঠাণ্ডা হইতেছে, বুঝিয়া লই, এ লোক এবার পাপ করিতে চলিল, এবার মৃত্যু আসিয়া ইহার ঘাড় ধরিবে । এই জন্তই উত্তাপবিহীন অবস্থাকে অগবিত্ত অবস্থা মনে করিতাম । যে দিন প্রাতঃকালে অগ্নিমন্ত্রে দীক্ষিত না হইয়া শয্যা হইতে উঠিতাম, মৃত্যু ভাবিতাম । নরক ও শীতল ভাব, আমি একই মনে করিতাম । কি মনের চারিদিকে, কি সামাজিক অবস্থার চারিদিকে, সততই উৎসাহের অগ্নি জালিয়া রাখিতাম । একদলের কাছে সেবা করিলাম, আর একটা দল কবে হইবে ; দশটা দল প্রস্তুত করিলাম, আর দশটা দল কবে প্রস্তুত করিব, ইহারই জন্ত ব্যগ্র থাকিতাম । এক বিভাগে কাজ করিতাম, আর এক বিভাগে কবে কাজ করিব; কতকগুলি লোকের সঙ্গে আলাপ করিলাম, আর কতকগুলি লোকের সঙ্গে কিসে আলাপ করিতে পাইব; কতকগুলি শাস্ত্র

সঙ্কলন করিয়া সত্য সংগ্রহ করিলাম, পাছে সেই সত্যগুলি লইয়া থাকিলে সেগুলি পুরাতন হইয়া পড়ে, এইজন্ত কিরূপে অপর কতকগুলি পড়িয়া সত্য সংগ্রহ করিব, কেবল এই চেষ্টাই ছিল। ইহাই উত্তাপের অবস্থা।

ক্রমাগত নূতন ভাব লইবার, নূতন পাইবার, নূতন সম্ভোগ করিবার ইচ্ছা হইতেছে। এ লোক ক্রমাগত নূতন দিকেই দৌড়িতেছে। নূতন মাত্রই উত্তাপবিশিষ্ট; পুরাতনের অর্থই শীতল। কত ব্রহ্মপরায়ণ ব্রাহ্ম দেখিলাম; চাকরী পুরাতন হইল, পাঠ অধ্যয়ন পুরাতন হইল, বড় বড় যুবাব যুত্যা হইল। কত উৎসাহী পুরুষ ছিলেন, পাপ করিলেন না, নরহত্যা করিলেন না, অবশেষে জলে ডুবিয়া মরিলেন। কত ব্রাহ্ম অনেক দিন বৈরাগ্য সাধন করিলেন, অবশেষে তাঁহাদের জীবন যাই শীতল হইয়া আসিল, সংসার তাঁহাদের নিকট হইতে স্নদ শুদ্ধ আসক্তি আদায় করিল, টাকার লোভে শেষটা মরিতে হইল। অনেক উৎসাহী যুবা দেখিয়া ছিলাম, তাঁহারা এ বিভাগে কি ও বিভাগে, এ দলে কি ও দলে, এ গ্রামে কি ও গ্রামে, কোথায় যে লুকাইয়া রহিলেন, দেখা যায় না। এক সময়ে কেমন উৎসাহী বীরের ছায় ছিলেন, এখন এমন ঠাণ্ডা যে কাছে বসিলেও উত্তাপ বোধ হয় না। এমনই ঠাণ্ডা যে আপনারা কেবল মরিতেছেন তাহা নয়, তাঁহাদের জীবন হইতে অপরের জীবনে জল প্রবিষ্ট হইতেছে। কত লোকেই তাহাতে মরিতেছে। পাছে হস্ত পদ শীতল হয়, পাছে চক্ষু ঠাণ্ডা হয়, পাছে হৃদয় উত্তমবিহীন হয়, ইহার জন্ত আমি সর্বদা সাবধান। একটু ঠাণ্ডা ভাব, পুরাতন ভাব দেখিলাম, মনে হইল, করি কি? কাজ কর্ম যে পুরাতন হইতেছে, উপাসনা যে পুরাতন হইতেছে,

বলিলাম “দয়াময়, এ বিপদ হ’তে সন্তানকে বাঁচাও।” এই বলিবামাত্র হোমের আরোজন করিলাম, ঘি ঢালিতে লাগিলাম। ঈশ্বর যিনি অগ্নিস্বরূপ, তাঁহাকে ডাকিতে ডাকিতে দেখি, সমুদ্র, নদীর উপরে আগুন ভাসিতেছে; পর্বতে আগুন জলিতেছে; জীব-শরীরে পর্য্যন্ত আগুন রহিয়াছে। নব নব সত্য অমনই এদিক হইতে ওদিক হইতে প্রকাশিত হইল।

যদি মিথ্যা কথা কই তা হ’লেই কি পাপী? তা নয়। যদি উপাসনাতে ঠাণ্ডা ভাব হয়, যদি আমায় কথায় শ্রোতার ভীৰু হয়, উৎসাহহীন হয়, তাহা হইলেও আমি ঘোর পাপী। কেননা পৃথিবীতে ঠাণ্ডা বিষ ঢালিতে আমি আসি নাই। অত্যন্ত নিশ্চিন্ত নিশ্চেষ্ট যদি হই, কেবল আমার সৰ্বনাশ হইবে না, আর দশজনেরও সৰ্বনাশ হইবে। সৰ্বদা উত্তাপ না থাকিলে সৰ্বনাশ হইতে পারে। এইজন্ত আশাগুলিকে সতেজ করিয়া, বিশ্বাসকে সতেজ করিয়া, সতেজ উদ্ভম লইয়া থাকিব। যখনই মনে হইবে শীতল ভাব আসিতেছে, বুঝিব কাম, ধূর্ত ব্যবহার, কপটতা সব সঙ্গে সঙ্গে আসিতেছে। মনে করিব পাপের শয্যায় শয়ন করিয়াছি। উপাসনার ঘরে গিয়া যদি দেখি কেবল জল, বুঝিব, অশুকার উপাসনা মারিবে। ধ্যান করিতে ইচ্ছা নাই, শব্দ এক একটা বলিতেছি; মনের ভিতর দেখিতেছি, তেজের সহিত বলিতেছি না; বুঝিব, উত্তাপ নাই, মৃত্যুর ব্যাপার। কার্যালয়ে বসিয়া কার্য করিতেছি, অথচ উত্তাপ নাই; বুঝিতে হইবে, প্রভুর কার্য করিতেছি না, মরণের কার্য করিতেছি। সেই জন্তই আমি প্রথম হইতে অগ্নিমন্ত্রের আদর করিতেছি। বিশ্বাসী দলের মধ্যে শাস্ত ভাব আছে, জানি। কিন্তু দোষ হউক আর গুণ

হউক আমি চিরদিনই উত্তাপপ্রিয়। নিষ্ক্রিয় হওয়া আমার পক্ষে সহজ নহে; দল ছাড়িয়া এক স্থানে লুকাইয়া থাকা এক প্রকার অসম্ভব। অগ্নিতে মস্তক হইতে পা পর্যন্ত পূর্ণ করিয়াছি। এই ভাব লইয়া সেবা করিলাম, পরিশ্রম করিলাম, ধ্যান, সাধন করিলাম। নির্জনে ব্রহ্মদর্শন কেমন তাহাও অনুভব করিলাম, সমুদয় ব্যবসায়ে প্রবৃত্ত হইলাম, কিন্তু শীতলতার কূপে পড়িয়া প্রাণ হারাইলাম না, এই সৌভাগ্য মনে মনে বোধ করিতেছি।

শীতল যাহারা তাহারা ভীৰু হয়; পাঁচ দশ বৎসর সাধন করিয়া পলায়ন করে। শীতলতা এমনই যে অগ্নিকে একেবারে নিবাইয়া ফেলে। গরম কি নরম? দেখিবে, ক্রিয়া আছে কি না? উত্তম আছে কি না? যদি দেখ আর বড় চেষ্টা করিতে ইচ্ছা হয় না, আর কার্য্য করিতে কোন আশ্রয় হয় না, আর দশজনে মিলিয়া সঙ্কীৰ্ত্তন করিতে উৎসাহ হয় না, অমনই চিকিৎসক ডাক, তোমরা মরিতে বসিয়াছ। তোমরা ব্রহ্মভক্তগণ, তোমাদের ধ্যানে উত্তম উৎসাহ থাকিবে না? ধর্ম্ম কার্য্যে উত্তাপ থাকিবে না? কখনই ইহা হইবে না। নিরাশার ঠাণ্ডা কথা তোমরা মুখে এনো না। হাত পা যেমন গরম থাকিলে শরীরে জীবনের লক্ষণ প্রকাশ পায়, তেমনি কার্য্য, চিন্তা, আশা, বিশ্বাস, কথা, ব্রত, এ সমুদয়ে উত্তাপ থাকিলে ধর্ম্ম-জীবনের লক্ষণ প্রকাশ পাইবে। তোমার অঙ্গুলিতে এমনই উত্তাপ থাকিবে যে স্পর্শমাত্র তোমার অঙ্গুলি হইতে আমার অঙ্গুলিতে তাপ সঞ্চালিত হইয়া আসিবে। আশী বৎসরের বৃদ্ধের এমনই তেজ যে, রসনা হইতে কথা বাহির হইতেছে, অমনই লক্ষ লক্ষ লোক উত্তেজিত হইতেছে। কাছে আসিলেই লোকে

বলিবে, আশী বৎসর বয়স হইল, উৎসাহ এখনও কমিল না ? এইরূপ তেজ, উৎসাহ, উত্তাপ, অগ্নি, প্রত্যেকের রাখিতে হইবে। উৎসাহদাতা, প্রাণদাতা যিনি, তাঁহাকেই ডাকি, উৎসাহের সহিত অগ্নিস্বরূপকে ডাকি। অগ্নি, অগ্নি, অগ্নি, রসনা ইহাই কেবল উচ্চারণ করুক, হৃদয় সর্বদা এই মন্ত্র সাধন করুক।

হে দয়ালু ! হে অগ্নিস্বরূপ ব্রহ্ম ! এই পৃথিবীতে সংসার অনেক কূপ নির্মাণ করিয়া বসিয়া আছে। সুযোগ পাইলেই মানুষকে ধরিয়া নিক্ষেপ করে, বিনাশ করে। জননি ! যতক্ষণ উত্তাপ থাকে আত্মাতে, ততক্ষণ আমরা তোমার। সংসার যদি কূপের জলে ফেলিয়া দেয় আর উত্তাপ থাকে না, আর ধর্ম সাধন করিতে পারি না, শৈত্য আসিয়া নষ্ট করিতে থাকে। হে প্রেমময় ! আরও বাক্যে, কার্যে, চিন্তায় তেজ দাও, যেন অকালে শীতলতারূপ মৃত্যুগ্রাসে না পড়ি।

এই পরম সৌভাগ্য যে, মা বলিয়া এখনও ডাকিতেছি ; এখনও দুই পার্শ্বে প্রকাণ্ড অগ্নিকুণ্ড জলিতেছে। সেই বাল্যকালে অগ্নিমস্ত্রে দীক্ষিত হইয়াছি বলিয়া, রোগ, সম্ভাপ, বিপদ, আপদের মধ্যে তোমার পবিত্র চরণ পূজা করিতেছি ; এখনও বন্ধু বান্ধব লইয়া নাচিতেছি, তোমার নামের গীত গান করিতেছি। কত লোক আসিয়াছিলেন, কত ভাব দেখাইয়াছিলেন, তাঁহারা অনেকেই পলায়ন করিলেন। অগ্নিমস্ত্রে যদি আমায় দীক্ষিত না করিতে, তোমাতে পুরাতন বলিতাম, নববিধান বলিতাম না। ভূমি উৎসাহ দিয়া বাঁচাইলে। দেখিলে যখন সব পুরাতন হইয়া আসিতেছে, তখন প্রকাণ্ড নববিধানকে পাঠাইয়া দিলে। নির্বাণপ্রায় হইতেছিল যখন সমস্ত দীপালোক, তখন প্রকাণ্ড

গ্যাসের আলো জালিলে। ধত্ব, ধত্ব তুমি, বলিয়া উঠিল সমস্ত সাধকগণ। তাহারা আর একশত বৎসর অধিক আয়ু লাভ করিল, সমস্ত নিরাশা ভয় চলিয়া গেল। একটা বাস্তব পরিবর্তে একশত বাস্তব স্থাপন করিয়া, বিধানের শ্রীহরি, তোমার নাম গান করিতে লাগিলাম। এদেশের পথঘাট শাস্ত হইয়া আসিতেছিল, যুবক-সম্প্রদায় নিস্তেজ, নিরুত্তম ও নিস্তব্ধ হইয়া পড়িতেছিল, কত ব্রাহ্ম ভ্রাতা, ব্রাহ্মিকা ভগ্নী উৎসাহ-হারা হইয়া ধর্মের পথ ছাড়িয়া সংসারে ঢুকিতেছিলেন, হে করুণাসিদ্ধ উৎসাহ দাতা ! তোমার ধর্মকে রক্ষা করিবার মানস করিয়া, সকল হরবস্ত্রার মধ্যে তুমি পথ ঘাট সমস্ত অগ্নিময় করিয়া দিলে। নিস্তব্ধ রসনাকে এমনই উত্তেজিত করিলে যে, সেই অবসর রসনা আগুনের মত কথা কহিতে লাগিল। বৃক্ষলতায় আবার তোমায় দেখিলাম, সংসারে আবার তোমায় দেখিলাম, জলের মধ্যে পুনরায় তোমাকে দর্শন করিলাম, আর আগুনের ভিতর ত কথাই নাই। গেলাম গেলাম করিয়া আবার বাঁচিলাম। পুরাতন হইতে তুমি দিলে না। নবীন উত্তম উত্তাপ পাইয়া রহিয়া গেলাম। পাপ না করিলেও মরিতাম; নিতান্ত মিথ্যাবাদী শঠ না হইলেও কেবল সংসারের হাতে পড়িয়া মরিতাম। আজও যেখানে নগর-কীর্ত্তন হইতেছে, কি প্রমত্ত বৈরাগীদের মন্ততাই দেখিতেছি। ধত্ব ধত্ব তুমি ! এমনই চির-নবীন ধর্ম দিয়াছ যে, কাহারও উৎসাহ আর কমিতে চায় না। আর যে কেহ কোন কালে ইহা লইয়া বলহীন উৎসাহহীন হইয়া মরিতে পারে, একথা বিশ্বাস করি না। নববিধানে মরণ শু নাই ; শীতলতা একেবারে নাই। আমার গুণে নয়, তাইদের গুণে নয়, তোমার

শুণে। উৎসাহ আর কমিবে না; এমন নৃত্য করিব যে আর থামে না। যে মা বলিয়া ডাকিতেছি, এ মা বলা আর শেষ হইবে না। শরীর পুড়িয়া যায় শ্মশানে, আগুন নিবিয়া যায়, মনের আগুন ত কোন মতেই নিবিবে না। যদি ব্রহ্মাগ্নিতে কেহ শরীর মন পূর্ণ করিতে পারে, দেখিবে এ অগ্নি নিবিবার নয়। কি অগ্নিই জালিলে! ভক্তির আগুন, বিশ্বাসের আগুন, প্রেমের আগুন জালিয়াছ। এ আগুনে ত কেউ মরিবে না। এই অগ্নি লইয়াই থাকি। এই স্মৃথেই জীবন কাটাই, আশীর্বাদ কর। অক্ষয় ব্রত দাও, অক্ষয় উৎসাহ দাও, যাহা কোন ক্রমেই নির্বাণ হয় না। অগ্নির ভাবে উৎসাহিত কর, সেই ভাবে নৃত্য যেন করি। যে নৃত্য থামে না, সেই নৃত্যে নাচাও। যে অগ্নি নির্বাণ হয় না, সেই অগ্নি জাল। তোমার শ্রীচরণে প্রার্থনা করি, দয়াময়, আমাদেরিগকে এই ভিক্ষা দাও।

কেশবচন্দ্র সেন।

রাজপুত জীবন-সন্ধ্যা

হল্‌দীঘাটার যুদ্ধ

তুমুল সংগ্রাম আরম্ভ হইল। একদিকে অসহ্য অবমাননার প্রতিশোধ-বাঞ্ছা, অপরদিকে শিশোদীয়া-কুলের চিরস্বাধীনতা রক্ষার স্থির-প্রতিজ্ঞা। একদিকে মোগল ও অশ্বরের অসংখ্য সুশিক্ষিত সৈন্য, অপরদিকে মেওয়ারের অতুল ও অপরিসীম বীরত্ব।

হল্‌দীঘাটার উপত্যকায় ও উভয় পার্শ্বের পর্বতের উপর দ্বাবিংশ সহস্র রাজপুত সজ্জিত রহিয়াছে, দলে দলে যোদ্ধগণ আপন আপন কুলাধিপতির চারিদিক্ বেষ্টিত করিয়া অপূর্ব রণ দিতেছে; কখনও বা দূর হইতে তীর বা বর্শা নিক্ষেপ করিতেছে, কখনও বা কুলাধিপতির ইচ্ছিতে বর্ষাকালের তরঙ্গের ত্রায় হৃদমনীয় তেজে শত্রু-সৈন্তের মধ্যে পড়িয়া ছারখার করিতেছে।

পর্বত-শিখরের উপর অসভ্য-জাতিগণ ধর্ম্মরূপহন্তে দণ্ডায়মান রহিয়াছে, বর্ষার বৃষ্টির ত্রায় তীর নিক্ষেপ করিতেছে, অথবা সুবিধা পাইলেই প্রকাণ্ড প্রকাণ্ড শিলাখণ্ড শত্রুসৈন্তের উপর গড়াইয়া দিতেছে।

অন্ত তুমুল উৎসবের দিন, সে উৎসবে কেহ পরাধীন হইল না। চোহান ও রাঠোর, ঝালা, চন্দায়ৎ ও গাওয়ৎ, সকল কুলের যোদ্ধগণ ভীষণনাদে শত্রুর উপর পড়িতে লাগিল। এক দল হত হয়, অন্য দল অগ্রসর হয়; অসংখ্য সৈন্তের শবরাশির উপর দিয়া অসংখ্য সৈন্য অগ্রসর হইতে লাগিল।

কিন্তু দিল্লীর অসংখ্য সৈন্তের বিরুদ্ধে এ বীরত্ব কি করিবে ? দিল্লীর ভীষণ কামানশ্রেণী হইতে ঘন ঘন মৃত্যুর আদেশ বহির্গত হইতে লাগিল, দলে দলে রাজপুতগণ আসিয়া জীবনদান করিল।

এই বিঘোর উৎসবে প্রতাপসিংহ পশ্চাতে ছিলেন না। যুদ্ধের প্রারম্ভ হইতে অশ্বরাধিপতির দিকে তিনি ধাবমান হইলেন, কিন্তু দিল্লীর অসংখ্য সেনা ভেদ করিয়া তথায় উপস্থিত হইতে পারিলেন না।

তৎপরে প্রতাপসিংহ, সলীম বখায় হস্তী আরোহণ করিয়া যুদ্ধ করিতেছিলেন, সেই দিকে নিজ অশ্ব ধাবমান করিলেন। এবার ভীষণনাদে রাজপুতগণ মোগলসৈন্ত বিদীর্ণ করিয়া অগ্রসর হইল। স্তরে স্তরে মোগলসৈন্ত সজ্জিত ছিল, কিন্তু বর্ষাকালের পর্বততরঙ্গের ঝায় সমস্ত প্রতিবন্ধক ভেদ করিয়া প্রতাপসিংহ ও তাঁহার সৈন্তগণ অগ্রসর হইলেন, বর্ষা ও অসির আঘাতে মোগলদিগের সৈন্তরেখা লণ্ডভণ্ড করিয়া অগ্রসর হইলেন। সলীম ও প্রতাপসিংহ সম্মুখীন হইলেন।

দুই পক্ষের প্রসিদ্ধ যোদ্ধগণ নিজ নিজ প্রভুর রক্ষার্থে অগ্রসর হইলেন। অচিরে যে তুমুল হত্যাকাণ্ড, যে গগনভেদী জয়নাদ ও আর্তনাদ আরম্ভ হইল, তাহা বর্ণনা করা যায় না। রাজপুত ও মোগলদিগের বিভিন্নতা রহিল না, শত্রু ও মিত্রের বিভিন্নতা রহিল না। দুই পক্ষের পতাকার চারিদিকে শব রাশীকৃত হইল।

প্রতাপের অব্যর্থ খড়্গাঘাতে সলীমের রক্ষকগণ ভূতলশায়ী হইল। তখন প্রতাপ সলীমকে লক্ষ্য করিয়া দীর্ঘ বর্ষা নিক্ষেপ করিলেন, হাওদার লোহে সেই বর্ষা প্রতিকূদ্ধ হওয়ায় সলীম সে দিন জীবনরক্ষা পাইলেন। রোষে তর্জ্জন করিয়া প্রতাপ অশ্ব ধাবমান

করাইলেন, অশ্ববর চৈতকও প্রতাপের যোগ্য লক্ষ্য দিয়া হস্তীর শরীরের উপর সম্মুখ-পদ স্থাপন করিল। প্রতাপের অব্যর্থ আঘাতে হস্তীর মাছত হত হইল। হস্তী তখন প্রভুর বিপদ জানিয়াই যেন সলীমকে লইয়া পলায়ন করিল। তুমুল শব্দে হৃদমণীয় প্রতাপসিংহ ও তাঁহার সঙ্গিগণ পশ্চাদ্ধাবন করিলেন; মোগলসৈন্তের শ্রেণী বিদীর্ণ করিয়া ভিতরে প্রবেশ করিলেন। প্রতাপসিংহের সে অসাধারণ বীরত্ব দেখিয়া হিন্দুগণ অর্জুনের কথা স্মরণ করিল, মুসলমানগণ মুহূর্তের জন্ত মনে মনে প্রমাদ গণিল।

তখন মুসলমানগণ নিজের বিপদ দেখিয়া ক্ষিপ্তপ্রায় হইল। মুসলমান যোদ্ধগণ ভীক নহে, পঞ্চশতবৎসর ভারতবর্ষ শাসন করিয়াছে, অত্বে হিন্দুর নিকট অবমাননা স্বীকার করিবে না। একবার “আল্লাহ আকবর” শব্দে আকাশ ও মেদিনী কম্পিত করিয়া প্রতাপকে চারিদিকে বেষ্টন করিল। রাজপুতগণ পলায়ন জানে না, প্রভুর চারিদিকে হত হইতে লাগিল। শরীরের সপ্তস্থানে আহত হইয়াও প্রতাপ বিপদ জানেন না, তখনও অগ্রসর হইতেছেন।

পশ্চাৎ হইতে কয়েকজন রাজপুত যোদ্ধা মহারাণার বিপদ দেখিলেন এবং হুঙ্কার শব্দ করিয়া শিশোদীয়ার পতাকা লইয়া অগ্রসর হইলেন। পতাকা দেখিয়া সৈন্তগণ অগ্রসর হইল, প্রতাপ যে স্থানে যুদ্ধ করিতেছিলেন, তথায় ঘাইয়া উপস্থিত হইল, সবলে প্রভুকে সেই নিশ্চয় মৃত্যু হইতে সরাইয়া আনি। সে উত্তমে শত রাজপুত প্রাণদান করিল।

পুনরায় প্রতাপসিংহ যুদ্ধমদে সংজ্ঞা হারাইয়া মোগলরেখার ভিতর প্রবেশ করিলেন। পুনরায় তাঁহার রাজচ্ছত্র শত্রুবেষ্টিত

দেখিয়া রাজপুতগণ পশ্চাৎ হইতে অগ্রসর হইয়া সমরোন্মত্ত বীরকে নিশ্চয়-মৃত্যুর কবল হইতে সবলে উদ্ধার করিয়া আনিল।

কিন্তু প্রতাপসিংহ অত্যন্ত ক্ষিপ্ত—উন্মত্ত ! জ্ঞানশূন্য হইয়া তৃতীয়বার 'মোগলসৈন্তেরেখার ভিতর প্রবেশ করিলেন। এবার মোগলগণ ক্ষিপ্তপ্রায় হইল, রোষে ছট্কা করিয়া শতশত সেনা প্রতাপকে বেষ্টন করিল। প্রতাপের বহির্গমনের পথ রাখিল না। এবার মোগলগণ এই কাফের বীরকে হত করিয়া দিল্লীস্থরের হৃদয়ের কণ্টকোদ্ধার করিবে, মানসিংহের অবমাননার প্রতিশোধ দিবে।

পশ্চাতে রাজপুতগণ মহারাণার বিপদ দেখিয়া বার বার তাঁহার উদ্ধারের চেষ্টা করিল ; কিন্তু মোগলসৈন্ত অসংখ্য, রাজপুতদিগের প্রধান প্রধান বীর হত হইয়াছে, রাতপুতগণ হীনবল হইয়াছে, এবার প্রভুর উদ্ধার অসম্ভব।

বার বার দলে দলে রাজপুতগণ প্রভুর উদ্ধার-চেষ্টা করিল, দলে দলে কেবল অসংখ্য শত্রু বিনাশ করিয়া আপনারা বিনষ্ট হইল, মোগলরেখা অতিক্রম করিতে পারিল না, এবার প্রভুর উদ্ধার করিতে পারিল না।

দূর হইতে দৈলওয়ারার অধিপতি এই ব্যাপার দেখিলেন ; মুহূর্তের জন্ত ইষ্টদেবতা স্মরণ করিলেন, পরে আপনার ঝালাবংশীয় যোদ্ধা লইয়া সম্মুখে ধাবমান হইলেন। মেওয়ারের কেতন সুবর্ণ-হৃদ্য একজন সৈনিকের হস্ত হইতে আপনি লইলেন এবং মহা কোলাহলে সেই কেতন লইয়া ঝালাকুলের সহিত অগ্রসর হইলেন।

সে তেজ মোগলগণ প্রতিরোধ করিতে পারিল না, বীর দৈলওয়ারাপতি শত্রুরেখা বিদীর্ণ করিলেন। সঙ্গে সঙ্গে ঝালাকুল,

যথায় প্রতাপ উন্নত রণকুঞ্জেরে গ্রায় যুদ্ধ করিতেছিলেন, তথায় উল্লাসরবে উপস্থিত হইলেন। সবলে প্রভুকে রক্ষা করিলেন, প্রতাপকে সেই শত্রুরেখা হইতে উদ্ধার করিয়া আনিলেন ও সেই উত্তমে সম্মুখরণে আপনার প্রাণদান করিলেন।

পতনশীল দেহের দিকে চাহিয়া মহানুভব প্রতাপ বলিলেন, “দৈলওয়ারা ! অত্ম আপনার জীবন দিয়া আমার জীবন রক্ষা করিয়াছ।” দৈলওয়ারা ক্ষীণস্বরে উত্তর করিলেন, “ঝালা স্বামিধর্ম জানে, বিপৎকালে মহারাণার পার্শ্ব ত্যাগ করে না।”

প্রতাপসিংহ স্মরণ করিলেন, ফাস্তুন মাসের শেষদিন রজনীতে দৈলওয়ারাপতি এই কথাগুলি বলিয়াছিলেন। দৈলওয়ারাপতির জীবনশ্রুত দেহ ভূতলে পড়িল।

দ্বাবিংশ সহস্র রাজপুত যোদ্ধার মধ্যে চতুর্দশ সহস্র সে দিন ভূতলশায়ী হইল, অবশিষ্ট আট সহস্র মাত্র যুদ্ধক্ষেত্র ত্যাগ করিল। প্রতাপসিংহ অগত্যা হলদীঘাটার যুদ্ধক্ষেত্র ত্যাগ করিলেন। মোগলগণ জয়লাভ করিল ; কিন্তু সে যুদ্ধকথা সহসা বিস্মৃত হইল না। বহু বৎসর পরে দিল্লীতে, দাক্ষিণাত্যে বা বঙ্গদেশে প্রাচীন যোদ্ধাগণ যুবক সেনাদিগের নিকট হলদীঘাটা ও প্রতাপসিংহের বিষয়কর গল্প বলিয়া রজনী অতিবাহিত করিত।

ভ্রাতৃত্ব

যুদ্ধক্ষেত্র হইতে প্রতাপ পলায়ন করিলেন, কিন্তু তখনও তাঁহার বিপৎশাস্তি হয় নাই, দুইজন মোগল, একজন খোরাসানী, অপর জন মুলতানী, তাঁহার পশ্চাদ্ধাবন করিতেছিলেন। প্রতাপের তেজস্বী অশ্ব চৈতক লক্ষ দিয়া একটা পর্বতনদী পার হইয়া গেল, মোগলগণের সেই নদী পার হইতে বিলম্ব হইল। কিন্তু চৈতক আহত, প্রতাপও আহত। পশ্চাদ্ধাবক সন্নিকটে আসিতেছে, তাহাদিগের অশ্বের পদশব্দ সেই পর্বতরাশিতে শব্দিত হইতেছে, প্রতাপ গুনিতে পাইলেন ; এবার রক্ষা নাই জানিলেন, কিন্তু বীরের জ্ঞায় মরিবেন প্রতিজ্ঞা করিলেন।

সহসা পশ্চাৎ হইতে স্বর গুনিলেন, “হো নীলা ঘোড়ারা আশোয়ার !” পশ্চাতে চাহিয়া দেখিলেন, কেবল একজন অশ্বারোহী। সেই অশ্বারোহী তাঁহার বিষম শত্রু ও সহোদর ভ্রাতা শত্রু !

রোমে প্রতাপসিংহ বলিলেন, “সংগ্রামসিংহের পৌত্র হইয়া মোগলের দাস হইয়াছ, ইহাতেও যথেষ্ট কলঙ্ক হয় নাই ; এক্ষণে ভ্রাতাকে বধ করিতে পশ্চাদ্ধাবন করিয়াছ ? কুলকলঙ্ক ! প্রতাপসিংহ অশ্ব সংগ্রামসিংহের বংশ নিষ্কলঙ্ক করিবে।” শত্রু প্রতাপের কথায় ভীত হইলেন না, কণ্ঠ হইলেন না, ধীরে ধীরে প্রতাপের নিকট আসিয়া বলিলেন, “ভ্রাতঃ ! একদিন তোমার প্রাণনাশে ইচ্ছুক হইয়াছিলাম, কিন্তু অশ্ব সে ইচ্ছা তিরোহিত হইয়াছে। অশ্ব তোমার বীরত্ব দেখিয়া মোহিত হইয়াছি, পূর্বদোষ ক্ষমা কর, ভ্রাতাকে আলিঙ্গন দান কর।”

প্রতাপসিংহ দেখিলেন, শত্রুর নয়নে জল। বহুদিনের

বৈরভাব দূরে গেল, ভ্রাতৃস্নেহে উভয়ের হৃদয় উথলিল, উভয়ে উভয়কে স্নেহে আলিঙ্গন করিলেন।

প্রতাপের মহত্ব ও প্রতাপের বীরত্ব দেখিয়া অল্প শক্তের বৈরভাব তিরোহিত হইয়াছে, বহু বৎসরের ভ্রাতৃবিরোধ তিরোহিত হইয়াছে। ভ্রাতার নিকট ভ্রাতা ক্ষমা যাচুঞা করিতেছে, প্রতাপ কি সেই স্নেহদানে বিরত হইবেন? প্রতাপ পূর্বদোষ বিস্মৃত হইলেন, সাশ্রনয়নে হৃদয়ের ভ্রাতাকে হৃদয়ে ধারণ করিলেন।

যে দুইজন মোগল প্রতাপের পশ্চাদ্ধাবন করিয়াছিল, তাহারা কোথায়? শত্রু দূর হইতে তাহাদিগকে দেখিয়াছিলেন, ভ্রাতার প্রাণনাশের সম্ভাবনা দেখিয়া অব্যর্থ বর্ষায় সে মোগলদিগের প্রাণনাশ করিয়াছেন।

সন্ধ্যার ছায়া সেই নির্জুন উপত্যকায় অবতীর্ণ হইতে লাগিল, পূর্বতের উপর আরোহণ করিতে লাগিল। সেই নির্জুন নিঃশব্দ উপত্যকায় দুই ভ্রাতা অনেকদিনের অপহৃত ভ্রাতৃস্নেহ পাইলেন, অনেক দিনের হারাধন পাইলেন। স্নেহ হৃদয়ে লীন হয়, একেবারে শুক হয় না, সেই লীন স্নেহধারা অল্প বীরহৃদয়ের হৃদয়কে প্রাবিত করিতে লাগিল।

অনেকক্ষণ পর প্রতাপসিংহ কহিলেন, “ভাই শত্রু! আজি প্রতাপের পরাজয়ের দিন নহে, আজি বিজয়ের দিন; আজ যে অপহৃত ধন ফিরিয়া পাইলাম, যুদ্ধের পরাজয় তাহার নিকট কি তুচ্ছ! ভাই! যেন আমরা পূর্বের বিষেষ চিরকাল বিস্মৃত হই, যেন আমাদের চিরকাল এইরূপ স্নেহ থাকে। ভাইয়ে ভাইয়ে মিলিত হইয়া স্বদেশ রক্ষা করিব, বিদেশীয় শত্রুকে ভয় করিব না, দিল্লীখর ও মানসিংহকে ভয় করিব না।”

রমেশচন্দ্র দত্ত।

একা

(শ্রীকমলাকান্ত চক্রবর্তীর উক্তি)

“কে গায় ওই ?”

বহুকাল-বিস্মৃত সুখস্বপ্নের স্মৃতির জ্বায় ঐ মধুর গীতি কর্ণরঞ্জে প্রবেশ করিল। এত মধুর লাগিল কেন ? এই সঙ্গীত যে অতি সুন্দর, এমত নহে। পথিক পথ দিয়া আপন মনে গায়িতে গায়িতে যাইতেছে। জ্যোৎস্নাময়ী রাত্রি দেখিয়া, তাহার মনের আনন্দ উছলিয়া উঠিতেছে। স্বভাবতঃ তাহার কণ্ঠ মধুর ;— মধুর কণ্ঠে, এই মধুমাसे, আপনার মনের সুখের মাধুর্য্য বিকীর্ণ করিতে করিতে যাইতেছে। তবে বহুতন্ত্রীবিশিষ্ট বাস্তবের তন্ত্রীতে অঙ্গুলী-স্পর্শের জ্বায় ঐ গীতধ্বনি আমার হৃদয়কে আলোড়িত করে কেন ?

কেন কে বলিবে ? রাত্রি জ্যোৎস্নাময়ী—নদী-সৈকতে কোমুদী হাসিতেছে। অর্দ্ধাবৃত্তা সুন্দরীর নীলবসনের জ্বায় শীর্ণশরীরী নীলসলিলা তরঙ্গিণী, সৈকত বেষ্টিত করিয়া চলিয়াছেন ; রাজপথে কেবল আনন্দ—বালক, বালিকা, যুবক, যুবতী, প্রৌঢ়া, বৃদ্ধা বিমল চন্দ্রকিরণে স্নাত হইয়া, আনন্দ করিতেছে। আমিই কেবল নিরানন্দ—তাই ঐ সঙ্গীতে আমার হৃদয়-যন্ত্র বাজিয়া উঠিল।

আমি একা—তাই এই সঙ্গীতে আমার শরীর কণ্টকিত হইল। এই বহুজনাকীর্ণ নগরীমধ্যে, এই আনন্দময় অনন্ত

জনশ্রোতোমধ্যে, আমি একা। আমিও কেন ঐ অনন্ত জনশ্রোতো-
মধ্যে মিশিয়া, এই বিশাল আনন্দতরঙ্গ-তাড়িত জলবুদ্বুদসমূহের
মধ্যে আর একটি বুদবুদ না হই? বিন্দু বিন্দু বারি লইয়া সমুদ্র,
আমি বারিবিন্দু, এ সমুদ্রে মিশাই না কেন?

তাহা জানি না—কেবল ইহাই জানি যে আমি একা। কেহ
একা থাকিও না। যদি অল্প কেহ তোমার প্রণয়ভাগী না হইল
তবে তোমার মনুষ্যজন্ম বৃথা। পুষ্প সুগন্ধী, কিন্তু যদি ভ্রাণ গ্রহণ-
কর্তা না থাকিত, তবে পুষ্প সুগন্ধী হইত না—ভ্রাণেন্দ্রিয়বিশিষ্ট
না থাকিলে গন্ধ নাই। পুষ্প আপনার জন্মও ফুটে না। পরের
জন্ম তোমার হৃদয়-কুসুমকে প্রস্ফুটিত করিও।

কিন্তু বারেকমাত্র ঐ সঙ্গীত আমার কেন এত মধুর
লাগিল, তাহা বলি নাই। অনেক দিন আনন্দোখিত সঙ্গীত
শুনি নাই—অনেক দিন আনন্দানুভব করি নাই। যৌবনে যখন
পৃথিবী সুন্দরী ছিল, যখন প্রতি পুষ্পে সুগন্ধ পাইতাম, প্রতি
পত্রমন্মথের মধুর শব্দ শুনিতাম, প্রতি নরক্রে চিত্রারোহিণীর শোভা
দেখিতাম, প্রতি মনুষ্যমুখে সরলতা দেখিতাম, তখন আনন্দ
ছিল। পৃথিবী এখনও তাই আছে, সংসার এখনও তাই আছে,
মনুষ্যচরিত্র এখনও তাই আছে, কিন্তু এ হৃদয় আর তাই নাই।
তখন সঙ্গীত শুনিয়া আনন্দ হইত, আজি এই সঙ্গীত শুনিয়া
সেই আনন্দ মনে পড়িল। যে অবস্থায়, যে স্নেহে, সেই আনন্দ
অনুভূত করিতাম, সেই অবস্থা, সেই স্নেহ মনে পড়িল। মুহূর্ত্ত
জন্ম আবার যৌবন ফিরিয়া পাইলাম। আবার তেমনি করিয়া,
মনে মনে সন্মবেত বন্ধুমণ্ডলীমধ্যে বসিলাম; আবার সেই অকারণ-
সঙ্গীত উচ্চ হাসি হাসিলাম, যে কথা নিশ্চয়োজনীয় বলিয়া এখন

বলি না, নিশ্চরোজনেও চিন্তের চাঞ্চল্য-হেতু তখন বলিতাম, আবার সেই সকল বলিতে লাগিলাম; আবার অকৃত্রিম হৃদয়ে পরের প্রণয় অকৃত্রিম বলিয়া মনে মনে গ্রহণ করিলাম। ক্ষণিক ভ্রান্তি জন্মিল—তাই এ সঙ্গীত এত মধুর লাগিল। শুধু তাই নয়। তখন সঙ্গীত ভাল লাগিত,—এখন লাগে না—চিন্তের যে প্রফুল্লতার জন্ম ভাল লাগিত, সে প্রফুল্লতা নাই বলিয়া ভাল লাগে না। আমি মনের ভিতর মন লুকাইয়া সেই গত যৌবন-সুখ চিন্তা করিতেছিলাম—সেই সময়ে এই পূর্বস্মৃতিস্মচক সঙ্গীত কর্ণে প্রবেশ করিল, তাই এত মধুর বোধ হইল।

সে প্রফুল্লতা, সে সুখ আর নাই কেন? সুখের সামগ্রী কি কমিয়াছে? অর্জন এবং ক্ষতি উভয়ই সংসারের নিয়ম। কিন্তু ক্ষতি অপেক্ষা অর্জন অধিক, ইহাও নিয়ম। তুমি জীবনের পথ যতই অতিবাহিত করিবে, ততই সুখদ সামগ্রী সঞ্চয় করিবে। তবে বরসে ক্ষুণ্ণি কমে কেন? পৃথিবী আর তেমন সুন্দরী দেখা যায় না কেন? আকাশের তারা আর তেমন জলে না কেন? আকাশের নীলিমায় আর সে উজ্জলতা থাকে না কেন? যাহা তৃণপল্লবময়, কুসুমসুবাসিত, স্বচ্ছ-কল্লোলিনী-শীকর-সিক্ত, বসন্ত-পবনবিধূত বলিয়া বোধ হইত, এখন তাহা বালুকাময়ী মরুভূমি বলিয়া বোধ হয় কেন? কেবল রঞ্জিল কাচ নাই বলিয়া। আশা সেই রঞ্জিল কাচ। যৌবনে অর্জিত সুখ অল্প, কিন্তু সুখের আশা অপরিমিত। এখন অর্জিত সুখ অধিক, কিন্তু সেই ব্রহ্মাণ্ডব্যাপিনী আশা কোথায়? তখন জানিতাম না, কিসে কি হয়, অনেক আশা করিতাম। এখন জানিয়াছি, এই সংসার-চক্রে আরোহণ করিয়া, যেখানকার আবার সেইখানে ফিরিয়া আসিতে

হইবে; যখন মনে ভাবিতেছি, এই অগ্রসর হইলাম, তখন কেবল আবর্তন করিতেছি মাত্র। এখন বুঝিয়াছি যে, সংসার-সমুদ্রে সন্তরণ আরম্ভ করিলে, তরঙ্গে তরঙ্গে আমাকে প্রহত করিয়া আবার আমাকে কূলে ফেলিয়া যাইবে। এখন জানিয়াছি যে, এ অরণ্যে পথ নাই, এ প্রান্তরে জলাশয় নাই, এ নদীর পার নাই, এ সাগরে দ্বীপ নাই, এ অন্ধকারে নক্ষত্র নাই। এখন জানিয়াছি যে, কুসুমের কীট আছে, কোমল পল্লবে কণ্টক আছে, আকাশে মেঘ আছে, নির্মলা নদীতে আবর্ত আছে, ফলে বিষ আছে, উদ্ভানে সর্প আছে, মনুষ্যহৃদয়ে কেবল আত্মাদর আছে। এখন জানিয়াছি যে, বৃক্ষে বৃক্ষে ফল ধরে না, ফুলে ফুলে গন্ধ নাই, মেঘে মেঘে বৃষ্টি নাই, বনে বনে চন্দন নাই, গজে গজে মৌক্তিক নাই। এখন বুঝিতে পারিয়াছি যে, কাচও হীরকের ত্রায় উজ্জ্বল, পিত্তলও স্নবর্ণের ত্রায় ভাস্বর, পঙ্কও চন্দনের ত্রায় স্নিগ্ধ, কাংশুও রজতের ত্রায় মধুরনাদী।—কিন্তু কি বলিতেছিলাম, ভুলিয়া গেলাম। সেই গীতধ্বনি! উহা ভাল লাগিয়া ছিল বটে, কিন্তু আর দ্বিতীয়বার শুনিতে চাহি না। উহা যেমন মনুষ্যকণ্ঠজাত সঙ্গীত, তেমনি সংসারের এক সঙ্গীত আছে, সংসাররসে রসিকেরাই তাহা শুনিতে পায়। সেই সঙ্গীত শুনিবার জন্ত আমার চিত্ত বড়ই আকুল। সে সঙ্গীত আর কি শুনিব না? শুনিব, কিন্তু নানাবাদ্যধ্বনি-সম্মিলিত, বহুকণ্ঠপ্রসূত সেই পূর্বপ্রসূত সংসারগীত আর শুনিব না। সে গায়কেরা আর নাই—সে বয়স নাই, সে আশা নাই। কিন্তু তৎপরিবর্তে যাহা শুনিতেছি, তাহা অধিকতর প্রীতিকর। অনন্তসহায় একমাত্র-গীতি-ধ্বনিতে কণ্ঠবিবর পরিপূরিত হইতেছে। প্রীতি সংসারে সর্বব্যাপিনী—

প্রীতিই ঈশ্বর। প্রীতিই আমার কর্ণে একগুণকার সংসারসঙ্গীত।
অনন্তকাল সেই মহাসঙ্গীত-সহিত মনুষ্য-হৃদয়তন্ত্রী বাজিতে থাকুক।
মনুষ্যজাতির উপর যদি আমার প্রীতি থাকে, তবে আমি অস্ত্র স্পর্শ
চাই না।

বঙ্কিমচন্দ্র চট্টোপাধ্যায়।

আমার দুর্গোৎসব

(শ্রীকমলাকান্ত চক্রবর্তীর উক্তি)

সপ্তমী পূজার দিন কে আমাকে এত আফিক চড়াইতে বলিল !
আমি কেন আফিক থাইলাম ! আমি কেন প্রতিমা দেখিতে
গেলাম ! যাহা কখন দেখিব না, তাহা কেন দেখিলাম ! এ কুহক
কে দেখাইল !

দেখিলাম—অকস্মাৎ কালের স্রোত দিগন্ত ব্যাপিয়া প্রবলবেগে
ছুটিতেছে—আমি ভেলায় চড়িয়া ভাসিয়া যাইতেছি। দেখিলাম—
অনন্ত, অকূল, অন্ধকারে, বাত্যাবিস্কৃত তরঙ্গসঙ্কুল সেই স্রোত—
মধ্যে উজ্জল নক্ষত্রগণ উদয় হইতেছে, নিবিতেছে—আবার
উঠিতেছে। আমি নিতান্ত একা—একা বলিয়া ভয় করিতে
লাগিল—নিতান্ত একা—মাতৃহীন—‘মা ! মা !’ করিয়া ডাকিতেছি।
আমি এই কালসমুদ্রে মাতৃসন্ধানে আসিয়াছি। কোথা মা ? কই
আমার মা ? কোথায় কমলাকান্ত-প্রসূতি বঙ্গভূমি ! এ ঘোর
কাল-সমুদ্রে কোথায় তুমি ? সহসা স্বর্গীয় বাণে কর্ণরক্ত পরিপূর্ণ
হইল—দিব্যগুণে প্রভাতারুণোদয়বৎ লোহিতোজ্জ্বল আলোক বিকীর্ণ
হইল—শিখ মন্দ পবন বহিল—সেই তরঙ্গসঙ্কুল জলরাশির উপরে,
দূরপ্রান্তে দেখিলাম—সুবর্ণমণ্ডিতা, এই সপ্তমীর শারদীয়া প্রতিমা !
জলে হাসিতেছে, ভাসিতেছে, আলোক বিকীর্ণ করিতেছে ! এই
কি মা ? হাঁ, এই মা ! চিনিলাম, এই আমার জননী—জন্মভূমি
—এই—মুন্সায়ী—মুক্তিকারুণিণী—অনন্ত রক্তভূমিতা এক্ষণে কালগর্ভে

নিহিতা । রত্নমণ্ডিত দশ ভূজ—দশ দিক্—দশ দিকে প্রসারিত ; তাহাতে নানা আয়ুধরূপে নানা শক্তি শোভিত ; পদতলে শত্রু বিমর্দিত—পদাশ্রিত বীরজন-কেশরী শত্রুনিপীড়নে নিবৃত্ত ! এ মূর্ত্তি এখন দেখিব না—আজি দেখিব না—কাল দেখিব না—কালশ্রোত পার না হইলে দেখিব না—কিন্তু একদিন দেখিব—দিগ্ভূজা, নানা-প্রহরপ্রহারিণী শত্রুমর্দিনী, বীরেন্দ্রপৃষ্ঠবিহারিণী, —দক্ষিণে লক্ষ্মী ভাগ্যরূপিণী, বামে বাণী বিণ্ডাবিজ্ঞানমূর্ত্তিময়ী, সঙ্গে বলরূপী কার্ত্তিকেয়, কার্য্যসিদ্ধিরূপী গণেশ, আমি সেই কালশ্রোতো-মধ্যে দেখিলাম, এই স্তবর্ণময়ী বঙ্গপ্রতিমা ।

কোথায় ফুল পাইলাম, বলিতে পারি না—কিন্তু সেই প্রতিমার পদতলে পুষ্পাঞ্জলি দিলাম,—ডাকিলাম, সৰ্ব্বমঙ্গলমঙ্গল্যে শিবে, আমার সৰ্ব্বার্থসাধিকে ! অসংখ্যসন্তানকুল-পালিকে ! ধর্ম্ম-অর্থ-সুখ-দুঃখ-দায়িকে ! আমার পুষ্পাঞ্জলি গ্রহণ কর । এই ভক্তি-শ্রীতি বৃত্তি শক্তি করে লইয়া তোমার পদতলে পুষ্পাঞ্জলি দিতেছি, তুমি এই অনন্তজলমণ্ডল ত্যাগ করিয়া এই বিশ্ববিমোহিনী মূর্ত্তি একবার জগৎসমীপে প্রকাশ কর । এসো মা ! নবরাগরঙ্গিনি, নববলধারিণি, নবদর্পে দর্পিণি, নবস্বপ্নদর্শিনি !—এসো মা, গৃহে এসো—ছয়কোটি সন্তানে একত্রে এককালে, দ্বাদশকোটি কর ঘোড় করিয়া তোমার পাদপদ্ম পূজা করিব । ছয়কোটি মুখে ডাকিব,—মা প্রসূতি অস্থিকে ! ধাত্রি ধরিত্রি ধনধাত্তদায়িকে ! নগাঙ্ক-শোভিনি নগেন্দ্রবালিকে ! শরৎসুন্দরি চারুপূর্ণচন্দ্রভালিকে ! ডাকিব,—সিদ্ধু-সেবিতে সিদ্ধু-পূজিতে সিদ্ধু-মথনকারিণি ! শত্রুবধে দশভূজে দশপ্রহরপ্রহারিণি অনন্তশ্রী অনন্তকাল-স্থায়িনি ! শক্তি দাও সন্তানে, অনন্তশক্তি প্রদায়িনি ! তোমায় কি বলিয়া ডাকিব

মা ? এই ছয় কোটি মুণ্ড ঐ পদপ্রান্তে লুপ্তিত করিব—এই ছয় কোটি কণ্ঠে ঐ নাম করিয়া হুঙ্কার করিব—এই ছয় কোটি দেহ তোমার জন্ত পতন করিব—না পারি, এই দ্বাদশ কোটি চক্ষে তোমার জন্ত কাঁদিব। এসো মা, গৃহে এসো—যাঁহার ছয় কোটি সন্তান, তাঁহার ভাবনা কি ?

দেখিতে দেখিতে আর দেখিলাম না—সেই অনন্ত কালসমুদ্রে সেই প্রতিমা ডুবিল ! অন্ধকারে সেই তরঙ্গসঙ্কুল জলরাশি ব্যাপিল, জলকল্লোলে বিশ্বসংসার পুরিল ! তখন যুক্তকরে সজল-নয়নে ডাকিতে লাগিলাম, উঠ মা হিরণ্ময়ি বঙ্গভূমি ! উঠ মা ! এবার স্নসন্ধান হইব, সৎপথে চলিব—তোমার মুখ রাখিব। উঠ মা, দেবি দেবানুগৃহীতে—এবার আপনা ভুলিব—ভ্রাতৃবৎসল হইব, পরের মঙ্গল সাধিব—অধর্ম, আলস্য, ইন্দ্রিয়ভক্তি ত্যাগ করিব— উঠ মা, একা রোদন করিতেছি, কাঁদিতে কাঁদিতে চক্ষু গেল মা !

উঠ উঠ মা উঠ বঙ্গজননি ! মা উঠিলেন না। উঠিলেন না কি ?

এসো ভাই সকল ! আমরা এই অন্ধকার কালপ্রোতে ঝাপ দিই ! এসো, আমরা দ্বাদশ কোটি ভুজ্জে ঐ প্রতিমা তুলিয়া, ছয় কোটি মাথায় বহিয়া, ঘরে আনি। এসো, অন্ধকারে ভয় কি ? ঐ যে নক্ষত্র মধ্যে মধ্যে উঠিতেছে, নিবিতেছে, উহারা পথ দেখাইবে—চল ! চল ! অসংখ্য বাহুর প্রক্ষেপে এই কালসমুদ্র তাড়িত, মথিত, ব্যস্ত করিয়া আমরা সম্ভরণ করি—সেই স্বর্ণপ্রতিমা মাথায় করিয়া আনি। ভয় কি ? না হয় ডুবিব, মাতৃহীনের জীবনে কাজ কি ? আইস, প্রতিমা তুলিয়া আনি, বড় পূজার ধুম বাধিবে। ঘেঁষক-ছাগকে হাড়িকাঠে ফেলিয়া সৎকীর্তি-খড়্গে

মায়ের কাছে বলি দিব—কত পুরাতনকার-ঢাকী ঢাক ঘাড়ে করিয়া
বঙ্গের বাজনা বাজাইয়া আকাশ ফাটাইবে—কত ঢোল, কঁাসি,
কাড়ানাগরায় বঙ্গের জয় বাদিত হইবে। কত সানাই পোঁ ধরিয়া
গাইবে, “কত নাচ গো।”—বড় পূজার ধুম বাধিবে। কত ব্রাহ্মণ-
পণ্ডিত লুচি-মণ্ডার লোভে বঙ্গপূজায় আসিয়া পাত্ড়া মারিবে—কত
দেশ-বিদেশী ভদ্রাভদ্র আসিয়া মায়ের চরণে প্রণামি দিবে—কত
দীন-দুঃখী প্রসাদ খাইয়া উদর পূরিবে! কত নর্তকী নাচিবে, কত
গায়কে মঙ্গল গায়িবে, কত কোটি ভক্তে ডাকিবে, মা ! মা ! মা !

বঙ্কিমচন্দ্র চট্টোপাধ্যায় ।

—

মনুষ্যত্ব কি ?

মনুষ্যজন্ম গ্রহণ করিয়া কি করিতে হইবে, আজিও মনুষ্য তাহা বুঝিতে পারে নাই। অনেক লোক আছেন, তাঁহারা জগতে ধর্ম্মাত্মা বলিয়া আত্মপরিচয় দেন, তাঁহারা মুখে বলিয়া থাকেন যে, পরকালের জন্ত পুণ্যসঞ্চয়ই ইহজন্মে মনুষ্যের উদ্দেশ্য। কিন্তু অধিকাংশ লোকই, বাক্যে না হউক, কার্যে একথা মানে না, অনেক লোক পরকালের অস্তিত্বই স্বীকার করে না। পরকাল সর্ববাদিসম্মত এবং পরকালের জন্ত পুণ্যসঞ্চয় ইহলোকের একমাত্র উদ্দেশ্য বলিয়া সর্বজনস্বীকৃত হইলেও, পুণ্য কি, সে বিষয়ে বিশেষ মতভেদ। এই বঙ্গদেশেই এক সম্প্রদায়ের মত মত্তপান পরকালের ঘোর বিপদের কারণ, আর এক সম্প্রদায়ের মত মত্তপান পরকালের জন্ত পরম কার্য্য। অথচ উভয় সম্প্রদায়ই বাঙ্গালী এবং উভয় সম্প্রদায়ই হিন্দু। যদি সত্য সত্যই পরকালের জন্ত পুণ্যসঞ্চয় মনুষ্যজন্মের প্রধান কার্য্য হয়, তবে সে পুণ্যই বা কি, কি প্রকারে তাহা অর্জিত হইতে পারে, তাহার স্থিরতা কিছুই এ পর্য্যন্ত হয় নাই।

মনে কর, তাহা স্থির হইয়াছে ; মনে কর, ব্রাহ্মণে ভক্তি, গঙ্গাস্নান, তুলসীর মালা ধারণ এবং হরিনামসঙ্কীৰ্ত্তন ইত্যাদি পুণ্যকর্ম্ম। ইহাই মনুষ্যজীবনের উদ্দেশ্য, অথবা মনে কর, রবিবারে কার্য্যাত্যাগ, গির্জায় বসিয়া নয়ননিমীলন এবং খৃষ্টধর্ম্ম ভিন্ন ধর্ম্মান্তরে বিদ্বেষ, ইহাই পুণ্যকর্ম্ম। যাহা হউক, একটা কিছু, আর কিছু হউক না হউক, দান, দয়া, সত্যনিষ্ঠা প্রভৃতি পুণ্যকর্ম্ম বলিয়া

সৰ্বজনস্বীকৃত । কিন্তু তাই বলিয়া, ইহা দেখা যায় না যে, দান, দয়া, সত্যনিষ্ঠা প্রভৃতিকে অধিক লোক জীবনের উদ্দেশ্য বলিয়া অভ্যস্ত এবং সাধিত করে । অতএব পুণ্য যে জীবনের উদ্দেশ্য, তাহা সৰ্ববাদিস্বীকৃত নহে ; যেখানে স্বীকৃত, সেখানে সে বিশ্বাস মৌখিকমাত্র ।

বাস্তবিক জীবনের উদ্দেশ্য কি, এ তত্ত্বের প্রকৃত মীমাংসা লইয়া মমুষ্যলোকে আজিও বড় গোল আছে । লক্ষ লক্ষ বৎসর পূর্বে, অনন্ত সমুদ্রের অতলস্পর্শ জলমধ্যে যে আণুবীক্ষণিক জীব বাস করিত, তাহার দেহতত্ত্ব লইয়া মমুষ্য বিশেষ ব্যস্ত—আপনি এ সংসারে আসিয়া কি করিবে, তাহা সম্যক্ প্রকারে স্থিরীকরণে তাদৃশ চেষ্টিত নহে । যে প্রকারে হউক, আপনার উদরপূর্তি এবং অপরাপর বাহ্যিক্রিয় সকল চরিতার্থ করিয়া, আত্মীয়-স্বজনেরও উদরপূর্তি সংসাধিত করিতে পারিলেই অনেকে মমুষ্যজন্ম সফল বলিয়া বোধ করেন । তাহার উপর কোন প্রকারে অত্নের উপর প্রাধান্তলাভ উদ্দেশ্য । উদরপূর্তির পর, ধনে হউক বা অত্ন প্রকারে হউক, লোকমধ্যে যথাসাধ্য প্রাধান্তলাভ করাকে মমুষ্যগণ আপনাদিগের জীবনের উদ্দেশ্য বিবেচনা করিয়া কার্য্য করে । এই প্রাধান্তলাভের উপায়, লোকের বিবেচনায় প্রধানতঃ ধন, তৎপরে রাজপদ ও যশঃ । অতএব ধন, পদ ও যশঃ মমুষ্যজীবনের উদ্দেশ্য বলিয়া মুখে স্বীকৃত হউক বা না হউক, কার্য্যতঃ মমুষ্যলোকে সৰ্ববাদিসম্মত । এই তিনটির সমবায় সমাজে সম্পদ বলিয়া পরিচিত । তিনটির একত্রীকরণ দুর্লভ, অতএব দুই একটি, বিশেষতঃ ধন থাকিলেই সম্পদ বর্তমান বলিয়া স্বীকৃত হইয়া থাকে । এই সম্পদাকাজ্জাই

সমাজমধ্যে লোকজীবনের উদ্দেশ্যস্বরূপ অগ্রবর্তী, এবং ইহাই সমাজের ঘোরতর অনিষ্টের কারণ। সমাজের উন্নতির গতি যে এত মন্দ, তাহার প্রধান কারণ এই যে, বাহ্য সম্পদ মনুষ্যের জীবনের উদ্দেশ্যস্বরূপ হইয়া দাঁড়াইয়াছে। কেবল সাধারণ মনুষ্যদিগের কাছে নহে, ইউরোপীয় প্রধান পণ্ডিত এবং রাজপুরুষ-গণের কাছেও বটে।

কদাচিৎ কখনও এমন কেহ জন্মগ্রহণ করেন যে, তিনি সম্পদকে মনুষ্যজীবনের উদ্দেশ্যমধ্যে গণ্য করা দূরে থাকুক, জীবনোদ্দেশ্যের প্রধান বিষয় বলিয়া ভাবিয়া থাকেন। যে রাজ্য-সম্পদকে অপর লোকে জীবনসফলকর বিবেচনা করে, শাক্যসিংহ তাহা বিয়্যকর বলিয়া প্রত্যাখ্যান করিয়াছিলেন। ভারতবর্ষে বা ইউরোপে এমন অনেকেই মুনিবৃত্ত মহাপুরুষ জন্মিয়াছেন যে, তাঁহারা বাহ্য সম্পদকে ঐরূপ ঘৃণা করিয়াছেন। ইঁহারা প্রকৃত পথ অবলম্বন করিয়াছেন, এমত কথা বলিতে পারিতেছি না। শাক্যসিংহ শিখাইলেন যে, ঐহিক ব্যাপারে চিন্তনিবেশ মাত্র অনিষ্টপ্রদ, মনুষ্য সর্বত্যাগী হইয়া নির্দাণাকাজ্জী হউক। ভারতে এই শিক্ষার ফল বিষময় হইয়াছে। এইরূপ, আরও অনেকানেক মুনিবৃত্ত মহাপুরুষ মনুষ্যজীবনের উদ্দেশ্য সম্বন্ধে ভ্রান্ত হওয়াতে, ঐহিক সম্পদে অনন্তরক্ত হইয়াও সমাজের ইষ্টসাধনে বিশেষ কৃতকার্য হইতে পারেন নাই। সামান্যতঃ সন্ন্যাসী প্রভৃতি সর্ব-দেশীয় বৈরাগী সম্প্রদায় সকলকে উদাহরণস্বরূপ নির্দিষ্ট করিলেই এ কথা যথেষ্ট প্রমাণীকৃত হইবে।

স্থূল কথা এই যে, ধনসঞ্চয়াদির ত্রায় সুখশূন্য, শুভফলশূন্য, মহবশুত্ব ব্যাপার প্রয়োজনীয় হইলেও কখনই মনুষ্যজীবনের উদ্দেশ্য

বলিয়া গৃহীত হইতে পারে না। এ জীবন ভবিষ্যৎ পারলৌকিক জীবনের জন্ত পরীক্ষা মাত্র—পৃথিবী স্বর্গলাভের জন্ত কর্মভূমি মাত্র—এ কথা যদি যথার্থ হয়, তবে পরলোকে সুখপ্রদ কার্যের অনুষ্ঠানই জীবনের উদ্দেশ্য হওয়া উচিত বটে। কিন্তু প্রথমতঃ সেই সকল কার্য কি, তদ্বিষয়ে মতভেদ, নিশ্চয়তার একেবারে উপায়াভাব; দ্বিতীয়তঃ পরলোকের অস্তিত্বেরই প্রমাণাভাব।

তৃতীয়তঃ পরলোক থাকিলে, এবং ইহলোক পরীক্ষাভূমিমাত্র হইলেও, ঐহিক এবং পারত্রিক জন্মের মধ্যে ভিন্নতা হইবার কোন কারণ দেখা যায় না। যদি পরলোক থাকে, তবে যে ব্যবহারে পরলোকে শুভ-নিষ্পত্তির সম্ভাবনা, সেই কার্যেই ইহলোকেও শুভ-নিষ্পত্তির সম্ভাবনা কেন নহে, তাহার যথার্থ হেতুনির্দেশ এ পর্য্যন্ত কেহ করিতে পারে নাই। ধর্ম্মাচরণ যদি মঙ্গলপ্রদ হয়, তবে যে উহা কেবল পরলোকে মঙ্গলপ্রদ, ইহলোকে মঙ্গলপ্রদ নহে, এ কথা কিসে সপ্রমাণীকৃত হইতেছে? ঈশ্বর স্বর্গে বসিয়া কাজির মত বিচার করিতেছেন, পাপীকে নরককুণ্ডে ফেলিয়া দিতেছেন, পুণ্যাত্মাকে স্বর্গে পাঠাইয়া দিতেছেন, এ সকল প্রাচীন মনোরঞ্জন উপন্যাসকে প্রমাণ বলিয়া গ্রহণ করা যাইতে পারে না। যাহারা বলেন যে, ইহলোকে অধার্ম্মিকের শুভ এবং ধার্ম্মিকের অশুভ দেখা গিয়া থাকে, তাঁহাদিগের চক্ষে কেবল ধনসম্পদাদিই শুভ। তাঁহাদিগের বিচার এই মূলভ্রান্তিতে দূষিত। যদি পুণ্যকর্ম্ম পরকালে শুভপ্রদ হয়, তবে ইহলোকেও পুণ্যকর্ম্ম শুভপ্রদ। কিন্তু বাস্তবিক কেবল পুণ্যকর্ম্ম কি পরলোকে কি ইহলোকে শুভপ্রদ হইতে পারে না। যে প্রকার মনোবৃত্তির ফল পুণ্যকর্ম্ম, তাহাই উভয় লোকে শুভপ্রদ হওয়াই সম্ভব। (কহ যদি

কেবল ম্যাজিষ্ট্রেট সাহেবের তাড়নায় বশীভূত হইয়া, অথবা যশের লালসায় অপ্রসন্নচিত্তে দুর্ভিক্ষনিবারণের জন্ত লক্ষমুদ্রা দান করে, তবে তাহার পারলৌকিক মঙ্গলসঞ্চয় হইল কি ? দান পুণ্যকর্ম বটে, কিন্তু এরূপ দানে পরলোকের কোন উপকার হইবে, ইহা কেহই বলিবে না। কিন্তু যে অর্থাভাবে দান করিতে পারিল না, কিন্তু দান করিতে পারিল না বলিয়া কাতর, সে ইহলোকে এবং পরলোক থাকিলে, পরলোকে সুখী হওয়া সম্ভব।

অতএব মনোবৃত্তি সকল যে অবস্থায় পরিণত হইলে পুণ্যকর্ম তাহার স্বাভাবিক ফলস্বরূপ স্বতঃ নিষ্পাদিত হইতে থাকে, পরলোক থাকিলে তাহাই পরলোকে শুভদায়ক বলিলে কথা গ্রাহ্য করা যাইতে পারে। পরলোক থাকুক বা না থাকুক, ইহলোকে তাহাই মমুষ্যজীবনের উদ্দেশ্য বটে। কিন্তু কেবল তাহাই মমুষ্যজীবনের উদ্দেশ্য হইতে পারে না। যেমন কতকগুলি মানসিক বৃত্তির চেষ্টা কর্ম, এবং যেমন সে সকলগুলি সম্যক মার্জিত ও উন্নত হইলে, স্বভাবতঃ পুণ্যকর্মের অনুষ্ঠানে প্রবৃত্তি জন্মে, তেমনি আর কতকগুলি বৃত্তি আছে, তাহাদের উদ্দেশ্য কোন প্রকার কার্য্য নহে—জ্ঞানই তাহাদিগের ক্রিয়া। কার্য্যকারিণী বৃত্তিগুলির অনুশীলন যেমন মমুষ্যজীবনের উদ্দেশ্য, জ্ঞানার্জনী বৃত্তিগুলিরও সেইরূপ অনুশীলন জীবনের উদ্দেশ্য হওয়া উচিত। বস্তুতঃ সকল প্রকার মানসিক বৃত্তির সম্যক অনুশীলন, সম্পূর্ণ ক্ষুণ্ণ ও যথোচিত উন্নতি ও বিগুদ্ধিই মমুষ্যজীবনের উদ্দেশ্য।

এই উদ্দেশ্যমাত্র অবলম্বন করিয়া, সম্পাদাদিতে উপযুক্ত যুগা দেখাইয়া, জীবন নির্বাহ করিয়াছেন, এরূপ মমুষ্য কেহ জন্মগ্রহণ করেন নাই, এমত নহে। তাহাদিগের সংখ্যা অতি অল্প হইলেও

তাহাদিগের জীবনবৃত্ত মনুষ্যগণের অমূল্য শিক্ষাস্থল। জীবনের উদ্দেশ্যসম্বন্ধে একুপ শিক্ষা আর কোথাও পাওয়া যায় না। নীতি-শাস্ত্র, ধর্মশাস্ত্র, বিজ্ঞান, দর্শন প্রভৃতি সর্বাপেক্ষা এই প্রধান শিক্ষা। দুর্ভাগ্যবশতঃ ইহাদিগের জীবনের গুঢ় তত্ত্বসকল অপরিজ্ঞেয়। কেবল দুইজন আপন আপন জীবনবৃত্ত লিখিয়া রাখিয়া গিয়াছেন। একজন গেটে, দ্বিতীয় জন ষ্টুয়ার্ট মিল।

বঙ্কিমচন্দ্র চট্টোপাধ্যায়।



কপালকুণ্ডলা

স্তূপশিখরে

যখন নবকুমারের নিদ্রাভঙ্গ হইল, তখন রজনী গভীরা। এখনও যে তাঁহাকে ব্যাঘ্রে হত্যা করে নাই, ইহা তাঁহার আশ্চর্য্য বোধ হইল। ইতস্ততঃ নিরীক্ষণ করিয়া দেখিতে লাগিলেন, ব্যাঘ্র আসিতেছে কি না। অকস্মাৎ সম্মুখে বহুদূরে একটা আলোক দেখিতে পাইলেন। পাছে ভ্রম জন্মিয়া থাকে, এজন্ত নবকুমার মনোনিবেশপূর্ব্বক তৎপ্রতি দৃষ্টি করিতে লাগিলেন। আলোক-পরিধি ক্রমে বর্দ্ধিতায়ন এবং উজ্জ্বলতর হইতে লাগিল—আগ্নেয় আলোক বলিয়া প্রতীতি জন্মিল; প্রতীতিমাত্র নবকুমারের জীবনাশা পুহুরুদ্ধীপ্ত হইল। মনুষ্যসমাগম ব্যতীত এ আলোকের উৎপত্তি সম্ভবে না। কেন না, এ দাবানলের সময় নহে। নবকুমার গাত্রোত্থান করিলেন; যথায় আলোক, সেই দিকে ধাবিত হইলেন। একবার মনে ভাবিলেন, “এ আলোক ভৌতিক।—হইতেও পারে; কিন্তু শঙ্কায় নিরস্ত থাকিলেই কোন্ জীবন-রক্ষা হয়?” এই ভাবিয়া নির্ভীকচিত্তে আলোক লক্ষ্য করিয়া চলিলেন। বৃক্ষ, লতা, বালুকাস্তূপ পদে পদে তাঁহার গতিরোধ করিতে লাগিল। বৃক্ষলতা দলিত করিয়া, বালুকাস্তূপ লজ্জিত করিয়া নবকুমার চলিলেন। আলোকের নিকটবর্ত্তী হইয়া দেখিলেন যে, এক অত্যুচ্চ বালুকাস্তূপের শিরোভাগে অগ্নি জ্বলিতেছে, তৎপ্রভায় শিখরাসীন মনুষ্যমূর্ত্তি আকাশপটস্থ চিত্রের স্থায় দেখা

যাইতেছে। নবকুমার শিখরাসীন মনুষ্যের সমীপবর্তী হইবেন স্থিরসঙ্কল্প করিয়া অশিথিলীকৃত বেগে চলিলেন। পরিশেষে স্তুপারোহণ করিতে লাগিলেন। তখন কিঞ্চিৎ শঙ্কা হইতে লাগিল—তথাপি কল্পিতপদে স্তুপারোহণ করিতে লাগিলেন। আসীন ব্যক্তির সম্মুখবর্তী হইয়া যাহা যাহা দেখিলেন, তাহাতে তাঁহার রোমাঞ্চ হইল। তিষ্ঠিবেন কি প্রত্যাবর্তন করিবেন, তাহা স্থির করিতে পারিলেন না।

শিখরাসীন মনুষ্য নয়ন মুদ্রিত করিয়া ধ্যান করিতেছিল—নবকুমারকে প্রথমে দেখিতে পাইল না। নবকুমার দেখিলেন, তাঁহার বয়ঃক্রম প্রায় পঞ্চাশৎ বৎসর হইবে। পরিধানে কোন কার্পাসবস্ত্র আছে কি না, তাহা লক্ষ্য হইল না; কটিদেশ হইতে জাম্বু পর্য্যন্ত শাদ্দুল-চর্ম্মে আবৃত। গলদেশে রুদ্রাক্ষমালা; আয়ত মুখমণ্ডল শ্মশ্রুজটা-পরিবেষ্টিত। সম্মুখে কাষ্ঠে অগ্নি জ্বলিতেছিল; সেই অগ্নির দীপ্তি লক্ষ্য করিয়া নবকুমার সে স্থলে আসিতে পারিয়াছিলেন। নবকুমার একটা বিকট ভূগন্ধ পাইতে লাগিলেন; ইহার আসন-প্রতি দৃষ্টিপাত করিয়া তাহার কারণ অমুভূত করিতে পারিলেন। জটাধারী এক ছিন্নশীর্ষ গলিত শবের উপর বসিয়া আছেন। আরও সভয়ে দেখিলেন যে, সম্মুখে নরকপাল রহিয়াছে; তন্মধ্যে রক্তবর্ণ দ্রবপদার্থ রহিয়াছে। চতুর্দিকে স্থানে স্থানে অস্থি পড়িয়া রহিয়াছে—এমন কি, যোগাসীনের কণ্ঠস্থ রুদ্রাক্ষ-মালামধ্যে ক্ষুদ্র ক্ষুদ্র অস্থিখণ্ড গ্রথিত রহিয়াছে। নবকুমার মন্ত্রমুগ্ধ হইয়া রহিলেন। অগ্রসর হইবেন কি স্থানত্যাগ করিবেন, তাহা বুঝিতে পারিলেন না। তিনি কাপালিকদিগের কথা ক্রত ছিলেন, বুঝিলেন যে, এ ব্যক্তি কাপালিক।

যখন নবকুমার উপনীত হইয়াছিলেন, তখন কাপালিক মঙ্গসাধনে বা জপে-বা ধ্যানে মগ্ন ছিল, নবকুমারকে দেখিয়া ভ্রক্ষেপও করিল না। অনেকক্ষণ পরে জিজ্ঞাসা করিল, “কতং ?” নবকুমার কহিলেন, “ব্রাহ্মণ।”

কাপালিক কহিল, “তিষ্ঠ।” এই কহিয়া পূর্বকার্যে নিযুক্ত হইল। নবকুমার দাঁড়াইয়া রহিলেন।

এইরূপে প্রহরার্দ্ধ গত হইল। পরিশেষে কাপালিক গাত্রোথান করিয়া নবকুমারকে পূর্ববৎ সংস্কৃতে কহিল, “মামমুসর।”

ইহা নিশ্চিত বলা যাইতে পারে যে, অল্প সময়ে নবকুমার কদাপি ইহার সঙ্গী হইতেন না। কিন্তু এক্ষণে ক্ষুধাতৃষ্ণায় প্রাণ কণ্ঠাগত; অতএব কহিলেন, “প্রভুর যেমত আজ্ঞা। কিন্তু আমি ক্ষুধা-তৃষ্ণায় বড় কাতর, কোথায় গেলে আহাৰ্য্য সামগ্রী পাইব, অমুমতি করুন।”

কাপালিক কহিল, “ভৈরবীপ্রেরিতোহসি, মামমুসর, পরিতোষন্তে ভবিষ্যতি।”

নবকুমার কাপালিকের অমুগামী হইলেন। উভয়ে অনেক পথ বাহিত করিলেন—পথিমধ্যে কেহ কোন কথা কহিল না। পরিশেষে এক পর্ণকুটীর প্রাপ্ত হইল—কাপালিক প্রথমে প্রবেশ করিয়া নবকুমারকে প্রবেশ করিতে অমুমতি করিল এবং নবকুমারের অবোধগম্য কোন উপায়ে একখণ্ড কাষ্ঠে অগ্নি জালিত করিল। নবকুমার সেই আলোকে দেখিলেন যে, ঐ কুটীর সর্বাংশে কিয়াপাতায় রচিত। তন্মধ্যে কয়েকখানা ব্যাঘ্রচৰ্ম্ম আছে—এক কলস জল ও কিছু ফলমূল আছে।

কাপালিক অগ্নি জালিত করিয়া কহিল, “কলমূল ঘাহা আছে, আত্মসাৎ করিতে পার। পর্ণপাত্র রচনা করিয়া কলস-জল পান করিও। ব্যাঘ্রচৰ্ম্ম আছে, অভিরুচি হইলে শয়ন করিও। নির্ঝিষে তিষ্ঠ—ব্যাঘ্রের ভয় করিও না। সময়ান্তরে আমার সহিত সাক্ষাৎ হইবে। যে পর্য্যন্ত সাক্ষাৎ না হয়, সে পর্য্যন্ত এ কুটীর ত্যাগ করিও না।”

এই বলিয়া কাপালিক প্রস্থান করিল। নবকুমার সামান্ত কলমূল আহাৰ করিয়া এবং সেই ঈষত্তিক্ত জল পান করিয়া পরম পরিতোষলাভ করিলেন। পরে ব্যাঘ্রচৰ্ম্মে শয়ন করিলেন, সমস্ত দিবসজ নিত ক্লেশ-হেতু শীঘ্রই নিদ্রাভিভূত হইলেন।

সমুদ্রতটে

প্রাতে উঠিয়া নবকুমার সহজেই বাটীগমনের উপায় করিতে ব্যস্ত হইলেন, বিশেষ কাপালিকের সান্নিধ্য কোনক্রমেই শ্রেয়স্কর বলিয়া বোধ হইল না। কিন্তু আপাততঃ এ পথহীন বনমধ্য হইতে কি প্রকারে নিষ্ক্রান্ত হইবেন? কি প্রকারেই বা পথ চিনিয়া বাটা ঘাইবেন? কাপালিক অবশ্য পথ জানে; জিজ্ঞাসিলে কি বলিয়া দিবে না? বিশেষ, যতদূর দেখা গিয়াছে, ততদূর কাপালিক তাহার প্রতি কোন শঙ্কাসূচক আচরণ করে নাই—কেনই বা তবে তিনি ভীত হন? এদিকে কাপালিক তাহাকে পুনঃ সাক্ষাৎ পর্য্যন্ত কুটীর ত্যাগ করিতে নিষেধ করিয়াছে, তাহার অবাধ্য হইলে বরং তাহার রোষোৎপত্তির সম্ভাবনা। নবকুমার শ্রুতি ছিলেন যে, কাপালিকেরা মন্ত্রবলে অসাধ্য-সাধনে সক্ষম—এ কারণে তাহার

অবাধ্য হওয়া অস্বচিত। ইত্যাদি বিবেচনা করিয়া নবকুমার আপাততঃ কুটীর মধ্যে অবস্থান করাই স্থির করিলেন।

কিন্তু বেলা অপরাহ্ন হইয়া আসিল, তথাপি কাপালিক প্রত্যাগমন করিল না। পূর্বদিনের উপবাস, অন্ত এ পর্য্যন্ত অনশন, ইহাতে ক্ষুধা প্রবল হইয়া উঠিল। কুটীর মধ্যে যে অল্পপরিমাণ ফলমূল ছিল, তাহা পূর্বরাত্রের ভুক্ত হইয়াছিল—এক্ষণে কুটীর ত্যাগ করিয়া ফলমূলাশ্বেষণ না করিলে ক্ষুধায় প্রাণ যায়। অল্প বেলা থাকিতে ক্ষুধার পীড়নে নবকুমার ফলাশ্বেষণে বাহির হইলেন।

নবকুমার ফলাশ্বেষণে নিকটস্থ বালুকাস্তূপ সকলের চারিদিকে পরিভ্রমণ করিতে লাগিলেন। যে ছই একটা গাছ বালুকায় জন্মিয়া থাকে, তাহার ফলাশ্বাদন করিয়া দেখিলেন যে, এক বৃক্ষের ফল বাদামের ঞায় অতি সুস্বাদু, তদ্বারা ক্ষুধা-নিবৃত্তি করিলেন।

কথিত বালুকাস্তূপশ্রেণী প্রস্থে অতি অল্প; অতএব নবকুমার অল্পকাল ভ্রমণ করিয়া তাহা পার হইলেন। তৎপরে বালুকাবিহীন নিবিড় বন মধ্যে পড়িলেন। যাহারা ক্ষণকাল জন্ত অপূর্বপরিচিত বন মধ্যে ভ্রমণ করিয়াছেন, তাঁহারা জানেন যে, পথহীন বন মধ্যে ক্ষণ মধ্যেই পথভ্রাস্তি জন্মে। নবকুমারের তাহাই ঘটিল। কিছুদূর আসিয়া আশ্রম কোন্ পথে রাখিয়া আসিয়াছেন, তাহা স্থির করিতে পারিলেন না। গম্ভীর জলকল্লোল তাঁহার কর্ণপথে প্রবেশ করিল। তিনি বুঝিলেন যে, এ সাগরগর্জ্জন। ক্ষণকাল পরে অকস্মাৎ বনমধ্য হইতে বহির্গত হইয়া দেখিলেন যে সম্মুখেই সমুদ্র। অনন্তবিস্তার নীলাশ্বমণ্ডল সম্মুখে দেখিয়া উৎকটানন্দে হৃদয় পরিপ্লুত হইল। সিকতাময় তটে গিয়া উপবেশন করিলেন। কেনিল,

নীল, অনন্ত সমুদ্রে। উভয়পার্শ্বে যতদূর চক্ষু যায়, ততদূর পর্য্যন্ত তরঙ্গ-ভঙ্গ-প্রক্ষিপ্ত ফেনার রেখা; শুভ্রপীকৃত বিমল কুসুমদাম-প্রধিত মালার জ্বায় সে ধবল ফেনারেখা হেমকান্ত সৈকতে ত্রুস্ত হইয়াছে, কাননকুন্ডলা ধরণীর উপযুক্ত অলকাভরণ নীলজলমণ্ডলমধ্যে সহস্র স্থানে সফেন তরঙ্গ-ভঙ্গ হইতেছিল। যদি কখনও এমন প্রচণ্ড বায়ু-বহন সম্ভব হয় যে, তাহার বেগে নক্ষত্রমালা সহস্রে সহস্রে স্থানচ্যুত হইয়া নীলাবরে আন্দোলিত হইতে থাকে, তবে সে সাগরতরঙ্গক্ষেপের স্বরূপ দৃষ্ট হইতে পারে। এ সময়ে অন্তগামী দিনমণির মূহল কিরণে নীলজলের একাংশ দ্রবীভূত সুরণের জ্বায় অলিতেছিল। অনতিদূরে কোন ইউরোপীয় বণিক্জাতির সমুদ্রপোত শ্বেতপক্ষ বিস্তার করিয়া বৃহৎ পক্ষীর জ্বায় ভলধিহীনদয়ে উড়িতেছিল।

কতক্ষণ যে নবকুমার তীরে বসিয়া অনন্তমনে জলধিশোভা দৃষ্টি করিতে লাগিলেন, তদ্বিষয়ে তৎকালে তিনি পরিমাণ-বোধ-রহিত। পরে একবারে প্রদোষতিমির আসিয়া কাল জলের উপর বসিল। তখন নবকুমারের চেতনা হইল যে, আশ্রম সন্ধান করিয়া লইতে হইবে। দীর্ঘনিশ্বাস ত্যাগ করিয়া গাত্রোথান করিলেন। দীর্ঘনিশ্বাস ত্যাগ করিলেন কেন, তাহা বলিতে পারি না—তখন তাহার মনে কোন ভূতপূর্ব স্মৃতির উদয় হইতেছিল, তাহা কে বলিবে? গাত্রোথান করিয়া সমুদ্রের দিকে পশ্চাৎ ফিরিলেন। ফিরিবামাত্র দেখিলেন অপূর্ব মূর্তি! সেই গম্ভীরনাদী বারিধি-তীরে, সৈকত ভূমে, অস্পষ্ট সন্ধ্যালোকে দাঁড়াইয়া অপূর্ব রমণীমূর্তি! কেশভার—অবেণীসংবদ্ধ, সংসর্গিত, রাশীকৃত, আশুল্ললললিত কেশভার; তদগ্রে দেহরত্ন, যেন চিত্রপটের উপর চিত্র দেখা

যাইতেছে। অলকাবলির প্রাচুর্য্যে মুখমণ্ডল সম্পূর্ণরূপে প্রকাশ হইতেছিল না—তথাপি মেঘবিচ্ছেদনিঃসৃত চন্দ্ররশ্মির জ্বায় প্রতীত হইতেছিল। বিশাল লোচনে কটাক্ষ অতি স্থির, অতি স্নিগ্ধ, অতি গভীর অথচ জ্যোতির্ময়; সে কটাক্ষ, এই সাগরহৃদয়ে ক্রীড়াশীল চন্দ্রকিরণরেখার জ্বায় স্নিকোজ্জল দীপ্তি পাইতেছিল। কেশরাশিতে স্বক্কেদশ ও বাহুগুণল আচ্ছন্ন করিয়াছিল। স্বক্কেদশ একেবারে অদৃশ্য; বাহুগুণলে বিমল শ্রী কিছু কিছু দেখা যাইতেছিল। রমণীদেহ একেবারে নিরাভরণ। মূর্ত্তিমধ্যে যে একটি মোহিনী শক্তি ছিল, তাহা বর্ণিতে পারা যায় না। অর্দ্ধচন্দ্র-নিঃসৃত কোমুদীবর্ণ; ঘনকৃষ্ণ চিকুরজাল; পরস্পরের সান্নিধ্যে কি বর্ণ, কি চিকুর, উভয়েরই যে শ্রী বিকসিত হইতেছিল, তাহা সেই গভীরনাদী সাগরকূলে সন্ধ্যালোকে না দেখিলে, তাহার মোহিনী শক্তি অনুভূত হয় না।

নবকুমার অকস্মাৎ এইরূপ বনমধ্যে দৈবী মূর্ত্তি দেখিয়া নিস্পন্দশরীর হইয়া দাঁড়াইলেন। তাহার বাকশক্তি রহিত হইল,—স্তব্ধ হইয়া চাহিয়া রহিলেন। রমণীও স্পন্দহীন, অনিমিষলোচনে বিশাল চক্ষুর স্থিরদৃষ্টি নবকুমারের মুখে স্থাপ্ত করিয়া রাখিলেন। উভয়মধ্যে প্রভেদ এই যে, নবকুমারের দৃষ্টি চমকিত লোকের দৃষ্টির জ্বায়, রমণীর দৃষ্টিতে সে লক্ষণ কিছুমাত্র নাই, কিন্তু তাহাতে বিশেষ উদ্বেগ প্রকাশ হইতেছিল।

অনন্ত সমুদ্রের জনহীন তীরে, এইরূপে বহুক্ষণ ছই জনে চাহিয়া রহিলেন। অনেকক্ষণ পরে তরুণীর কণ্ঠস্বর শুনা গেল। তিনি অতি মুহূর্ত্তে কহিলেন, “পাখিক, তুমি পঞ্চ হারাইয়াছ ?”

এই কণ্ঠস্বরের সঙ্গে নবকুমারের হৃদয়বীণা বাজিয়া উঠিল। বিচিত্র হৃদয়যন্ত্রের তন্ত্রীচয় সময়ে সময়ে একরূপ লয়হীন হইয়া থাকে যে, যত যত্ন করা যায়, কিছুতেই পরস্পর মিলিত হয় না, কিন্তু একটি শব্দে, একটি রমণীকণ্ঠসম্বৃত স্বরে সংশোধিত হইয়া যায়। সকলেই লয়বিশিষ্ট হয়, সংসারযাত্রা সেই অবধি সুখময় সঙ্গীতপ্রবাহ বলিয়া বোধ হয়। নবকুমারের কর্ণে সেইরূপ এ ধ্বনি বাজিল।

“পথিক, তুমি পথ হারাইয়াছ ?”—এ ধ্বনি নবকুমারের কর্ণে প্রবেশ করিল। কি অর্থ, কি উত্তর করিতে হইবে, কিছুই মনে হইল না। ধ্বনি যেন হর্ষবিকম্পিত হইয়া বেড়াইতে লাগিল; যেন পবনে সেই ধ্বনি বহিল; বৃক্ষপত্রে মর্ম্মরিত হইতে লাগিল, সাগরনাদে যেন মন্দীভূত হইতে লাগিল। সাগরবসনা পৃথিবী সুন্দরী; রমণী সুন্দরী; ধ্বনিও সুন্দর,—হৃদয়তন্ত্রীমধ্যে সৌন্দর্য্যের লয় মিলিতে লাগিল।

রমণী কোন উত্তর না পাইয়া কহিলেন, “আইস।” এই বলিয়া তরুণী চলিল, পদক্ষেপ লক্ষ্য হয় না। বসন্তকালে মন্দানিল-সঞ্চালিত শুভ্র মেঘের ত্রায় ধীরে ধীরে অলক্ষ্য-পদ-বিক্ষেপে চলিল; নবকুমার কলের পুত্তলিকার ত্রায় সঙ্গে চলিলেন। এক স্থানে একটা ক্ষুদ্র বন পরিবেষ্টন করিতে হইবে; বনের অন্তরালে গেলে আর সুন্দরীকে দেখিতে পাইলেন না। বনবেষ্টনের পর দেখেন যে, সম্মুখে কুটীর।

বঙ্কিমচন্দ্র চট্টোপাধ্যায়।

ঐহিক অমরতা

পৃথিবীর এক দৃশ্য স্মৃতিকাগৃহ, আর এক দৃশ্য শ্মশান ! পর্বতে উচ্চতা আছে, নদীর তরঙ্গে শোভা আছে, নদীপ্রবাহসম্মিলিত সমুদ্রের বক্ষে অনির্বচনীয় বিস্তার আছে ;—ফুলে মধু, ফুলভারাবনত লতাদেহে মাধুরী এবং লতার আকর্ষণবিসর্পি-বেষ্টনবদ্ধ অচল-পাদপে গরিমার এক অপূর্ণ বিলাসভঙ্গি আছে । কবি অথবা ভাবুকের চক্ষু লইয়া দেখিতে হইলে, দেখিবার এইরূপ কত বস্তুই যে চারিদিকে পড়িয়া রহিয়াছে, কে তাহার গণনা করিবে ? আবার মানুষী শক্তির জয়সম্ভ দেখিতে হইলে, নগর, উপনগর, দুর্গ, সেতু, জল-যান, স্থল-যান, ব্যোম-যান, আগ্রার তাজ এবং মিসরের পিরামিড প্রভৃতি কতই কি না মনুষ্যচক্রুর সন্নিহিত হইতেছে ! কিন্তু দৃশ্য পদার্থের গূঢ় গৌরব ভাবিয়া দেখিলে, তথাপি ইহাই পুনঃ পুনঃ বলিতে ইচ্ছা হয় যে, পৃথিবীর এক দৃশ্য স্মৃতিকাগৃহ, আর এক দৃশ্য শ্মশান । এই দুইয়ের তুলনা নাই । জলে যেমন জলবুদ্বুদের উদয় ও বিলয় হইতেছে, বস্তুকরার বক্ষঃস্থলরূপ বিশাল নিকেতনে স্মৃতিকা ও শ্মশানের প্রকোষ্ঠদ্বয়েও, প্রতি মুহূর্ত্তে, প্রতি নিমিষে, সেইরূপ অসংখ্য প্রাণীর উদয় ও বিলয় অথবা আবির্ভাব ও তিরোভাব ঘটিতেছে । যে ছিল না, সে আসিতেছে । যে ছিল, সে চলিয়া যাইতেছে । যাহাকে দেখি নাই, সে নয়নপথের নূতন পথিক হইয়া হাসিতেছে, নাচিতেছে এবং ভালবাসার বাহু প্রসারিয়া বুকে আসিতে যত্ন পাইতেছে । যাহাকে দেখিতাম, জানিতাম, ভালবাসিতাম, সে যেন নয়নপথের অন্তরালে অনন্ত ও অতলস্পর্শ অন্ধকার-সমুদ্রে বিলীন হইতেছে ।

জন্মমৃত্যুর এই আবর্তগতি গাঢ়রূপে চিন্তা করিলে মনে আপনা হইতে দুইটি গভীর প্রশ্নের উদয় হয়। প্রথম প্রশ্ন এই,—যাহারা এই জগতে নূতন প্রবিষ্ট হইতেছে, তাহারা কোথা হইতে আসিল ? কেন আসিল ? কে তাহাদিগকে আনিল ? কে তাহাদিগকে জীবন দান করিয়া এই সংসারে সুখদুঃখের তরঙ্গে তাহাদিগের জীবনতরী ভাসাইয়া দিল ?

দ্বিতীয় প্রশ্ন এই যে,—যাহারা যায়, তাহারা কোথায় যায় ? তাহা তাহাদিগের নির্বাণ, না তিরোধান ? মৃত্যুর পর তাহাদিগের আর কিছু থাকে কি ? যাহাদিগের স্নকুমার তনু সমাধির ক্রোড়ে কিংবা শম্মানানলে উৎসর্গ দিয়া আসিলে, এই জগতের সহিত তাহাদিগের আর কোন সম্বন্ধ রহিল কি ? এত আশা, এত ভালবাসার এই কি শেষ ? যাহাকে পলকের তরে হারাইলে প্রলয়-জ্ঞান হইত, তাহাকে কি একেবারে চিরদিনের জন্তই হারাইতে হইবে ? অথবা যাহারা এই পৃথিবীর মঙ্গল-কামনায় প্রাণত্যাগেও কুণ্ঠিত হন নাই,—যাহাদিগের প্রেমাশ্রুতে স্নাত হইয়াই ইহা রমণীয় পুষ্পোদ্যান ও পূজ্যস্থান বলিয়া জগতে আদৃত হইয়াছে, পৃথিবী আর কি কখনও তাহাদিগকে আপনার জন বলিয়া মনে করিতে পারিবে না ? সেই ত অযোধ্যা আজিও সরযুর তটে শয়ান রহিয়াছে। কিন্তু অযোধ্যার সেই রাম কৈ ? সরযুর কলকল্যায়মান সলিলরাশি যাহার পাদস্পর্শে পবিত্র হইত,—যাহার পাদকমল লইয়া খেলা করিত,—যাহার স্নেহশীতল গম্ভীরমূর্তি আপনার হৃদয়াদর্শে অন্ধিত দেখিয়া আনন্দভরে কুলিয়া উঠিত, সেই বধুকুলভিলক দয়ার অবতার কৈ ? সেই ত বাঙ্গালিকির তপোবন পড়িয়া রহিয়াছে। কিন্তু বাঙ্গালিকির সে বীণা কৈ ? বীণার সে

বন্ধার কৈ ? আর বান্ধীকি যাহাকে প্রীতির পুতলি পবিত্রতা প্রতিকৃতি বলিয়া জানিতেন, এবং যাহাকে এই জন্তই জননী ও হুহিতা অপেক্ষাও অধিকতর ভালবাসিতেন, অবলাকুণের আভরণ-রূপিণী সেই অলোকসামান্য জানকী কৈ ? সেই গঙ্গা, সেই যমুনা, তেমনই মুহমুহ মধুর নাদে বহিয়া যাইতেছে,—সেই কুরুক্ষেত্র, সেই উজ্জয়িনী চৈত্ররৌদ্রের খরজ্যোতিতে তেমনই ধু ধু করিতেছে । কিন্তু গঙ্গার লহরী যাহাদিগের জলদগম্ভীর স্বর-লহরীর সঙ্গে সঙ্গে নৃত্য করিত, সেই ভগবন্তুক্ত জগদগুরু আৰ্য্যতাপসেরা কৈ ? যমুনার শ্রাম সলিল যাহাদিগের শৌর্য্য-প্রবাহ-স্বরূপ শোণিত-ধারায় জবামাল্যভূষিতা রণরঙ্গিণী শ্রামার শ্রায় ভয়ঙ্কর সৌন্দর্য্যে সুন্দর হইত, সেই পোরব ও যাদব কৈ ? উজ্জয়িনী আছে, উজ্জয়িনীর সেই বিক্রম কৈ ? কালিদাস কৈ ? কুরুক্ষেত্র আছে, কুরুক্ষেত্রের সেই কোরব কৈ ? যিনি বিনাযুদ্ধে অণুপরিমাণ ভূমিদানেও অসম্মত ছিলেন, সেই অভিমানদগ্ধ কুরুরাজ কৈ ?

মনুষ্য স্মৃতিকাগৃহের আনন্দকোলাহলে অধীর ও উদ্ভ্রান্ত হইয়া জন্মতন্ময়ের আদি চিন্তায় উদাসীন রহিতে পারে ; এবং যাহার জীবনের শ্রোত, জোয়ারের নূতন শ্রোতের শ্রায়, আবিল আমোদের ঢেউ খেলাইতে খেলাইতে বহিয়া যায়, সেও জীবনের উদ্বেগচিন্তা সম্বন্ধে সম্পূর্ণরূপেই উপেক্ষা দেখাইতে পারে । দিন দিন করিয়া দিন যায় না, বর্ষ বাড়ে । তাহার আর ভাবনা কি ? শীত যায়, গ্রীষ্ম আইসে ; গ্রীষ্ম যায়, শীত আইসে । তাহার আর চিন্তা কি ? কিন্তু শ্মশানই যাহার শেষ গতি এবং সমাধিতেই যাহার শেষ স্মৃতি, স্মৃতি হউক আর দ্রুতী হউক, মৃত্যুচিন্তাসম্বন্ধে সে কিরূপে ঔদাস্ত ও উপেক্ষা দেখাইবে ? এই সংসারে কোথায়

কে কবে আসিয়াছিল, যাহাকে যাইতে হয় নাই ? কোথায় কে কবে জন্মিয়াছিল, যে একদিন আশানের সম্মুখীন হয় নাই ? যে ধনী, তাহারও শেষ শয্যা আশান ; এবং যে মনুষ্যকুলে জন্মলাভ করিয়া, মনুষ্যের সুখদুঃখ হর্ষবিষাদে সর্বতোভাবে স্বত্ববান্ হইয়াও ধনিগৃহের মার্জ্জার-কুকুরের সমান বলিয়া পরিগণিত হইল না, তাহারও শেষ শয্যা আশান। আজি ময়ূরসিংহাসন কি স্বর্ণ-পর্য্যঙ্কের সুকোমল আন্তরগেও যাহার কোমলতর শরীর ক্লিষ্ট হয়, তাহারও শেষ শয্যা আশান, এবং যে দিনান্তের পর্য্যটনে মুষ্টিভিক্ষা না পাইয়া গাছের তলায় পড়িয়া থাকে, তাহারও শেষ শয্যা আশান। যেখানে আকবর সাহের সেকেন্দরা বিলুপ্ত সম্পদের স্বরণস্তম্ভ-স্বরূপ শোভা পাইতেছে, তাহারই চতুষ্পার্শ্বে অসংখ্য দীন, দুঃখী ও পথের ভিখারীর অস্থিত্পূ অবদনীর ক্রোড়ে পড়িয়া রহিয়াছে। যিনি জ্ঞানসমুদ্রের শেষ সীমা দর্শনের জন্য কপিল, কণাদ, কিংবা নিউটন কি হাম্বোল্ডের জায় অক্লান্তমনে সন্ତরণ করিয়াছেন, তিনিও এইক্ষণ আশানে ; আর যাহারা পৃথিবীতে আসিয়া, থাইয়া, শুইয়া, হাসিয়া, চলিয়া, এবং দর্পণে আপনাদিগের মুখখানি মাত্র দেখিয়াই চলিয়া গিয়াছে, তাহাদিগের শেষ স্থান এইক্ষণ আশান।

হেলেনার মত রূপসী এবং রূপলাবণ্য-বর্জিতা কান্জালিনী, বড় আর ছোট, বৃদ্ধ ও শিশু, যে যেখান হইতে অন্তর্হিত হইতেছে, তাহারই বাহির হইবার পথ আশান। স্মৃতরাং আশানের পরপারে কি, এই প্রশ্ন মনুষ্য-মাত্রকেই কোন না কোন সময়ে চিন্তায় অভিভূত করে, এবং মরিয়াও অমর হওয়া যায় কিনা, এই আকাঙ্ক্ষা সকলকেই কোন না কোন সময়ে আকুল করিয়া তুলে। কিন্তু কে ইহার উত্তর করিবে ?

বিজ্ঞানের নিকট এই ভয়াবহ প্রশ্নের উত্তর নাই। বিজ্ঞান সমাধির মৃত্তিকা তুলিয়াও অশেষ প্রকারে পরীক্ষা করিয়া দেখিয়াছে ; যে চলিয়া গিয়াছে, সেই মৃত্তিকায় তাহার কোন চিহ্ন পায় নাই। বিজ্ঞান শ্মশানের ভস্মরাশিকে বিবিধ যন্ত্রযোগে রেণু রেণু বিভক্ত করিয়া দেখিয়াছে ; সেই ভস্মরাশির মধ্যে ভস্ম বই আর কিছুই পাওয়া যায় নাই। বৈজ্ঞানিকের এক চক্ষু দূরবীক্ষণ, আর চক্ষু অল্পবীক্ষণ। যাহা দূরবীক্ষণে দেখা যায় না এবং অল্পবীক্ষণেও অল্পমেয় হয় না, প্রত্যক্ষবাদী বৈজ্ঞানিক তাহা মানিবে কেন ? সুতরাং বৈজ্ঞানিকের নিকট শ্মশানের পরপার অন্ধকার। তবে বিজ্ঞানের কাছে সেই অন্ধকারের মধ্যেও এই একটুমাত্র আলোকের আভা পাওয়া যায় যে, এ জগতে কিছুই বিনাশ নাই। যেখানে একদিন পাহাড় ছিল, সেখানে আজ সমুদ্র। যেখানে একদিন সমুদ্র ছিল, সেখানে আজ পাহাড়। আপাততঃ দেখিতে গেলে পাহাড় ও সমুদ্রের ধ্বংস হইয়াছে। কিন্তু বিজ্ঞান ইহা জানে যে, যে সকল পরমাণু পাহাড় ও সমুদ্রের উপাদান ছিল, তাহারা জগদ্ব্যস্ত্রের চক্রের সঙ্গে বিঘূর্ণিত হইয়া অতীত অবিনশ্বর রহিয়াছে ! জল আগুনে শুকায়, আগুন জলসেকে নিবিয়া যায়। কিন্তু বিজ্ঞান ইহা উপদেশ করে যে, যে সকল পদার্থ জল ও আগুনের উপাদান, তাহার একটিরও বিনাশ হয় না। ফুল ঝরিয়া পড়ে, ফল পচিয়া যায়, অসংখ্য তরুরাজিপূর্ণ অটবী দাবদাহে পুড়িয়া ছাই হয় ;—গ্রাম ও নগর, দরিদ্রের কুটীর, সমুদ্রের প্রাসাদ, বিলাসীর নিকুঞ্জ ও বিবেকীর ভজনগৃহ প্রভৃতি স্মর ও কুৎসিত এবং স্থায়ী ও অস্থায়ী সমস্ত সামগ্রী লইয়া, সহসা নদীর গর্ভে প্রবেশ করে। কিন্তু বিজ্ঞান ইহা শিক্ষা দেয় যে, ফুল ও ফলের রূপান্তর মাত্র হইয়াছে,

যে সকল উপকরণ ফুল ও ফলের দেহ গঠন করিয়া সৌন্দর্য্যে প্রস্ফুটিত হইয়াছিল, তাহার একটিও বিনষ্ট হয় নাই;—অটবীর আকৃতি মাত্র পরিবর্তিত হইয়াছে, অটবীর উপাদান-পদার্থনিচয়ের একটিও হারাণ যায় নাই; এবং যে সকল বস্তু গ্রাম ও নগরের সহিত নদীর জলে ধুইয়া গিয়াছিল, তাহারাই আবার দ্বীপ ও উপদ্বীপের মনোহর মূর্ত্তি ধারণ করিয়া, নূতন তরুলতার ও নূতন শস্তসম্পদের সহিত জলরাশির মধ্য হইতে ফুটিয়া উঠিতেছে; তাহার একটি রেণুকাও বিলুপ্ত হয় নাই। বিজ্ঞান এইরূপ অসংখ্য প্রমাণসহকারে প্রতিপাদন করে যে, বিনাশ এই শব্দটি নিরর্থক ও ভ্রমাত্মক। কিছুই কোন দিন বিনাশ হয় নাই, বিশ্বের কিছুই কোন দিন বিনাশ হইবে না। কিন্তু বিজ্ঞানের গতি এই পর্য্যন্ত যাইয়াই অবরুদ্ধ হয়। বিনাশ না হইলে মনুষ্যের শেষ গতি কি? বিজ্ঞান এখানে নিরুত্তর।

মনুষ্যের হৃদয়, প্রথমে বিজ্ঞানের কিছুমাত্র অপেক্ষা না করিয়া, পরে বিজ্ঞানের নিরাশ-কঠোর বাদ-বিতর্কে সর্ব্বতোভাবে উপেক্ষা দেখাইয়া, কখনও আশার অর্দ্ধস্ফুট আলোকে, কখনও কল্পনার অস্ফুট অথচ কমনীয় জ্যোৎস্নায়, কখনও মমতার প্রণোদনে, কখনও বিবেকের তাড়নায়, এবং সৌভাগ্যবশতঃ কোন কোন স্থলে হৃদ্যালোকদর্শিনী ভক্তির স্নমধুর সাস্বনায়ে, নানাভাবে এই প্রশ্নের নানাবিধ মীমাংসা করিয়াছে; এবং সেই সকল মীমাংসাকে ধর্ম্মের দৃঢ় ভিত্তির উপর সংস্থাপন করিয়া সমগ্র মনুষ্যজাতিকে সেখানে আসিয়া আশ্রয় লইবার জন্য ‘মা ভৈবীঃ’ বলিয়া আহ্বান করিতেছে। আভাসেই ইহা উপলব্ধ হইবে যে, সে মীমাংসার শেষ স্থল স্বর্ণ,—শেষ লক্ষ্য পরকাল। তুমি ভালবাসিয়া বঞ্চিত হইয়াছ, পরকালে

তোমার বিচার হইবে, আর তুমি বঞ্চনার অভিলাষে ভালবাসার বাগুরা বিস্তার করিয়াছ, তুমিও পরকালে জ্বালের বিচার দেখিবে। তুমি স্বজাতির উন্নতি এবং স্বদেশের উদ্ধারের জন্ত, আপনার বুকের রক্ত ঢালিয়া দিয়াও, প্রতিদানে পদাঘাত মাত্র দক্ষিণা পাইয়াছ, পরকালে তোমার বিচার হইবে। তুমি জ্বালের অমুরোধে স্বার্থত্যাগ করিয়া ভিখারী বনিয়াছ, দয়ার অমুরোধে আপনার মুখের গ্রাস পরের মুখে তুলিয়া দিয়াছ, এবং প্রীতির অমুরোধে আপনি পদানত রহিয়াও পরচিত্ত বিনোদন করিয়াছ, পরকালে তোমার বিচার হইবে;—আর তুমি স্বসুখবাসনার সুপরিমার্জিত বেদির নিকট জ্বায়, ধর্ম ও নীতির বঞ্চনীকে অ-ভ্রভঙ্গে বলিদান করিয়া নিতান্ত সমুদ্র হইয়া উঠিয়াছ, ক্ষুধাতুরের মুখের গ্রাস কাড়িয়া আনিয়া আপনার পূর্ণ উদর পুনঃপূরণ করিয়াছ, এবং প্রীতির কোমলতম আশুনে পোড়াইয়া আনন্দে বল বল করিয়া হাসিতেছ; তুমিও পরকালে জ্বালের বিচার দেখিতে পাইবে। হুঃখি ! হুঃখ করিও না, পরকাল আছে; শোকি ! শোক করিও না, পরকাল আছে। পরকালে শোকের অবসান—শাস্তি কিংবা সন্মিলন, পরকালে হুঃখের অবসান—সুখ। যে তৃষ্ণা হৃদয়কে ইহকালে তুষানলের জ্বায় দহনমাত্র করিল, আর কিছুই পাইল না, যদি উহা নির্মল হয়, তবে উহার তৃষ্ণির চরম স্থল পরকাল; এবং যে আশা মনুষ্যের মৃগচঞ্চলা মনোবৃত্তিকে মৃগতৃষ্ণিকার জ্বায় উদ্ভ্রান্ত করিয়া দিগ্দিগন্তরে ও দেশদেশান্তরে ঘুরাইল,—যে আশা মনুষ্যকে পৃথিবীতেই স্বর্গসম্পদের প্রতিবিম্ব দেখাইবে বলিয়া তাহাকে আকাশে উঠাইল, সাগরে ডুবাইল এবং অসাধ্যসাধনে শক্তি দিল, যদি জ্বায়োপেত হয়, তবে উহারও শেষ সাফল্য পরকালে।

ইতিহাস অথবা মানবজনীন স্মৃতি তৃতীয় এক প্রকারে প্রস্তাবিত প্রশ্নের উত্তর করিতেছে এবং উহা মনুষ্যের আত্মাকে বিজ্ঞানের ত্রায় অঙ্ককারে না ডুবাইয়া এবং হৃদয়োদ্ভূত আশার ত্রায় লোকান্তরের অপার্থিব জগতেও প্রেরণ না করিয়া ইহলোকেই অমরতার আশ্বাস দিতেছে। ইহা বলা অনাবশ্যক যে, আমরা পারলৌকিক আশার যে সকল কথা উল্লেখ করিয়াছি, সেগুলি পৃথিবীর পুরাতন ও নূতন সুসভ্য ও অসভ্য সমুদয় জাতিরই জীবনগ্রন্থির সহিত গ্রথিত রহিয়াছে, এবং কবিতাও সেই সকল কথার অমৃতপ্রবাহে অভিষিক্ত হইয়াই সংসারের দন্ধমন্ডলে অমৃত-সেচন করিতেছে। কিন্তু আমরা যে কারণে মনুষ্যের উৎপত্তিতত্ত্ব সম্বন্ধে কিছু বলিতে যাই নাই, মনুষ্যের আধ্যাত্মিক পরকাল সম্বন্ধেও আমরা সেই কারণেই এইক্ষণ কিছু বলিব না। মনুষ্য ইতিহাসের অশ্রান্ত আলোকেও শ্মশানের পরপারে কিছু দেখিতে পায় কিনা, শুধু ইহাই এইক্ষণ আমাদের আলোচনার বিষয়।

তবে ইতিহাস কি আশার পরকাল সম্বন্ধে সন্দিহান? তাহা নহে। আমরা পূর্বেই বলিয়াছি যে, ইতিহাসের আর এক নাম স্মৃতি, অথবা স্মৃতিতেই উহা গঠিত এবং অল্পপ্রাপ্ত। স্মৃতি যদি আশার কার্য না করে, তাহা হইলে উহা স্মৃতির অপরাধ নহে; এবং ইতিহাসও যদি অধ্যাত্মজ্ঞানের ফলপ্রদানে অসমর্থ হয়, তাহা হইলে তাহাও ইতিহাসের অপরাধ বলিয়া গণ্য হয় না। ইতিহাস কি বলিতেছে? বাহা স্মৃতি প্রীতির উচ্ছ্বাসে সর্বত্র বলিয়া বলিয়া অবসন্ন হয়, ইতিহাসও শৈলশৃঙ্গসমারূঢ় সর্বদশী সিদ্ধযোগীর ত্রায়, গভীর অথচ মোহনস্বরে সেই কথাই দিনে নিশীথে সর্বত্র বলিতেছে,—

‘আমি ভুলি না’

এবং সেই সুখশীতল সুগভীর কথা নিস্তব্ধ যামিনীর বংশীধ্বনির
 স্রাব পর্কতের শৃঙ্গে শৃঙ্গে, পর্কতবিলম্বিনী জলদমালার পটলে পটলে,
 —শ্রোতে,—তরঙ্গে,—নিঝরে,—জলপ্রপাতে, বনে বনে, কান্তারে
 কান্তারে, কুটীরে কুটীরে, প্রাসাদে প্রাসাদে, এবং পৃথীবাসী
 মনুষ্যমাত্রেয়ই হৃদয়ে হৃদয়ে, প্রতিধ্বনিত হইতেছে,—

‘আমি ভুলি না ।’

যেখানে যোদ্ধা, একদিকে মৃত্যুর করাল গ্রাস, আর এক দিকে
 শাস্তির কণ্টকশৃঙ্গ কোমল শয্যা, এই দুইয়ের মধ্যস্থলে দণ্ডায়মান
 হইয়া ইতস্ততঃ ভাবিতেছে, ইতিহাসের মধুর বংশী তখন তাহার
 কর্ণকূহরে অতি মধুর স্বরে এই বলিয়া তাহাকে উন্মাদিত করিতেছে
 যে,—‘আমি ভুলি না ।’ যাহারা সাক্ষাৎসম্বন্ধে মনুষ্যের সেবক,
 তাঁহারা ইতিহাসের এই কথা শুনিয়াই আশ্বস্ত আছেন,—‘আমি
 ভুলি না ;’ আর যাহারা কাব্য, সাহিত্য, শিল্প, সংগীত অথবা অত্যাশ্রিত
 উপায়যোগে হোমার, মিল্টন, ভণ্টেয়ার কিংবা ভবভূতি প্রভৃতির স্রাব
 অসাক্ষাৎ সম্বন্ধে মনুষ্যের সেবা করিতেছেন, তাঁহারাও অবসাদের
 অসংখ্য কারণ সত্ত্বে ইতিহাসের এই কথা শুনিয়াই সতত উদ্ভম ও
 উৎসাহে পরিপূর্ণ রহেন,—‘আমি ভুলি না’—‘আমি ভুলি না ।’

ইতিহাসের অস্তিত্ব কোথা হইতে ?—কেন ? মনুষ্য মনুষ্যকে
 ভুলে না, এই জন্তই মনুষ্যের ইতিহাস । মনুষ্য মনুষ্যকে ভালবাসে,
 এই জন্তই মনুষ্যের ইতিহাস । আর, যাহাকে ভালবাসে, মনুষ্য
 সকল সময়েই তাহার গুণগান ও নামকীর্তন করিতে চাহে, এই
 জন্তই মনুষ্যের ইতিহাস । ইতিহাস এই নিমিত্ত সকলকেই সমান
 আদরে এই বলিয়া সম্ভাষণ করিতেছে যে,—পৃথিবীর যেখানে যে
 থাক, মানসকুসুমের সৌরভ ও সৌন্দর্য্য বিস্তার করিয়া মনুষ্যের

মনোমোহনে যত্নশীল হও, ‘আমি ভুলিব না ;’—পৃথিবীর যেখানে যে থাক, মনুষ্যত্বের উচ্চতর আদর্শ এবং মানুষী শক্তির শ্রেষ্ঠতর বিকাশ দেখাইয়া মনুষ্যকে উন্নতি হইতে উচ্চতর উন্নতিতে লইয়া যাও, ‘আমি ভুলিব না ;’—এবং পৃথিবীর যেখানে যে থাক, মনুষ্যকে ভালবাস, মনুষ্যের পরিচর্যা কর, মনুষ্যহিতে ব্রতী হও এবং মনুষ্যের সুখবর্দ্ধন ও মঙ্গলসাধনে স্বার্থত্যাগ ও আত্মোৎসর্গ করিয়া প্রকৃত মনুষ্যত্ব দেখাও, এই সৃষ্টি যতকাল রহে, ততকাল ইহা আমি মনে রাখিব,—‘আমি ভুলিব না ।’ ইহার নাম ঐহিক অমরতা, এবং ইতিহাস যাহাদিগকে ভুলে না,—যাহাদিগের জীবন-স্রোতের গতি ঐতিহাসিক স্মৃতির সহিত এইরূপে মিলিত হয়, যাহাদিগের হৃদয়মনের প্রতিকৃতি ইতিহাসের স্মৃতিপটে এইভাবে লিখিত হইয়া রহে, তাঁহারাই সেই অমরতার আশ্রয়পুরুষ । তাঁহারা মরিয়াও মরেন না, তাঁহারাই এই মরভূমিতে অমর । বিপ্লবের উপর বিপ্লব এবং রাজ্য ও সমাজ লইয়া বিঘটনের পর বিঘটন হইয়া যায়, পুরাণ সৃষ্টি নূতন হয় ; কিন্তু সেই স্মৃতিশালী সার্থকজন্মা মহাত্মারা বিপ্লব ও বিঘটনের অনন্ত ঝটিকার মধ্যেও চিরদিনই নূতন জীবন ও নূতন যৌবনে অমর রহেন ।

কালিদাস মরিয়া গিয়াছেন, না বৃদ্ধ হইয়াছেন ? তুমি যখন ভ্রমর-ভয়-ব্যাকুলা বিলাস-চঞ্চলা শকুন্তলার সেই ক্ষণে ক্ষণে পরিবর্তনশীল মধুরলীলা দেখিয়া আনন্দে উষেল হও, কালিদাস তখন তোমার পার্শ্বচর ও প্রিয়তম বয়স্ত ; এবং যখন তুমি হিমাদ্রির উচ্চতম প্রান্তে কল্পনার মনোহর রথে আরোহণ করিয়া যোগিকূলধোয় মহাযোগী মহেশ্বরের সেই ‘নিবাত নিঃস্প’ ধীরমূর্ত্তি নিরীক্ষণ কর,—বনের বিহঙ্গ বনতরুর শাখার উপর নিস্তব্ধ বসিয়া

রহিয়াছে, ভয়ে শব্দ করে না,—বনচর যুগাদিভক্ত চিত্রাঙ্গিতবৎ
 স্ব স্ব স্থলে স্থির রহিয়াছে, ভয়ে পাদচারণা কিংবা মুখের অর্দ্ধাবলীচ
 শব্দ অধঃকরণ করিতে সাহস পায় না; অদূরে বসন্তপুষ্পাভরণা
 বিলোলনয়না উমা, দূরে হরবন্ধলক্ষ্য মূর্তিমান্ কন্দর্প, সেই
 কাব্যজগতের অদ্বিতীয় অনির্বচনীয় অতুল তপঃশোভা, যখন তুমি
 মানসনেত্রে প্রত্যক্ষ কর, তখন কালিদাস আর তোমার বাহিরে
 নহেন। তখন কালিদাস তোমার অন্তরে বাহিরে, অন্তরের
 অন্তরে,—আত্মার অভ্যন্তরে। তখন তোমার জীবন কালিদাসময়।
 কে বলে যে অযোধ্যা রহিয়াছে, অযোধ্যার রাম নাই? রাম
 চাক্ষুষ-প্রতীতির লৌকিক জীবনে কেবল অযোধ্যায়ই অবস্থান
 করিতেন, এইক্ষণ যুগে যুগে জীবিত রহিয়া অসংখ্য নরনারীর
 প্রাণের মধ্যে অবস্থান করিতেছেন। রামময়-জীবিতা পতিপ্রাণা
 সীতা একদিন ‘হা রাম! হা রাম!’ বলিয়া আপনার নয়নজলে
 ভাসিয়াছে। এইক্ষণ প্রীতির প্রফুল্লকমলের ত্রায় প্রীতিমুগ্ধ
 মনুষ্যমাত্রেয়ই নয়নজলে অহোরাত্র ভাসমানা রহিয়া, যেখানে
 প্রীতির কথা, পবিত্রতার কথা, যেখানে অবলাজন-স্পৃহণীয়
 অমলসৌন্দর্যের কথা, সেইখানেই বিরাজমানা হইতেছেন।
 বাল্মীকি এক স্থানে বসিয়া এক সময়ে আপনার বীণা বাজাইয়া-
 ছিলেন। কিন্তু এইক্ষণ যেখানে সারস্বত-স্বর্গ, সেইখানেই তাঁহার
 বীণার ঝঙ্কার; যেখানে আনন্দ-কুঞ্জের আনন্দ-উৎসব, সেইখানেই
 তাঁহার বীণার ধ্বনি,—যেখানে হৃদয় হৃদয়ের সহিত আলাপ
 করে, মন মনের সহিত মিলিয়া যায়, আত্মা আত্মার সহিত
 আপনার বিনিময় করিতে চাহে, সেইখানেই তাঁহার বিশ্বমোহিনী
 বীণার বিনোদনিস্বন। এইরূপ কত অগণিত আত্মা লোকস্বৃতির

অমরাবতীকে উজ্জল করিয়া বসিয়া আছে, তাহা চাহিয়া দেখ।
যদি অবনীৰ এই সকল সম্ভানও মরিয়া গিয়া থাকেন, তবে কি
জীবিত আছি আমরা ? আর যদি ইঁহারা সত্য সত্যই অমর হইয়া
থাকেন, তবে যে ভাবে ইঁহারা অমর হইয়া আছেন, অমরতার
সেই সম্পদ কি আকাশকুসুম ?

ইংলণ্ডের একজন অচিরগত প্রধান রাজপুরুষ জাতীয় স্বাধীনতার
পরম সূহৃদ রিচার্ড কব্‌ডেনের নামস্মরণে পার্লামেন্ট ভবনে এইরূপ
বলিয়াছিলেন যে,—“এই সকল লোক অনুপস্থিত থাকিলেও
পার্লামেন্টের সভাস্থলে নিয়ত উপস্থিত।” আমরাও বলি, যাহারা
শক্তির প্রসাদাৎ কিংবা সাধনার বলে আপনার জীবনকে বহুজীবনের
সহিত মিশাইয়া গিয়াছেন,—তাঁহারা জীবনের অমৃত বিলাইয়া
কিংবা আলেখ্য দেখাইয়া মনুষ্যের আশা আকাজ্জকে উপরে
তুলিয়াছেন, তাঁহারা সমুদ্রে উপস্থিত না থাকিলেও আমাদের
মধ্যে সতত উপস্থিত। পৃথিবী তাঁহাদিগের তপশ্চর্য্যার পদ্মাসন,—
শ্মশান তাঁহাদিগের স্বর্গারোহণের সোপানমঞ্চ।

কালীপ্রসন্ন ঘোষ।



বাঙ্গালীর বীরত্ব

বাঙ্গালার পূর্বে গৌরব অনেক ছিল। বাঙ্গালীর পূর্ব-বীরত্বও অনেক ছিল। আপনাদের পূর্ব-গৌরব কাহিনী গুনিলে লাভ ভিন্ন ক্ষতি নাই, এবং উপকার ভিন্ন অপকার নাই। যাহাদের মনোবৃত্তি বিকারগ্রস্ত হইয়াছে, তাঁহারা ইহাতে উপহাস করিতে পারেন, কিন্তু তাঁহাদের জন্ত আমাদের এই প্রয়াস নয়।

রঘুবংশে মহাকবি কালিদাস রঘুর দিগ্বিজয়-বর্ণনায় বাঙ্গালীর সম্বন্ধে যাহা লিখিয়াছেন, তাহার অনুবাদ এই;—

“সেনা-নায়ক সেই রঘু, রণতরী আরোহণপূর্বক যুদ্ধার্থ উপস্থিত বঙ্গবাসীদিগকে পরাজয় করিয়া গঙ্গার মধ্যস্থ দ্বীপে জয়ন্তস্ত স্থাপন করিলেন।”

ইহাতে বোধ হইতেছে, কালিদাস যখন রঘুবংশ লিখেন, তখন বাঙ্গালী নো-বুদ্ধে পটু ছিল এবং তখন বাঙ্গালা স্বাধীন ছিল। কেহ কেহ অনুমান করেন, বালী ও যবদ্বীপেও বাঙ্গালীর জয়-পতাকা উড়িয়াছিল। সমুদ্রযাত্রা ও সামুদ্রিক রাজ্য-জয়ে বাঙ্গালী যেমন যোগ্যতা দেখাইয়াছে, এমন ভারতবর্ষের আর কোন জাতি দেখাইতে পারে নাই। পাল ও সেনবংশের বীরত্বের বিবরণ আজও বাঙ্গালা উজ্জ্বল করিয়া রাখিয়াছে। মুঙ্গেরে যে একখানি তাম্রশাসন-পত্র পাওয়া যায়, তাহাতে লিখিত আছে, গৌড়ের অধিপতি দেবপাল দেব মুদগগিরিতে (মুঙ্গেরে) শিবির সন্নিবেশ করিয়া অবস্থান করিয়াছিলেন, তাঁহার যুদ্ধাশ্ব কাষোজ দেশে

উপনীত হইয়াছিল। রাজসাহীর অমুশাসন-পত্রেও মহারাজ লক্ষ্মণসেনের এইরূপ দিগ্বিজয়-বর্ণনা দেখা যায়। ইতিহাসের পাঠকমাত্রেই অবগত আছেন, উড়িষ্যার গঙ্গাবংশীয় রাজারা অত্যন্ত পরাক্রান্ত ছিলেন; এই গঙ্গাবংশীয়দিগের আদিপুরুষ বাক্সালী। তমোলুক ও মেদিনীপুর প্রদেশে ইহাদের আবাস ছিল। হন্টর সাহেব লিখিয়াছেন, বিষ্ণুপুরের ভূপতিগণ মুসলমান হইতে আপনাদের স্বাভাব্য রক্ষা করিয়াছিলেন। বাক্সালী পূর্বে নিতান্ত ক্ষুদ্রজাতি ছিল না।

একজন পণ্ডিত লেখক বাক্সালার ইতিহাস লিখিতে যাইয়া, বাক্সালীর সম্বন্ধে যাহা লিখিয়াছিলেন, তাহা সকলেরই পড়া উচিত। বাক্সালার ইতিহাসে ইহার লেখনী হইতে এই বাক্য নির্গত হইয়াছে,—

“পাঠানেরাই এতদ্দেশে মুসলমান-জয়পতাকা উড্ডীন করেন। ৩৭২ বৎসর পরে তাঁহাদিগের রাজত্বের শেষ সময়ে, এদেশের কত দূর তাঁহাদিগের অধিকৃত ছিল, এক বার বিবেচনা করিয়া দেখা মন্দ নহে। পশ্চিমে বিষ্ণুপুর ও পঞ্চকোট তাঁহাদিগের ক্ষমতা প্রবিষ্ট হয় নাই; দক্ষিণে সুন্দর-বন-সমিহিত প্রদেশে স্বাধীন হিন্দু রাজা ছিলেন; পূর্বে চট্টগ্রাম, নোয়াখালী এবং ত্রিপুরা, আরাকানরাজ ও ত্রিপুরাধিপতির হস্তে ছিল; এবং উত্তরে কোচবিহার স্বতন্ত্রতা রক্ষা করিতেছিল। সুতরাং যে সময়ে পাঠানেরা উড়িষ্যা জয় করিতে সক্ষম হইয়াছিলেন, যে সময়ে তাঁহারা ১,৪০,০০০ পদাতিক ৪০,০০০ অশ্বরোহী এবং ২০,০০০ কামান দেখাইতে পারিতেন, সে সময়েও এ দেশের অনেকাংশ তাঁহাদিগের হস্তগত হয় নাই।”

এগুলি প্রকৃত ইতিহাসের কথা। বাক্সালার এই ইতিহাসের সমালোচনা-প্রসঙ্গে উল্লিখিত কথা উদ্ধৃত করিয়া, একজন সুবিজ্ঞ সমালোচক অভিমানের সহিত বলিয়াছেন, “বাক্সালার অধঃপতন এক দিনে ঘটে নাই।” স্বদেশবৎসল বাক্সালী, স্বদেশের পূর্বতন গৌরবে উন্নত হইয়া যে সরল ভাবে সে সকল বাক্যের উল্লেখ করিয়াছিলেন, আজ আমরাও সেই সরল ভাবে সেই সরল বাক্যের পুনরুল্লেখ করিতেছি,—“বাক্সালার অধঃপতন এক দিনে ঘটে নাই।”

পাঠানেরা যে, কেবল সপ্তদশ অশ্বারোহী মাত্র লইয়া বাক্সালা অধিকার করিয়াছে, এ কথা মিথ্যা। বাক্সালায় পাঠানের উদয়, স্থিতি ও বিলয় হইয়াছে, তথাপি অনেক স্থানে অনেক বাক্সালী আপনাদের স্বাধীনতা রক্ষা করিয়াছেন। ইহার পর মোগলের আধিপত্য-সময়েও বাক্সালীর বীর্য-বহি নিবিয়া যায় নাই। যশোহরের প্রতাপাদিত্যের নাম আমাদের দেশের সকলেই জানেন। প্রতাপাদিত্য কখনও কাপুরুষের ছায় আপনাদের স্বাধীনতায় জলাঞ্জলি দেন নাই, এবং কখনও কাপুরুষের ছায় দিল্লীর সেনাপতির সহিত যুদ্ধ করিতে পরাধু হন নাই। আমাদের দেশে যে সকল পরাক্রান্ত বীরভূঁইয়ার বিবরণ শুনা যায়, প্রতাপাদিত্য তাঁহাদের অগ্রতম। প্রতাপাদিত্য ব্যতীত আরও অনেক পরাক্রমশালী ভূঁইয়ার নাম করা যাইতে পারে। ইহাদের দুর্গ ছিল, সৈন্য ছিল, যুদ্ধ-পোত ছিল। ইহারা যুদ্ধস্থলে বীরত্ব দেখাইতেন, সাহস দেখাইতেন। ইহারা সৈন্য দিয়া, অস্ত্র দিয়া, যুদ্ধ-তোপ দিয়া বাদসাহের সাহায্য করিতেন। ইহারা গোড়ের অধিপতির অধীনে থাকিয়া, শেষে আপনাদের ক্ষমতাবলে স্বাধীন হন। ইহারা কাহাকেও কর দিতেন না, বা কাহারও অধীনতা স্বীকার করিতেন না। ইহারা

আপনা আপনি স্বাধীন রাজা হইয়া, যুদ্ধের জন্ত এবং পৰ্তুগীজ ও মগ-দস্যুদের আক্রমণ নিবারণ-জন্ত, সৈন্ত ও সামরিক পোতা রাখিতেন। বাক্সালী পূর্বে বীরত্বশূন্য ছিল না।

আমরা এ স্থলে এই বীর্যশালী বাক্সালী ভূস্বামীদিগের আরও দুই এক জনের নাম করিব। বর্তমান নারায়ণগঞ্জের প্রায় এক মাইল উত্তরবর্তী খিজিরপুরের ঈশা খাঁর বীরত্বের বিবরণ আজ পর্যন্ত বাক্সালীর লিখিত কোন বাক্সালার ইতিহাসে উঠে নাই। ঈশা খাঁ এই নাম শুনিয়াই অনেকে মনে করিতে পারেন, এ ব্যক্তি পাঠান ছিল, সুতরাং ইহার কথা তুলিয়া বাক্সালীর বীরত্বের গৌরব করা অসঙ্গত। কিন্তু আমরা তাঁহাদিগকে বলিতেছি, ঈশা খাঁর পিতা হিন্দু ছিলেন। তাঁহার নাম কালিদাস। হুসেন শাহের রাজত্বকালে (খ্রীঃ অব্দ ১৪৯২-১৫২০) কালিদাস মুসলমান-ধর্ম পরিগ্রহ করেন। সুতরাং ঈশা খাঁ পাঠান নহেন, মুসলমান-ধর্মাবলম্বী হিন্দুর সন্তান। বিশেষ বাক্সালী ভূস্বামী।

ঈশা খাঁ সুবর্ণগ্রামে আধিপত্য করিতেন, সমস্ত পূর্ববাক্সালা তাঁহার অধীন ছিল। তিনি আসামের অন্তর্গত রাজ্যমাটিতে, বর্তমান নারায়ণগঞ্জের অপর পারশ্বে জিবেগীতে, এবং যে স্থানে লক্ষা নদী ব্রহ্মপুত্র হইতে বাহির হইয়াছে, সেই স্থানের নিকটবর্তী এগারসিঙ্কুতে দুর্গ নিষ্কাণ করেন। ১৫৮৩ খ্রীঃ অব্দে রাল্ফ্‌কিচ্ নামে একজন ভ্রমণকারী সুবর্ণগ্রামে উপস্থিত হন। তিনি লিখিয়াছেন, “এই সমস্ত দেশের প্রধান রাজার নাম ঈশা খাঁ। তিনি অত্যন্ত অধিপতিদিগের মধ্যে প্রধান, এবং খ্রীষ্টানদিগের পরম বন্ধু।” ১৫৮৫ খ্রীঃ অব্দে দিল্লীখরের সেনানী শাহাবাজ খাঁ অনেক সৈন্তসামন্তের সহিত পূর্ববাক্সালায় প্রবেশ করেন, কিন্তু

ঈশা খাঁর পরাক্রমে তাঁহার এই দেশ জয়ের চেষ্টা বিফল হয়। শাহাবাজ খাঁ পরাভূত হইয়া প্রস্থান করেন। ঈশা খাঁর স্বাধীনতা অটল থাকে। এই সময়ে ঈশা খাঁর জয়পতাকা সমুদ্র-তট পর্য্যন্ত উড়িয়াছিল।

১৫৯৫ খ্রীঃ অব্দে সম্রাট আকবরের আদেশে ফুলিয়-বীর রাজা মানসিংহ আবার বাজালায় আসিয়া ঈশা খাঁর এগারসিদ্ধি দুর্গ অবরোধ করেন। ঈশা খাঁ তখন উপস্থিত ছিলেন না, দুর্গের অবরোধ-সংবাদ শুনিয়া অবিলম্বে সৈন্তগণের সহিত এগারসিদ্ধিতে আসিলেন। কিন্তু তাঁহার সৈন্তগণ কোন কারণবশতঃ অসম্মত হইয়া, যুদ্ধ করিতে অসম্মত হইল। ঈশা খাঁ কাপুরুষ ছিলেন না। তিনি রাজা মানসিংহকে দ্বন্দ্বযুদ্ধে আহ্বান করিয়া কহিলেন, এই যুদ্ধে যে জীবিত থাকিবে, সেই বাজালা একাকী ভোগ করিবে। মানসিংহ ঈশা খাঁর প্রস্তাবে সম্মত হইলেন। কিন্তু ঈশা খাঁ অস্বারোহণে যুদ্ধস্থলে উপনীত হইয়া দেখিলেন, তাঁহার প্রতিদ্বন্দ্বী একজন তরুণবয়স্ক যুবক, রাজা মানসিংহ নহেন,—মানসিংহের জামাতা। ইহার সহিতই যুদ্ধ আরম্ভ হইল। মানসিংহের জামাতা নিহত হইলেন। ঈশা খাঁ মানসিংহকে ভীরা বলিয়া ভৎসনা করিয়া, শিবিরে প্রস্থান করিলেন। কিন্তু শিবিরে আসিতে না আসিতেই সংবাদ আসিল, রাজা মানসিংহ যুদ্ধস্থলে অবতীর্ণ হইয়াছেন। সংবাদ পাওয়া মাত্র ঈশা খাঁ অস্বারোহণে তড়িৎ গতিতে সমর-ভূমিতে উপস্থিত হইয়া, এই অভিপ্রায় প্রকাশ করিলেন যে, যাবৎ তিনি তাঁহার প্রতিদ্বন্দ্বীকে রাজা মানসিংহ বলিয়া ভালরূপে চিনিতে না পারিবেন, তাবৎ যুদ্ধে প্রবৃত্ত হইবেন না। শেষে ঈশা খাঁ ভাল করিয়া চিনিলেন যে, উপস্থিত প্রতিদ্বন্দ্বী

যথার্থই রাজা মানসিংহ। স্মৃতরাং যুদ্ধ আরম্ভ হইল। প্রথম আক্রমণেই মানসিংহের তরবারি ভগ্ন হইয়া গেল। ঈশা খাঁ আপনার তরবারি রাজাকে দিলেন, কিন্তু রাজা তাহা গ্রহণ না করিয়া অশ্ব হইতে নামিলেন। তাঁহার প্রতিপক্ষ ঈশা খাঁও অশ্ব হইতে অবরোহণ করিয়া, নিরস্ত্র রাজার সহিত মল্ল-যুদ্ধে উত্তত হইলেন। মানসিংহ আর যুদ্ধে প্রবৃত্ত হইলেন না। প্রতিদ্বন্দীর উদারতা, সাহস ও বীরত্বে সন্তুষ্ট হইয়া, তাঁহাকে বন্ধু বলিয়া আলিঙ্গন করিলেন। ক্ষত্রিয়-ধর্মের অবমাননা করিলেন না, ঈশা খাঁকে আপ্যায়িত করিয়া, উপহার দিয়া বিদায় দিলেন।

ঈশা খাঁ ইহার পর রাজা মানসিংহের সহিত আগরাতে সম্রাট আকবরের নিকট উপনীত হইলেন। কিন্তু তাঁহাকে এই স্থানে কারাগারে অবরুদ্ধ করা হইল। শেষে সম্রাট যখন এগারসিদ্ধুর স্বর্ঘ্যযুদ্ধের বিবরণ শুনিলেন, তখন কালবিলম্ব না করিয়া ঈশা খাঁকে কারাগার হইতে মুক্ত করিলেন এবং তাঁহাকে “দেওয়ান” ও “মসনদইআলি” উপাধি ও বান্ধালার অনেক পরগণা দিলেন। ষোড়শ শতাব্দীর শেষভাগে একজন বান্ধালীর এইরূপ বীরত্ব ও সাহসের বিবরণ পাওয়া যায়। এক্ষণে ঈশা খাঁর বংশধরেরা পূর্ববান্ধালার সম্রাস্ত্র জমীদার বলিয়া গণ্য। কিন্তু তাঁহাদের বংশের সে সাহস, সে বীর্য এক্ষণে অতীত কালের সহিত মিশিয়া গিয়াছে।

ঈশা খাঁকে ছাড়িয়া দিলেও বলশালী খাঁটি হিন্দু বান্ধালীর অভাব হইবে না। স্বাধীন ত্রিপুরার অধিপতিগণ অনেক সময়ে যুদ্ধে অসাধারণ সাহস দেখাইয়া বীরত্ব-কীর্তির সম্মান রক্ষা করিয়াছেন। আজ পর্য্যন্ত ইহাদের স্বাধীনতা অক্ষত রহিয়াছে।

বিক্রমপুরের কায়স্থবংশীয় চাঁদ রায় ও কেদার রায় এক সময়ে পরাক্রান্ত ভূস্বামী বলিয়া প্রসিদ্ধ ছিলেন। যে ঈশা খাঁর বীরত্বে মোগলসেনানী বিস্মিত হন, সেই ঈশা খাঁর সহিত এই দুই ভ্রাতার সর্কদা যুদ্ধ হইত। ঈশা খাঁর সহিত যুদ্ধে চাঁদ রায় ও কেদার রায় দীর্ঘকাল আপনাদের স্বাধীনতা রক্ষা করেন। বাল্লাচন্দ্রদ্বীপের (বর্তমান বাথরগঞ্জ জেলা) কন্দর্পনারায়ণ রায় ও সুল্লরবনের সন্নিহিত প্রদেশের মুকুন্দ রায় বীরত্বে বিখ্যাত ছিলেন। ১৫৮৬ খ্রীঃ অব্দে রাল্‌ফ্‌চ্ বাল্লাচন্দ্রদ্বীপ দর্শন করেন। তাঁহার লিখিত বিবরণে স্পষ্ট বোধ হয়, বাল্লাচন্দ্রদ্বীপ বর্তমান স্বাধীন রাজাদিগের শাসিত রাজ্য অপেক্ষা কোন অংশেই নিকৃষ্ট ছিল না। কন্দর্প-নারায়ণের অনেক সমর-পোত ছিল। অত্য়াপি তাঁহার একটি পিতলের কামান চন্দ্রদ্বীপে আছে। ফরিদপুরের নিকটবর্তী চরমুকুন্দিয়া নামক স্থানে মুকুন্দ রায় দিল্লীশ্বরের একজন সেনানীকে যুদ্ধে নিহত করেন। তাঁহার পুত্র শত্রুজিৎ মোগল সম্রাট জাহাঁঙ্গীরের অধীনতা স্বীকার করেন নাই।

খ্রীষ্টীয় সপ্তদশ শতাব্দী পর্য্যন্ত বাঙ্গালায় বাঙ্গালীদিগের এইরূপ প্রতাপ ছিল। অষ্টাদশ শতাব্দীতে আমরা যশোহরের রাজা সীতারামকে দেখিতে পাই। কেহ কেহ সীতারামকে একজন ডাকাইত বলিয়া নির্দেশ করিয়াছেন। আমরা এই কথার অত্মমোদন করি না। সীতারাম একজন পরাক্রান্ত হিন্দু জমীদার। সে সময়ে বাঙ্গালার আর কেহই সাহসে ও বীরত্বে তাঁহার সমকক্ষ ছিল না। সীতারামের সেনাপতি মেনাহাতীর নামে অত্য়াপি যশোহরের লোকের হৃৎকম্প হইয়া থাকে। সীতারামের পরাক্রম যখন বাড়িয়া উঠে, তখন বাহাদুর শাহ ও ফররোখ্‌সয়ের যথাক্রমে

দিল্লীর সিংহাসনে অধিষ্ঠিত ছিলেন। এই সময়ে যশোহর জেলা দ্বাদশ চাক্কার বিভক্ত ছিল। এই সকল চাক্কার অধিস্বামিগণ বাদসাহকে কর দিতেন না। বাদসাহ সীতারামের পরাক্রমের কথা শুনিয়াছিলেন, সুতরাং তাঁহাকেই এই অবাধ্য জমীদারদিগকে বশীভূত করিতে অনুরোধ করেন। সীতারাম বাদসাহের আদেশ-লিপি পাইয়া, অবিলম্বে অবাধ্য জমীদারদিগকে দমন করিয়া দ্বাদশ চাক্কার অধিকারী হন এবং বাদসাহ হইতে এই কার্যের পুরস্কার-স্বরূপ ‘রাজা’ উপাধি লাভ করেন। ইহার পর সীতারাম বান্ধালার নবাবের অধীনতা উচ্ছেদ করিলে, নবাব তাঁহার শাসন জন্ত অনেক বার সৈন্ত পাঠান, কিন্তু সীতারামের বীরত্বে নবাবের সৈন্ত বারংবার পরাভূত হয়। নবাব অবশেষে অনেক সৈন্তের সহিত স্বীয় জামাতা আবুতরাবকে পাঠাইয়া দেন। মহাপরাক্রম যেনাহাতী সীতারামের অনুপস্থিতিতেই এই সৈন্তদল পরাজয় করেন, এবং নবাবজামাতা আবুতরাবের ছিন্ন-মস্তক আনিয়া সীতারামকে দেখান। পূর্বে বান্ধালী শত্রুর আক্রমণে পলায়ন করিত না।

যে সময়ে আলীবর্দী খাঁ বান্ধালা, বিহার ও উড়িষ্যার শাসনদণ্ড পরিচালনা করিতেছিলেন, সে সময়ে রাজা কীর্তিচাঁদ ও রাজা রামনারায়ণ শত্রুর সহিত যুদ্ধ করিতে পরাভূত হন নাই। মস্তাফা খাঁ যখন বিদ্রোহী হইয়া আলীবর্দী খাঁর সৈন্তদল পরিত্যাগ-পূর্বক আজিমাবাদ আক্রমণ করেন, তখন তথাকার দেওয়ান জৈন-উদ্দীন, কীর্তিচাঁদ ও রামনারায়ণের হস্তে সৈন্তাধ্যক্ষতা সমর্পণ করেন। ইঁহারা অত্যাশ্রয় মুসলমান সেনাপতির শ্রায় মস্তাফা খাঁর সহিত যুদ্ধ করিয়াছিলেন।

ঐতিহাসিকের মতে সিরাজউদ্দৌলার সেনাপতি দেওয়ান মাণিকচাঁদ ও মোহনলাল বাঙ্গালী। সিরাজউদ্দৌলা যখন কলিকাতায় ইংরেজদের দুর্গ আক্রমণ করেন, তখন মাণিকচাঁদ আক্রমণকারী সৈন্যদলের অধ্যক্ষ ছিলেন। পলাসীর যুদ্ধক্ষেত্রে মোহনলালের কিরূপ বীরত্ব প্রকাশ পাইয়াছিল, তাহা বাঙ্গালার ইতিহাস-পাঠকের অবিদিত নাই। এস্থলে ইহা বলিলেই যথেষ্ট হইবে যে, মীরজাফর বিশ্বাসঘাতক হইয়া সিরাজউদ্দৌলাকে কুপারামর্শ না দিলে, পলাসীর যুদ্ধে জয়ী হওয়া ক্লাইবের পক্ষে দুর্ঘট হইত। বাঙ্গালী এক সময়ে ব্রিটিশ তেজের নিকটেও অবনত হয় নাই।

অধিক উদাহরণ দিবার প্রয়োজন নাই। যাহা কিছু বলা-হইল, তাহাতে বাঙ্গালী ব্রিটিশ অধিকারের পূর্বে কিরূপ ক্ষমতাপন্ন ছিল, বুঝা যাইবে। আমরা এখানে বাঙ্গালীর সাহসের একটি উদাহরণ দিব। ইতিহাস নির্দেশ করে, শূরবংশীয় ফরিদ স্বহস্তে একটি প্রকাণ্ড ব্যাঘ্র হত্যা করিয়া ‘শের সাহ’ নাম ধারণ করেন। অন্তাজিলো এক সময়ে এইরূপ পরাক্রম দেখাইয়া ‘শের আফগান’ নাম পরিগ্রহ-পূর্বক অতুল লাভণ্যবতী মুরজাহানের সহিত পরিণয়-সূত্রে আবদ্ধ হন। একাকী একটা বাঘকে মারিয়া ফেলিতে ইতিহাসে এই দুই বীরের সাহসের বড় প্রশংসা দেখিতে পাওয়া যায়। ফরিদ ও অন্তাজিলো যে সাহস দেখাইয়া ইতিহাসে নাম রাখিয়াছেন, হতভাগ্য বাঙ্গালার একজন হিন্দুযুবকও এক সময়ে এই সাহস দেখাইয়াছিলেন। কিন্তু বাঙ্গালার ইতিহাসের পক্ষে আজ পর্য্যন্তও তাঁহার নাম পাওয়া যায় না। এই বাঙ্গালী যুবকের নাম উদয়নারায়ণ মজুমদার-উপাধিক মিত্র বংশীয়। বাল্লাচন্দ্রবীপের

কন্দর্পনারায়ণের বংশের সহিত ইঁহার নিকট-সম্পর্ক ছিল। কালক্রমে কন্দর্পনারায়ণের বংশ লোপ হইলে, তাঁহাদের সমস্ত ভূসম্পত্তি উদয়নারায়ণের হস্তগত হয়। কিন্তু কিছুকাল পরে মুর্শিদাবাদের নবাববংশের এক ব্যক্তি উদয়নারায়ণকে এই অধিকার হইতে বিচ্যুত করেন। উদয়নারায়ণ মুর্শিদাবাদে বাইয়া নবাবকে ইহা জানাইলে, নবাব কহেন, যদি উদয়নারায়ণ স্বহস্তে একটি ব্যাঘ্র বধ করিতে পারেন, তাহা হইলে তাঁহাকে সমস্ত সম্পত্তি দেওয়া বাইবে। উদয়নারায়ণ বিলক্ষণ বলিষ্ঠ ও সাহসী ছিলেন, নবাবের প্রস্তাবে অসম্মত হইলেন না। অবিলম্বে একটি ভয়ঙ্কর প্রকাণ্ড ব্যাঘ্রের সহিত যুদ্ধ আরম্ভ করিলেন, এবং অঙ্গ-সঞ্চালন-কৌশলে তাহাকে হত্যা করিয়া, আপন সম্পত্তির অধিকারী হইলেন। বাজালী পূর্বে কেবল বলশালী ছিল না, সাহসী বলিয়াও বিখ্যাত ছিল।

রজনীকান্ত শুভ।

হেমচন্দ্র ও মধুসূদন

শিক্ষিত বাঙ্গালির প্রধান কবি পাঁচ জন,—মধুসূদন, হেমচন্দ্র, নবীনচন্দ্র, রবীন্দ্রনাথ ও গিরিশচন্দ্র। শেষের তিনজন, বাঙ্গালির সৌভাগ্য থাকিলে, আরও কত দিন কত নব নব রসে আমাদেরকে অভিষিক্ত করিবেন, তাঁহাদের সঙ্গে আমরা কত হাসিব কাঁদিব ; কত শত বিচিত্র সংসারের লীলাখেলা, তাঁহারা আমাদের দেখাইবেন—সুতরাং তাঁহাদের কবিত্বের সমালোচনার দিন এখনও আসে নাই। না আসাই প্রার্থনীয়। হেমচন্দ্রের সহিত তাঁহাদের কাহারও এখন তুলনাই হইতে পারে না। তবে মধুসূদনের সহিত হেমচন্দ্রের তুলনা হইতে পারে হেমচন্দ্রকে বুঝিতে হইলে তুলনা করাও বোধ করি কর্তব্য।

১৮৬৫ খৃষ্টাব্দে মধুসূদনের ‘মেঘনাদ-বধ,’ বি, এর পাঠ্য বলিয়া স্থির হইল। তৎপূর্বেই হেমচন্দ্র সটীক মেঘনাদ-বধ প্রকাশিত করিয়াছিলেন। স্বদীর্ঘ ভূমিকায় হেমচন্দ্র বাঙ্গালিকে নব-প্রবর্তিত ‘মিতাক্ষর’ বুঝাইবার চেষ্টা করিলেন,—বড় আগ্রহে, বড় উৎসাহে, বড় অমুরাগে, বড় ব্যাকুলতা-সহকারে। তখন হেমচন্দ্র ‘চিন্তাতরঙ্গিনী’-প্রণেতা হাইকোর্টের একজন নাম লেখান’ উকীল মাত্র। কিন্তু ‘মধু’ময় মিতাক্ষর বুঝাইবার সেই আগ্রহ, হ্রস্বোদ্যম মধু-কুট বুঝাইবার জন্ত টাকায় সেই যত্ন—উকীলের ওকালতি বলিয়া বোধ হইল না। বোধ হইল, হেমচন্দ্র মধুসূদনের নোঁড়া, মধুসূদনের ভক্ত, মধুসূদনের শিষ্য।

অনেক দিন পরে, মধুসূদনের ‘স্বর্গারোহণে’ হেমচন্দ্র যে হুঃখ প্রকাশ করেন, তাহাতেও সেই ভাব প্রকটিত হয় :—

“হবে কি সেদিন, এ গোড়-মাঝে
পূরিবে তোমার আশা ?
বুঝিবে কি ধন . দিয়াছ ভাঙারে,
উজ্জল করিয়া ভাষা ।”

কিন্তু হেমচন্দ্র মধুসূদনের এরূপ ভক্ত, এরূপ গোড়া, এরূপ শিষ্যানুকল্প হইয়াও ‘মিতাক্ষর’ গ্রহণ করেন নাই। কেন করেন নাই, তিনি জানেন। ভাল করিয়াছেন, কি মন্দ করিয়াছেন এখন আমি বলিতে পারিব না। তবে একটা কথা প্রসঙ্গত বলিয়া রাখি, যদি ‘মিতাক্ষর’ কেবল নিগড়-বন্ধন-মোচনের জ্ঞাত প্রকাশিত হইয়া থাকে, তবে সেটা কিছু মহত্বদেষ্ঠ-সাধন নহে। চূড়, বলয়, অনন্ত—এগুলি ত নিগড় বটে। বাহুল্যতা বহিয়া রূপ খসিয়া খসিয়া পড়ে, তাই বলয়-চূড়-অনন্ত-বন্ধনে বাঁধিয়া রাখিতে হয়। ভাল জিজ্ঞাসা করি, তাহাতে শোভা বাড়ে, না কমে? তালু ত সুরের নিগড়। ঐ নিগড় ভাঙ্গিলেই কি ভাল? তা নয়। দশরূপ নিগড়েই মহুশ্যত্ব। দশরূপ নিগড়েই কবিত্ব। নিগড়েই সৌন্দর্যের বিকাশ ও বৃদ্ধি। ছন্দে উঠে রবি-শশী। ছন্দ ত নিগড়। নিগড় সৌর জগতে; নিগড় কাব্য জগতে। নিগড়-ছেদনই আমাদের উদ্দেশ্য নহে।

যে কারণেই হউক হেমচন্দ্র মধুসূদনের মিতাক্ষর গ্রহণ করেন নাই। তবে মধুসূদনের কবিত্ব তিনি বিশেষ আয়ত্ত করিয়াছিলেন। কবি যেমন আর একজন কবিকে আয়ত্ত করেন, আমরা তেমন

ইজের সে মুখকান্তি, ঘুঁচায়ে নয়ন-ভ্রান্তি,
কত দিন সখি রে না হেরি !

কত দিন বৈসে নাই, ঘুঁচায়ে চক্ষু-বালাই,
সুরবন্দ বাসবেরে ঘেরি !

সুমেরু-শিখরে যবে, সুখে খেলিতাম সবে,
অমর সঙ্গিনীগণ সহ,

উপরে অনন্ত শূন্য, অনন্ত নক্ষত্রপূর্ণ,
সদা স্মিত সদা গন্ধবহ ।

ভ্রমিত নির্মল বায়, কুটিয়া কুটিয়া তার
কত পুষ্প সুমেরু শোভিত,

নির্মল কিরণ-শোভা, সখি রে কি মনোলোভা,
মেরু-অঙ্গে নিত্য বরষিত !

সখি সেই মন্দাকিনী, চিরানন্দ প্রদায়িনী,
দেবের পরশ সুধকর ।

চলেছে নয়নতলে, উছলি মধুর জলে,
ভাবিতে রে হৃদয় কাতর !

কার ভোগ্যা এবে তাহা, কার ভোগ্যা এবে আহা !
আমার সে নন্দন-বিগিন !

কে ভ্রমিছে এবে তার, কেবা সে আজ্ঞা পায়,
পারিজাত কে করে মলিন !"—

ইত্যাদি বর্ণনার সহিত মেঘনাদবধের সীতা-সরমার কথাবার্তা
কুলনা করুন ;—

“পঞ্চবটী বনে মোরা, শোভাবরী ড়টে
ছিহু সুখে । হায়, সখি, কেমনে বর্ণিব

সে কান্তার কান্তি আমি ? সতত স্বপনে
 উনিতাম বন-বীণা বন-দেবী-করে ;
 সরসীর তীরে বসি, দেখিতাম কভু
 সৌর-কর-রাশি-বেশে সুর-বালাকেলি
 পদ্যবনে ; কভু সাধবী ঋষি-বংশ-বধু
 সূহাসিনী আসিতেন দাসীর কুটীরে,
 সূধাংগুর অংগু যেন অঙ্ককার ধামে !
 অজিন (রঞ্জিত, আহা, কত শত রঙ্গে !)
 পাতি বসিতাম কভু দীর্ঘ তরুন্মূলে
 সখী-ভাবে সম্ভাষিয়া ছায়ায় ; কভু বা
 কুরঙ্গিনী-সঙ্গে রঙ্গে নাচিতাম বনে,
 গাইতাম গীত, শুনি কোকিলের ধ্বনি !
 নব-লতিকার, সতি, দিতাম বিবাহ
 তরু-সহ ; চুম্বিতাম, মঞ্জরিত যবে
 দম্পতী, মঞ্জরীবৃন্দে, আনন্দে সম্ভাষি
 নাতিনৌ বলিয়া সবে ! শুঞ্জরিলে অলি,
 নাতিনৌ-জামাই বলি বলিতাম তারে !
 কভু বা প্রভুর সহ ভ্রমিতাম স্নেহে
 নদী-তটে, দেখিতাম তরল সলিলে
 নূতন গগন যেন, নব তারাবলী,
 নব নিশাকান্ত-কান্তি ! কভু বা উঠিয়া
 পর্বত-উপরে, সখি, বসিতাম আমি
 নাথের চরণতলে, ব্রততী যেমতি
 বিশাল ক্রসাল-মূলে ; কত যে আদরে

তুধিতেন প্রভু মোরে, বরষি বচন-
 স্মৃধা, হায়, কব কারে ? কব বা কেমনে ?
 শুনেছি কৈলাস-পুরে কৈলাস-নিবাসী
 ব্যোমকেশ, স্বর্ণাসনে বসি গৌরী-সনে
 আগম, পুরাণ, বেদ, পঞ্চতন্ত্র-কথা
 পঞ্চমুখে পঞ্চমুখ কহেন উমারে ;
 শুনিতাম সেইরূপে আমিও, রূপসি,
 নানা কথা ! এখনও, এ বিজ্ঞ বনে,
 ভাবি আমি শুনি যেন সে মধুর বাণী !
 সাক্ষি কি দাসীর পক্ষে, হে নিষ্ঠুর বিধি,
 সে সঙ্গীত ?”

রুদ্রপীড়-পতনের পর, হঠাৎ ইন্দুবালার অনুমরণ-সংবাদে
 বৃত্তাস্ত্রের মুখে,—

“শুকায়েছে হায়,
 সে চারু কোমল লতা ইন্দুবালা মম !
 হের, মস্ত্রি, বিধাতার বিধি অদ্ভুত,
 দৈত্যকুল-রবি সনে সে কুল-পঙ্কজ
 ডুবিল হে এক কালে ! ছাড়িলা যখন
 রুদ্রপীড় বৃত্তাস্ত্রে, থাকে কি সে আর
 দৈত্যকুল-লক্ষ্মী তার ঘরে ? জানিলাম
 এত দিনে অস্ত্র-কুলের অবসান !
 হা মাতঃ স্মরণে ! তব অন্তিম কালেতে
 চক্ষে না দেখিছু তোমা ! সেবিলে মা কত

তনয়ার স্নেহে বৃদ্ধে—বৃদ্ধ জীবমানে
মরিলে শত্রুর কোলে ! মৃত্যুর সময়
না পাইলে স্ববাক্যে স্বজনে দেখিতে ।
হা বিধাতঃ, লীলা তব কে বুঝিতে পারে ?”—

ইত্যাদি করুণ কাহিনীর সহিত প্রেমীলার সহমরণ-স্থলে,
শ্মশান-শায়িত পুত্রের শব লক্ষ্য করিয়া রাবণের সে বীর
কাতরোক্তি,—

“ছিল আশা, মেঘনাদ, মুদিব অস্তিমে
এ নয়নদ্বয় আমি তোমার সন্মুখে,—
সঁপি রাজ্যভার, পুত্র, তোমায়, করিব
মহাযাত্রা ! কিন্তু বিধি—বুঝিব কেমনে
তঁার লীলা ?—ভাঁড়াইলা সে স্মৃথ আমারে !
ছিল আশা, রক্ষঃকুলরাজসিংহাসনে
জুড়াইব আঁখি, বৎস, দেখিয়া তোমারে,
বামে রক্ষঃকুললক্ষ্মী রক্ষোরাণীরূপে
পুত্রবধূ ! বৃথা আশা ! পূর্বজন্ম-ফলে
হেরি তোমা দৌড়ে আজি এ কাল-আসনে !
কর্ষুর-গৌরব-রবি চির রাহগ্রাসে !
সেবিষ্ম শিবেরে আমি বহু যত্ন করি,
লভিতে কি এই ফল ? কেমনে ফিরিব,—
হার রে কে কবে মোরে, ফিরিব কেমনে
শূন্ত লঙ্কাধামে আর ? কি সাধনাচ্ছলে
সাধনিব মায়ে তব, কে কবে আমারে ?

‘কোথা পুত্র পুত্রবধু আমার ?’ স্মৃতিবে
 যবে রাণী মনোদরী,—‘কি স্মৃতি আইলো
 রাখি দৌহে সিদ্ধতীরে, রক্ষঃকুলপতি ?’—
 কি করে বুঝাব তারে ? হায় রে, কি করে ?
 হা পুত্র ! হা বীরশ্রেষ্ঠ ! চিরজয়ী রণে !
 হা মাতঃ রাক্ষসলক্ষ্মি ! কি পাপে লিখিলা
 এ পীড়া দারুণ বিধি রাবণের ভালে ?”

ভুলনা করুন ; নিশ্চয়ই দেখিবেন, ওস্তাদ মাইকেল ওস্তাদী বজ্রার
 রাখিয়াছেন ।

তাহার পর দেব-চরিত্র-চিত্রণ । ইচ্ছাপূর্বক মধুসূদন রাক্ষস-
 পক্ষের শৌর্য্য-বীৰ্য্য মহিমময় করিয়াছেন । কিন্তু রাম-লক্ষ্মণ নিস্ত্রাভ
 হইলেও মাইকেলের মহেশ-মহেশ্বরী-চিত্র হেমচন্দ্রের ঐ সকল চিত্র
 অপেক্ষা অধিকতর দেবতার মত ।

বৃজসংহারে ছন্দ-বৈচিত্র্য থাকিতে লাভ হয় নাই । ওজোবশে
 ব্যাঘাত হইয়াছে ; মাইকেলের কবিতা মিতাক্ষর পয়ারের পটতালে
 পরীক্ষণীয় হইয়াছে । তবে যুদ্ধ-বর্ণনা,—ওটি আমি ভাল বুঝি না ।
 বজ্রমবাবু মাথার দিব্য দিয়া বৃজসংহারের যুদ্ধ-বর্ণনার প্রশংসা
 করিলেও, কাশীদাসের এবং মাইকেলের এই ভাগে আমাকে যত
 মোহিত করে, তত বৃজসংহারে করে না ।

অক্ষয়চন্দ্র সরকার ।

ব্রাহ্মত্বীয়

শ্রামাপূজার পর ব্রাহ্মত্বীয়। মা জাগিলে ছেলে জাগিবে। ছেলের পূর্ণ জাগরণ ঘটিলে তাহাদের স্বতি, ধৃতি, লজ্জা, স্মৃতি সবই জাগিয়া উঠিবে। দেবী বুদ্ধিরূপিণী হইয়া তখন তাহাদের বুঝাইবেন যে, তোমরা এক মায়ের ছেলে—সহোদর ভাই। এই বোধটুকু হইলে সকল ভাই মায়ের অঞ্চল ধরিয়া, মাতৃস্নেহের ছায়ায় হস্তমুখে ঝাঁড়াইতে পারিবে। তখন সহজা ধৃতিরূপিণী ভগিনী ভাইয়ের কপালে তিলক দিয়া ব্রাহ্মগণকে অক্ষয়, অজর, অমর, অচ্যুত করিয়া তুলিতে পারিবেন।

“ভাইয়ের কপালে দিলাম ফোঁটা।

যমের দুয়ারে প'ড়ল কাঁটা ॥”

—এই ত সোজা কথা। ইহার প্রভাবে যমের দুয়ারে কেমন করিয়া কাঁটা পড়ে? সেই কথাটাই একটু খুলিয়া বলিবার চেষ্টা করিব।

মমুষ্যদেহ অজর-অমর হইতেই পারে না। এ সোজা কথাটা জগতের মানুষ মাঝেই বুঝে এবং জানে। তথাপি মানুষ কিন্তু অমর হইতে চাহে। এইটুকুই মমুষ্যদেহের বিশিষ্টতা। যখন দেহকে অমর করিতে পারি না, তখন দেহজ বিশিষ্ট শক্তিকে অমর ও অক্ষয় করিতে চাহি। তাই বংশের ধারা, জাতির ধারা রক্ষা করিবার জন্য শাস্ত্র নানা স্থানে, নানা ভাবে উপদেশ দিয়াছেন। এই বংশের ধারা এবং জাতির ধারা অব্যাহতভাবে সুরক্ষিত হইলে জাতি এবং বংশ অমরত্ব লাভ করিতে পারে। কে জানে কত

কাল পূর্বে তাঁহারা জন্মিয়াছিলেন, ইংরেজ বলেন চারি পাঁচ হাজার বর্ষের পূর্বে—কোন অজ্ঞেয় ও অজ্ঞাত অতীতে ব্যাস, বশিষ্ঠ, শাণ্ডিল্য, ভরদ্বাজ, তুণ্ড, অঙ্গিরা প্রভৃতি মহাবিশ্ব জন্মগ্রহণ করিয়াছিলেন ! আমরা কিন্তু এখনও তাঁহাদের পরিচয় পরিচিত হইতেছি। আমরা যদি মুসলমান ধর্ম অবলম্বন করিতাম, বা অধুনা খৃষ্টান হইতাম, তাহা হইলে আমাদের এ পরিচয় এতদিনে লোপ পাইত। সঙ্গে সঙ্গে জাতির ও বংশের ধারা ব্যাহত এবং বিচ্ছিন্ন হইয়া যাইত। তাঁহারা যেমন মানুষ ছিলেন, আমরা তেমন মানুষ নহি বটে ; পরন্তু তাঁহাদের সহিত আমাদের যে একটা সম্বন্ধ আছে, একটা বিশিষ্টতার ধারা তাঁহাদের ভিতর হইতে বাহির হইয়া এই অজ্ঞেয় অজ্ঞাত কাল ভেদ করিয়া বর্তমান কালেও দেদীপ্যমান আছে এবং আমাদের কাছেও নিজের বলিয়া দাবী করিতেছে,—ইহা ত অস্বীকার করিবার উপায় নাই ! এই পরিচয়, এই ধারাই জাতি এবং বংশের অমরত্বের বেদী। আমি কে, আমরা কে ?—এই প্রশ্নের উত্তর করিতে হইলে এখন হইতে বৈদিক যুগ পর্যন্ত টানিয়া পিছু হটিয়া যাইতে হয়। এই পরিচয়, সত্য হউক বা মিথ্যা হউক, ইহাই আমার মনুষ্যত্বের ধারা, আমার বিশিষ্টতার স্রোতক। বাঙ্গালার মুসলমান যাহাই হউন না কেন, যেখানকার হউন না কেন, জাতির এবং বংশের পরিচয় দিতে হইলে তাঁহাকে প্রায় দুই সহস্র বর্ষ পূর্বের আরবদেশের কোরেশ-দিগের পরিচয় টানিয়া বাহির করিতে হয়। কেন না, তাহাই তাঁহার মনুষ্যত্বের স্রাঘ। খ্রীষ্টান, বৌদ্ধ, জৈন প্রভৃতি সকল জাতির সকল ধর্মাবলম্বীরাই এমনই একটা অতীতের পরিচয় আছে। এই জাতিগত, বংশগত এবং ধর্মগত ধারার বা প্রবাহের পরিচয়

যে জাতির নাই, সে জাতি সভাই নহে, সে জাতির মধ্যে সংহতি-শক্তির বিকাশ নাই, সে জাতির পিতৃপরিচয় নাই।

এই ধারার খবর, এই বৈশিষ্ট্যের উপাদান-পরম্পরা পাই কেমন করিয়া এবং কোথা হইতে? আমি কাহার এবং আমরা কাহার?—এই ছই প্রশ্নের ঠিকমত উত্তর দিতে পারিলেই বৈশিষ্ট্যের খবরটা আপনা হইতে খুলিয়া যায়। আজ ভ্রাতৃষিঠীয়ার সেই খবরটা পাইবার একটা শুভক্ষণ। কাল-সহোদরা কালিন্দী যমুনা আজ সমষ্টীকৃত সমবেত ভাইয়ের কপালে ফোঁটা দিয়া বলিতেছেন,—

“ভাইয়ের কপালে দিলাম ফোঁটা।

যমের ছয়ারে প’ড়্‌ল কাঁটা ॥”

আমি ফোঁটা দিলেই ভাইয়ের যমের ছয়ারে, নাশের—লোপের পথে কাঁটা পড়িবেই। কেননা আমি যে যমুনা, যম-সহোদরা। আমি যে অনন্তকাল-প্রবাহিনী কালিন্দী! কালস্রোতের অঞ্জের নীল জলরাশি বহন করিয়া আমিই অনন্ত কাল, কুল-কুল—কল-কলরবে বহিয়া যাইতেছি। আমার বিরাম নাই, বিশ্রাম নাই, ব্যাঘাত নাই, স্তম্ভন নাই; আমি কেবলই চলিতেছি এক দেখিতেছি। জগতের কত অসংখ্য অর্কুদ পরিবর্তন দেখিলাম, আরও কত দেখিব। আমারই ছই তটে অখণ্ড দণ্ডায়মান হইয়া বিরাজ করিতেছেন—আমার সহোদর মহাকাল। আমি গতি-রূপিণী চপলা, চঞ্চলা বালিকা; ভাই আমার স্থিতিরূপ, ধীর, স্থির, সনাতন, কাল-পুরুষ। আমি গতি, সে স্থিতি; আমি শক্তি—সচল, সবেগ শক্তি, সে শাস্ত, দান্ত সমাহিত সনাতন পুরুষ। সে এমন

কেন হইল—জান ? ভগিনী সহোদরা আমি, আমারই অতি
সোহাগের টাকা পাইয়া সে এমন চিরজীবী হইয়াছে। তোমরা
আমার মতন এমনই সোহাগ ও স্নেহভরে টাকা দিতে পারিলেই
তোমাদের ভাইদের, আমার ভাইয়ের মত বৃত্তান্ত সনাতন পুরুষ
করিয়া তুলিতে পারিবে।

মা-বাপের ঠিক খবর জানিতে না পারিলে ভাই-ভগিনীর
স্বচ্ছটা ঠিকমত জানিতে পারা যায় না। ভাই বলিতে হইয়াছে—
জাগিয়ে দে চৈতন্তময়ি, এবার আমরা সবাই জাগিয়া দাঁড়াই।
জাগিয়া উঠিলেই, চোখ রগুড়াইয়া চারিদিক্ চাহিয়া দেখিলেই
বুঝিতে পারিব—আমরা কে, আমরা কাহাদের। সেটুকু বুঝিতে
ভুলিয়াছি বলিয়াই ত ভাই-ভাই ঠাই ঠাই হইয়াছি,—সহোদরকে
সহোদর ঈর্ষ্যা-বিষেব দেখাইতেছে, আঁচড়াইতেছে—কামড়াইতেছে!
পরিচয়বিভ্রাট ঘটয়াছে বলিয়াই আজ দলে দলে আমরা বিভক্ত,
আজ আমরা প্রত্যেকে ওস্তাদ এবং গুরুপদপ্রার্থী; পরিচয়বিভ্রাট
ঘটিয়াছে বলিয়াই আজ এক দল অপর দলের নিন্দা করিতেছে,
সর্বনাশের পথ উন্মুক্ত করিয়া দিতেছে। পরিচয়বিভ্রাট বিষম ও
বেজার ভাবে ঘটয়াছে বলিয়াই আমরা পরাজিত, পরাধীন,
পরমুখাপেক্ষী, পরপদলিপ্সু, পরের ধারায় নিজের নিজের পিতৃ-
পরিচয়ের ধারা ডুবাইতে—মিশাইতে প্রয়াসী। জননীর হাত ধরিয়া
মানুষ পিতাকে চিনিয়া থাকে, পিতৃপরিচয় লাভ করিয়া থাকে।
মায়ের কোলে বসিতে পারিলেই বালক বাপের বেটা হইতে পারে।
ভাই শ্রামাপূজার দিনে কাতরস্বরে বলিয়াছিলাম—

জাগিয়ে দে চৈতন্তময়ি

এবার আমি জেগে যাই।

মহামায়ার মোহপাশে

আর বেন ঘুমাতো না চাই ।

জামা জন্মদে, তোমারই স্বীয়নীর-ধারা পান করিয়া আমাদের মজ্জাদেহ পুট হইয়াছে ; তুমিই আমাদের জননী-ধাত্রী । জাগিয়ে দে মা । সম্মুখে ব্রাহ্মচর্য, ভগিনী যমুনাকে ধুঁজিয়া বাহির করিতে হইবে, তাহার চঞ্চল চম্পক অঙ্গুলি হইতে বিজয়-টীকা গ্রহণ করিতে হইবে । সে টীকা পাইলে আমি—আমরা অমর হইব, অবিনাশী সনাতন পুরুষ হইব । তুমি জাগিলে আমি জাগিব ; আমরা মায়ে-পোয়ে জাগিয়া বসিলে আমাদের ভাই ভগিনীদের বাছিয়া লইতে কষ্ট হইবে না । সে জাগরণ হইয়াছে কি ? যদি হইয়া থাকে, তাহা হইলে আমার এবং আমাদের বাছাইও ঠিকমত হইয়াছে—আমাদের যম-চরিত্রের কোঁটাও আমাদের ভালে বালারূপের মত শোভা পাইবে ।

মায়ের কোলে শিশু ঘুমাইয়া আছে,—নির্ভয়ে নিশ্চিন্ত-মনে সে ঘুমাইতেছে । যখন তাহার ঘুম ভাঙ্গে, তখন সে নয়ন মেলিয়াই মায়ের মুখখানি দেখিতে পায় । সে অপরূপ রূপমাধুরী দেখিয়া, শত নিফলক পূর্ণচন্দ্র-নিগুড়ান সুধামাখান পূর্ণাবয়ব পূর্ণশ্রী মাতৃমুখ দেখিয়া শিশু সোহাগের হাসি হাসে । সে ভাবে আমার মায়ের মতন আর কাহারও এমন মা আছে কি ?—এমন সুন্দর, এমন মনোহর, এমন অল্পপম, এমন অতুল্য ও অদ্বিতীয় মা আর আছে কি ? শিশু মায়ের মুখে কোন দোষ, কোন চ্যুতি দেখিতে পায় না । জাগিয়া উঠিয়া, মায়ের কোলে শুইয়া দেখিলে অমনিই দেখায় । জাগিয়াছ যদি, তাহা হইলে শিশুর মতন নয়নময় হইয়া মাতৃমুখ দেখ দেখি ! তেমন নিফলক এবং নিশ্চলভাবে মায়ের

শ্রীমুখ দেখিতে পারিলে, আদরিলী, সোহাগিনীভগিনী যমুনা, এক পিঠ চুল এলাইয়া, বিলোল-কটাক্ষে তোমার উপর স্নেহ সোহাগ ঢালিয়া দিয়া তোমার কপালে যমভয়-নিবারক, মরণভয়-প্রতিষেধক এমন বিজয়-টাকা পরাইয়া দিবে, যে টাকার—যে কোঁটার জ্যোতিতে তুমি জগজ্জয়ী হইবে। আত্মশক্তি জগজ্জননী বাহাদের জননী, তাহাদের ভগিনী কালিন্দী-যমুনা ত বটেনই। যিনি কালের সহোদরা কালিন্দী, তিনি কালকলয়িনী মহাকালীর কন্যা—জঠরজাতা পতি-শীলা। আমিও চিরকাল আছি, তিনিও চিরকাল আছেন। আমি সনাতন, তিনি সনাতনী, কেন না আমরা উভয়ে আত্মশক্তি সনাতনীর পুত্রকন্যা—সন্তানসন্ততি।

ব্রাহ্মচর্যের আর একটু মজার কথা লুকান আছে। কেবল তুমি জাগিলেই হইবে না, ভগিনী কালিন্দীকেও জাগাইয়া তুলিতে হইবে। ভাই-ভগিনী একসঙ্গে না দাঁড়াইলে মায়ের আদর করিবে কে? ভাই রে, আমরা সব কালের পরিবার—শ্রামার সন্ততি। না আমাদের কালী—শ্রামা—বারিদবরণা; ভগিনী আমাদের শ্রাম-সোহাগিনী, শ্রামাজী, কালিন্দী-যমুনা—আমরা সবাই কাল। এখন জাগিয়াছ যদি, তবে এই কালরূপের, শ্রাম-বিতানের আদর কর না, ইহার বড়াই, ইহার শ্লাঘা, ইহার দর্প-দম্ভ প্রকাশ কর না, ছার তোমাদের শ্বেতাজ—শ্বেতাজ-শ্বেতকায়! ছার তোমাদের অরুণরাগসমুদ্ভাসিত, রক্তিম-গোলাপবিস্তার! দেখ দেখি আমার কালো বরণ কেমন,—

“নব সজল জলদ কায়

হেরিলে আঁখি জুড়ায়।”

নব সজলজলদ বর্ণ, স্নিগ্ধ শান্ত শ্রামশোভা, শ্রাম-শ্রামার অপরূপ

সন্মেলন,—বিভা কত মধুর, কত সুন্দর, কেমন মনোহর ! নীল আকাশ সেই শ্রামের প্রতিচ্ছায়া, পন্নোনিধির নীলাশ্বরাশি সে বিভার অঙ্ককারী, নবদুর্কাদলশ্রাম সে রূপের নমুনা যাত্র—পত্র-পল্লব, ব্রততী-বল্লরী, সে শ্রামরূপ লইয়া লোকালুকি করিতেছে। ধূম্মগিরিরাঙ্গ-মেখলা সে শ্রামরূপের স্থির ধীর বিকাশ। এমন কালো রূপের আদর কর না ? জাগিয়াছ যখন, তখন নীল নয়নে এমন নিত্য নীলবরণকে নয়ন ভরিয়া দেখ না কেন, জাগিয়াছ যখন, তখন এমন শ্রামরূপের সাকারী ও সাবয়ব বিকাশ শ্রামাকী যমুনা ভগিনীকে সম্মুখে বসাইয়া তাহারই হাতে সোহাগের বিজয়-টাকা গ্রহণ কর না, তোমাদের কাননকুন্তল দেশের, তোমার গগনপবনের, তোমার নদনদীর, তোমার আকাশ ও সাগরের চিরস্থায়ী শ্রাম শোভাকে নিঙড়াইয়া, তাহাকে ভগিনীরূপে সম্মুখে বসাইয়া, তাহার ফুল্লারবিন্দ হাসিমুখের ফোঁটাটি গ্রহণ কর না, এতকাল পরধারী, পরদারী ছিলে—এত কাল মোহনিদ্রায় অভিভূত থাকিয়া স্বপ্নঘোরে কেবল স্বপ্ন ও লোহিতের বাহার দেখিতেছিলে, নিজের শ্রাম চর্চ ছিঁড়িয়া তুলিয়া শাদার দলে মিশিতে চাহিতেছিলে ; তোমার শ্রামা-মায়ের কোলে যখন জাগিয়াছ, মায়ের শ্রাম-শোভা যখন প্রাণ ভরিয়া দেখিয়াছ, তখন শ্রামাক ভাইদের হাত ধরিয়া শ্রামা-মায়ের সম্মুখে দাঁড়াইয়া শ্রামাকীর এবং শ্রামলীলাবিলাসিনী ভগিনী কালিন্দীর হাতের ফোঁটাটা আজ হেঁট মুণ্ডে গ্রহণ কর না, যে মরণ ভয়ে আজ আকুল হইয়া উঠিয়াছ, সে মরণভয় তোমার আর থাকিবে না। যে যম—মৃত্যু-বিস্মৃতির ভীষণ বদন ব্যাদান করিয়া একে একে তোমার অতীতের কত গৌরবের, কত স্পর্কার বৈশিষ্ট্য—তোমার বংশের ধারা, জাতির ধারা, ধর্মের ধারা,

সভ্যতার ধারা, বিশিষ্টতার ধারা—গ্রাস করিতেছিল, সে ভগিনীর
 নেহের চীকা দেখিয়া আর তোমাকে গ্রাস করিবে না, বরং যে
 সকল গ্রাস করিয়াছে, তাহা উগারিয়া দিবে। জাঁগিয়াছ যদি,
 তবে গ্রহণ কর—ভাই ভাই এক ঠাই হইয়া, হাত ধরাধরি করিয়া
 শ্রামশোভায়—শ্রামসোহাগে প্রমত্ত হইয়া শ্রামা ভগিনী—কালিন্দী
 সহোদরার বামাঙ্গুলির নেহের কোঁটা আদরে গ্রহণ কর। তোমার
 কল্যাণ হইবে—তুমি আবার পূর্বজন্মের মত অমর অজর অক্ষর
 হইয়া থাকিবে।

পাঁচকড়ি কব্জোপাখ্যায় ।

সেকালের সুখদুঃখ

নবাব সিরাজদ্দৌলার নাম সকলের কাছেই চিরপরিচিত। তিনি অতি অল্পদিন মাত্র বাঙ্গালা, বিহার, উড়িষ্যার সিংহাসনে বসিয়াছিলেন ; কিন্তু সেই অল্পদিনের মধ্যেই স্বদেশে এবং বিদেশে আপন নাম চিরস্মরণীয় করিয়া গিয়াছেন।

ইংরাজেরা একবার তাহাদের দেশের একজন হতভাগ্য নরপতিকে নর-বলি দিয়াছিল। যাতকের শাগিত কুঠার যখন সেই রাজমুণ্ড স্থিতিগত করে, শোণিত-লোলুপ জনসাধারণ তখন উন্মত্ত পিশাচের মত ভৈরব নৃত্যে করতালি দিয়া কিছু দিনের জন্ত প্রজাতন্ত্র সংস্থাপিত করিয়াছিল ! কিন্তু তখনও তাহাদের দেশের কুটীরে-কুটীরে, হুর্গে-হুর্গে, প্রাসাদে-প্রাসাদে, কত কৃষক, কত সৈনিক, কত সম্ভ্রান্ত পরিবার দীর্ঘ নিঃশ্বাস ফেলিয়াছিল ! বাঙ্গালী যখন ষড়্‌যন্ত্র করিয়া সিরাজদ্দৌলাকে গৃহতাড়িত করে, মীরণের নৃশংস আদেশে সিরাজ-মুণ্ড যখন দেহবিচ্যুত হয়, দেশের রাজা প্রজা তখন সকলে মিলিয়া বিশ্বাসঘাতক মীরজাফরকে সিংহাসনে বসাইয়া তাঁহার রূপাকটাকের প্রতীকায় করঘোড়ে দাঁড়াইয়াছিলেন ;—সিরাজের শোচনীয় পরিণামে তাঁহার জন্ত কেহই একবিন্দু অশ্রুমোচনের অবসর পান নাই।

এ সকল এখন পুরাতন কথা। দেশের আর সে অবস্থা নাই, লোকের আর সে তীব্র প্রতিহিংসা নাই, সিরাজ এবং তাঁহার সমসাময়িক রাজা প্রজা সকলেই ইহলোক হইতে অবসর গ্রহণ

করিয়াছেন। এখন বোধ হয়, বাঙ্গালী যথার্থ নিরপেক্ষভাবে সিরাজ-চরিত্র আলোচনা করিবার অবসর পাইবেন।

সিরাজদৌলা নাই। তাঁহার সময়ে যে বাঙ্গালা দেশ ছিল, সে বাঙ্গালা দেশও নাই। মোগল বাদশাহেরা * “সমুদয় মানব জাতির স্বর্গতুল্য বঙ্গভূমি” বলিয়া অল্পশাসনপত্রে যাহার উল্লেখ করিতেন, সে স্বর্গ এখন গৌরবচ্যুত হত-সর্বস্ব কাকাল-ভূমি। সে শিল্প নাই, সে বাণিজ্য নাই, বাঙ্গালীর সে রাজপদ, মন্ত্রিপদ জমীদারদিগের সে জীবন-মরণের বিচারক্ষমতা নাই;—সে বাহুবল, সে রণকৌশল, সকলই এখন ইতিহাসগত অতীত কাহিনীতে পর্য্যবসিত হইয়াছে। সিরাজদৌলা যে সময়ের লোক, সে সময় এখন বহুদূরে সরিয়া পড়িয়াছে।

এক সময়ে এ দেশে মুসলমানের নামগন্ধ ছিল না। হিন্দুস্থান কেবল হিন্দু অধিবাসীর শঙ্খ-ঘণ্টারবে প্রতিশব্দিত হইত। কিন্তু সে বহুদিনের কথা। সেকালের সকল চিত্রই এত পুরাতন, এত জরাজীর্ণ, এত অস্পষ্ট হইয়া উঠিয়াছে যে, এখন আর ভাল করিয়া তাহার সৌন্দর্য্য বিচার করিবার উপায় নাই। বহুদিন হইতে এ দেশ হিন্দু-মুসলমানের জন্মভূমি বলিয়া পরিচিত হইয়াছে; গ্রামে গ্রামে, নগরে নগরে, বহুদিন হইতে হিন্দু-মুসলমান বাহুতে বাহুতে মিলিত হইয়া জীবন-সংগ্রামে জন্মভূমির রণপতাকা বহন করিতেছে। সিরাজদৌলার সময়ে হিন্দু-মুসলমানের মধ্যে ধর্মগত পার্থক্য ছিল; কিন্তু ক্ষমতাগত, পদগৌরবগত কোনই পার্থক্য ছিল না। মুসলমানের শিষ্টাচার, মুসলমানের প্রয়োজনাতীত-সৌজত্ব-পরিপ্লুত, প্রথ-বিস্তৃত, প্রতিশ্রুতধুর, সুমার্জিত যাবনিক

ভাষা এবং পদবিজ্ঞাপক যাবনিক উপাধি পৌরবের সঙ্গে হিন্দু-মুসলমান সমভাবে ব্যবহার করিতেন।

দিল্লীর বাদশাহ নামমাত্র বাদশাহ; বাঙ্গালার নবাবই বাঙ্গালাদেশের প্রকৃত “মা বাপ” হইয়া উঠিয়াছিলেন। সেই নবাব-দরবারে হিন্দু-মুসলমানের কোনরূপ আসনগত পার্থক্য বা ক্ষমতাগত তারতম্য ছিল না। বরং অনেকাংশে হিন্দুদিগেরই বিশেষ প্রাধান্ত জন্মিয়াছিল। বিলাসলোলুপ মুসলমান ওমরাহগণ আহার বিহার লইয়াই সমধিক ব্যস্ত থাকিতেন; কৰ্ম্মকুশল হিন্দু অধিবাসিগণ, কেহ রাজা, কেহ মন্ত্রী, কেহ কোষাধ্যক্ষ, কেহ বা সেনানায়ক হইয়া বুদ্ধিবলে, শাসনকৌশলে, বাহুবিক্রমে বাঙ্গালাদেশের ভাগ্য-বিবর্তন করিতেন।

মুসলমান নবাব আপনাকে বাঙ্গালী বলিয়া পরিচয় দিতে লজ্জাবোধ করিতেন না। বাঙ্গালাদেশই তাঁহার স্বদেশ, এবং বাঙ্গালী-জাতিই তাঁহার স্বজাতি হইয়া উঠিয়াছিল। রাজকোষের ধনরত্ন বাঙ্গালা দেশেই সঞ্চিত থাকিত; বাহা ব্যয় হইত, তাহাও বাঙ্গালীগণ কেহ দ্রব্য-বিনিময়ে, কেহ শ্রম-বিনিময়ে কড়ার গণ্ডায় বুঝিয়া লইতে পারিত। দেশের টাকা দেশেই থাকিত, তাহা সাত সমুদ্র তের নদীর পারে চির-নির্ভাসিত হইত না।

সেই একদিন আর এই একদিন! আজ সে দিনের বিলুপ্ত কাহিনীর আলোচনা করিতে হইলে অতীতের স্বপ্ন-সমুদ্র সন্तरণ করিয়া বাস্তব রাজ্যের, বাস্তব চিত্রপটের সম্মুখে আসিয়া দাঁড়াইতে হইবে; সেকালের চক্ষু লইয়া, সেকালের প্রাণ লইয়া, সেকালের ইতিহাস অধ্যয়ন করিতে হইবে। সে ইতিহাস কেবল হতভাগ্য

সিরাজদ্দৌলার মর্শ্ব-বেদনার ইতিহাস নহে ;—তাহা আমাদের পূজনীয় পিতৃপিতামহের সুখদুঃখের ইতিহাস ।

সিরাজদ্দৌলার সময়ে বাঙ্গালা দেশ ১৩ চাকলায় এবং ১৬৬০ পরগণায় বিভক্ত ছিল । * পরগণাগুলি কোন না কোন জমীদারের অধিকারভুক্ত ছিল । তাঁহারা বাহুবলে আপন আপন রাজ্য রক্ষা করিয়া, বিচারবলে ছুষ্ঠের দমন ও শিষ্টের পালন করিয়া, যথাকালে নবাব-সরকারে রাজস্ব দিতে পারিলে, তাঁহাদের স্বাধীন শক্তির প্রবল প্রতাপে কেহই বাধা দিতে চাহিত না । চাকলায় চাকলায় এক একজন হিন্দু অথবা মুসলমান “ফৌজদার” অর্থাৎ শাসনকর্ত্তা থাকিতেন ; তাঁহারা যথাকালে রাজস্ব-সংগ্রহের সাহায্য করা ভিন্ন আভ্যন্তরীণ শাসনকার্য্যে হস্তক্ষেপ করিতেন না । গঙ্গা, ভাগীরথী, ব্রহ্মপুত্র বাঙ্গালীর বাণিজ্য-ভাণ্ডার বহন করিত ; সে বাণিজ্যে জেতু-বিজিত বলিয়া গুন্ডদানের কোনরূপ তারতম্য ছিল না । মুসলমান নবাব কোন কোন নির্দিষ্ট সময়ে পাত্র মিত্র লইয়া দরবার করিতেন, কিন্তু আভ্যন্তরীণ শাসনকার্য্যে প্রায়ই মনোনিবেশ করিবার অবসর পাইতেন না । জগৎ-শেঠের ইতিহাস-বিখ্যাত বিদ্বত প্রাক্ষণে বাদসাহের নামে স্বর্ণ ও রৌপ্যমুদ্রা মুদ্রিত হইত ; পরগণাধিপতি জমীদারগণ জগৎ-শেঠের কোষাগারে রাজস্ব ঢালিয়া দিয়া মুক্তিপত্র গ্রহণ করিতেন ; এবং কখন কখন শিষ্টাচারের অমুরোখে রাজধানীতে আসিয়া কাবা চাপকান পরিয়া, উকীষ বাধিয়া জাহ্নু পাতিয়া মুসলমানী প্রথায় নবাব-দরবারে সমাসীন হইতেন ।

দেশে যে অত্যাচার অবিচার ছিল না তাহা নহে ; বরং অনেক সময়েই দেশে ভয়ানক অরাজকতা উপস্থিত হইত । কিন্তু সে

* Grant's Analysis of Finances of Bengal.

অরাজকতায় জমীদার ও মহাজন বতই উৎপীড়িত হ'ন না কেন, কৃষক-কুটীরে তাহার ছায়াস্পর্শ হইত না। কৃষক যথাকালে হল চালনা করিয়া, যথা-প্রাপ্য শস্ত সঞ্চয় করিয়া, জীপুত্র লইয়া যথাসম্ভব নিরুদ্বেগেই কালযাপন করিত। দেশে দস্যু-তস্করের উৎপীড়নের অভাব ছিল না; কিন্তু দেশের লোকের অস্ত্রশস্ত্র ব্যবহারেও কোনরূপ নিষেধ ছিল না। সম্ভ্রান্ত বংশের যুবকেরাও লাঠি তরবারি চালনা করিতে জানিতেন। দস্যু-তস্করের উপদ্রব হইলে, গ্রামের লোকে দল বাধিয়া, রাত্রি জাগিয়া, লাঠি ঘুরাইয়া, মশাল জ্বলাইয়া, তরবারি ভাঁজিয়া, বর্ষা চালাইয়া আত্মরক্ষা করিত। দস্যু-তস্কর ধরা পড়িলে, গ্রামবাসীরাই দশজনে মিলিয়া প্রয়োজনাভীত উত্তম-মধ্যম দিয়া সংক্ষেপে বিচার-কার্য্য সমাধা করিয়া ফেলিত।

ইহাতে যেমন দুঃখ ছিল, সেইরূপ সুখও ছিল। আজকাল দস্যু-তস্করে উপদ্রব করিলে, কেহ কাহারও সাহায্য করিতে বাহির হয় না; অসহায় গৃহস্থ ঘরে পড়িয়া আর্তনাদ করিতে থাকে! দস্যুদল সর্ব্বশ্ব লুটিয়া, মানসস্তম পদদলিত করিয়া, হেলিতে হুলিতে ধীরে ধীরে বহুদূরে চলিয়া গেলে, গৃহস্থ পঞ্চায়েৎ ডাকিয়া থানায় গিয়া পুলিশে সংবাদ দিয়া আসে। দারোগা, বকসী, কনেষ্টবল এবং চৌকীদার মহাশয় অবসর অল্পসারে একে একে শুভাগমন করিলে, গৃহস্থ ব্যস্তসমস্ত হইয়া একহাতে চোখের জল মুছিতে মুছিতে, আর একহাতে তাঁহাদের যথাযোগ্য মর্য্যাদা রক্ষার জন্ত ঋণ গ্রহণে বাহির হয়। দস্যু-তস্কর ধরা পড়ুক বা না পড়ুক, সন্দেহে পড়িয়া অনেক গরীবকে নির্ঘাতন সহ্য করিতে হয়; দুই একস্থলে মিথ্যা অভিযোগ বলিয়া গৃহস্থকে রাজস্বারে বিলক্ষণ

বিড়ম্বনা ভোগ করিতে হয়। সেকালে সুবিচারের স্বপ্নবস্ত্র ছিল না, সুতরাং কাহাকেও বিচার-বিড়ম্বনা ভোগ করিতে হইত না।

অনেক বিষয়ে অসুবিধা ছিল ; কিন্তু অনেক বিষয়ে সুবিধাও ছিল। পথ-ঘাট ছিল না, স্থিরিত গমনের সড়পায় ছিল না, দাতব্য-চিকিৎসালয় এবং বিনামূল্যে বিতরণীয় ঔষধালয় ছিল না ;—কিন্তু লোকের ধনধান্ত ছিল, স্বাস্থ্য ও বাহুবল ছিল ; হা অন্ন ! হা অন্ন ! করিয়া দেশে দেশে ছুটিয়া বেড়াইবার বিশেষ প্রয়োজন হইত না। লোকে ঘরে বসিয়া হাতে-লেখা তুলট-কাগজের রামায়ণ মহাভারত পড়িত, অবসর সময়ে কবিকঙ্কণের চণ্ডীর গান গাহিত, এবং আপন আপন বাসস্থলীতে নিপুণভাবে, প্রসন্নচিত্তে, আপন কার্যে নিযুক্ত থাকিত। অভাব অল্প হইলে দুঃখও অল্প হইয়া থাকে। সভ্যতাবিরোধী সূচিকণ স্বপ্ন-বস্ত্রের জন্ত সকলেই লালায়িত হইত না ; দেশের মোটা ভাত মোটা কাপড়েই অধিকাংশ লোকের এক রকম দিন চলিয়া যাইত। পাঠশালায় গুরুমহাশয়ের অথবা তাঁহার বেত্রদণ্ডের মহিমায় যথাসম্ভব বিজ্ঞাভ্যাস করিয়া, বালকেরা অবসর-সময়ে মাঠে মাঠে ছুটাছুটি করিয়া বেড়াইত ; কখনও বা ঘোড়া ধরিয়া তাহার অনাবৃত পৃষ্ঠে নিতান্ত অসঙ্গতরূপে এক জনের স্থানে দুই তিন জন চাপিয়া বসিত ; কখনও বা বর্ষার জলে নদ, নদী, খাল, বিলে ঝাঁপঝাঁপি করিয়া সাঁতার কাটিত ; সময়ে অসময়ে গৃহস্থের গরু বাছুর চরাইয়া, হাট বাজার বহিয়া, দিন-শেষে ঠাকুরমার উপকথায় হুঁ দিতে দিতে স্নেহের কোলে ঘুমাইয়া পড়িত। যুবকদল দিবসে তাস পাশা খেলিয়া, দাবা ব'ড়ে টিপিয়া, বৈকালে লাঠি তরবারি ভাঁজিত ; সন্ধ্যা-সমাগমে সযত্ন-বিস্তৃত লম্বা

কোঁচা দোলাইয়া অনাবৃত দেহ-সোঁঠবের গোরব বাড়াইবার জন্ত কাঁধের উপর রঞ্জিণ গামছা ছড়াইয়া দিয়া, বাবরী-চুলে চিরুণী শুঁজিয়া, শুক সারী অথবা নিতাস্ত অভাবপক্ষে একটা পোষা বুলবুল হাতে লইয়া, তাম্বুল-রাগ-রঞ্জিত অধরৌষ্ঠে মুহুমন্দ শিস্ দিতে দিতে—পাড়ায় বেড়াইতে বাহির হইত। বুদ্ধেরা গৃহকর্ম সারিয়া, পর্যাপ্ত ভোজনের পর তৈলাক্ত স্নিগ্ধতন্তু দিবা-নিদ্রায় সমাহিত করিয়া, সায়াছে তাঁমাকু সেবনের জন্য চণ্ডীমণ্ডপে, নদী-সৈকতে অথবা বৃক্ষতলে সমবেত হইয়া, দেশের কথা, দশের কথা, কত কি আবশ্যক অনাবশ্যক বিষয়ের মীমাংসা করিয়া, সন্ধ্যার পর হরিশঙ্কীৰ্তনে অথবা পুরাণশ্রবণে ভক্তি গদগদ হৃদয়ে নিমগ্ন হইতেন। সমাজের যাহারা লক্ষ্মীরূপিণী অর্দ্ধাঙ্গিনী, তাহারা দেবতা, ব্রাহ্মণ, অতিথি ও পোষ্যবর্গের সেবা করিয়া, সময়ে অসময়ে ছেলে ঠেঙ্গাইয়া, নথ নাড়িয়া, চুল খুলিয়া, সন্ধ্যার শীতল বাতাসে পুকুর-ঘাট আলো করিয়া বসিতেন; কত কথা, কত রঙ্গরস—তার সঙ্গে প্রোঢ়ার সগর্ষ-হস্তসঞ্চালন, নবীনার অবগুষ্ঠন-ভড়িত অশ্রুট সখী-সস্তাষণ, এবং স্থবিরার স্বলদ্বচনে শিবমহিম-স্তোত্রের বিকৃতি-আবৃতি সাক্ষ্য সম্মিলনকে কতই মধুময় করিয়া তুলিত।

সে দিন আর নাই; এখন আমরা সভ্য হইয়াছি। বালকেরা দস্তোদগমের পূর্বেই, ক, খ ধরিয়া পাঁচ ঘণ্টা স্কুলের কঠিন কাষ্ঠাসনে কখন দাঁড়াইয়া, কখনও বা বসিয়া, বৈকালে গৃহশিক্ষকের তীব্র তাড়না সহ্য করিয়া, আহার না করিতেই ঘুমাইয়া পড়ে; যুবারা হা অন্ন! হা অন্ন! করিয়া চাকরীর আশায়, উমেদারীর আশায়, কখনও বা শুধু একখানি প্রশংসাপত্র পাইবার আশায়,

দেশে দেশে ছুটাছুটি করিয়া, অল্প দিনেই অধ্যয়নক্লিষ্ট হৃৎকল দেহে-
 নিতান্ত অসময়েই স্থবিরত্ব লাভ করে; বৃদ্ধেরা অনাবশ্যক উৎসাহে
 সেকালের জীর্ণ খুঁটার সঙ্গে উদ্ভীয়মান জাতীয় জীবনকে বাঁধিয়া
 রাখিবার জন্ত পাড়ায় পাড়ায় দলাদলির বৈঠক করিয়া ক্ষুধাবুদ্ধি
 করেন; আর সমাজের যাহারা লক্ষ্মীরূপিণী, সেট অন্ধাঙ্গিনীগণ
 অন্ধ-অবশুণ্ডনে স্বামিপুলের সঙ্গে দেশে দেশে ফিরিয়া কেবল
 অনাবশ্যকরূপে চিকিৎসকের এবং স্বর্ণকারের ঋণজালে জড়িত
 হইয়া পড়েন। এ সকল যদি একালের সুখের চিত্র বলিয়া গর্ব
 করিতে পারি, তবে সেকালে দেশের লোকের সুখশাস্তির
 একেবারেই অভাব ছিল বলিয়া উপহাস করা শোভা পায় না।

শ্রীঅক্ষয়কুমার মৈত্রেয় ।

মধুসূদনের কাব্যানুরক্তি

মধুসূদন বহু ভাষা শিক্ষা করিয়াছিলেন এবং বহু গ্রন্থ পাঠ করিয়াছিলেন; কিন্তু তাঁহার সমস্ত শিক্ষার ও অধ্যয়নের নিষ্ফল, তাঁহার কাব্যানুরক্তি। নানাদেশীয় কাব্য-রামায়ণ ও মহাভারত পাঠে অনুরাগ। শাস্ত্রের অনুশীলনে তাঁহার সমকক্ষ ব্যক্তি, বঙ্গদেশে, বোধ হয়, এ পর্য্যন্ত, অতি অল্পই

জন্মগ্রহণ করিয়াছেন। তাঁহার জীবনের অত্যাগত অনেক গুণের জন্ম এই কাব্যানুরাগ ও তাঁহার জননীর প্রদত্ত শিক্ষা হইতে পরিবর্দ্ধিত হইয়াছিল। সে সময় স্ত্রীলোকদিগের মধ্যে বিদ্যাশিক্ষার বড় প্রচলন ছিল না। কিন্তু জাহ্নবীদাসী, তৎকালেও, লেখাপড়া শিক্ষা করিয়াছিলেন। তিনি রামায়ণ, মহাভারত, এবং কবিকঙ্কণ চণ্ডী প্রভৃতি বাঙ্গালা কাব্যসমূহ অতি যত্নের সহিত পাঠ করিতেন। তাঁহার স্মরণশক্তি অতি তীক্ষ্ণ ছিল; পঠিত গ্রন্থের অনেক অংশ তিনি মুখে মুখে আবৃত্তি করিতে পারিতেন। মেধাবী মধুসূদন, আট দশ বৎসর বয়সের সময়ে, মাতাকে ও বাটার অত্যাগত প্রাচীন মহিলাদিগকে এই সকল গ্রন্থ পাঠ করিয়া শুনাইতেন এবং মাতার দৃষ্টান্ত-অনুসারে তাহা কণ্ঠস্থ করিতেন। কোন সহৃদয় ব্যক্তি যথার্থই বলিয়াছেন, মনুষ্য মাতৃস্নেহের সঙ্গে যাহা শিক্ষা করে, জীবনে তাহা কখনও বিস্মৃত হইতে পারে না। মধুসূদনের সম্বন্ধে একথা অতি সুন্দররূপে প্রমাণিত হইয়াছে। বহু ভাষায় এবং বহু গ্রন্থে অভিজ্ঞতা লাভ করিয়াও, মাতৃপ্রদত্ত শিক্ষার ফলে, রামায়ণ ও

মহাভারত-সম্বন্ধে মধুসূদনের অমুরাগের কখনও থর্বতা হয় নাই। পূর্ণবয়সে যখন সংস্কৃত, পারসীক, লাতিন, গ্রীক, ইংরাজী, ফরাসী, জার্মান এবং ইতালীয়ান—পৃথিবীর এই আটটি প্রধান ভাষার রত্ন-ভাণ্ডার তাঁহার নিকট উন্মুক্ত হইয়াছিল এবং যখন তিনি বাস্কীকি, হোমর, ভার্জিল, দান্তে এবং মিল্টন প্রভৃতি মহাকবিদিগকে স্মৃদকপে প্রাপ্ত হইয়াছিলেন, তখনও তিনি তাঁহার শৈশবের সহচর, দরিদ্র কাশীরাম দাস ও রুত্তিবাসকে বিস্মৃত হইতে পারেন নাই। তাঁহার মাস্ত্রাজ হইতে প্রত্যাগমনের পর তাঁহার কোন আত্মীয়, তাঁহার সহিত সাক্ষাৎ করিতে যাইয়া দেখেন, তিনি একখানি কাশীদাসী মহাভারত মনোযোগের সহিত পাঠ করিতেছেন। মধুসূদন বেশভূষায় এবং আহার-ব্যবহারে সাহেবের ত্রায় থাকিতেন; স্মৃতরাং তাঁহার আত্মীয় ব্যক্তি করিয়া বলিলেন, “একি ! সাহেব লোকের হাতে মহাভারত ?”

মধুসূদন হাসিয়া বলিলেন, “সাহেব আছি বলিয়া কি বইও পড়িতে দিবে না ? রামায়ণ, মহাভারত আমার কেমন ভাল লাগে, না পড়িয়া থাকিতে পারি না।”

মাস্ত্রাজে অবস্থান কালে, যখন চর্চার অভাবে, তিনি বাঙ্গালা-ভাষা বিস্মৃত হইতেছিলেন, তখনও তিনি, কলিকাতা হইতে রামায়ণ ও মহাভারত আনাইয়া, যত্নের সহিত পাঠ করিতেন। কেবল রামায়ণ, মহাভারত নহে ; বাঙ্গালা ভাষার অনেক প্রাচীন কাব্যই তিনি অতি সমাদরের সহিত পাঠ করিতেন, এবং সেই সকল কাব্যের অনেক স্থলই তাঁহার কণ্ঠস্থ ছিল। চতুর্দশপদী কবিতা-বলীতে তিনি তাঁহার স্বদেশীয় কবিগণের প্রতি যে সম্মান প্রদর্শন

করিয়া গিয়াছেন তাহা শিষ্টাচারের জ্ঞান নয়; তাহা প্রকৃতই তাঁহার আন্তরিক শ্রদ্ধার ও অনুরাগের ফল।

রামায়ণ ও মহাভারত পাঠের সহিত মধুসূদনের ভবিষ্যৎ জীবনের অতি ঘনিষ্ঠ সম্বন্ধ বর্তমান আছে। যে মহাগ্রন্থদ্বয়,

শত শত বৎসর অবধি, হিন্দু নরনারীদিগকে
রামায়ণ, মহাভারত
পাঠের ফল।
অনুপ্রাণিত করিয়া আসিতেছে এবং সহস্র

সহস্র ভারতসন্তান যাহা হইতে আপন আপন ভাবী মহত্বের বীজ প্রাপ্ত হইতেছেন, তাহা মধুসূদনেরও প্রকৃতিদত্ত প্রতিভাকে অনুপ্রাণিত করিয়াছিল। বাল্যে পুনঃ পুনঃ রামায়ণ ও মহাভারত পাঠ করিয়া তিনি তাঁহার কবিশক্তি-বিকাশের সহায়তা লাভ করিয়াছিলেন। তাঁহার ছাত্র আরও কত ভারতীয় কবি যে এরূপ সহায়তা প্রাপ্ত হইতেছেন, তাহার সংখ্যা নাই। লোকের বিশ্বাস, কল্পতরুর নিকট প্রার্থনা করিলে অতীষ্ট বর প্রাপ্ত হওয়া যায়। রামায়ণ ও মহাভারত হিন্দু-সন্তানের পক্ষে সেই কল্পতরু। আমরাদিগের জাতীয় জীবন গঠনের পক্ষে এই দুই গ্রন্থ যেরূপ সহায়তা করিয়াছে, ইলিয়দ্ ভিন্ন আর কোন কাব্য সেরূপ করিয়াছে কি না সন্দেহ। কত অনুতপ্ত হৃদয় ইহা হইতে শান্তিলাভ করিতেছে; কত শোকজীর্ণ প্রাণ ইহা হইতে সান্ত্বনা প্রাপ্ত হইতেছে; কত স্বদেশবৎসল ইহা হইতে বীরত্ব ও স্বদেশপ্রেম শিক্ষা করিতেছেন; এবং কত ভাবুক পুরুষ ইহা হইতে কবিশক্তি পরিপোষণের সহায়তা প্রাপ্ত হইতেছেন। রাজা পরীক্ষিত ইহা হইতে ঘোর অনুতাপ-যজ্ঞগায় মুক্তি পাইয়া-ছিলেন; শিবাজী ইহা হইতে স্বদেশপ্রেম শিক্ষা করিয়াছিলেন; তুলসীদাস ইহা হইতে ধর্ম-জীবন লাভ করিয়াছিলেন; এবং সেই

প্রাচীন কাল হইতে আরম্ভ করিয়া বর্তমান সময় পর্য্যন্ত ভারতের সহস্র সহস্র কবি ইহা হইতে আপন আপন কবিশক্তি পরি-
পোষণের উপযুক্ত উপাদান প্রাপ্ত হইতেছেন। মধুসূদনের
প্রকৃতিদত্ত কবিশক্তি বিকাশের পক্ষে যে সকল সামগ্রী অমুকূলতা
করিয়াছিল, রামায়ণ ও মহাভারত পাঠ তাহাদিগের মধ্যে সর্বোপ-
উল্লেখের যোগ্য। কিন্তু এই রামায়ণ ও মহাভারত পাঠ সম্বন্ধে
বান্দীকির ও বেদব্যাসের অপেক্ষা কৃষ্ণিবাসের ও কাশীদাসেরই
নিকট মধুসূদন সমধিক ঋণী ছিলেন। মহর্ষিষ্যয়ের সৃষ্ট চরিত্র
হইতে যদিও তিনি তাঁহার কাব্যসমূহের ব্যক্তি নির্বাচন
করিয়াছিলেন, কিন্তু তাঁহার ভাষাজ্ঞান, বর্ণনানৈপুণ্য এবং
পুরাণান্তর্গত বিষয়-সম্বন্ধে অভিজ্ঞতা কৃষ্ণিবাস ও কাশীদাস হইতেই
লব্ধ। মেঘনাদবধের ও বীরাস্ত্রনার অনেক স্থলেই, সেই জন্ত
ইহাদিগের প্রভাব লক্ষিত হইবে।

মধুসূদনের কাব্যানুরক্তির অপর কারণ তাঁহার বাল্য-শিক্ষা।
শৈশবে গ্রামস্থ পাঠশালায় তিনি যে শিক্ষকের নিকট বিজ্ঞাত্যাস
করিতেন, তিনি পারসীক ভাষায় ব্যুৎপন্ন
শৈশব-শিক্ষা।

ছিলেন। ছাত্রদিগকে তিনি অনেক
পারসীক ভাষার কবিতা আবৃত্তি করিয়া শুনাইতেন, এবং
তাঁহাদিগকে সেই সকল কবিতা কণ্ঠস্থ করিতে বলিতেন। তিনি
নিজে কবিতা রচনা করিতে পারিতেন কি না, তাহা জানিতে
পারা যায় না। তবে তিনি যে কবিতানুরাগী ছিলেন, তাহা
তাঁহার ছাত্রদিগের হৃদয়ে কাব্যানুরাগ সঞ্চারিত করিবার
চেষ্টা-দ্বারা ই সপ্রমাণ হইতেছে। শিক্ষক মহাশয়ের উপদেশ-
অনুসারে মধুসূদন, অল্প বয়সে, অনেক পারসী কবিতা কণ্ঠস্থ

করিয়াছিলেন, এবং সমবয়সীদিগকে তাহা আবৃত্তি করিয়া শুনাইতেন। হিন্দু-কলেজে অধ্যয়নের সময়েও তিনি পারসী “গজল” গান করিয়া সঙ্গীদিগকে আমোদিত করিতেন।

মধুসূদনের কাব্যানুরক্তির অপর একটা কারণ তাঁহার সঙ্গীত-প্রিয়তা। বালা হইতে, কবিতার শ্রায়, গীতবাহ্যেরও দিকে তাঁহার

প্রগাঢ় অনুরাগ ছিল। তাঁহার পিতার ও সঙ্গীত-প্রিয়তা।

পিতৃব্যগণের শ্রায় তিনিও আগমনী, বিজয়া-সঙ্গীত শুনিতে শুনিতে গলদশ্রু হইতেন। অবস্থার কোনও রূপ পরিবর্তনে তাঁহার সঙ্গীতানুরাগের হ্রাস হয় নাই। তাঁহার, ব্যারিষ্টার হইয়া, ইংলণ্ড হইতে প্রত্যাগমনের পর, কোন ব্রাহ্মণ, একবার তাঁহার নিকট, একটা মোকদ্দমা সম্বন্ধে পরামর্শ জানিবার জন্ত গিয়াছিলেন। মধুসূদনের সঙ্গে ব্রাহ্মণের পূর্ব-পরিচয় ছিল এবং তিনি জানিতেন যে, ব্রাহ্মণ অতি সুন্দর “সখীসম্বাদ” গান করিতে পারেন। মধুসূদন মোকদ্দমার কথা রাখিয়া, সখীসম্বাদ শুনিবার জন্ত, ব্রাহ্মণীকে পীড়াপীড়ি আরম্ভ করিলেন, এবং তাঁহার নিকট ক্রমান্বয়ে, দশ পনরটা সখীসম্বাদ শুনিয়া, বিনা অর্থগ্রহণে, তাঁহার মোকদ্দমা-সম্বন্ধে উপযুক্ত পরামর্শ দান করিলেন।

মধুসূদনের সাহিত্যিক জীবন বৃষ্টিতে হইলে তাঁহার শৈশব সম্বন্ধীয় যে সকল বিষয়ের উল্লেখ আবশ্যক, আমরা, একে একে, ক্ষণভূমির সৌন্দর্য্য।

তাঁহার আলোচনা করিয়াছি। তাঁহার পিতামাতার কাব্যানুরাগ, তাঁহার শিক্ষকের কবিতাপ্রিয়তা এবং সেই সঙ্গে তাঁহার নিজের রামায়ণ ও মহাভারত পাঠে এবং সঙ্গীত-শ্রবণে প্রগাঢ় আসক্তি ইত্যাদি যে সকল উপাদানে তাঁহার ভবিষ্যৎ জীবন গঠিত হইয়াছিল, আমরা, ক্রমে ক্রমে,

তাহার সকল গুলিরই উল্লেখ করিয়াছি। কেবল তাঁহার কপোতাক্ষী-সলিল-বিধোতা, গ্রাম্য-সৌন্দর্য্যপূর্ণা জন্মভূমির বিবরণ উল্লেখ করি নাই। প্রকৃতি আপন নীরব ভাষায় যে শিক্ষা প্রদান করেন, পৃথিবীর কোন কাব্য বা কোন উপদেষ্টার উপদেশ হইতে সে শিক্ষা লাভ করিতে পারা যায় না। প্রকৃতির নিত্যনবীন মুখশ্রী যে কত অপ্রেমিককে প্রেমিক ও কত অকবিকে কবি করিতেছে, তাহার সংখ্যা নাই। সেইজন্য মধুসূদনের শৈশবের অত্যাশ্রয় অমুকুল উপাদানের ত্রায়, তাঁহার জন্মভূমির কথারও উল্লেখ আবশ্যক। প্রকৃতির অতি সৌন্দর্য্যময় নিকেতনে মধুসূদনের শৈশব অতিবাহিত হইয়াছিল। এক্ষণে ম্যালেরিয়ার প্রকোপে লষ্টগোরব হইলেও তাঁহার জন্মভূমি সাগরদাঁড়ী অতি সুকোমল গ্রাম্য-শোভায় পূর্ণ। নদী, প্রাস্তর, এবং বৃক্ষলতা প্রভৃতি যে সকল উপাদান লইয়া বঙ্গের পল্লীগ্রামের সৌন্দর্য্য, তাহার কোনটীরই সেখানে অভাব নাই। নিম্নলিখিত কপোতাক্ষী, ইহার তিনদিক্ বেষ্টন করিয়া, ধীরে ধীরে প্রবাহিত হইতেছে। ঘনসন্নিবিষ্ট বৃক্ষশ্রেণী, শাখায় শাখায় সম্বদ্ধ হইয়া, স্থানে স্থানে, তাহার উপর অবনত হইয়া পড়িয়াছে। শ্রামল তৃণাচ্ছাদিত ভূমি, নদীর তট হইতে জলের রেখা পর্য্যন্ত, প্রসারিত রহিয়াছে। নগরের কৃত্রিমতার সঙ্গে সেখানকার কোন সম্বন্ধ নাই। প্রকৃতি অতি সরল, গ্রাম্য-মূর্ত্তিতে সেখানে বিরাজিত। নদীজলে কুলললনাগণ স্নানাবগাহন করিতেছেন; ক্ষুদ্র, বৃহৎ নানাপ্রকারের তরলী-সমূহ নদীবক্ষে গমনাগমন করিতেছে; কৃষক-বনিতাগণ, কলসীকক্ষে, নদীতটে দণ্ডায়মান হইয়া, একদৃষ্টিতে তাহাদিগের পানে চাহিয়া রহিয়াছে; রাখালবালকগণ পশুপাল

ছাড়িয়া, ইতস্ততঃ ক্রীড়া করিতেছে ; দেখিলে নগরের কোলাহল
বিস্তৃত হইয়া, সেই সরল, গ্রাম্য-সৌন্দর্য্যে মগ্ন হইয়া যাইতে হয় ।
কপোতাক্ষীর পশ্চিমদিকে দূরপ্রসারিত শ্রামলপ্রান্তর । নদীর
উভয় তটে, বৃক্ষলতার অন্তরালে, স্থানে স্থানে, কৃষকদিগের কুটীর ;
মধ্যে মধ্যে দুই একটি প্রাচীন বট বা অশ্বথবৃক্ষ । উত্তানজ
তরুসমূহের ঘনসন্নিবেশে গ্রামটী মধ্যাহ্নকালেও ছায়াপূর্ণ । মধুসূদনের
কণ্ঠস্বর নীরব রহিয়াছে ; কিন্তু, তাহার জন্মভূমির বিহগগণের
সঙ্গীতের বিরাম হয় নাই । পাপিয়ার গগনপ্লাবী কণ্ঠস্বরে এখনও
তাহা, পূর্বের স্রাব, দিবারাত্র প্রতিধ্বনিত হইতেছে । কত অযত্ন-
সম্ভূত তরুলতা, উত্তানজ বৃক্ষরাজির সঙ্গে সম্মিলিত হইয়া, গ্রামটীকে
অরণ্যশোভায় অলঙ্কৃত করিয়া রাখিয়াছে । মধুসূদনের পৈতৃক
বাসভবনের অদূরবর্তী নদীতটে দণ্ডায়মান হইয়া, একবার,
জ্যোৎস্নালোকে, পাপিয়ার দিগন্তপ্লাবী সঙ্গীত শ্রবণ করিতে করিতে
নিমন্তক গ্রামটীর এবং ধীরবাহিনী কপোতাক্ষীর দিকে দৃষ্টিনিষ্ক্ষেপ
করিলে, অতি নীরস হৃদয়ও কবিজনোচিত সরসভাবে পূর্ণ হয়
এবং গ্রামটীকে স্কটের ভাষায় “কবিপুত্রের উপবৃক্ষ ধাত্রী” * বলিতে
ইচ্ছা করে । নিদাঘের জ্যোৎস্নালোকে যিনি কপোতাক্ষীর সৌন্দর্য্য
দর্শন করিবেন, তিনি বুঝিতে পারিবেন যে, মধুসূদন যে তাহাকে
হৃদয়স্রোতের সহিত তুলনা করিয়াছেন, তাহা অসঙ্গত হয় নাই ।

শ্রীযোগীন্দ্রনাথ বসু ।

স্বদেশ-যন্ত্র

হে ভারত, ভুলিও না—তোমার নারীজাতির আদর্শ সীতা, সাবিত্রী, দময়ন্তী ; ভুলিও না—তোমার উপাশ্র উমানাথ সর্বভাগী শঙ্কর ; ভুলিও না—তোমার বিবাহ, তোমার ধন, তোমার জীবন, ইন্দ্রিয় স্বেধ—নিজের ব্যক্তিগত স্বেধের জন্ত নহে ; ভুলিও না—তুমি জন্ম হইতেই “মায়ের” জন্ত বলিপ্রদত্ত ; ভুলিও না—তোমার সমাজ সে বিরাট মহামায়ার ছায়ামাত্র ; ভুলিও না—নীচ জাতি, মূর্থ, দরিদ্র, অজ্ঞ, মুচি, মেথর তোমার রক্ত, তোমার ভাই । হে বীর, সাহস অবলম্বন কর, সদর্পে বল—আমি ভারতবাসী, ভারতবাসী আমার ভাই ; বল—মূর্থ ভারতবাসী, দরিদ্র ভারতবাসী, ব্রাহ্মণ ভারতবাসী, চণ্ডাল ভারতবাসী, আমার ভাই ; তুমিও কটিমাত্র-বজ্রাবৃত হইয়া সদর্পে ডাকিয়া বল—ভারতবাসী আমার ভাই, ভারতবাসী আমার প্রাণ, ভারতের দেবদেবী আমার ঈশ্বর, ভারতের সমাজ আমার শিশুশয্যা, আমার ঘোবনের উপবন, আমার বার্ষিক্যের বারাগসী ; বল ভাই—ভারতের মুক্তিকা আমার স্বর্গ, ভারতের কল্যাণ আমার কল্যাণ ; আর বল দিনরাত, “হে গৌরীনাথ, হে জগদগুরু, আমায় মনুষ্যত্ব দাও ; মা, আমার দুর্বলতা কাপুরুষতা দূর কর, আমায় মানুষ কর ।”

স্বামী বিবেকানন্দ ।

বঙ্গ-সাহিত্যের ভবিষ্যৎ

প্রথম যৌবনে, যখন কলেজে অধ্যয়ন করিতাম, তারপর যখন ক্রমে কার্যক্ষেত্রে প্রবেশ করিলাম, আমার সতত ধ্যান ছিল, যে, কি উপায়ে আমার জননী বঙ্গভূমির, বঙ্গভাষার শ্রীবৃদ্ধি করিতে পারিব। মানুষের কত স্বপ্ন থাকে, আমার ঐ একই স্বপ্ন ছিল। একটা ধারণা আমার দৃঢ় ছিল যে, যে জাতির মাতৃভাষা যত সম্পন্ন, সে জাতি তত উন্নত ও অক্ষয়। আমার মাতৃসমা মাতৃভাষাকে যদি কোনমতে সম্পত্তিশালিনী করিতে পারি, আমার জীবন ধন্য হইবে। কিন্তু অপলাপে লাভ কি? যে সম্পদ থাকিলে, যে শক্তি, থাকিলে, মাতৃভাষার মুখ উজ্জ্বল করা যায়, হুঁত্যা আমি, আমার সে সম্পদ বা শক্তি নাই। আমি মধ্যে মধ্যে ভাবিতাম, কবে এমন দিন আসিবে, যখন, আমার শিক্ষিত দেশবাসিগণ আচারে ব্যবহারে, কথায় বার্তায়, চালচলনে প্রকৃত বাঙ্গালীর মতন হইবে। কবে দেখিব, দেশের যাহারা মুখপাত্রস্বরূপ, সমাজের যাহারা নেতা, বঙ্গভাষা তাঁহাদের আরাধ্যদেবতা। কবে শুনিব, শিক্ষিত বাঙ্গালী আর এখন বাঙ্গালাভাষায় সর্বসমক্ষে কথা বলিতে বা প্রকাশ্য সভাসমিতিতে বঙ্গভাষায় বক্তৃতা করিতে সঙ্কোচ বোধ করেন না, বা বঙ্গবাসী নিজেকে বঙ্গভাষার সেবকরূপে পরিচয় দিতে কুণ্ঠিত হন না। আজ ভাবিতেও শরীর কণ্টকিত হয়, নয়নে আনন্দাশ্রু উদ্ভূত হয়, যে, সে সুদিন আসিয়াছে, আমার সেই আবাল্যাদ্যেয় সুসময় আজ আমার সম্মুখে বর্তমান। একদিকে, দেশের যাহারা

ভবিষ্যৎ আশার স্থল, যাহাদের বিবেচনার উপর বঙ্গদেশের অদৃষ্ট নিহিত, সেই শিক্ষার্থী যুবকগণ আজকাল বিশ্ববিদ্যালয়ে রাজভাষার সহিত বঙ্গভাষারও আলোচনা করিতেছেন, আর ছ'দিন পরে, যাহারা ইচ্ছা করিলে, তর্জনীহেলনে দেশের লোক-মত পরিচালন করিতে পারিবেন, সেই যুবকবৃন্দ বঙ্গভাষার চর্চায় মনোনিবেশ করিয়াছেন, বিশ্ববিদ্যালয়ে বঙ্গভাষার আসন পড়িয়াছে ; শ্বেতঈপের মাতৃভাষার পার্শ্বে আমার বঙ্গের শ্বেতশতদল-বাসিনীর সিংহাসন স্থাপিত হইয়াছে ; আর ঐ দেখ, অন্তদিকে যাহারা লক্ষ্মীর বরপুত্র, সৌভাগ্যদেবতার আদরের সন্তান, তাঁহারাও বঙ্গভাষার সেবায় আত্মনিয়োগ করিয়াছেন। বঙ্গের তথা বঙ্গভাষার ইহা পরম কল্যাণের কথা। বাঙ্গালীর ইহা পরম মাহেন্দ্রক্ষণ।

দেশের জনসম্মুখে যদি সংপথে লইয়া যাইতে হয়, মানুষ করিয়া তুলিতে হয়, বাঙ্গালী জাতিকে একটা মহা জাতিতে পরিণত করিতে হয়, তাহা হইলে, তাহাদিগের মনের সম্পদ বাহাতে উত্তরোত্তর বৃদ্ধি প্রাপ্ত হয়, তাহা করিতেই হইবে। পাশ্চাত্য ভাষায় অনিপুণ থাকিয়াও, যাহাতে বঙ্গের ইতর-সাধারণ, পাশ্চাত্য প্রদেশের যাহা উত্তম, যাহা উদার এবং নিঃশূল, তাহা শিখিতে পারে, এবং শিখিয়া আত্মজীবনের ও আত্মসমাজের কল্যাণ সাধন করিতে পারে, তাহার ব্যবস্থা করিতে হইবে। পাশ্চাত্য শিক্ষার মধ্যে যাহা নির্দোষ, আমাদের পক্ষে যাহা পরম উপকারক, যে সমুদয় গুণগ্রাম অর্জন করিতে পারিলে, আমাদের সুন্দর সমাজ-দেহ ও দেশাত্ম-বোধ, আরও সুন্দরতর, সুন্দরতম হইবে, সেই সকল বিষয়, আমাদের মাতৃভাষার সাহায্যে বঙ্গের সর্বসাধারণের গোচরীভূত করিতে হইবে। ক্রমেই যে ভয়ঙ্কর কাল আসিতেছে, সেই কালের

সহিত প্রতিদ্বন্দ্বিতায় দেশবাসীদিগকে জয়ী করিতে হইলে, কেবল এ দেশীয় নহে, বিদেশীয় আয়ুধেও সশস্ত্র হইতে হইবে। সুতরাং জাতীয় সাহিত্যগঠন-সম্বন্ধে অল্প আমার বিশেষ কিছু বলিবার নাই। অল্প আমার প্রধানতঃ বক্তব্য এই যে, শুধু বঙ্গের জাতীয় সাহিত্যগঠন করিলেই চলিবে না, বঙ্গের জাতীয় সাহিত্য কি উপায়ে জগতের অপরাপর দেশের বিদ্বৎ-মণ্ডলও আরাধ্য হইতে পারে, তাহার চিন্তা করিতে হইবে। এবং সেই চিন্তা-প্রসূত উপায় অবলম্বনপূর্বক বঙ্গসাহিত্যের অঙ্গপুষ্টি করিতে হইবে। তবেই ত বঙ্গভাষা অমরত্ব লাভ করিবে। যদি এমন ভাবে বঙ্গসাহিত্য গঠিত হয়, এমন সম্পদে বঙ্গসাহিত্য সুসম্পন্ন হয় যে, সেই সম্পদের উৎকর্ষে পৃথিবীর অপরাপর মনীষিগণেরও চিন্তা আমার বঙ্গসাহিত্যের প্রতি আকৃষ্ট হয়, আজ যেমন আমরা অনেক অনর্থ এবং শিক্ষণীয় বিষয় আয়ত্ত করিবার নিমিত্ত পাশ্চাত্য দেশের অমেক ভাষা শিখিতে প্রয়াস করিয়া থাকি, সেইরূপ বঙ্গভাষায় যদি এমন অনেক উৎকৃষ্ট উৎকৃষ্ট বিষয়, আবিষ্কৃত এবং উপনিবদ্ধ হয়, যাহা কৃতবিদ্য মাত্রেই সর্বথা অবশ্যশিক্ষণীয়, অথচ পৃথিবীর অন্য কোন ভাষায় ঐ ঐ বিষয়সমূহ, এতাবৎকাল লিখিত হয় নাই, তাহা হইলে, পৃথিবীর সর্বস্থানের বিদ্বৎ-মণ্ডলই সাগ্রহে বঙ্গভাষা শিক্ষা করিবেন। সম্পূর্ণরূপে মানুষ হইতে হইলেই যাহাতে বঙ্গভাষাও অপরাপর ভাষার স্তায় শিখিতে হয়, না শিখিলে, অনেক অবশ্যজ্ঞাতব্য বিষয় চিরকালের মত অজ্ঞাত থাকিয়া যায়, সুতরাং অন্য শত ভাষার শিক্ষাতেও পূরা মানুষ হওয়া যায় না, যদি এমনই ভাবে বঙ্গভাষার সম্পদ বৃদ্ধি করা যায়, তবেই বঙ্গভাষা জগতে চিরস্থায়িনী হইবে, বাঙ্গালার ভাষা জগতের অন্তান্ত প্রধানতম ভাষার শ্রেণীতে সমূদ্রীত হইবে। অন্তথা

বঙ্গের তথা বঙ্গভাষার গৌরব বাড়িল কৈ ? বঙ্গসাহিত্য বলিলেই যাহাতে একটা বিরাট সাহিত্য বুঝায়, বিশ্বের অগ্রতম প্রধান সাহিত্য বুঝায়, এমন ভাবে বঙ্গসাহিত্যের গঠন করিতে হইবে । কিছুই অসম্ভব নহে । চেষ্টা ও একাগ্রতা থাকিলে এই সংসারে স্বপ্নকেও বাস্তবে পরিণত করা যায় ।

এক দেশের ভাষা অন্য দেশের লোকের নিকট আদৃত হইবার কারণ প্রধানতঃ দুইটী, একটা রাজনৈতিক কারণ, অপরটী ভাষার শিক্ষণীয় বিষয়ের প্রাচুর্য্য ।

রাজ্যের জাতির ভাষা না শিখিলে, রাজ্যের জাতির ভাষায় বিজ্ঞতালাভ না করিলে, নানারূপ অসুবিধা, স্মৃতিরাজ্য বিজিত জাতির বিজ্ঞতার ভাষায় অভিজ্ঞ হওয়া ছাড়া অগ্র উপায় নাই । ধরিয়া লউন, আমাদের ইংরাজরাজ যদি আজ পৃথিবীর একচ্ছত্র সম্রাট হইতেন, তাহা হইলে এই বিশাল পৃথিবীতে ইংরাজী ভাষাই প্রধানতঃ প্রচলিত হইত । সেরূপ কোনও সম্ভাবনা আমাদের বঙ্গভাষার নাই, স্মৃতিরাজ্য প্রথমোক্ত কারণে বঙ্গভাষা জগতের ভাষা হইতে পারে না । কিন্তু রাজভাষা না হওয়া সত্ত্বেও এমন অনেক ভাষা দেখিতে পাই, যাহা পৃথিবীর অগ্রাগ্র দেশবাসীর নিকট অনাদৃত নহে, প্রত্নত যথেষ্ট আদৃতই হইয়া থাকে । যেমন ইংরাজী ভাষা । সমগ্র পৃথিবী ইংরাজের রাজত্ব না হইলেও, অনেক স্বাধীন দেশেও এই ভাষার আদর দেখিতে পাই । এইরূপ রুষদেশীয় ভাষাও এমন অনেক দেশে যথেষ্ট সমাদৃত, যেখানে হয়ত এক লক্ষ অধিবাসীর মধ্যে একজনও রাষিয়ান দেখিতে পাওয়া যায় না । আমাদের গর্বের কারণ, ভারতবর্ষের স্পর্ধার বিজয়বৈজয়ন্তী সংস্কৃতভাষা, অথবা ইউরোপের ল্যাটিন্ এবং গ্রীকভাষা কোন-দেশে

অনাদৃত? কোন্ মেধাবী ব্যক্তি এই সকল ভাষা শিখিয়া কৃতার্থ হইতে না চান? ফরাসী ভাষায় যে সকল বিশিষ্ট বিশিষ্ট জ্ঞানগর্ভ গ্রন্থাদি আছে, তাহার অনুবাদমাত্রে পরিতৃপ্ত না হইয়া, কোন্ আজীবনছাত্র মনস্বী উক্ত ভাষা অভ্যাস না করেন? এই সকলের কারণ কি? ঐ ঐ ভাষায় এমন অনেক বস্তু আছে, যাহা না শিখিলে, সেই সেই বিষয়ে তিনি অভিজ্ঞ হইয়াছেন, এ কথা অবিসংবাদে স্বীকার করা যায় না। মনে করুন, গণিত এবং রসায়ন-শাস্ত্র;—রাশিয়ান ভাষায় গণিত এবং রসায়নশাস্ত্রের এত অধিক পর্যালোচনা ও গবেষণা আছে যে, সেই সেই শাস্ত্রব্যবসায়ীদের পক্ষে সেগুলি অবশ্য-দ্রষ্টব্য। যদি কেহ অঙ্ক বা রসায়নশাস্ত্রে প্রকৃত পাণ্ডিত্য অর্জন করিতে চান, ঐ ঐ বিষয়ে নিজের যে জ্ঞান-পিপাসা, তাহা সম্পূর্ণরূপে মিটাইতে চান, তবে তাঁহাকে রুষীয় ভাষা শিক্ষা করিতেই হইবে। অন্তথা সে সম্ভাবনা নাই। ইংলণ্ডের, অথবা কেবল ইংলণ্ড কেন, জগতের গৌরবভাজন মহাকবি সেক্সপীয়ারের অমৃতময়ী লেখনীর রসাস্বাদ করিবার জন্য কোন্ সুরসিক ইংরাজী ভাষা শিক্ষা করিতে না চান? রাজনৈতিক কারণ ব্যতিরেকেও রাশিয়ান এবং ইংরাজী ভাষার প্রতি এত যে আদর, জ্ঞানার্থীদের এত যে শ্রদ্ধা, তাহার প্রকৃত কারণ হইল, তৎ তৎ ভাষায় ঐ সমৃদ্ধ মহার্ঘ বিষয়ের সম্ভিবেশ। যদি অঙ্ক এবং রসায়ন বিষয়ে রাশিয়ান ভাষা অতটা সম্পন্ন না হইত, বা সেক্সপীয়ার, মিল্টন, বাইরণ প্রভৃতির অপূর্ণ কল্পনালোকে, বা নিউটনের অভূতপূর্ণ আবিষ্কারে ইংরাজী ভাষা সমলঙ্কৃত না হইত, তবে রুষিয়া এবং ইংরাজের অনধিকৃত দেশসমূহেও এই এই ভাষার কি এত গৌরব কদাচ বৃদ্ধি পাইত? ভারতের জ্ঞান-বিজ্ঞানময় সংস্কৃত ভাষার

ইউরোপেও যে এত আদর, তাহার কারণ কি ? পরাধীন ভারতের প্রাচীনতম ভাষার প্রভাব স্বাধীন পাশ্চাত্য জগতে যে ভাবে বিস্তার লাভ করিতেছে, তাহাতে মনে হয়, কালে এমন এক দিন আসিবে, যখন, পশ্চিমের প্রত্যেক বিজ্ঞ অভিজ্ঞ ব্যক্তিই কোন না কোন বিষয়ে সম্পূর্ণতা লাভের জন্য সংস্কৃত ভাষার অনুশীলন করিবেন। কবে, কোন দিন, কত শত সহস্র বৎসর পূর্বে, তমসার তীরে বসিয়া, ক্রৌঞ্চমিথুনের কবি, তাঁহার তপঃসিদ্ধ বীণায় ঝঙ্কার দিয়া গিয়াছেন, আর আজও ঐ দেখ, সকল দেশের সুপণ্ডিত ব্যক্তিই সেই ঝঙ্কার শুনিবার জন্য কান পাতিয়া আছেন। বাম্বীকির রামায়ণ বা ব্যাসের মহাভারত, ভারতের অপৌরুষেয় বেদ-সংহিতা প্রভৃতি সংস্কৃত ভাষায় উপনিবদ্ধ বলিয়া সকল দেশের জ্ঞানপিপাসুই এই ভাষায় আস্থাসম্পন্ন। মহাকবি কালিদাস, শিপ্রাতটে বসিয়া যে মোহন বংশীধ্বনিতে ভারতবর্ষ উদ্ভাস্ত, একেবারে তন্ময় করিয়া গিয়াছেন, আজও সে বাশরী-ঝঙ্কারে যেন বিরাম হয় নাই; ঐ দেখুন, ইউরোপের মেধাবী সন্তানগণ, ঐ মনোজ্ঞ সঙ্গীতের রসাস্বাদের আশায়, সংস্কৃত ভাষার অনুশীলন করিতেছেন। এদেশীয় শকুন্তল-নাটকের বিদেশীয়-কৃত অনুবাদের অনুবাদ পড়িয়াও স্নকবি গেটে আত্মহারা হইয়াছিলেন। জগতের অন্ততম প্রধান চিন্তাশীল প্লেটো, ইউক্লিড, পিথাগোরাস, এরিস্টটল প্রভৃতির মনীষাসাগরোখিত রত্নমালা কণ্ঠে ধারণপূর্বক গ্রীক ভাষা এই মরধামে অমরতালাভ করিয়াছে। রাজনৈতিক আধিপত্যে উল্লিখিত ভাষাসমূহ অকিঞ্চিংকর হইলেও জ্ঞানের আধিপত্যে, সম্পদের আধিপত্যে ঐ ঐ ভাষা জগতের শিক্ষিত সমাজের উপর অপ্রতিহত প্রভাব বিস্তার করিয়া রাখিয়াছে। পৃথিবীর

রাজনৈতিক গগনের চন্দ্র স্বর্গ্য পরিবর্তিত হইতে পারে, কিন্তু জ্ঞানমহার্ণবের বেলাভূমিতে ঐ যে সমুদয় প্রাচীন মনীষিগণের স্মৃতিস্মারকবিমণ্ডিত সৌধাবলী শির উত্তোলনপূর্ব্বক, অরণ্যাতীত কাল হইতে দাঁড়াইয়া আছে, জগতের ঐহিকবাদিগণের পরম্পর বাদবিসংবাদ দর্শনে যেন নীরবে হাসিতেছে,—ঐ সকল মনীষা-মন্দিরের কোন দিন বিলোপ ঘটিবে না। নানাবিধ বিপ্লবে ভারতবর্ষ ধ্বস্তবিধ্বস্ত হইলেও, সেই প্রাচীনকাল হইতে বেদাদি ঋত্নহারে স্নশোভিত হইয়া সংস্কৃত ভারতী একই ভাবে দাঁড়াইয়া আছেন। যদি সংস্কৃত ভাষায় বেদ, উপনিষদ, দর্শন, পুরাণ, ইতিহাস, সংহিতা প্রভৃতি উপনিবদ্ধ না হইত, যদি কালিদাস, ভবভূতি, ভাস প্রভৃতি অমর কবিকুলের সমগ্রগ্রন্থিত মণিময়হারে সংস্কৃত ভাষা অলঙ্কৃত না হইত, তবে কি আজ এই ঘোর জীবন-সংগ্রামের দিনেও সংস্কৃত ভাষা এমনই অক্ষতদেহে ভারতীয় সভ্যতার কিরীটরূপে শোভা পাইত? ভাষার অমরত্বের এবং সর্বত্র প্রসারের কারণ হইল সম্পদ। যে ভাষায় যত সম্পদ, যে ভাষা যত অধিক স্মৃতিস্তা-প্রসূত-বিষয়ে বিমণ্ডিত, সেই ভাষার প্রসার জগতে তত অধিক। সে ভাষা যে দেশেরই হউক না কেন, সকল বিদেশীয়েরাই আন্তরিক যত্নসহকারে সেই ভাষার সেবা করিয়া নিজেকে ধন্য করিবেন। এইরূপ সংস্কারে হৃদয় দৃঢ় করিয়া, বঙ্গভূমির প্রকৃত সুসন্তানের শ্রায়, আমরা যদি বঙ্গভাষার আলোচনা করিতে পারি, কালে বঙ্গভাষা জগতের শিক্ষণীয় ভাষা হইবে। বঙ্গের গৌরব ডাক্তার রবীন্দ্রনাথের শ্রায়, আচার্য্য জগদীশচন্দ্র প্রফুল্লচন্দ্র প্রভৃতি বঙ্গের বর্ত্তমান মনস্বিগণও যদি, তাঁহাদের জ্ঞানগরিমার সম্পদ বঙ্গভাষাতেই উপনিবদ্ধ করেন, এবং উত্তর

কালেও যাহাদের হস্তে বাঙ্গালার সারস্বত-রাজ্যের ভার অর্পিত হইবে, তাঁহারা যদি বঙ্গভাষাতেই স্ব স্ব জ্ঞানের চরম ফল লিপি-বদ্ধ করিয়া যান,—এবং এই প্রকারে যদি বহুকাল বঙ্গসাহিত্যের সেবা অব্যাহতভাবে প্রচলিত থাকে, তবে এমন এক দিন আসিবেই, যখন বিদেশীয়গণের অনেক কৃতবিদ্যকেই আগ্রহপূর্ব্বক বঙ্গভাষা শিক্ষা করিতে হইবে। বাঙ্গালার মধ্যে যাহারা কোন বিষয়ে প্রাণীকৃত লাভ করেন, কোন বিষয়ে বিশেষজ্ঞ হন, তাঁহারা যদি তাঁহাদের আবিষ্কার, তাঁহাদের চিন্তালহরী, ভাষান্তরে রূপান্তরিত না করিয়া স্ব স্ব মাতৃভাষাতেই প্রকাশপূর্ব্বক জন্মভূমির তথা জননী বঙ্গভাষার গৌরব বৃদ্ধি করেন, তাহা হইলে জগতের অপরাপর শিক্ষিত সম্প্রদায় বাধ্য হইয়া বঙ্গভাষার আলোচনা করিবেন। অবশ্য তাহাতে বঙ্গভাষা জগতের সর্বত্র একাধিপত্য করিবে না সত্য, কিন্তু রাশিয়ান গ্রীক্ লাটিন্ সংস্কৃত ইংরাজী ফরাসী প্রভৃতির ন্যায় বঙ্গভাষাও পৃথিবীর তাবৎ শিক্ষাকেন্দ্রের বিশেষজ্ঞগণের অন্ততম আলোচনীয়রূপে গৃহীত হইবে।

আন্তোষ মুখোপাধ্যায় ।

সমর্থ রামদাস স্বামী

(খৃঃ ১৬০৮ অব্দ—১৬৮১ অব্দ)

মহাত্মা রামদাস স্বামী ১৬০৮ খ্রীষ্টাব্দে রামনবমী দিবসে, গোদাবরীতটস্থিত ‘জম্বু’ গ্রামে জন্মদগ্নি-গোত্রীয় ব্রাহ্মণ-বংশে জন্মগ্রহণ করেন। গোদাবরী-তীর তাঁহার জন্মভূমি হইলেও তিনি মারাঠাজাতির ঐহিক ও পারলৌকিক উন্নতি-সাধন উদ্দেশ্যে স্বীয় জীবনের অধিকাংশ কৃষ্ণাতীরে অতিবাহিত করিয়াছিলেন। তাঁহার প্রকৃত নাম “নারায়ণ পন্ত”। আট বৎসর বয়সের সময়ে তিনি ত্রয়োদশাঙ্গুরী রাম মন্ড্রে দীক্ষিত হইয়া “রামদাস” আখ্যা প্রাপ্ত হইলেন। তাঁহার পিতার নাম “স্বর্ধ্যাজি পন্ত”, মাতার নাম “রাঙ্গুবাই”। স্বর্ধ্যাজি পন্ত জম্বুগ্রামের কুলকরগী ছিলেন। *

রামদাস বাল্যকাল হইতেই সংসারের প্রতি বীতরাগ ছিলেন। তাঁহার এইরূপ ঔদাসীন্ম দেখিয়া তাঁহার মাতা ষাট বর্ষ বয়ঃক্রম কালে তাঁহাকে বিবাহ-সূত্রে সংসারপাশে আবদ্ধ করিতে চেষ্টা করিয়াছিলেন। কিন্তু রামদাস সে পাশে আবদ্ধ হইলেন নাই। তাঁহার ইচ্ছার বিরুদ্ধে তাঁহাকে বিবাহপাশে বদ্ধ করা হইতেছে দেখিয়া তিনি বিবাহ-মণ্ডপ হইতে উঠিয়া পলায়ন করেন। অনন্তর নাশিকের নিকটস্থিত পঞ্চবটীতে গমন করিয়া, তথায় ষাট বৎসর

* কুলকরগী—গ্রামলেখক “কুলকরগী গ্রামলেখী শ্রাং।” ইতি রাজব্যবহার কোষঃ।

তপস্শ্রী (মঙ্গলপুস্তক) করেন । কথিত আছে, তাঁহার পুস্তক
সমাপ্ত হইলে, স্বয়ং ভগবান্ শ্রীরামচন্দ্র ও পবননন্দন হনুমান্ তাঁহার
সম্মুখে আবির্ভূত হইয়া তাঁহাকে আদেশ করিলেন,—“তুমি
কৃষ্ণাভীরে গমন কর । তথায়, শ্লেচ্ছগণের বিনাশ সাধন ও ধরণীর
(ভারতের) ভারহরণ জন্ত শঙ্করের অংশে শিবরাজ (শিবাজী)
জন্মগ্রহণ করিয়াছেন । তুমি তথায় গমন করিয়া তাঁহাকে ধর্মরাজ্য
সংস্থাপনে সাহায্য, ও সর্বত্র উপাসনা ও ভক্তিতত্ত্ব প্রচার করিয়া
পৃথিবীর মঙ্গল সাধন কর ।” স্বয়ং ভগবান্ কর্তৃক এইরূপ আদিষ্ট
হইয়া তিনি ভারতের নানাস্থান পরিভ্রমণ করণানন্তর ১৬৪৩ খ্রীষ্টাব্দে
কৃষ্ণাভীরে মহাবলেশ্বরে উপনীত হইলেন । এই সময় হইতে
কথকতা দি দ্বারা ধর্ম প্রচারকালে, তিনি মারাঠাগণকে মুসলমান-
গণের বিরুদ্ধে উত্তেজিত করিতে প্রবৃত্ত হইলেন ।

খ্রীষ্টীয় ১৬৪২ অব্দে রামদাস স্বামী, মহাত্মা শিবাজীকে যে
উপদেশপূর্ণ ছন্দোবদ্ধ পত্র লিখিয়াছিলেন, এস্থলে তাহার কিসদংশ
অনুবাদিত করিয়া উদ্ধৃত করিয়া দিলাম,—

তীর্থক্ষেত্র সকল মুসলমানগণ কর্তৃক ভগ্ন
হইয়াছে ; ব্রাহ্মণগণের পবিত্র স্থানসমূহ অপবিত্রীকৃত হইয়াছে ;
পৃথিবী বিপ্লব-পূর্ণা হইয়াছেন ; ধর্ম বিলুপ্ত হইয়াছে । এই ভূমণ্ডলে
ধর্মের রক্ষক এখন আর কেহই নাই । কেবল তোমার জন্ত
মহারাত্রি-দেশে এখনও কিসৎ পরিমাণে ধর্ম বিস্তারিত রহিয়াছে ।
গো, ব্রাহ্মণ, ধর্ম ও দেবমন্দিরসমূহ রক্ষা করিবার জন্ত নারায়ণ
তোমার হৃদয়স্থ হইয়া প্রেরণা করিতেছেন । হে রাজন্ ! তুমি
ধর্মের অবতার ; তোমাকে অধিক আর কি বলিব ? ধর্ম-
সংস্থাপনের ভার তোমাকেই লইতে হইবে ।

যিনি মৃত্যুকে ভয় করেন, তাঁহার কালধর্ম পালন করিতে যত্ন না করিয়া অল্প কোনও উপায়ে (ভিক্ষাদি বৃত্তি অবলম্বন করিয়া) উদরপূর্তি করত কাল যাপন করা উচিত। মদোন্মত্ত ম্লেচ্ছগণ অত্যন্ত অত্যাচার করিতেছেন ; তাহাদিগকে ‘দ্বিখণ্ড’ করিয়া তুমি রাজ্য ভোগ কর। মারাঠাগণকে একত্রিত কর, ও মহারাষ্ট্র ধর্মের অতিবৃদ্ধি সাধনে যত্নপর হও। দেবদ্রোহী বিধর্মীকে দেশ হইতে বিতাড়িত কর। নিশ্চয় জানিও দেবভক্তগণ চিরকালই জয়লাভ করিয়া থাকেন।”

বলা বাহুল্য, এই উদ্দীপনাপূর্ণ পত্র পাঠ করিয়া স্বদেশ-ভক্ত মহাবীর শিবাজীর সাহস, উৎসাহ ও স্বদেশপ্রেম শতগুণে বর্দ্ধিত হইল। তিনি এই পত্র প্রাপ্তি মাগ্রেই রামদাস স্বামীর সহিত সাক্ষাৎ করিলেন। শিবাজী ইতিপূর্বে কথকগণের মুখে শুনিয়া-ছিলেন যে “গুরুপদেশ ব্যতীত মুক্তি হয় না।” সুতরাং এক্ষণে রামদাস স্বামীর নিকটে মস্তোপদেশ গ্রহণ করত আপনাকে কৃতার্থ মনে করিলেন। কবি পুরুষোত্তম পণ্ডিত এই ঘটনাটিকে অতি সংক্ষেপে এইরূপে বর্ণনা করিয়াছেন। যথা,—

ভূতলে রামদাস নামে খ্যাত মারুতির * নিকটে গমন করত শিবাজী প্রণাম করিয়া কহিলেন, “হে গুরো ! আমাকে

* মহারাষ্ট্রবাসিগণ রামদাস স্বামীকে মহারাত্র মারুতির অবতার বলিয়া মনে করেন। ভবিষ্যোত্তর পুরাণে নাকি লিখিত আছে,—

“কৃত্যে তু মারুতাত্যাশ্চ ত্রেতায়াং পবনাস্কজঃ ।

দ্বাপরে ভীমসংজ্ঞস্ত রামদাস কলৌ যুগে ॥”

“ ভগবান্ রামচন্দ্রের ঐতি তাঁহার ঐকান্তিকী ভক্তি বশতঃই বোধ হয়, তিনি মারুতির অবতাররূপে কল্পিত হইয়াছেন।

আত্মতত্ত্ব সম্বন্ধে উপদেশ প্রদান করিয়া ভববন্ধন হইতে মুক্ত করুন। স্বামিজী জিজ্ঞাসা করিলেন,—“রাজন্! গুরুদক্ষিণা কি দিবে?” শিবাজী কহিলেন,—“যাহা আপনি চাহিবেন, তাহাই দিব।” রামদাস কহিলেন,—“তোমার পুত্রবৎ প্রজাপালন, আমার দক্ষিণাস্বরূপ হইবে।” শিবাজী ‘তথাস্তু’ বলিয়া তাহা অঙ্গীকার করিলেন। এইরূপে রামদাস স্বামী নিবৃত্তিমার্গাবলম্বনেচ্ছু শিবাজীকে কৰ্ম্মমার্গে প্রবৃত্ত করিলেন। *

রামদাস স্বামী শিবাজীর কেবল মস্ত্রোপদেষ্টা গুরু ছিলেন, তাহা নহে। তিনি অনেক সময় শিবাজীকে উৎসাহ ও সংপরাশ্রম প্রদান দ্বারা বিশেষ সাহায্য করিতেন। যবনগণের সংঘর্ষণে মারাত্মক জাতির মধ্যে “সেলাম” ও “তসলিম্” করিবার প্রথা প্রচলিত হইয়াছিল। মহাত্মা শিবাজী রাজা হইলে পর, রামদাস স্বামী উক্ত প্রথা উঠাইয়া দিয়া “রাম রাম” অর্থাৎ প্রণাম ও নমস্কার করিবার প্রথা রাজ্যমধ্যে প্রবর্তিত করিতে শিবাজীকে অমুরোধ করেন। তদনুসারে সেই সময় হইতে সেলাম করিবার প্রথা রহিত হয়।

জাতীয় ভাষার প্রতি রামদাস স্বামীর অত্যন্ত অমুরাগ ছিল। তিনি বুঝিতে পারিয়াছিলেন যে, মাতৃভাষার উন্নতি ভিন্ন জাতীয় উন্নতির স্থায়িত্ব সম্ভব নহে। এই নিমিত্ত তিনি স্বয়ং মহারাষ্ট্রীয়

* “রামদাস ইতি ভূতলে গতং খ্যাতিম্ভেদমুপস্থত্য মারুতিঃ।

সংপ্রশম্য নিজগাদ হে গুরো! মাং কুরুষ ভববন্ধবর্জিতং ॥

ভূপতি প্রবর কাত্র দক্ষিণা, যন্ননোগতমহং দদামি তং।

পুত্রবৎ সকললোকপালনং দক্ষিণা মম তথেষতি সোহব্রবীৎ ॥”

—শ্রীশিবকাব্যে প্রথমস্তমৎকারঃ।

ভাষায় বিবিধ গ্রন্থ রচনা করিয়াছেন ; এবং অপরকেও তৎকার্যে
 প্রবৃত্ত করিতে চেষ্টা করিয়াছেন, দেখিতে পাই। এই সময়ে
 মহারাষ্ট্রদেশে বামন পণ্ডিত নামক একজন সুপ্রসিদ্ধ সংস্কৃতজ্ঞ-
 পণ্ডিত ছিলেন। যমকালঙ্কারযুক্ত কবিতা রচনায় তৎকালে
 তাঁহার সমকক্ষ আর কেহ ছিল না। তিনি অধিকাংশ পণ্ডিতকে
 বিচারে পরাস্ত করিয়াছিলেন। সংস্কৃত শাস্ত্রে অতিশয় পারদর্শিতা
 হেতু মহারাষ্ট্রীয় ভাষার প্রতি তাঁহার অত্যন্ত বিরাগ ছিল। পরে
 রামদাস স্বামীর সহিত আত্মতত্ত্ব-বিষয়ক বিচারে পরাজিত হইলে,
 স্বামিজী তাঁহাকে বলিলেন,—“বর্তমানকালে বুদ্ধির স্থূলতাবশতঃ
 সংস্কৃত ভাষা জন সাধারণের দুর্লভ হইয়া উঠিয়াছে। সুতরাং
 অধুনা সংস্কৃত ভাষার চর্চায় সাধারণের কোনও উপকারের সম্ভাবনা
 নাই। এই নিমিত্ত ভগবানের আদেশ এ যে, আপনি বেদাদি-
 শাস্ত্রের মর্ম্ম মারাঠী ভাষায় সঙ্কলিত ও প্রকাশিত করিয়া জাতীয়
 ভাষাকে পবিত্র, স্বীয় জীবনকে সার্থক ও সাধারণের উপকার-
 সাধন করুন।” রামদাস স্বামীর এই উপদেশে বামন পণ্ডিতের
 চক্ষু ফুটিল। তিনি সংস্কৃতজ্ঞতার বৃথা অভিমানে আর মত্ত না
 থাকিয়া, মহারাষ্ট্রীয় সাহিত্যের উন্নতি বিধানে চেষ্টিত হইলেন।
 নিগমসার প্রভৃতি গ্রন্থ এই চেষ্টার ফলস্বরূপ।

রামদাস স্বামী অশ্বচালনায় বিশেষ দক্ষ ছিলেন। রঙ্গনাথ
 স্বামী, জয়রাম স্বামী প্রভৃতি তাৎকালিক সন্ন্যাসিগণও সশিষ্য
 অশ্বারোহণে ভ্রমণ করিতেন। অশ্বারোহণ তাৎকালিক সাধারণ
 শিক্ষার একটি প্রধান অঙ্গ ছিল।

স্বদেশের হিত সাধন শিবাজীর জীবনের একমাত্র উদ্দেশ্য
 ছিল। রামদাস স্বামীরও জীবনের লক্ষ্য তাহাই ছিল বলিয়া,

তিনি শিবাজীর অকৃত্রিম ভক্তি আকর্ষণ করিতে সমর্থ হইয়াছিলেন। কথিত আছে, একদা স্বামীজী ভিক্ষা করিতে করিতে সাতারার রাজবাটীর নিকটবর্তী হইলে, শিবাজী একটি কাগজে, “আজ পর্য্যন্ত যাহা কিছু উপার্জন করিয়াছি, তৎ সমস্তই প্রভুর চরণে অর্পণ করিলাম” এই কয়টি কথা লিখিয়া সেই কাগজখানি স্বনামাঙ্কিত মুদ্রা * দ্বারা চিহ্নিত করিয়া তাঁহার ভিক্ষা পাত্রে প্রদান করিলেন। রামদাস স্বামী কাগজ পাঠ করিয়া বৃদ্ধিতে পারিলেন যে, তাঁহাকে সমস্ত রাজ্য অর্পণ করা হইয়াছে। স্বামীজী রাজ্য গ্রহণ করিতে অস্বীকৃত হওয়ায় শিবাজী অতিশয় দুঃখিত হইলেন দেখিয়া তিনি কহিলেন, “তুমি দান করিয়াছ বলিয়া এই রাজ্য এখন আমার হইয়াছে। কিন্তু ধর্ম্মালোচনা ও তপস্যা পরিত্যাগ করিয়া রাজ্যপালনে রত থাকা আমাদের পক্ষে সম্ভব নহে। শিষ্য গুরুর পুত্র তুল্য। অতএব আমার এই রাজ্যপালনের ভার সম্রাতি তোমারই প্রতি অর্পণ করিলাম। জ্ঞানানুসারে প্রজাপালন করিয়া ধর্ম্ম সঞ্চয় কর, তাহা হইলেই আমি সুখী হইব।” এই বলিয়া তিনি শিবাজীকে রাজধর্ম্ম ও কালধর্ম্ম সম্বন্ধে বিবিধ উপদেশ প্রদান করিলেন। তৎপরে শিবাজী তাঁহার পাদুকা গ্রহণ করত সাতারার দুর্গে গমন

* মহাত্মা শিবাজীর রাজমুদ্রার উপর নিম্নলিখিত শ্লোকটি উৎকীর্ণ ছিল।
যথা,—

“প্রতিপচ্ছন্দ্রেণেব বদ্ধিকোর্বিশবন্দিতা।

শাহাস্তত্তম মুদ্রেয়ং শিবরাজস্ত রাজতে ॥”

সাতারার কালেক্টর মিঃ রোজ্ শিবাজীর এই মুদ্রাটি ও অপরাপর যারাই নৃপতি ও সেনানায়কগণের মুদ্রাগুলি সংগ্রহ করিয়া ইংলণ্ডে প্রেরণ করিয়াছেন।

করিলেন ও রামদাস স্বামীর নামে রাজ্য শাসন করিতে লাগিলেন ; এবং তৎচিহ্ন স্বরূপ ধ্বজপতাকাদি গৈরিক-বর্ণে রঞ্জিত করিলেন। এই সময় হইতে মহারাষ্ট্রীয়গণের মধ্যে গৈরিক পতাকা ব্যবহৃত হইতে লাগিল।

রামদাস স্বামী ধর্মপ্রচারোদ্দেশ্যে সমগ্র মহারাষ্ট্র দেশ ভ্রমণ ও মারাঠাগণকে স্বদেশভক্তি ও প্রভুভক্তি বিষয়ে শিক্ষা প্রদান করেন। শিবাজীর প্রতি তাঁহার অকৃত্রিম স্নেহ ছিল। খ্রীষ্টীয় ১৬৮০ অব্দের চৈত্র মাসীয় পূর্ণিমা রবিবার দিবা দুই প্রহরের সময় মহাত্মা শিবাজী অকালে ইহলোক পরিত্যাগ করেন। প্রিয়তম শিষ্যের এইরূপ আকস্মিক মৃত্যু-সংবাদ শ্রবণে রামদাস স্বামী হৃদয়ে অতিশয় আঘাত পাইলেন। এই ঘটনায় তাঁহার হৃদয় এরূপ ভগ্ন হইয়া গেল যে, তিনি তাহার পর আর অধিক দিন স্নেহে স্বচ্ছন্দে কালযাপন করিতে পারেন নাই। শিবাজীর মৃত্যুর পর তৎপুত্র কুলাঙ্গার সাম্ভাজী সিংহাসনে আরোহণ করিয়া স্বীয় নিষ্ঠুরতা, বিলাসপ্রিয়তা, অসচ্চরিত্রতা ও দাস্তিকতার পরিচয় প্রদান, ও তদ্বারা নব সংস্থাপিত মহারাষ্ট্রীয় রাজ্যের অবনতি সাধনে প্রবৃত্ত হইলে, মহাত্মা রামদাস তাঁহাকে এক উপদেশ পূর্ণ পত্র লিখিয়াছিলেন। যে রামদাস স্বামীর উপদেশ মহাত্মা শিবাজীর হৃদয়ে উৎসাহানল প্রজ্জ্বলিত করিয়া দিত, তাহা দুর্বৃত্ত সাম্ভাজীর হৃদয়কে অণুমাত্র বিচলিত করিতে সমর্থ হইল না। তখন রামদাস স্বামী বুঝিতে পারিলেন যে, সাম্ভাজী জীবিত থাকিলে রাজ্যের আর মঙ্গলাশা নাই। যিনি মহারাষ্ট্র জাতির উন্নতির জন্য সহস্র চেষ্টা করিয়াছেন, এই দৃশ্য তাঁহার চক্ষে অসহনীয়। রামদাস স্বামী মর্মান্বিত কণ্ঠে জীবনের অবশিষ্টাংশ অতিবাহিত করিয়াছিলেন ;

তিনি ক্রমে আহাৰাদি ও সাধাৰণেৰ সহিত বাক্যানাপ
পৰিত্যাগ কৰিলেন। অবশেষে কিছুদিন শয্যাগত অবস্থায় থাকিয়া
নানাধৰণৰ মানসিক কষ্টভোগেৰ পৰ ১৮৮১ খ্রীষ্টাব্দে মাঘী কৃষ্ণ
নবমী মঙ্গলবাৰ দিবা দ্বিপ্রহৰেৰ সময় নম্বৰ দেহ পৰিত্যাগ কৰিয়া
অমৃতময় ব্ৰহ্মলোকে গমন কৰিলেন। এইৰূপে এই মহাপুৰুষেৰ
জীৱনেৰ অবসান হয়।

সখাৰাম গণেশ দেউৰুৱা।

বঙ্গসাহিত্যে বিজ্ঞান

গত কয় বৎসর বাঙ্গালা ভাষায় যে সকল বিজ্ঞান বিষয়ক পুস্তক প্রকাশিত হইয়াছে তাহার প্রায় সমস্ত গুলিই পাঠ্যপুস্তকশ্রেণিভুক্ত। দুই একখানি মাত্র সাধারণ পাঠোপযোগী। ইহা আলোচনা করিলে আমরা দেখিতে পাই যে আমাদের বর্তমান সাহিত্যে হইতে বিজ্ঞান স্থানচ্যুত হইয়াছে। বিজ্ঞানের অধিষ্ঠাত্রী দেবী ভারতবর্ষ হইতে নির্বাসিতা হইয়া ইউরোপথণ্ডে ও আসিয়ার পূর্ব প্রান্তে আশ্রয় লইয়াছেন। বাস্তবিক ৬০।৭০ বৎসর পূর্বেও বাঙ্গালা সাহিত্যের এ প্রকার দুর্গতি হয় নাই। বাঙ্গালা সাময়িক পত্রিকায় তখন বিজ্ঞান স্বীয় স্থান অধিকার করিয়াছিল। অক্ষয়কুমার 'তত্ত্ববোধিনী' পত্রিকা'র পদার্থবিজ্ঞা বিষয়ক যে সকল প্রবন্ধ প্রকাশিত করিয়াছিলেন, রাজেন্দ্রলাল "বিবিধার্থ সংগ্রহে" ভূতত্ত্ব, প্রাণিবিজ্ঞা ও প্রাকৃতিক বিজ্ঞান বিষয়ক যে সকল প্রবন্ধ লিখিয়াছেন, তাহা বাঙ্গালা সাহিত্যের অস্থিমজ্জাগত হইয়া থাকিবে। বাঙ্গালা সাহিত্যে বিজ্ঞানের যাহা কিছু সমাবেশ হইয়াছে তজ্জন্ত এই দুই মহাত্মার নিকট আমরা চিরঋণী থাকিব। ইহাদের কিছু পূর্বে কৃষ্ণমোহন বন্দ্যোপাধ্যায় লর্ড হার্ডিঞ্জের আত্মকল্যাণ *Encyclopædia Bengalensis* অথবা "বিজ্ঞানকল্পদ্রুম" আখ্যা দিয়া কয়েকখণ্ড পুস্তক প্রণয়ন ও প্রকাশ করেন। ইহাতে পাশ্চাত্য বিজ্ঞান ও দর্শনতত্ত্ব সকল প্রকাশিত হইত। রাজেন্দ্রলাল ও কৃষ্ণমোহন উভয়েই অশেষশাস্ত্রবিৎ ও নানা ভাষাভিজ্ঞ ছিলেন।

যদিও তাঁহাদের রচনা অক্ষয়কুমারের রচনার ত্রায় স্থায়ী প্রচলিত সাহিত্যের (classics) মধ্যে গণ্য হইবে না, তথাপি তাঁহারা বঙ্গ-সাহিত্যের অভিনব পথপ্রদর্শক বলিয়া চিরকাল মান্ত হইবেন। কিন্তু ইহাদের পূর্বেও বাঙ্গালা সাহিত্যের উন্নতি ও প্রসারের জন্ত বিজ্ঞানের প্রয়োজনীয়তার উপলব্ধি হইয়াছিল। শ্রীরামপুরের মিশনারীগণকে বর্তমান বাঙ্গালা গদ্য সাহিত্যের জন্মদাতা বলিলেও অতুক্তি হয় না; তাঁহারাই আবার বাঙ্গালা ভাষায় বিজ্ঞান প্রচারেরও প্রথম প্রবর্তক। আমাদের জাতীয় অভিমান আঘাতপ্রাপ্ত হয় বলিয়া একথা আমাদের ভুলিয়া যাইলে, ‘খৃষ্টানী বাঙ্গালা’ বলিয়া তাঁহাদের কৃত কার্যকে উড়াইয়া দিলে চলিবে না, ঐতিহাসিক ত্রাণের ও সত্যের তুল্যদণ্ড হস্তে করিয়া যাহার যে সম্মান প্রাপ্য তাহাকে তাহা প্রদান করিতে হইবে।

১৮২৫ খৃঃ অঃ উইলিয়ম ইয়েট্‌স্ প্রথমে ‘সার পদার্থ-বিজ্ঞান’ বাঙ্গালা ভাষায় প্রকাশিত করেন। ইহাতে পদার্থ বিজ্ঞান ভিন্ন মৎস্ত, পতঙ্গ, পক্ষী ও অন্যান্য জীবের বর্ণনা আছে। এতদ্বিিন্ন “কিমিয়া বিজ্ঞানসার” নামক রসায়নবিজ্ঞান সম্বন্ধীয় গ্রন্থ শ্রীরামপুর হইতে প্রচারিত হয়। সাহিত্য-পরিষৎ-পত্রিকায় শ্রীযুক্ত রামেশ্বর-সুন্দর ত্রিবেদী মহাশয় এই পুস্তকের সবিস্তার সমালোচনা করিয়াছেন। ১৮১৮ খৃঃ অঃ শ্রীরামপুরের মিশনারীগণ ‘সমাচার দর্শন’ নামে সর্বপ্রথম বাঙ্গালা সংবাদপত্র প্রকাশিত করেন, এবং তাঁহারাই আবার ‘দিগ্‌দর্শন’ নামক নানাতত্ত্ববিষয়িনী পত্রিকা পরিচালিত করিতেন। এই পত্রিকাতেই বাঙ্গালা ভাষায় বিজ্ঞান-চর্চার প্রথম সূত্রপাত হয়।

ইহার পর ১৮২৮ খৃঃ অঃ “বিজ্ঞান অনুবাদ সমিতি” * নামে একটি সমিতি স্থাপিত হয়। প্রফেসার উইল্‌সন্ এই সমিতির সভাপতি নিযুক্ত হন ও উক্ত সমিতির চেষ্টার ‘বিজ্ঞান সেবধি’ নামক গ্রন্থের ১৫ খণ্ড প্রকাশিত হয়। ইহার পর ১৮৫১ খৃঃ অঃ ‘বান্ধালা সাহিত্য-সমিতি’ † নামে আর এক সমিতি স্থাপিত হয়। বান্ধালা সাহিত্যের উন্নতি ও প্রসার এই সমিতির প্রধান উদ্দেশ্য হইলেও যাহাতে বান্ধালীর অন্তঃপুরে জ্ঞানালোক প্রবেশ করিতে পারে তদ্বিষয়ে ইহার বিশেষ লক্ষ্য ছিল। মহাত্মা বেথুন ও বাবু জয়কৃষ্ণ মুখোপাধ্যায় এই সভার পৃষ্ঠপোষক ছিলেন; এতদ্বিত্ত গবর্নেন্ট মাসিক ১৫০০ টাকা দিয়া ইহার আয়কূল্য করিতেন। এই সভার উদ্বোধণেই ডাঃ রাজেন্দ্রলাল মিত্র “বিবিধার্থ সংগ্রহ” প্রকাশ করেন। মহামতি হড্‌সন প্রিন্সিপাল এই সমিতির স্থাপয়িতাদিগের মধ্যে অন্যতম উদ্যোগী সভ্য ছিলেন। তিনি উক্ত সমিতির উদ্দেশ্য সম্বন্ধে যাহা লিখিয়া গিয়াছেন তাহার স্থূল মর্ম্ম এই :—

“বান্ধালার অধিবাসীদিগকে ইংরাজী ভাষায় শিক্ষা দিয়া পাশ্চাত্য বিজ্ঞানাদিতে ব্যুৎপন্ন করার আশা একেবারেই অসম্ভব। সুতরাং জাতীয় ভাষায় ইহাদিগের শিক্ষার পথ প্রসারতর করা কর্তব্য। এই নিমিত্ত বান্ধালা সাহিত্যের উৎকর্ষ সাধন করা একান্ত প্রয়োজনীয়। * * ইহাদের নিমিত্ত সরল সুখপাঠ্য গ্রন্থ প্রচার করিয়া পাঠ-লিপ্সার সৃষ্টি করিতে হইবে। জ্ঞানার্জনের নিমিত্ত তৃষ্ণা বৃদ্ধি করিতে হইবে, নগরে নগরে গ্রামে গ্রামে পল্লীতে পল্লীতে অল্প মূল্যের গ্রন্থ প্রচার করিতে হইবে।

* Society for translating European Sciences.

† Vernacular Literary Society.

সেই সকল গ্রন্থে বিজ্ঞান, স্বাস্থ্য ও মানবশরীরতত্ত্ব-সম্বন্ধীয় সহজ ও চিত্তাকর্ষী প্রবন্ধ থাকিবে। কৃষি, শিল্প ও বাণিজ্য-সম্বন্ধেও প্রবন্ধাদি লিখিয়া প্রচার করিতে হইবে। * * * * এই সকল প্রয়োজন সাধনের নিমিত্ত সহজ ও সরল সাহিত্য-প্রচার অতি আবশ্যক। এই সমিতিতে এই কার্যের ভার গ্রহণ করিতে হইবে।” *

বিজ্ঞান প্রচার-সম্বন্ধে এই সমিতির আশা তাদৃশী ফলবতী হয় নাই। সতের খানি পুস্তক প্রকাশের পর সমিতি এই সিদ্ধান্তে উপনীত হইলেন যে, গল্প ও আমোদজনক পুস্তকই এদেশের পাঠক-সাধারণের অধিকতর প্রিয়। এতদ্ব্যতীত অপর শ্রেণীর পুস্তক আদৌ আদরে গৃহীত হয় না।

এস্থলে ইহাও উল্লেখ করা উচিত যে, কলিকাতা, হুগলী ও ঢাকা—এই তিন স্থানে তিনটি নর্ম্যাল বিদ্যালয় স্থাপিত হয়। এই সকল বিদ্যালয়ের ছাত্রদিগের ব্যবহারার্থ পদার্থ-বিজ্ঞা, প্রাণিবিজ্ঞা, জ্যামিতি, ভূগোল প্রভৃতি বিষয়ক অনেকগুলি বাক্সালা পুস্তক প্রণীত হয়। ইহা ভিন্ন ছাত্রবৃত্তি ও মাইনর পরীক্ষার উপযোগী পদার্থবিজ্ঞা উদ্ভিদবিজ্ঞা ও রসায়নবিজ্ঞা বিষয়ক অনেক পুস্তক প্রকাশিত হইয়াছে। মেডিক্যাল স্কুল সমূহের পাঠ্য অস্থিবিজ্ঞা, শারীরবিজ্ঞা, রসায়নবিজ্ঞা-ঘটিত অনেকগুলি বৈজ্ঞানিক গ্রন্থও বাক্সালা ভাষায় বিবৃত হইয়াছে। এই সকল গ্রন্থ প্রচারেও যে বাক্সালা ভাষার অনেকটা উন্নতি হইয়াছে তদ্বিষয়ে কোন সন্দেহ নাই।

এখন আলোচনার বিষয় এই যে, অল্প শতাব্দীর অধিককাল ধরিয়া বাক্সালা ভাষায় বৈজ্ঞানিক গ্রন্থসকল প্রচারিত হইতেছে,

* বিবক্ষ্যে।

কিন্তু ইহাতে বিশেষ কিছু ফললাভ হইয়াছে কি না। বিজ্ঞান বিষয়ক যে সকল পুস্তকের কিছু কাটতি আছে তাহা ‘পাঠ্যপুস্তক নির্বাচন কমিটি’র * নির্বাচিত তালিকাভুক্ত, স্মৃতরাং পরীক্ষায় উত্তীর্ণ হইবার সোপান-স্বরূপ। একাদশ বা দ্বাদশ বর্ষীয় বালক-দিগের গলাধঃকরণের জন্ত যে সকল বিজ্ঞানপাঠ প্রচারিত হইয়াছে, তদ্বারা প্রকৃত প্রস্তাবে দেশের ইষ্ট কি অনিষ্ট সাধিত হইতেছে তাহা সঠিক বলা যায় না। আসল কথা এই, আমাদের দেশ হইতে প্রকৃত জ্ঞানস্পৃহা চলিয়া গিয়াছে। জ্ঞানের প্রতি একটা আন্তরিক টান না থাকিলে কেবল বিশ্ববিদ্যালয়ের ২৩টি পরীক্ষায় উত্তীর্ণ হওয়ায় বিশেষ ফললাভ হয় না। এই জ্ঞান-স্পৃহার অভাবেই, যদিও বিশ্ববিদ্যালয়ের অঙ্গীভূত বিদ্যালয়সমূহে বহুকাল হইতে বিজ্ঞান-অধ্যাপন ব্যবস্থা হইয়াছে, তথাপি বিজ্ঞানের প্রতি আন্তরিক অনুরাগ-সম্পন্ন ব্যুৎপন্ন ছাত্র আদৌ দেখিতে পাওয়া যায় না; কেননা ঘোড়াকে জলাশয়ের নিকট আনিলে কি হইবে? উহার যে তৃষ্ণা নাই। পরীক্ষাপাশই ষেখানকার ছাত্রজীবনের মুখ্য উদ্দেশ্য, সেখানকার যুবকগণের দ্বারা অধীত বৈজ্ঞানিক বিজ্ঞান শাখা প্রশাখাদির উন্নতি হইবে এরূপ প্রত্যাশা করা নিতান্তই বৃথা। সেই সকল মৃতকল্প, স্বাস্থ্যবিহীন যুবকগণের যত্নে জাতীয় ভাষার উন্নতি-বিধান কিম্বা যে কোনও প্রকার ছুরুহ ও অধ্যবসায়-মূলক কার্যের সাফল্য সম্পাদনের আশা নিতান্তই সূদূরপর্যাহত। বস্তুতঃ পরীক্ষা পাশ করিবার নিমিত্ত এরূপ হাশ্বোদ্ধীপক উন্মত্ততা পৃথিবীর অন্ত্র কুত্রাপি দেখিতে পাওয়া যায় না। পাশ করিয়া সরস্বতীর নিকট চিরবিদায় গ্রহণ,—শিক্ষিতের এরূপ জঘন্য প্রবৃত্তি

আর কোন দেশেই নাই। আমরা এদেশে যখন বিশ্ববিদ্যালয়ের শিক্ষা শেষ করিয়া জ্ঞানী ও গুণী হইয়াছি বলিয়া আত্মাদরে ক্ষীত হই, অপরাপর দেশে সেই সময়েই প্রকৃত জ্ঞানচর্চার কাল আরম্ভ হয়। কারণ, সে সকল দেশের লোকের জ্ঞানের প্রতি বথার্থ অমুরাগ আছে, তাঁহারা একথা সম্যক্ উপলব্ধি করিয়াছেন যে, বিশ্ববিদ্যালয়ের দ্বার হইতে বাহির হইয়াই জ্ঞান-সমুদ্র-মস্থনের প্রশস্ত সময়। আমরা দ্বারকেই গৃহ বলিয়া মনে করিয়াছি, সুতরাং জ্ঞানমন্দিরের দ্বারেই অবস্থান করি, অভ্যন্তরস্থ রত্নরাজি দৃষ্টিগোচর না করিয়াই ক্ষুধমনে প্রত্যাবর্তন করি।

বিশ্ববিদ্যালয়ের বার্ষিক পঞ্জিকা পরীক্ষোত্তীর্ণগণের নামে পরিপূর্ণ দেখিলে চক্ষু জুড়ায়। এক বৎসর হয়ত উদ্ভিদবিদ্যায় দশজন প্রথম শ্রেণীতে এম্, এ পাশ হইলেন। কিন্তু অগ্নিস্ফুলিঙ্গ এখানেই নির্বাণপ্রাপ্ত হইল; সে সমুদয় যুবকগণকে ২।১ বৎসর পর আর বিজ্ঞানমন্দিরের প্রাঙ্গণেও দেখিতে পাওয়া যায় না। পিপাসাশূন্ত জ্ঞানালোচনার এইত পরিণাম! জাপানের জ্ঞান-তৃষ্ণা আর আমাদের যুবকগণের তৃষ্ণা দুই তুলনা করিলে অবাক হইতে হয়। সম্প্রতি সঞ্জীবনীতে কোন বাঙ্গালীযুবক জাপানে পদার্পণ করিয়াই যাহা লিখিয়াছেন, তাহা এস্থলে উদ্ধৃত করা গেল :—

“জাপানীদের জ্ঞানতৃষ্ণা যেরূপ, অথচ কোন জাতির সেরূপ আছে কিনা সন্দেহ। কি ছোট, কি বড়, কি ধনী, কি নির্ধন, কি বিদ্বান, কি মূর্খ, সকলেই নূতন বিষয় জানিতে এতদূর আগ্রহ প্রকাশ করিয়া থাকে যে, ভাবিলে অবাক হইতে হয়। জাহাজ হইতে জাপানে পদার্পণ করিবার পূর্বে যে আভাস পাইয়াছিলাম তাহাতেই মনে করিয়াছিলাম একরূপ জাতির উন্নতি অবশ্যজ্ঞাবী। • •

চাকরাণীগুলি পর্য্যন্ত বাহিরের বিষয় সম্বন্ধে যতটা খোঁজ রাখে আমাদের দেশের অধিকাংশ ভদ্রমহিলাই তাহা জানেন না।”

এখন একবার ফ্রান্সের দিকে তাকাইয়া দেখা যাউক। ফরাসী বিপ্লবের কিঞ্চিৎ পূর্বে এই জ্ঞানপিপাসা কি প্রকার বলবতী হইয়াছিল তাহা বাকল (Buckle) সবিস্তারে বর্ণনা করিয়াছেন। যখন লাবোয়াসিয়ে, লাল্যাণ্ড, বাফো প্রভৃতি মনোবিগণ প্রকৃতির নবতত্ত্ব সকল আবিষ্কার করিয়া সরল ও সরস ভাষায় জনসাধারণের নিকট প্রচার করিতে লাগিলেন, তখন ফরাসী সমাজে ধনীর রম্য হর্ষো ও দরিদ্রের পর্ণকুটীরে হলস্থূল পড়িয়া গেল। ইহার পূর্বে বিজ্ঞান সমিতিতে যে সকল বৈজ্ঞানিক বিষয় আলোচিত হইত তাহা শুনিবার জন্য দুই চারিজন বিশেষজ্ঞ মাত্র উপস্থিত হইতেন। কিন্তু এই নূতন বারতা শুনিবার জন্য সকল শ্রেণীর লোক ক্ষিপ্ত হইয়া উঠিল। যে সকল সম্ভ্রান্ত মহিলা ইতর লোকের সংস্পর্শে আসিলে নিজকে অপবিত্র জ্ঞান করিতেন তাঁহারাই পদমর্যাদা হুলিয়া লেকচার শুনিবার জন্য নগণ্য লোকের সহিত ঘেসাঘেসি করিয়া বসিবার একটু স্থান পাইলেই চরিতার্থ হইতেন।

সম্প্রতি এক ধূয়া উঠিয়াছে যে বহু অর্থব্যয়ে যন্ত্রাগার (Laboratory) প্রাপ্ত না হইলে বিজ্ঞান শিক্ষা হয় না। কিন্তু বাঙ্গালা দেশের গ্রামে ও নগরে, উজানে ও বনে, প্রান্তরে ও ভগ্নস্তূপে, নদী ও সরোবরে, তরুকেটরে ও গিরিগহ্বরে, অনন্ত পরিবর্তনশীল প্রাকৃতিক সৌন্দর্য্যের অভ্যন্তরে জ্ঞান-পিপাসুর যে কত প্রকার অমূল্যের বিষয় ছড়াইয়া রহিয়াছে তাহা কে নির্ণয় করিবে? বাংলার দয়েল, বাংলার পাপিয়া, বাংলার ছাতারের জীবনের কথা কে লিখিবে? বাংলার মশা, বাংলার সাপ, বাংলার মাছ, বাংলার

কুকুর, ইহাদের সম্বন্ধে কি আমাদের জানিবার কিছুই বাকী নাই ? এদেশের সোদাল, বেল, বাবলা ও গুণ্ডার কাহিনী শুধু কি ইউরোপীয় লেখকদিগের কেতাব পড়িয়াই আমাদেরিগকে শিখিতে হইবে ? এদেশের ভিন্ন ভিন্ন কৃষিপ্রণালী, প্রাচীন ভিন্ন ভিন্ন ক্রীড়াপদ্ধতি এসবের ভিতরে কি আমাদের জ্ঞাতব্য কিছুই থাকিতে পারে না ?

রসায়ন, পদার্থবিজ্ঞাদি শাস্ত্র সম্বন্ধে যাহাই হউক না কেন, প্রাণিতত্ত্ব, উদ্ভিদবিজ্ঞা এবং ভূতত্ত্ববিজ্ঞার মৌলিক গবেষণা যে বিরাট যজ্ঞাগারের অভাবে কতক দূর চলিতে পারে তাহা সকলেই স্বীকার করিবেন।

ছুরি, কাঁচি, অণুবীক্ষণ ইত্যাদি সরঞ্জাম কিনিতে ১০০ টাকার অধিক মূল্য লাগে না; কিন্তু গোড়াতেই গলদ, জ্ঞানের পুণ্য-পিপাসা কোথায় ? এদেশের প্রকৃতি-বিজ্ঞার্থী যুবক দেখিয়াছেন, এখন একবার ইউরোপের প্রকৃতি-বিজ্ঞার্থী যুবকের কথা শুনি। বিজ্ঞাবিষয়ক উপকরণ আহরণের জন্ত জ্ঞানপিপাসু ইউরোপীয় যুবক আফ্রিকার নিবিড় স্থাপদসঙ্কুল অরণ্যে প্রাণ হাভে করিয়া ভ্রমণ করিয়া বেড়ান, বৈজ্ঞানিক তথ্যসমূহের অনুসন্ধানের নিমিত্ত আহার নিদ্রা ভুলিয়া কার্য্য করিতে থাকেন। ভোগলালস তখন তাঁহাদিগকে বিচলিত করিতে সমর্থ হয় না। জ্ঞানপিপাসা তাঁহাদের হৃদয়ের একমাত্র আসক্তি। আপনারা অনেকেই জানেন, উদ্ভিদনিচয় আহরণের জন্ত সার জোসেফ হকার ১৮৪৫ খৃঃ অঃ কত বিপদ আলিঙ্গন করিয়া হিমালয় পর্ব্বতের বহু উচ্চদেশ পর্য্যন্ত আরোহণ করিয়াছিলেন। সে সময়ে দার্জিলিং-হিমালয় রেলপথ হয় নাই। কাজেই তখন হিমাচলারোহণ এখনকার

মত সুগম ছিল না। তুবারমণ্ডিত মেরুপ্রদেশের প্রাকৃতিক অবস্থা জানিবার জন্ত কত অর্থব্যয়ে কতবার অভিযান প্রেরণ করা হইয়াছে; কত বৈজ্ঞানিক তাহাতে প্রাণ বিসর্জন দিয়াছেন। পাশ্চাত্যদেশের কি অদম্য উৎসাহ! কি অতৃপ্ত জ্ঞানপিপাসা! যখন ন্যানসেন (Nansen) ফিরিয়া আসিলেন সমগ্র ইউরোপ ও আমেরিকা তাঁহার ভ্রমনকাহিনী শুনিবার জন্য ব্যাকুল।

ফল কথা এই যে, আমরা যত দিন স্বাধীনভাবে নূতন নূতন গবেষণায় প্রবৃত্ত হইয়া মাতৃভাষায় সেই সকল তত্ত্ব প্রচার করিতে সক্ষম না হইব ততদিন আমাদের ভাষার এই দারিদ্র্য ঘুচিবে না। প্রায় সহস্র বৎসর ধরিয়া হিন্দুজাতি একপ্রকার মৃতপ্রায় হইয়া রহিয়াছে। যেমন ধনীর সন্তান পৈতৃক বিষয়-বিভব হারাইয়া নিঃস্বভাবে কালাতিপাত করেন অথচ পূর্ব-পুরুষগণের ঐশ্বৰ্য্যের দোহাই দিয়া গর্বে ক্ষীত হন, আমাদেরও দশা সেইরূপ। লেখক বলেন যে, খৃঃ অঃ দ্বাদশ শতাব্দী হইতে ইয়োরোপখণ্ডে স্বাধীন চিন্তার স্রোত প্রথম প্রবাহিত হয়; প্রায় সেই সময় হইতেই ভারতগগন তিমিরাচ্ছন্ন হইল। অধ্যাপক বেবর (Weber) যথার্থই বলিয়াছেন ভাস্করাচার্য্য ভারত-গগনের শেষ নক্ষত্র। সত্য বটে আমরা নব্য-স্মৃতি ও নব্য-জ্ঞানের দোহাই দিয়া বাঙ্গালী-মস্তিষ্কের প্রথরতার প্লাঘা করিয়া থাকি; কিন্তু ইহা আমাদের স্মরণ রাখিতে হইবে যে, যে সময়ে রঘুনাথ, গদাধর ও জগদীশ প্রভৃতি মহামহোপাধ্যায়গণ বিবিধ জটিল টীকা টিপ্পনি রচনা করিয়া টোলের ছাত্রদিগের আতঙ্ক উৎপাদন করিতেছিলেন, যে সময়ে এখানকার জ্যোতির্বিদবৃন্দ প্রাতে দুই দশ দশ পল গতে

নৈমিত্তিক কোণে বায়স কা কা রব করিলে সে দিন কি প্রকার যাইবে ইত্যাদি বিষয় নির্ণয় পূর্বক কাকচরিত্র রচনা করিতে-
 ছিলেন, যে সময় এদেশের অধ্যাপকবৃন্দ “তাল, পড়িয়া টিপ করে,
 কি টিপ করিয়া পড়ে” ইত্যাকার তর্কের মীমাংসায় সভাস্থলে
 ভীতি উৎপাদন করিয়া সমবেত জনগণের অন্তরে শান্তি-ভঙ্গের
 আয়োজন করিতেছিলেন, সেই সময়ে ইয়োরোপখণ্ডে গ্যালিলিও,
 কেপ্লার, নিউটন প্রভৃতি মনস্বিগণ উদীয়মান হইয়া প্রকৃতির নূতন
 নূতন তত্ত্ব উদ্ঘাটন পূর্বক জ্ঞানজগতে যুগান্তর উপস্থিত করিতে-
 ছিলেন ও মানব-জীবনের সার্থকতা সম্পাদন করিতেছিলেন।
 তাই বলি, আজ সহস্র বৎসর ধরিয়া হিন্দুজাতি নিম্পন্দ ও অসাড়
 হইয়া পড়িয়া রহিয়াছে। বাহা হউক বিধাতার কৃপায় হাওয়া
 ফিরিয়াছে; মরা গাঙে সত্য সত্যই বান ডাকিয়াছে; আজ
 বাঙ্গালী জাতি ও সমগ্র ভারত নূতন উৎসাহে, নূতন উদ্দীপনায়
 অল্পপ্রাণিত। যে দিন রাজা রামমোহন রায় বাঙ্গালীর ঘরে
 জন্মগ্রহণ করিয়া প্রাচ্য ও প্রতীচ্য সম্মিলনই ভবিষ্য ভারতের
 সমৃদ্ধিসোপান বলিয়া নির্দেশ করিলেন, সেই দিনই বুঝি বিধাতা
 ভারতের প্রতি পুনরায় শুভ দৃষ্টিপাত করিলেন। জগতের
 ইতিহাস পর্যালোচনা করিলে দেখিতে পাওয়া যায়, যে সকল
 জাতি পুরাতন আচার, ব্যবহার, জ্ঞান ও শিক্ষা বিষয়ে নিতান্তই
 মৌড়া, বাহারা প্রাচীন শিক্ষার ও প্রাচীন প্রথার নামে আবদ্ধ হইয়া
 হন, বাহারা বর্তমান জগতের জীবন্তভাব জাতীয় জীবনে সংবেশিত
 করা হঠকারিতা বলিয়া মনে করেন, তাঁহারা বর্তমান কালের
 ইতিহাসে নগণ্য ও মৃতপ্রায়; এমন কি এই সমস্ত জাতি নূতনের
 প্রবল সংঘর্ষে লুপ্ত হইবার উপক্রম হইয়াছে। এ বিষয়ে

কিছুমাত্রও সন্দেহ নাই যে, বর্তমান ইয়োরোপের শিক্ষা অত্যন্তকাল হইল আরম্ভ হইয়াছে ; কিন্তু আমরা ইহা বেন না ভুলি যে বর্তমান অবস্থায় ইয়োরোপ আমাদের যোজন্যধিক পশ্চাতে ফেলিয়া বিজ্ঞান ও সাহিত্যের পূর্ণোন্নতির দিকে অগ্রসর হইয়াছে । আমার স্বতঃই মনে হয় আমাদের এই অধোগতির কারণ পুরাতনের প্রতি এক অস্বাভাবিক ও অনেক সময়ে অহেতুক আসক্তি ও অপরাপর জাতির গুণাবলীর প্রতি বিদ্বেষ ও অগ্রাহ্যের ভাব । এখানে অবশ্য স্বীকার্য্য যে, আমাদের পূর্বপুরুষগণের আচার-পদ্ধতি ও শিক্ষা অনেক সময়ে বর্তমান সভ্যজাতিগণের আচার-পদ্ধতি হইতেও শ্রেষ্ঠ ছিল এবং সে সমুদায়ের প্রতি ভক্তিবিশীন হওয়া মূঢ়তার লক্ষণ সন্দেহ নাই । কিন্তু কালের পরিবর্তনে যেমন বাহ্য জগতে তেমনই মানসিক রাজ্যে অনেক বিষয়ের আমূল পরিবর্তন সংঘটিত হইয়াছে । এ স্থানে প্রশ্নটি একটু বিশদভাবে আলোচনা করা কর্তব্য । আমি, শঙ্কিত হইতেছি পাছে কাহারও মনে অপ্রীতি-সঞ্চার করিয়া ফেলি, কিন্তু যদি স্বাধীন চিন্তা মানব মাত্রেই পৈতৃক সম্পত্তি হয় তাহা হইলে আমাদের বলিতেই হইবে যে পরকীয় শিক্ষা ও জ্ঞানের গ্রহণেচ্ছা আমাদের আদৌ নাই । যদি থাকিত, তাহা হইলে অন্ততঃ বিজ্ঞান বিষয়ে বর্তমান ইয়োরোপ ও আমেরিকা আমাদের অনুকরণীয় হইত । এই প্রাচ্য এবং প্রতীচ্য শিক্ষার সংমিশ্রণের উপরেই আমার মতে ভারতের সমৃদ্ধি নির্ভর করিতেছে । যে জাপান ণি . . . পূর্বে ঘোর তমসচ্ছন্ন ছিল, জগতে যাহার অস্তিত্ব (ঐতিহাসিক হিসাবে) সন্দেহের বিষয় ছিল, সেই জাপান পাশ্চাত্য শিক্ষা জাতীয় শিক্ষার সহিত সংযোজন করিয়া আজ

কি এক অভিনব ক্ষমতামণ্ডিত জাতি হইয়া আসিয়ার পূর্ব প্রান্তে
বিরাজ করিতেছে।

এখন জ্ঞানজগতে যেমন তুমুল সংগ্রাম পার্শ্বিক জগতেও
ততোধিক। নূতনের দ্বারা পুরাতনের সংস্কার করিতেই হইবে;
নচেৎ ভয় হয় ভারতভাগ্যবিধি প্রভাতাকাশে উঠিয়াই অস্তমিত
হইবে।

শ্রীপ্রহরচন্দ্র রায়।

ক্ষমার আদর্শ

চন্দ্র ধীর গতিতে মেঘের কোলের ভিতর দিয়া বহিয়া যাইতে ছিল। নীচে নদী কুল কুল শব্দে বায়ুর সঙ্গে সুর মিশাইয়া নাচিতে নাচিতে বহিয়া যাইতেছিল। আধ জোছনা আধ অন্ধকারে মিশিয়া পৃথিবীর সৌন্দর্য্য অপূর্ণ দেখাইতেছিল। চারিদিকে ঋষির আশ্রম। এক একটা আশ্রম নন্দন বনকে ধিকার প্রদান করিতেছিল। এক একখানি ঋষির কুটির তরু, পুষ্প ও বৃক্ষলতা শোভিত হইয়া অপূর্ণ শ্রী ধারণ করিয়াছিল। একদিন এইরূপ জ্যোৎস্নাপুলকিত রাত্রে ব্রহ্মর্ষি বশিষ্ঠদেব সহধর্ম্মিণী অরুন্ধতী দেবীকে বলিতেছিলেন, “দেবি, ঋষি বিশ্বামিত্রের নিকট হইতে একটু লবণ ভিক্ষা করিয়া আন।” এই প্রশ্নে অরুন্ধতী দেবী বিস্মিত হইয়া জিজ্ঞাসা করিলেন, “প্রভু, এ কি আজ্ঞা করিতেছেন, আমি কিছুই বুঝিতে পারিতেছি না। যে আমার শত পুত্র হইতে বঞ্চিত করিয়াছে—” এই কথা বলিতে বলিতে দেবীর সুর অশ্রুপূর্ণ হইয়া উঠিল, সমস্ত পূর্ব-স্মৃতি জাগিয়া উঠিল, সে অপূর্ণ শান্তির আলয় গভীর হৃদয় ব্যথিত হইল, তিনি বলিতে লাগিলেন— “আমার শত পুত্র এই জোছনা-শোভিত রাত্রে বেদ গান করিয়া বেড়াইত, শত পুত্রই আমার বেদজ্ঞ ও ব্রহ্মনিষ্ঠ, আমার এইরূপ শত পুত্রই সে বিনষ্ট করিয়াছে; তাহার আশ্রম হইতে লবণ ভিক্ষা করিয়া আনিতে বলিতেছেন? আমি কিংকর্তব্যবিমূঢ় হইয়াছি।”

ধীরে ধীরে ঋষির মুখ জ্যোতিপূর্ণ হইয়া উঠিল, ধীরে ধীরে সাগরোপম হৃদয় হইতে এই কয়টা বাক্য নিঃসৃত হইল,—“দেবি, আমি তাহাকে যে ভালবাসি।” অরুন্ধতীর বিস্ময় আরও বর্ধিত হইল, তিনি বলিলেন, “আপনি যদি তাহাকে ভালবাসেন ত তাহাকে ‘ব্রহ্মর্ষি’ বলিয়া সম্বোধন করিলেই ত জঞ্জাল মিটিয়া বাইত, আমাকেও শত পুত্র হইতে বঞ্চিত হইতে হইত না।” ঋষির মুখ অপূর্ণ শ্রী ধারণ করিল, তিনি বলিলেন, “তাহাকে ভালবাসি বলিয়াই ত তাহাকে ব্রহ্মর্ষি বলি নাই, আমি তাহাকে ব্রহ্মর্ষি বলি নাই বলিয়াই তাহার ব্রহ্মর্ষি হইবার আশা আছে।”

আজ বিশ্বামিত্র ক্রোধে জ্ঞানশূন্য। আজ আর তাঁহার তপস্তায় মনোনিবেশ হইতেছে না। তিনি সঙ্কল্প করিয়াছেন আজ যদি বশিষ্ঠ তাঁহাকে ব্রহ্মর্ষি না বলেন তাহা হইলে তাঁহার প্রাণসংহার করিবেন। সঙ্কল্প কার্য্যে পরিণত করিবার জন্ত তিনি তরবারি হস্তে কুটির হইতে বহির্গত হইলেন। ধীরে ধীরে বশিষ্ঠদেবের কুটির-পার্শ্বে আসিয়া দাঁড়াইলেন। দাঁড়াইয়া দাঁড়াইয়া বশিষ্ঠদেবের সমস্ত কথা শুনিলেন। মুষ্টিবদ্ধ তরবারি হস্তে শিথিল হইয়া পড়িল। ভাবিলেন, “কি করিয়াছি, না জানিয়া কি অত্ৰায় কার্য্য করিয়াছি, না জানিয়া কাহার নির্জিকার চিন্তে বাধা দিতে চেষ্টা করিয়াছি।” হৃদয়ে শত বৃশ্চিক-দংশন-যন্ত্রণা অনুভূত হইল। অমুতাপে হৃদয় দগ্ধ হইতে লাগিল। দৌড়িয়া গিয়া বশিষ্ঠের পদপ্রান্তে পতিত হইলেন। কিছুক্ষণ বাক্যক্ষুণ্ণ হইল না, ক্ষণপরে বলিলেন,—“ক্ষমা করুন, কিন্তু আমি ক্ষমাভিক্ষারও অযোগ্য।” গর্জিত হৃদয় অন্ত কিছু বলিতে পারিল না। কিন্তু বশিষ্ঠ কি করিলেন? বশিষ্ঠ দুই হাত দিয়া তাঁহাকে ধরিয়া বলিলেন, “উঠ,

ব্রহ্মর্ষি উঠ।” দ্বিগুণ লজ্জায় বিশ্বামিত্র বলিলেন, “শ্রদ্ধ, কেন লজ্জা দেন।” বশিষ্ঠদেব উত্তর করিলেন, “আমি কখনও মিথ্যা বলি না—আজ তুমি ব্রহ্মর্ষি হইয়াছ, আজ তুমি অভিমান ত্যাগ করিয়াছ। আজ তুমি ব্রহ্মর্ষি-পদ লাভ করিয়াছ।” বিশ্বামিত্র বলিলেন, “আমাকে আপনি ব্রহ্মজ্ঞান শিক্ষা দিন।” বশিষ্ঠ উত্তর করিলেন, “অনন্তদেবের নিকট যাও, তিনিই তোমাকে ব্রহ্মজ্ঞান শিক্ষা দিবেন।”

অনন্তদেব যেখানে পৃথিবী মস্তকে ধরিয়া আছেন বিশ্বামিত্র সেখানে আসিয়া উপস্থিত হইলেন। অনন্তদেব বলিলেন, “আমি তোমায় ব্রহ্মজ্ঞান শিক্ষা দিতে পারি যদি তুমি এই পৃথিবী মস্তকে ধারণ করিতে পার।” তপোবলে গর্জিত বিশ্বামিত্র বলিলেন, “আপনি পৃথিবী ত্যাগ করুন আমি মস্তকে ধারণ করিতেছি।” অনন্তদেব বলিলেন, “ধারণ কর, আমি ত্যাগ করিলাম।” শূন্তে পৃথিবী ঘুরিতে ঘুরিতে পড়িতে লাগিল।

বিশ্বামিত্র ডাকিয়া বলিতেছেন, “আমি সমস্ত তপস্তার ফল অর্পণ করিতেছি পৃথিবী ধৃত হউক—।” তথাপি পৃথিবী স্থির হইল না। উচ্চৈঃস্বরে অনন্তদেব বলিলেন, “বিশ্বামিত্র, এত তপস্তা কর নাই যে পৃথিবী ধারণ করিবে, কখনও কি সাধুসঙ্গ করিয়াছ ? তাহার ফল অর্পণ কর।” বিশ্বামিত্র বলিলেন, “এক মুহূর্ত্ত বশিষ্ঠের সঙ্গ করিয়াছি।” অনন্তদেব বলিলেন, “তবে সেই ফল অর্পণ কর।” বিশ্বামিত্র বলিলেন, “আমি সেই ফল অর্পণ করিতেছি।” ধীরে ধীরে পৃথিবী স্থির হইল। তখন বিশ্বামিত্র বলিলেন, “এখন আমায় ব্রহ্মজ্ঞান দিন।” অনন্তদেব বলিলেন, “মূর্থ বিশ্বামিত্র, যার এক মুহূর্ত্ত সঙ্গফলে পৃথিবী ধৃত হইল তাঁহাকে

ছাড়িয়া আমার নিকট ব্রহ্মজ্ঞান চাহিতেছ ?” বিশ্বামিত্রের ক্রোধ হইল, ভাবিলেন, বশিষ্ঠদেব তাঁহাকে তবে প্রতারণা করিয়াছেন। দ্রুত তাঁহার নিকট গমন করিয়া বলিলেন, “আপনি আমায় কেন প্রতারণা করিলেন ?” বশিষ্ঠদেব অতি ধীর-গম্ভীরভাবে উত্তর দিলেন, “আমি যদি তখন তোমায় ব্রহ্মজ্ঞান শিক্ষা দিতাম, তোমার তাহাতে বিশ্বাস হইত না, এখন তোমার বিশ্বাস হইবে।” বিশ্বামিত্র বশিষ্ঠের নিকট ব্রহ্মজ্ঞান শিক্ষা করিলেন। ভারতে এমন ঋষি ছিলেন, এমন সাধু ছিলেন, এমন ক্ষমার আদর্শ ছিল। এমন তপস্তার বল ছিল যাহার দ্বারা পৃথিবী ধারণ করা যায়। ভারতে আবার সেইরূপ ঋষি জন্মগ্রহণ করিতেছেন যাহাদের প্রভাব পূর্বতন ঋষিদিগের জ্যোতি হীনপ্রভ হইয়া যাইবে, যাহারা আবার ভারতকে পূর্বগৌরব হইতে অধিকতর গৌরবে প্রতিষ্ঠিত করিবেন।

শ্রীঅরবিন্দ ঘোষ ।

সিদ্ধিদাতা গণেশ

১

উদ্ধব ঘোষ চাষ করিয়া থায়। প্রত্যহ প্রত্যুষে হল কাঁধে করিয়া একঘোড়া হেলে গরু লইয়া ক্ষেতে যায়। যাইবার সময় একবার তারাচাঁদ সরকার মহাশয়ের বাটীর দিকে যায়। সরকার মহাশয় প্রাতে আপন বহির্কাটীর বাহিরের রোয়াকে বসিয়া তামাকু সেবন করেন। উদ্ধব দূর হইতে তাঁহাকে একটী নমস্কার করিয়া মাঠে যায়। উদ্ধবের বিশ্বাস যে, প্রাতে সরকার মহাশয়কে দেখিয়া ক্ষেতে গেলে চাষ ভাল হয়।

২

অলকান্মন্দরী আজ ছয় বৎসরের পর হাসিতেছে। পতিব্রতার পতি ছয় বৎসর গৃহে ছিল না। কন্মোপলক্ষে প্রবাসে ছিল। যথেষ্ট ধন সঞ্চয় করিয়া পতি আজ বাড়ীতে আসিয়াছে। আফ্লাদে কাঁদাকাটার পর অলকান্মন্দরী পতিকে হাসিতে হাসিতে বলিল—তুমি আজ আসিবে তা আমি জানি। পতি জিজ্ঞাসা করিল—কেমন করিয়া জানিলে? আমি ত পত্র লিখি নাই। পতিব্রতা উত্তর করিল—আজ সকালে ঘাটে বাসন যাজিতে গিয়া সর্কাগ্রে কমল পিসীর মুখ দেখিয়াছিলাম। দেখিবামাত্র মনে হইয়াছিল, আমার ছয় বৎসরের দুঃখ আজ যুচিবে।

৩

এইরূপে দেশে কি জীলোক কি পুরুষ প্রায় সকলেরই বিশ্বাস যে কাহারো কাহারো মুখ দেখিয়া দিবসের কার্য আরম্ভ করিলে

সে দিবসটাই স্মৃতে কাটে এবং সে দিবসের কার্যও সফল হয়। এ বিশ্বাস যুক্তিমূলক কি না, এস্থলে বিচার করিবার আবশ্যকতা নাই।

এখানে একটা কথাই উল্লেখ করিলেই চলিবে। যাহাদের দর্শন লোকে সফলপ্রদ বলিয়া বিশ্বাস করে, তাহাদিগকে প্রকৃত-পক্ষে ধীর ও শাস্ত্র স্বভাব দেখা যায়। অন্ততঃ এমন কথা বলা যাইতে পারে যে, যাহাদিগকে দেখা লোকে মঙ্গলকর বলিয়া বুঝিয়া থাকে, তাহাদের আকারে উগ্রতা, ঔদ্ধত্য বা চপলতা লক্ষিত হয় না। ধীরতা, সংযম ও শাস্ত্রি যাহার মূর্তিতে ব্যক্ত, সে জী হউক বা পুরুষ হউক লোকে কেবল তাহারই দর্শনের সহিত সিদ্ধির প্রত্যাশা সংযুক্ত করিয়া থাকে।

লোকের যেরূপ বিশ্বাস, পৌরাণিক পণ্ডিতের শিক্ষাও সেইরূপ। সে শিক্ষা সিদ্ধিদাতা গণেশের মূর্তিতে পরিস্ফুট। গণেশমূর্তি চঞ্চলতা, চপলতা, উগ্রতা, ঔদ্ধত্য, বাগ্রতা, হঠকারিতা বা অস্থিরতার মূর্তি নয়! সে মূর্তি স্থৈর্য্য, ধৈর্য্য, গাম্ভীৰ্য্য, সংযম, সতর্কতা ও চিন্তাশীলতার মূর্তি। গণেশকে দেখিলে চালাক চটপটে বা ব্যস্তভ্রম্ভ বলিয়া মনে হয় না। আজ কাল লোকে সচরাচর যে সকল গুণ কার্য-সিদ্ধির নিমিত্ত আবশ্যক মনে করে, গণেশমূর্তিতে সে সকল গুণ ব্যক্ত নয়। আজিকার ইউরোপে এবং ইউরোপের দেখাদেখি নবা বঙ্গে লোকের এইরূপও ধারণা যে, হটাপুট, লাফালাফি, দোড়াদোড়ি, তাড়াতাড়ি, হুড়াহুড়ি, চটকচালাকী ব্যতীত কার্যে সিদ্ধিলাভ অসম্ভব। কিন্তু সে রকম কোন ভাবই গণেশের মূর্তিতে লক্ষিত হয় না। গণেশের মূর্তিতে সেরকম ভাবের বিপরীত ভাবই অভিব্যক্ত। এখন কথা হইতেছে

গণেশ সত্য না মিথ্যা । কার্য্যসিদ্ধির জন্ত ব্যস্ততা চঞ্চলতা প্রভৃতি গুণ আবশ্যক, না ধীরতা গাভীৰ্য্য প্রভৃতি গুণ আবশ্যক । এ কথার সম্যক্ উত্তর এই যে দুইই আবশ্যক ; কিন্তু ধীরতা সংযম গাভীৰ্য্য প্রভৃতি গুণই বেশী আবশ্যক । কোন কার্য্য করিতে হইলে অনেক দিক্, অনেক বাধাবিঘ্ন, অনেক সুবিধা অসুবিধা, অনেক অগ্রপশ্চাৎ, অনেক ভূত ভবিষ্যৎ বর্তমান, অনেক ওজর আপত্তি প্রভৃতি উত্তমরূপে ধীরভাবে সাবধানে স্নগভীর প্রণালীতে বিবেচনা করিয়া দেখিতে হয় । এই প্রকারে সকল রকম বিবেচনা করিয়া স্থির করিতে হয়, কার্য্য করা উচিত কি না । শুদ্ধ একটা ক্ষণিক মানসিক আবেগে কার্য্য আরম্ভ করা অকৰ্ত্তব্য । সকল দিক্ বিবেচনা না করিয়া, কেবল ভাব বা আবেগের বশবর্তী হইয়া অথবা একটা মতের খাতিরে কার্য্য করিলে ফল প্রায়ই শোচনীয় হয় । আবার কার্য্যের প্রারম্ভ হইতে শেষ পর্য্যন্ত কার্য্যে অনেক বাধাবিঘ্ন উপস্থিত হইতে পারে । কার্য্য করিতে করিতে সে সকল বাধা-বিঘ্নও ধীরভাবে বুঝিয়া দেখিতে হয় । নহিলে আরক্ত কার্য্য নিষ্ফল হয় অর্থাৎ কার্য্যসিদ্ধির জন্ত বিচার বিবেচনা ও মন্ত্রণা প্রথম হইতে শেষ পর্য্যন্ত আবশ্যক । সে বিচার বিবেচনা বা মন্ত্রণায় ত্রুটি হইলে অপরিমিত উৎসাহ উত্তম ক্ষিপ্ৰকারিতা ইত্যাদি সত্বেও কার্য্যে সিদ্ধি লাভ হয় না । একটা উদাহরণ দিই । যুদ্ধক্ষেত্রে উত্তম উগ্রতা চঞ্চলতা প্রভৃতি গুণ কার্য্যসিদ্ধির জন্ত বত আবশ্যক বলিয়া মনে হয়, হৈৰ্য্য ধৈৰ্য্য গাভীৰ্য্য প্রভৃতি তত হয় না । কিন্তু প্রকৃতপক্ষে রণস্থলেও প্রথমোক্ত গুণগুলি অপেক্ষা শেষোক্ত গুণগুলি জয়লাভের জন্ত বেশী আবশ্যক । ওয়াটাৰ্ণ'র যুদ্ধে ওয়েলিংটনের উত্তম, উগ্রতা ও উৎসাহ নেপোলিয়ানের অপেক্ষা কম

ছিল। নেপোলিয়ানেরও ধৈর্য ও চিত্তশৈথিল্য ওয়েলিংটনের অপেক্ষা কম ছিল। অসংখ্য ইংরাজসেনার বিনাশ দেখিয়াও ওয়েলিংটন ব্লুকের আগমন পর্য্যন্ত স্থির ধীর অবিচলিত ভাবে অপেক্ষা করিয়াছিলেন। নেপোলিয়ান দূরে তোপধ্বনি হইতে শুনিয়া চিত্ত-শৈথিল্য হারাইয়া আপন পক্ষের সেনানায়ক মার্শাল গ্রুজে আসিতেছে ভাবিয়া বীর বিক্রমে আপন সেনা রণস্থলে পরিচালনা করিয়া শীঘ্রই পরাজিত হইয়াছিলেন। কার্যের উত্তম উৎসাহ ও ব্যস্ততার ভিতরেও অবিচলিত বুদ্ধি, স্থির চিত্ত, সম্পূর্ণ আত্মসংযম এবং গভীর চিন্তাশীলতা আবশ্যক। নহিলে কার্যে সিদ্ধিলাভ অসম্ভব। এই জন্তই সিদ্ধিদাতা গণেশের মূর্তি উগ্রতা চঞ্চলতা বা ব্যস্ততা-ব্যঞ্জক নয়, শৈথিল্য ধৈর্য সংযম শান্তি গান্ধীর্ষ্য ও চিন্তাশীলতাব্যঞ্জক। কার্যসিদ্ধির হিসাবে গণেশমূর্তি প্রকৃত মূর্তি—গণেশমূর্তিই প্রকৃত সত্য।

আজিকার দিনে এই সত্যটি আমাদের স্মরণ করা আবশ্যক হইয়া উঠিয়াছে। সকল সময়েই মানুষের এই সত্যটি স্মরণ করা আবশ্যক, কেননা মানুষ সকল সময়েই কেবলমাত্র মানসিক আবেগের বা ভ্রান্ত সংস্কারের স্বল্পাধিক বশবর্তী হইয়া কার্য করিয়া থাকে। কিন্তু আজকাল আমরা কিছু বেশী আবেগবান ও হঠকারী হইয়া, সকল দিক্ না দেখিয়া না বুঝিয়া, কার্য করিয়া থাকি। কালেজ ছাড়িয়াই আমরা পালে পালে আদালতে ওকালতি করিতে যাই। ওকালতি করিতে যে সকল গুণ আবশ্যক তাহা আছে কিনা, ওকালতি করিতে যে অর্থ বা সহায়তা আবশ্যক তাহা আয়ত্তাধীন কিনা, ইত্যাদি নানা কথার মধ্যে কোন কথাই বিবেচনা না করিয়া আমরা দলে দলে উকিল হইতে যাই।

ঠিক এই প্রকারেই আমরা দলে দলে ডাক্তার হইতে বাই। ঠিক এই প্রকারেই আমরা ঝাঁকে ঝাঁকে চাকুরীর উমেদার হই। ঠিক এই প্রকারেই আমরা পালে পালে মুদ্রায়ন্ত্রের আশ্রয় লইয়া গ্রন্থকার হইয়া উঠি। ইংরাজী শিখিয়া আমরা আমাদের দেশের সকল জিনিসই ঘুণার চক্ষে দেখি। তাই কোন দিক্ না দেখিয়া ভূত ভবিষ্যৎ বর্তমান কিছুই না বুঝিয়া এক একটা ভাবের বা অপরিপক সংস্কারের তাড়নায় আমরা উন্মত্তের স্থায় গৃহসংস্কার, সমাজসংস্কার, ধর্মসংস্কার প্রভৃতি আকাশ পাতাল সংস্কার করিতে বাই। কোন সংস্কারই করিতে পারি না। বরং একটা দোষের সংস্কার করিতে গিয়া দশটা দোষের সৃষ্টি করিয়া বসি। রোগীর রোগের চিকিৎসা করিতে গিয়া আমরা আধ মিনিটের মধ্যে রোগের পরীক্ষা শেষ করিয়া এমনি ঔষধাদির ব্যবস্থা করি যে, আধ ঘণ্টার মধ্যেই স্বয়ং রোগীরও শেষ হইয়া যায়। এইরূপ সকল কার্যে আমরা মনে করি যে, তাড়াতাড়ি হুড়াহুড়ি লক্ষ্যবন্দ করিলে খুব কাজ করা হয়। তাই যেমন আমাদের মনে একটা খেয়াল উঠে অমনি আমরা তদনুসারে কার্য করিতে বাই। তাই আমরা কোন কার্যে সিদ্ধিলাভ করিতে পারি না।

অতএব এই হঠকারিতা ও আবেগানুবর্তিতার দিনে সিদ্ধিদাতা গণেশের কথা স্মরণ করা বড় আবশ্যক। গণেশের সেই স্থির ধীর গম্ভীর শাস্ত সংযত চিন্তাশীল মূর্তি চিন্তে অঙ্কিত করিয়া সকল কার্য স্থির ধীর গম্ভীর শাস্ত সংযত ও চিন্তাশীল প্রণালীতে না করিলে আমাদের বিশৃঙ্খলতা দিন দিন বাড়িয়া যাইবে এবং ঘরে বাহিরে আমরা সকল প্রকার দুঃখ কষ্ট ও লাঞ্ছনার ভাগী হইব। অতএব আমাদের সকলেরই ভক্তিভাবে সেই সিদ্ধিদাতা গণেশমূর্তি চিন্তে

প্রতিষ্ঠিত করা কর্তব্য। গণেশমূর্তি ব্রহ্মাওপতিরই এক বিস্ময়কর মূর্তি। জলে স্থলে মহাশূন্তে যখন তুমুল ঝটিকা বহিতে থাকে— আকাশে বজ্রের ঝন্‌ঝনা, জলে তরঙ্গ-গর্জন, জলে স্থলে আকাশে পঞ্চভূতের প্রলয়ান্বলন—তখনও জল স্থল বায়ু বহি বোম্‌ সকলেরই নিয়মগুলি সম্পূর্ণ সুস্পষ্টতম প্রণালীতে প্রতিপালিত হয়; কাহারো কোন নিয়মের কণামাত্রও ব্যর্থ বা বিপর্যস্ত হয় না। ইহাই ব্রহ্মাওপতির বিস্ময়কর গণেশমূর্তি। সে মূর্তি দেখিবার জন্ত বিশ্বপটের অন্তরালে বাইতে হয়। কার্য্যসিদ্ধির কারণ বুঝিতে হইলেও কার্য্যক্ষেত্রের অন্তরালে ঢুকিতে হয়।

চন্দ্রনাথ বসু।

ঈশ্বরচন্দ্র বিদ্যাসাগর

রত্নাকরের রামনাম উচ্চারণে অধিকার ছিল না। অগত্যা মরা মরা বলিয়া তাঁহাকে উদ্ধার লাভ করিতে হইয়াছিল।

এই পুরাতন পৌরাণিক নজীরের দোহাই দিয়া আমাদেরকেও ঈশ্বরচন্দ্র বিদ্যাসাগরের নামকীৰ্ত্তনে প্রবৃত্ত হইতে হইবে। নতুবা ঐ নামগ্রহণ করিতে আমাদের কোনরূপ অধিকার আছে কি না, এ বিষয়ে ঘোর সংশয়, আরম্ভেই উপস্থিত হইবার সম্ভাবনা। বস্তুতই ঈশ্বরচন্দ্র বিদ্যাসাগর এত বড় ও আমরা এত ছোট, তিনি এত সোজা ও আমরা এত বাঁকা যে, তাঁহার নামগ্রহণ আমাদের পক্ষে বিষম আত্মপক্ষাতির কথা বলিয়া বিবেচিত হইতে পারে। বাঙ্গালী জাতীর প্রাচীন ইতিহাস কেমন ছিল, ঠিক স্পষ্ট জানিবার উপায় নাই। লক্ষ্মণসেনঘটিত প্রাচীন কিংবদন্তীটা অনৈতিহাসিক বলিয়া উড়াইয়া দেওয়া যাইতে পারে। কিন্তু পলাশির লড়াইএর কিছু দিন পূর্বে হইতে আজ পর্য্যন্ত বাঙ্গালীর চরিত্র ইতিহাসে যে স্থান লাভ করিয়া আসিয়াছে, বিদ্যাসাগরের চরিত্র তাহা অপেক্ষায় এত উচ্চে অবস্থিত যে, তাঁহাকে বাঙ্গালী বলিয়া পরিচয় দিতেই অনেক সময়ে কুণ্ঠিত হইতে হয়। বাগ্‌যত কৰ্ম্মনিষ্ঠ ঈশ্বরচন্দ্র বিদ্যাসাগরও আমাদের মত বাক্সকঁস সাধারণ বাঙ্গালী, উভয়ের মধ্যে এত ব্যবধান যে, স্বজাতীয় পরিচয়ে তাঁহার গুণকীৰ্ত্তন-দ্বারা প্রকারান্তরে আত্মগৌরব খ্যাপন করিতে গেলে, বোধ হয়, আমাদের পাপের মাত্রা আরও বাড়িয়া যাইতে পারে। আমাদের প্রত্যেক অন্তর্জ্ঞানে

সহৃদয়তার এত অভাব ও মৌখিকতার এত প্রভাব যে, অল্প যে আমরা তাঁহার স্মৃতির উপাসনার জন্ত একত্র হইয়াছি, এই উপাসনা ব্যাপারটাই একটা ভণ্ডামি নহে, তাহা প্রমাণ করা দুষ্কর। আমরা তাঁহার তর্পণোদ্দেশে যে বহুতাময় বারির অঞ্জলি প্রদান করিতে উপস্থিত হইয়াছি, তাঁহার প্রেতপুরুষ যদি অবজ্ঞার সহিত তাহা গ্রহণ করিতে পরাঙ্মুখ হয়েন, তাহা হইলে আমাদের পক্ষসমর্থনে বলিবার কথা কি আছে, সহজে খুঁজিয়া পাই না।

বিদ্যাসাগরের উপাসনায় এই অধিকার অনধিকারের কথা আসে বলিয়া প্রথমেই আমাকে রত্নাকরের নজীর আশ্রয় করিতে হইয়াছে। বিদ্যাসাগরের উপাসনায় আমাদের অধিকার না থাকিতে পারে, এবং বিদ্যাসাগরের জীবনের ও বিদ্যাসাগরের চরিত্রের সম্পূর্ণ তাৎপর্য্য আমাদের সম্পূর্ণ হৃদয়ঙ্গম হওয়াও হয় ত অসম্ভব; তথাপি এই সাংবৎসরিক উপাসনা বর্ষে বর্ষে অনুষ্ঠিত হইয়া আমাদের জাতীয় চরিত্রের কলঙ্ক ক্রমশঃ দৌত করিবে, এই আমাদের একমাত্র ভরসা। পূজিতের প্রীতি-উৎপাদন, বোধ হয়, আমাদের শাস্ত্রবিহিত শ্রাদ্ধতর্পণাদি ব্যাপারের উদ্দেশ্য নহে; পূজক আত্মোন্নতি বিধানের জন্ত ঐ সকল অনুষ্ঠানসাধনে বাধ্য। বিদ্যাসাগরের প্রেতপুরুষের প্রীতিজনন আমাদের অসাধ্য হইলেও আমরা স্বার্থের অনুরোধে ঐ কার্য্যে প্রবৃত্ত হইতে পারি।

কিন্তু প্রথমেই বিদ্যাসাগরকে আমাদের বলিয়া পরিচয় দিব কি না, সেই ঘোর সমস্যা আসিয়া দাঁড়ায়। সেই প্রকাণ্ড মানবতাকে সঙ্কীর্ণ বান্ধালীষের সীমার মধ্যে আবদ্ধ রাখিতে বাওয়া নিতান্ত খৃষ্টতা বলিয়া মনে হয়। ঈশ্বরচন্দ্র বিদ্যাসাগরের জীবদ্দশাতে তাঁহার স্বজাতি তাঁহার নিকট আপনার যে মূর্তি

দেখাইয়াছিল, তাহা তাঁহার জীবনকাহিনীপাঠে কতকটা অসম্মান করা যাইতে পারে। তাঁহার আত্মীয়বন্ধুগণের সম্পর্কে আসিয়া তাঁহাকে পদে পদে লজ্জিত ও প্রতারিত হইতে হইয়াছে, ইহার ভূরি উদাহরণ তাঁহার জীবনের আখ্যায়িকামধ্যে সঙ্কলিত আছে। যদি কোন বৈদেশিক আমাদের জাতীয় চরিত্রের ছবি আঁকিতে প্রয়াসী হয়েন, তাঁহাকে ক্ষমীর্ণ সংগ্রহ করিবার জন্য অধিক প্রয়াস পাইতে হইবে না ; ঈশ্বরচন্দ্র বিদ্যাসাগরের চরিত-লেখকগণ প্রচুর পরিমাণে ঐ সকল সামগ্রী একাধারে সংগ্রহ করিয়া রাখিয়াছেন।

অণুবীক্ষণ নামে এক রকম যন্ত্র আছে, যাহাতে ছোট জিনিষকে বড় করিয়া দেখায় ; বড় জিনিষকে ছোট দেখাইবার নিমিত্ত উপায় পদার্থবিজ্ঞানশাস্ত্রে নির্দিষ্ট থাকিলেও, ঐ উদ্দেশ্যে নিশ্চিত কোন যন্ত্র আমাদের মধ্যে সর্বদা ব্যবহৃত হয় না। কিন্তু বিদ্যাসাগরের জীবনচরিত বড় জিনিষকে ছোট দেখাইবার জন্য নিশ্চিত যন্ত্রস্বরূপ। আমাদের দেশের মধ্যে যাহারা খুব বড় বলিয়া আমাদের নিকট পরিচিত, ঐ গ্রন্থ একখানি সম্মুখে ধরিবামাত্র তাঁহারা সহসা অতিমাত্র ক্ষুদ্র হইয়া পড়েন ; এবং এই যে বাঙ্গালী লইয়া আমরা অহোরাত্র আশ্ফালন করিয়া থাকি, তাহাও অতি ক্ষুদ্র ও শীর্ণ কলেবর ধারণ করে। এই চতুর্পার্শ্ব ক্ষুদ্রতার মধ্যস্থলে বিদ্যাসাগরের মূর্তি ধবল পর্বতের ত্রায় শীর্ষ তুলিয়া দণ্ডায়মান থাকে ; কাহারও সাধ্য নাই যে, সেই উচ্চ চূড়া অতিক্রম করে বা স্পর্শ করে।

পূর্বেই বলিয়াছি, অনর্থক আত্মগ্লানির অবতারণা আমার অভিপ্রেত নহে। কিন্তু বিদ্যাসাগরকে আপনার বলিয়া তাঁহার

সমীপস্থ হইতে তুলনায় আত্মগ্লানি আপনা হইতে আসিয়া পড়ে। বাস্তবিকই বিদ্যাসাগরের উন্নত স্মৃতি চরিত্রে বাহ্য মেরুদণ্ড, সাধারণ বাঙ্গালীর চরিত্রে তাহার একান্তই অসম্ভাব। প্রাণিতত্ত্ব-বিদেরা মেরুদণ্ড দেখিয়া সমগ্র প্রাণিসমষ্টিকে উন্নত ও অন্নুন্নত দুই প্রধান পর্যায়ে ভাগ করেন। মেরুদণ্ডের অস্তিত্ব প্রাণীর পক্ষে সামর্থ্যের ও আত্মনির্ভরশক্তির প্রধান পরিচয়। বিদ্যাসাগর যে সামর্থ্য ও আত্মনির্ভরশক্তি লইয়া জন্মগ্রহণ করিয়াছিলেন, সাধারণ বাঙ্গালী-চরিত্রে তাহার তুলনা মিলে না।

একটা কথা আজকাল অহরহঃ শুনিতে পাওয়া যায়। বর্তমান রাজকীয় শাসনে চারিদিকে আমাদের জাতীয় অভ্যুদয়ের লক্ষণ দেখা দিয়াছে। অতি প্রাচীনকালে যখন হিন্দু রাজা হিন্দুরাজ্যে শাসনদণ্ড পরিচালনা করিতেন তখন আমাদের জাতীয় অবস্থা সমধিক উন্নত ছিল, অনেকে এ কথা অস্বীকার করেন না; অন্ততঃ হিন্দুজাতির পুরাত্ত্বের অভাবে এ কথা লইয়া তর্ক বিতর্ক যতক্ষণ ইচ্ছা চালান যাইতে পারে। কিন্তু গত কয় শত বৎসরে আমাদের দুর্দশার যে একশেষ ঘটনাছিল, এবং বর্তমানকালে আমাদের সামাজিক জীবন সঙ্কটাপন্ন মুমূর্ষু অবস্থা হইতে ফিরিয়া আসিয়াছে, ইহা একরকম সর্ববাদিসম্মত সত্য। এই নবজীবনসঞ্চারের কয়েকটা বড় বড় লক্ষণ দেখিতে পাওয়া যায়। একটা প্রধান লক্ষণ, আমাদের জাতীয় রুচির পরিবর্তন ও জাতীয় সাহিত্যের বিকাশ। বেহুলার নাচ দেখিয়া স্বর্গের দেবগণ যতদূর তৃপ্তিলাভ করিতেন, আমরা মর্ত্যদেহ ধরিয়াও কোনরূপেই ভতটা পারি না। এখন বঙ্কিমচন্দ্র অথবা রবীন্দ্রনাথের হাতে মানবজীবনের উৎকট সমস্তাঙ্গলার আলোচনা কবিতাকারে দেখিতে চাই। দ্বিতীয় একটা লক্ষণ,

আমাদের মধ্যে রাষ্ট্রিক আকাজ্জক উদ্দীপন এবং তৎসহকারে স্বায়ত্তশাসন লাভের প্রয়াস।

কিন্তু এই সুস্পষ্ট লক্ষণগুলি বর্তমান থাকিতেও আমরা উন্নতির সোপানে উঠিতেছি, এই বাক্য নিষিদ্ধবাদে গ্রহণ করিতে আমরা প্রস্তুত নহি। এক শত বা দেড় শত বৎসরের মধ্যে কলির প্রকোপ সহসা এতদূর বৃদ্ধিলাভ করিয়াছে যে, বাঙ্গালীর পরমায়াঃ একেবারেই পঁচানব্বই হইতে পঁয়ত্রিশে আসিয়া দাঁড়াইয়াছে, এবং ধর্ম্মের চারি পায়ের মধ্যে তিনটা একেবারে চিরদিনের মত খঞ্জ হইয়া গিয়াছে, অবশ্য এরূপ বিশ্বাস করিতে আমি বাধ্য নহি। কিন্তু আবার আমাদের সামাজিক গগনের পূর্বাকাশে তরুণ সূর্য্যের উদয় হইয়াছে, এবং অরুণ সারথি হস্তধৃত হরিদম্বগণের রশ্মিগুচ্ছ আর যে ঘুরাইয়া দিবেন না, ইহার স্বীকারেও আমার সাহস হয় না। বঙ্গ-সাহিত্যের অভ্যুদয়সম্বন্ধে কোন কথা এখানে বলিতে চাহি না। ভূর্তাগ্যক্রমে আমরা বন্ধিমের প্রতিভার উজ্জ্বল আলোক হইতে বঞ্চিত হইয়াছি; কিন্তু আশা করি, নবীনচন্দ্রের ও রবীন্দ্রনাথের তুলিকা অক্ষয় হইয়া আমাদের চিত্তবিনোদনে ও সস্তাপহরণে নিযুক্ত থাকিবে। * কিন্তু আমাদের রাষ্ট্রিক অবস্থা সম্বন্ধে আমার কিছু বলিবার আছে। শ্রোতৃবর্গ অল্পগ্রহ করিয়া মার্জ্জনা করিবেন।

বস্তুতই শতাধিক বর্ষব্যাপী সুশাসনে আমরা নিতান্ত আত্মরে ছেলে হইয়া পড়িয়াছি। আমাদের পরিণামও বোধ করি আত্মরে ছেলের পরিণামের অপেক্ষা অধিকতর আশাপ্রদ নহে। পালঙ্কের উপর সুখশয্যাশায়ী শিশুকে যখন আরামের সহিত তুলিযোগে চুমুকে চুমুকে ছুঁপান করিতে দেখা যায়, তখন বয়স্ক লোকের মুখ

* এই প্রবন্ধ যখন প্রথম পঠিত হয়, তখন নবীনচন্দ্র জীবিত ছিলেন।

হইতে “আহা মরি শিশুকাল” ইতি কবিতাবাণী সনিঃস্বাসে নির্গত হওয়াই স্বাভাবিক। কিন্তু প্রাকৃতিক নিয়মে এই শিশুকেই আবার কিছুদিন মধ্যে সেই বয়স্কের স্থান গ্রহণ করিয়া জীবনবন্ধে নিযুক্ত হইতে হয়। আমাদের শ্বেহময়ী গবর্ণমেণ্টজননীর অনুগ্রহের মাত্রা ও আমাদের আব্দারের মাত্রা এমন হইয়া দাঁড়াইয়াছে যে, আর আমরা সেই আরামের পালঙ্ক ও তুলির দুধ সহজে ছাড়িতে চাহিতেছি না এবং আমাদের স্বচ্ছন্দতার অণুমাত্র ত্রুটি ঘটিলেই, শৈশবস্থলভ সামুনাসিক কণ্ঠধ্বনি বাহির করিয়া জননীর মনোযোগ আকর্ষণ করিতে প্রয়াসী হইতেছি। বাস্তবিকই আমাদের মত সর্বতোভাবে পরমুখাপেক্ষী কোন জাতির উন্নতি ঘটিয়াছে, তাহা ইতিহাসে লেখে না।

আমাদের মেরুদণ্ডের সনাতন কোমলতা হইতেই এই অবস্থার উৎপত্তি হইয়াছে; আবার সেই অবস্থা হইতেই মেরুদণ্ডের কোমলতা বাড়িয়া যাইতেছে। আমরা কথায় কথায় আমাদের চরিত্রসংশোধনের প্রস্তাব করি, এবং এই চরিত্রসংশোধন না হইলে জাতীয় উন্নতির সম্ভাবনা নাই, এই মর্মে মহতী ঘটা করিয়া বক্তৃতা করি। চরিত্রসংশোধন না হইলে যে উন্নতি ঘটবে না, ইহা সত্য কথা; কিন্তু চরিত্রসংশোধন ব্যাপারটাই কি এত সহজ জিনিষ? যেন ইচ্ছা করিলেই চরিত্রটা আপনা-আপনি শোধিত হইয়া যাইবে। কিঞ্চিলিকা যেন ইচ্ছামাত্রেই আপনাকে কুস্তীরে পরিণত করিবে! ডাক্তার-বাদীরা বলেন, কুস্তীরেরও পূর্বপুরুষ এককালে কেঁচোর মত ছিল। কিন্তু সেই কুস্তীরে পরিণতির পূর্ব পর্যন্ত তাহাকে কত যুগ-ব্যাপী জীবনবন্ধে নিযুক্ত থাকিতে হইয়াছে! ইচ্ছামাত্রেই চরিত্রশোধন ঘটে না এবং প্রস্তাব-ব্যর্থ ও জাতীয় উন্নতির সম্ভাবনা নাই।

বিদ্যাসাগরের মহত্বের সম্মুখীন হইলে, আমাদের ক্ষুদ্রত্বের উপলব্ধি জন্মিয়া যে আত্মমানি উপস্থিত হয়, এইরূপে সেই আত্মমানির কতকটা ওজর মিলিতে পারে।

আমরা যে বিদ্যাসাগরের সম্মুখে দাঁড়াইতে সঙ্কুচিত হই, এইরূপে তাহার কতকটা সাস্থনা মিলিতে পারে বটে, কিন্তু এই দেশে এই জাতির মধ্যে সহসা বিদ্যাসাগরের মত একটা কঠোর কঙ্কালবিশিষ্ট মনুষ্যের কিরূপে উৎপত্তি হইল, তাহা বিধম সমস্তা হইয়া দাঁড়ায়। সেই হৃদয় প্রকৃতি, যাহা ভাঙ্গিতে পারিত, কখন নোয়াইতে পারে নাই; সেই উগ্র পুরুষকার, যাহা সহস্র বিঘ্ন ঠেলিয়া ফেলিয়া আপনাকে অব্যাহত করিয়াছে; সেই উন্নত মস্তক, যাহা কখন ক্ষমতার নিকট ও ঐশ্বর্যের নিকট অবনত হয় নাই; সেই উৎকট বেগবতী ইচ্ছা, যাহা সর্ববিধ কপটাচার হইতে আপনাকে মুক্ত রাখিয়াছিল, তাহার বঙ্গদেশে আবির্ভাব একটা অদ্ভুত ঐতিহাসিক ঘটনার মধ্যে গণ্য হইবে, সন্দেহ নাই। এই উগ্রতা, এই কঠোরতা, এই হৃদয়মতা ও অনম্যতা, এই হৃদয় বেগবতার উদাহরণ, যাহারা কঠোর জীবনবন্দে লিপ্ত থাকিয়া ছই বা দিতে জানে ও ছই বা খাইতে জানে, তাহাদের মধ্যেই পাওয়া যায়; আমাদের মত যাহারা তুলির ছখ চুমুক দিয়া পান করে ও সেই ছখে মাখন তুলিয়া জল মিশাইয়া লয়, তাহাদের মধ্যে এই উদাহরণ কিরূপে মিলিল, তাহা গভীর আলোচনার বিষয়।

সেই জন্তই বিদ্যাসাগরকে আমাদের বলিয়া পরিচয় দিতে চিহ্নিত হয়। অনেকে বিদ্যাসাগরের চরিত্রে পাশ্চাত্য জাতিগুলির বিবিধ গুণের বিকাশ দেখেন। ইউরোপীয়দের আমরা যতই নিন্দা করি

না, অনেক বিষয়ে তাঁহার খাঁটি মানুষ; আমাদের মনুষ্যত্ব তাঁহাদের নিকট নিশ্চিন্ত ও মলিন। যে পুরুষকারে পুরুষের পৌরুষ, সাধারণ ইউরোপীয়ের চরিত্রে যাহা বর্তমান, সাধারণ বাঙ্গালীর চরিত্রে যাহার অভাব, বিদ্যাসাগরের চরিত্রে তাহা প্রচুর পরিমাণে বর্তমান ছিল। বিদ্যাসাগরের বাল্যজীবনটা দুঃখের সহিত সংগ্রাম করিতে অতিবাহিত হইয়াছিল। শুধু বাল্যজীবন কেন, তাঁহার সমগ্র জীবনকেই নিজের জন্ত না হউক, পরের জন্ত সংগ্রাম বলিয়া নির্দেশ করা যাইতে পারে। এই সংগ্রাম তাঁহার চরিত্রগঠনে অনেকটা আত্মকূল্য করিয়াছিল, সন্দেহ নাই; কিন্তু পিতৃপিতামহ হইতে তাঁহার ধাতুতে ও মজ্জাতে ও শোণিতে এমন একটা পদার্থ তিনি পাইয়াছিলেন, যাহাতে সমুদয় বিপত্তি ভিন্ন করিয়া তিনি বীরের মত সেই রণক্ষেত্রে দাঁড়াইতে সমর্থ হইয়াছিলেন। দুঃখ অনেকেরই ভাগ্যে ঘটে; জীবনের বন্ধুর পথ অনেকের পক্ষেই কণ্টকসমাবেশে আরও দুর্গম। কিন্তু এইরূপে সেই কাঁটাগুলিকে ছাটিয়া দলিয়া চলিয়া যাইতে অল্প লোককেই দেখা যায়। বাঙ্গালীর মধ্যে এমন দৃষ্টান্ত প্রকৃতই বিরল।

অথচ আশ্চর্য্য এই, এত প্রভেদ সত্ত্বেও বিদ্যাসাগর খাঁটি বাঙ্গালী ছিলেন। তিনি খাঁটি বাঙ্গালীর ঘরে জন্মগ্রহণ করিয়াছিলেন; তাঁহার বাল্যজীবনে ইউরোপীয় প্রভাব তিনি কিছুই অনুভব করেন নাই। তিনি যে স্থানে তাঁহাদের মধ্যে জন্মগ্রহণ করেন, সে স্থানে তাঁহাদের মধ্যে পাশ্চাত্য ভাবের প্রভাব তখন পর্য্যন্ত একেবারেই প্রবেশলাভ করে নাই। পরজীবনে তিনি পাশ্চাত্য শিক্ষা ও পাশ্চাত্য দীক্ষা অনেকটা পাইয়াছিলেন, অনেক পাশ্চাত্যের স্পর্শে আসিয়াছিলেন, পাশ্চাত্য চরিত্রে অনুকরণের

ষোণ্য অনেক পদার্থের সমাবেশ দেখাইয়াছিলেন, কিন্তু তাহাতে যে
 তাঁহার চরিত্রকে কোনরূপ পরিবর্তিত করিয়াছিল, তাহা বোধ হয়
 না। তাঁহার চরিত্র তাহার পূর্বেই সম্যগ্ভাবে সম্পূর্ণরূপে গঠিত
 হইয়াছিল ; আর নূতন মশলা-সংগ্রহের প্রয়োজন হয় নাই। যে
 বৃদ্ধ বিদ্যাসাগরের চরিত্রের সহিত আমরা এত পরিচিত, যে বালক
 ঈশ্বরচন্দ্র পরের ক্ষেতে যবের শীষ খাইতে গিয়া গলায় কাঁটা ছুটাইয়া
 মৃতপ্রায় হইয়াছিলেন, অথবা আহারকালে পার্শ্ববর্তীদের স্বগার
 উদ্বেকভয়ে নিজের পাকস্থলীতে আরগুলার জ্বায় বিকট জঙ্ঘ প্রেরণ
 করিয়া ফেলিয়াছিলেন, সেই বালক বিদ্যাসাগরেই সেই চরিত্রের
 প্রায় সম্পূর্ণ বিকাশ দেখা যায়। বিদ্যাসাগর যদি ইংরাজি
 একেবারে না শিখিতেন, বা ইংরাজের স্পর্শে না আসিতেন ;
 চিরকালই যদি তিনি সেই নিভৃত বীরসিংহ গ্রামের টোলখানিতে
 ব্যাকরণের তাৎপর্য আলোচনায় ব্যাপৃত থাকিতেন, তাহা হইলে
 ১৩০৩ সালের ১৩ই শ্রাবণ তারিখে কলিকাতা সহরের অবস্থাটা
 ঠিক এমনি না হইতে পারিত ; কিন্তু ঈশ্বরচন্দ্র আপন প্রকাণ্ড
 পুরুষসিংহত্ব লইয়া আপনার পল্লীগ্রামখানিকে বিক্ষোভিত রাখিতেন
 সন্দেহ নাই। তিনি ঠিক যেমন বাঙ্গালীটি হইয়া ভূমিষ্ঠ হইয়া-
 ছিলেন, শেষ দিন পর্য্যন্ত তেমনি বাঙ্গালীটিই ছিলেন। তাঁহার
 নিজস্ব এত প্রবল ছিল যে, অলুকের-দ্বারা পরস্পর গ্রহণের তাঁহার
 কখন প্রয়োজন হয় নাই ; এমন কি, তাঁহার এই নিজস্ব সময়ে
 সময়ে এমন উগ্র মূর্তি ধারণ করিত যে, তিনি বলপূর্ব্বক এই
 পরস্পকে সম্মুখ হইতে দূরে ফেলিতেন। পাশ্চাত্য চরিত্রের
 সহিত তাঁহার চরিত্রের যে কিছু সাদৃশ্য দেখা যায়, সে
 সমস্তই তাঁহার নিজস্ব সম্পত্তি, অথবা তাঁহার পুরুষাত্মকমে

আগত পৈত্রিক সম্পত্তি। ইহার জন্ত তাঁহাকে কখন ঋণস্বীকার করিতে হয় নাই।

সম্পত্তি আমাদের পরমশ্রদ্ধাভাজন মাননীয় কোন মহাশয় এইরূপ একটা কথা তুলিয়াছিলেন যে, পাশ্চাত্যগণের সহিত আমাদের সামাজিক কুটুম্বিতাস্থাপন না ঘটিলে, আমাদের জাতীয় চরিত্রের উন্নতির সম্ভাবনা নাই। কথাটা লইয়া আমাদের সমাজ-মধ্যে অনেকটা আন্দোলন চলিয়াছিল। আমাদের মধ্যে যাহারা পাশ্চাত্য বেশভূষার ও পাশ্চাত্য আচারের পক্ষপাতী, তাঁহারা এই আন্দোলনে কিছু চঞ্চল হইয়া উঠিয়াছিলেন।

বৈদেশিকের সহিত কুটুম্বিতাস্থাপন ও বিদেশের আচার-গ্রহণ-সম্বন্ধে ঈশ্বরচন্দ্র বিদ্যাসাগরের মত গ্রহণ করিতে গেলে কি ফল ঘটিত, বোধ হয়, উল্লেখ অনাবশ্যক। তাঁহার খাটি দেশীয় পরিচ্ছদ হইতেই তাহার উত্তর মিলিতে পারে। চটিজুতার প্রতি তাঁহার একটা আত্যন্তিক আসক্তি ছিল বলিয়াই তিনি যে চটিজুতা ভিন্ন অন্য জুতা পায়ে দিতেন না, এমন নহে। আমরা যে স্বদেশের প্রাচীন চটি ত্যাগ করিয়া বুট ধরিয়াছি, ঠিক তাহা দেখিয়াই যেন বিদ্যাসাগরের চটির প্রতি অনুরাগ বাড়িয়া গিয়াছিল। বাস্তবিকই এই চটিজুতাকে উপলক্ষমাত্র করিয়া একটা অভিমান, একটা দর্প তাঁহার অভ্যন্তর হইতে প্রকাশ পাইত। যে অভিমান ও দর্পের অনুরোধে নিতান্ত অনাবশ্যক হইলেও মুটের মাথা হইতে বোঝা কাড়িয়া নিজের মাথায় তুলিয়া পথ চলিতেন, এই দর্প ঠিক সেই দর্প।

আচার বিষয়ে অন্তরে অনুরাগ দূরের কথা, বিদ্যাসাগরের চরিত্রে এমন ছই একটা পদার্থ ছিল, বাহ্যতে পাশ্চাত্য মানব

হইতে তাঁহাকে পৃথক্ করিয়া রাখিয়াছিল; এই প্রকৃতিগত পার্থক্য দেখিয়াই আমরা বিজ্ঞানাগরের অসাধারণত্ব অনুভব করি।

পাশ্চাত্যদেশে ফিলানথ্রপি নামে একটা পদার্থ আছে, তাহার বান্ধালা নাম মানবপ্রীতি। এই মানবপ্রীতি কোন সঙ্কীর্ণ সমাজের মধ্যে আবদ্ধ নহে; সমস্ত মানবসমাজ এই হিতৈষণার বিষয়ীভূত এবং ইহাও বলা যাইতে পারে যে, এই হিতৈষণা পলিটিকাল ইকনমি শাস্ত্রেরও সম্পূর্ণ বিরোধী নহে। এই লোকহিতৈষণা ইউরোপ হইতে বাহির হইয়া দিগ্দিগন্তে ঘুরিয়া বেড়াইতেছে, এবং ইহার প্রভাবে যে কত অলৌকিক ঘটনার কত অসাধারণ স্বার্থভ্যাগের উদাহরণ মিলিয়াছে, তাহার সংখ্যা নাই। এই লোকহিতৈষণার প্রকৃতির মধ্যে এমন একটা কিছু আছে, প্রাচ্যদেশে তাহার তুলনা মিলে না। আধুনিক পাশ্চাত্য সভ্যতার ভিতর এমন একটা স্ফুর্তি রহিয়াছে, যেন তাহা আপনাকে সামলাইতে না পারিয়া আপনা হইতে উছলিয়া বাহির হয় এবং অন্য কোন মূর্ত্তিধারণের সুবিধা না পাইলে এই মানবপ্রীতির ও বিশ্বহিতৈষণার আকৃতি পরিগ্রহ করে। যে স্ফুর্তির বশে ইংরেজের ছেলে সাঁতার দিয়া নায়াগারা পার হইতে গিয়া জীবনকে অবলীলাক্রমে বিসর্জন দেয়, এই হিতৈষণাও যেন সেই অমাহুষিক স্ফুর্তি হইতেই উদ্ভূত। এই পরার্থপরতার মূলে যেন ব্যক্তিগত স্ফুর্তি বর্ত্তমান রহিয়াছে। আপনার ব্যক্তিত্ব যেন নিজের ভিতর স্থান না পাইয়া অপরের উপর সবেগে বিক্ষিপ্ত হইতেছে। প্রাণের প্রবাহ যেন আপনার বেগ আপনি সহিতে না পারিয়া পরের দিকে ধাবিত হইতেছে। পরের উপকার যেন ইহার মুখ্য উদ্দেশ্য নহে, আপনার নিজস্বের অভিব্যক্তিই যেন তাহার প্রণোদক।

বিদ্যাসাগরকে এইরূপ ফিলান্থ্রপিষ্ট বলা চলে না। বিদ্যাসাগরের লোকহিতৈষিতা সম্পূর্ণ অল্প ধরণের। বিদ্যাসাগরের লোক-হিতৈষিতা সম্পূর্ণ প্রাচ্য ব্যাপার। ইহা কোনরূপ নীতিশাস্ত্রের, ধর্মশাস্ত্রের, অর্থশাস্ত্রের বা সমাজশাস্ত্রের অপেক্ষা করিত না। এমন কি, তিনি হিতৈষণাবশে যে সকল কাজ করিয়াছেন, তাহার অনেকই আধুনিক সমাজতত্ত্ব মঞ্জুর করিবে না। কোন স্থানে দুঃখ দেখিলেই যেমন করিয়াই হউক তাহার প্রতিকার করিতে হইবে, একালের সমাজতত্ত্ব সর্বদা তাহা স্বীকার করিতে চাহে না। কিন্তু দুঃখের অস্তিত্ব দেখিলেই বিদ্যাসাগর তাহার কারণানুসন্ধানের অবসর পাইতেন না। লোকটা অভাবে পড়িয়াছে জানিবামাত্রই বিদ্যাসাগর সেই অভাবমোচন না করিয়া পারিতেন না। লোকটার কুলশীলের পরিচয় লওয়ার অবসর ঘটিত না। তাহার অভাবের উৎপত্তি কোথায়, তাহার অভাব পূরণ করিলে প্রকৃতপক্ষে তাহার উপকার হইবে কি অপকার হইবে, ও গৌণ সম্বন্ধে সমাজের ইষ্ট হইবে, কি অনিষ্ট হইবে, নীতিতত্ত্ব-ঘটিত সমাজতত্ত্ব-ঘটিত এই সকল প্রশ্নের মীমাংসা তিনি করিতেন না। অপিচ, দুঃখের সম্মুখে আসিবামাত্র তাঁহার ব্যক্তিত্ব একবারে অভিভূত হইয়া যাইত। তিনি আপনাকে ভুলিয়া যাইতেন; পরের মধ্যে তাঁহার নিজস্ব একেবারে মগ্ন ও লীন হইয়া যাইত। এই লক্ষণের দ্বারা তাঁহার মানবপ্রীতি অল্প দেশের মানবপ্রীতি হইতে স্বতন্ত্র ছিল।

ঈশ্বরচন্দ্র বিদ্যাসাগর কোন ব্যক্তির কি উপকার করিয়াছেন, তাহার সম্পূর্ণ তালিকা তৈয়ার করা একরকম অসম্ভব। তাঁহার জীবনচরিতলেখকেরা যেগুলো সংগ্রহ করিয়াছেন, তাহাই পড়িতে

পাড়িতে খাসরোধের উপক্রম হয়। কিন্তু ছুংথের বিষয়, এই সুদীর্ঘ ফর্দের মধ্যে প্রায় শতকরা নব্বইটা কার্য্য অর্থনীতির অনুমোদিত নহে। কিন্তু প্রচলিত অর্থনীতির উপরে আর একটা নীতি আছে, তাহা উচ্চতর মানবনীতির অঙ্গীভূত।

ঈশ্বরচন্দ্র বিদ্যাসাগরের সহিত বর্ত্তমান যুগের বঙ্গসন্তানগণের অধিক সাদৃশ্য না থাকিতে পারে, কিন্তু সেই চরিত্র আমরা যে আদৌ দেখিতে পাই, তাহা সম্ভবে। কঠোরতার সহিত কোমলতার সমাবেশ ব্যতীত মনুষ্যচরিত্র সম্পূর্ণতা পায় না। ভারতবর্ষীয় মহাকবির কল্পনায় পূর্ণ মনুষ্যত্ব বজ্রের ত্রায় কঠোর ও কুসুমের ত্রায় কোমল ; যুগপৎ ভীম ও কান্ত, অশ্রু এবং অভিগম্য।

রামায়ণ এবং উত্তরচরিত্র অবলম্বন করিয়া বিদ্যাসাগর সীতার বনবাস রচনা করিয়াছিলেন। রামায়ণ ও উত্তরচরিত্রের নায়কের একটা অপবাদ জনসমাজে প্রসিদ্ধ আছে। কোন একটা কিছু ছল পাইলেই রামচন্দ্র কাঁদিয়া পৃথিবী ভাসাইয়া ফেলেন। বিদ্যাসাগরের জীবনচরিত্র গ্রন্থের প্রায় প্রতি পাতাই দেখিতে পাওয়া যায়, বিদ্যাসাগর কাঁদিতেছেন। বিদ্যাসাগরের এই রোদন-প্রবণতা তাঁহার চরিত্রের একটা বিশেষ লক্ষণ। কোন দীন ছুংখী আসিয়া ছুংথের কথা আরম্ভ করিতেই বিদ্যাসাগর কাঁদিয়া আকুল ; কোন বালিকা-বিধবার মলিন মুখ দর্শনমাত্রেই বিদ্যাসাগরের বক্ষঃস্থলে গঙ্গা প্রবহমানা ; ভ্রাতার অথবা মাতার মৃত্যু-সংবাদ পাইবামাত্র বিদ্যাসাগর বালকের মত উচ্চৈঃস্বরে কাঁদিতে থাকেন। বিদ্যাসাগরের বাহিরটাই বজ্রের মত কঠিন, ভিতরটা পুষ্পের অপেক্ষাও কোমল। রোদন-ব্যাপার বড়ই গর্হিত কর্ম্ম, বিজ্ঞের নিকট ও বিরাগীর

নিকট অতীব নিন্দিত। কিন্তু এইখানেই বিদ্যাসাগরের অসাধারণত্ব; এইখানেই তাঁহার প্রাচ্যতা। প্রতীচ্য দেশের কথা বলিতে পারি না, কিন্তু প্রাচ্য দেশ রোদনপ্রবণতা মনুষ্যচরিত্রের যেন একটা প্রধান অঙ্গ। বিদ্যাসাগরের অসাধারণত্ব এই যে, তিনি আপনার সুখস্বাচ্ছন্দ্যকে তৃণের অপেক্ষাও ত্যাগ করিতেন, কিন্তু পরের জন্ত রোদন না করিয়া থাকিতে পারিতেন না। দরিদ্রের দুঃখদর্শনে তাঁহার হৃদয় টলিত, বান্ধবের মরণশোকে তাঁহার ধৈর্য্যচ্যুতি ঘটাইত। জ্ঞানের উপদেশ ও বৈরাগ্যের উপদেশ তাঁহার নিকট এ সময়ে ঘেঁষিতে পারিত না। বায়ুপ্রবাহে দ্রুমসান্নুমানের মধ্যে দ্রুমেরই চাঞ্চল্য জন্মে, সান্নুমান চঞ্চল হয় না। এ ক্ষেত্রে বোধ করি দ্রুমের সহিতই তাঁহার সাদৃশ্য। কিন্তু আবার সান্নুমানেরই শিলাময় হৃদয় বিদীর্ণ করিয়া যে বারিপ্রবাহ নিঃসৃত হয়, তাহাই বসুন্ধরাকে উর্বরা করে ও জীবকুলকে রক্ষা করে। সুতরাং সান্নুমানই বিদ্যাসাগরের সহিত প্রকৃতপক্ষে তুলনীয়। ভাগীরথী গঙ্গার পুণ্যধারায় যে ভূমি যুগ ব্যাপিয়া সূজলা সূফলা শতশ্রামলা হইয়া রহিয়াছে, রামায়ণী গঙ্গার পুণ্যতর অমৃতপ্রবাহ সহস্র বৎসর ধরিয়া যে জাতিকে সংসারতাপ হইতে শীতল রাখিয়াছে, সেই ভূমির মধ্যে ও সেই জাতির মধ্যেই বিদ্যাসাগরের আবির্ভাব সঙ্গত ও স্বাভাবিক।

ঈশ্বর এবং পরকাল প্রভৃতি সম্বন্ধে বিদ্যাসাগরের কিরূপ বিশ্বাস ছিল, তাঁহার চরিত্রলেখকেরা সে সম্বন্ধে কোন স্পষ্ট কথা বলেন না। তবে সংসার হইতে দুঃখের অন্তিম এক নিঃশ্বাসে উড়াইয়া দিয়া সুখের এবং মঙ্গলের রাজ্য কল্পনার বলে প্রতিষ্ঠা করা বোধ করি দয়ার সাগরের পক্ষে অসাধ্য ছিল। সমুদ্রতলে সার জন

লরেন্স * ডুবাইয়া দিয়া হুনিয়ার মালিক কিরূপ করুণা প্রকাশ ও মঙ্গল সাধন করিলেন, এক নিঃশ্বাসে তিনি তাহা আবিষ্কার করিতে পারিতেন না। বস্তুতই দুঃখদাবানলের কেন্দ্রস্থলে উপবেশন করিয়া জগতের মঙ্গলময়ত্ব সন্থকে বজ্রুতা করা তাঁহার প্রকৃতির বিরুদ্ধ ছিল। বোধ করি সেই জন্তই ঈশ্বর ও পরকাল সন্থকে নিজ মত প্রকাশ করিতে তিনি চাহিতেন না। তাঁহার প্রবৃত্তি তাঁহাকে যে কর্তব্যপথে চালাইত, তিনি সেই পথে চলিতেন। মনুষ্যের প্রতি কর্তব্যসম্পাদন করিয়াই তিনি সন্তুষ্ট থাকিতেন; গণগোলে প্রবৃত্ত হইবার তাঁহার অবসর ছিল না। এমন দিন কবে আসিবে, যে দিন মনুষ্যসমাজ সাম্প্রদায়িক কোলাহলের হস্ত হইতে নিষ্কৃতি পাইবে; যে দিন আপামর সাধারণ বিতণ্ডা ত্যাগ করিয়া বিদ্যাসাগরের অনুবর্ত্তী হইয়া মনুষ্যের প্রতি কর্তব্যনির্ণয়ে মন দিতে অবকাশ লাভ করিবে।

বিদ্যাসাগর একজন সমাজসংস্কারক ছিলেন। তিনি নিজেই বলিয়াছেন, বিধবাবিবাহে পথ-প্রদর্শন তাঁহার জীবনের সর্বপ্রধান সংকল্প। বস্তুতই এই বিধবাবিবাহ-ব্যাপারে আমরা ঈশ্বরচন্দ্রের সমগ্র মূর্ত্তিটা দেখিতে পাই। কোমলতা ও কঠোরতা উভয় গুণের আধাররূপে তিনি লোকসমক্ষে প্রতীয়মান হইলেন। প্রকৃতির নিষ্ঠুর হস্তে মানবনির্ধ্যাতন তাঁহার কোমল প্রাণকে দিবানিশি ব্যথিত রাখিত; দুর্বল মনুষ্যের প্রতি নিষ্করণ প্রকৃতির অত্যাচার তাঁহার হৃদয়ের মর্শ্বস্থলে ব্যথা দিত; তাহার উপর মনুষ্যবিহিত সমাজবিহিত অত্যাচার, তাঁহার পক্ষে নিতান্তই অসহ্য হইয়াছিল। বিধাতার

* এই নামে একখানা জাহাজ ১০০ যাত্রীসহ কলিকাতা হইতে পুরী যাইবার পথে সমুদ্রে গড়িয়া মগ্ন হয়।

কুপায় মানুষের দুঃখের ত আর অভাব নাই, তবে কেন মানুষ আবার সাধ করিয়া আপন দুঃখের বোঝায় ভার চাপায়। ইহা তিনি বুঝিতেন না এবং ইহা তিনি সহিতেনও না। বালবিধবার দুঃখ দর্শনে তাঁহার হৃদয় বিগলিত হইল এবং সেই বিগলিত হৃদয়ের প্রস্রবণ হইতে করুণামন্দাকিনীর ধারা বহিল! স্মরনদী যখন ভূমিপৃষ্ঠে অবতরণ করে, তখন কার সাধ্য যে, সে প্রবাহ রোধ করে! বিজ্ঞাসাগরের করুণার প্রবাহ যখন ছুটিয়াছিল, তখন কাহারও সাধ্য হয় নাই যে, সেই গতির পথে দাঁড়াইতে পারে। দেশাচারের দারুণ বাধ তাহা রোধ করিতে পারে নাই। সমাজের অকুটীভঙ্গিতে তাহার স্রোত বিপরীত মুখে ফিরে নাই। এইখানে বিজ্ঞাসাগরের কঠোরতার পরিচয়। সরল, উন্নত, জীবন্ত মনুষ্য লইয়া তিনি শেষ পর্য্যন্ত স্থিরভাবে দণ্ডায়মান ছিলেন; কাহারও সাধ্য হয় নাই যে, সেই মেরুদণ্ড নমিত করে।

কিন্তু এই সমাজসংস্কার-ব্যাপারেও বিজ্ঞাসাগরের একটু অসাধারণত্ব দেখা যায়। প্রথমতঃ বিধবাবিবাহে হস্তক্ষেপের পূর্বে তিনি পিতামাতার অনুমতি চাহিয়াছিলেন। দ্বিতীয়তঃ বিধবাবিবাহের শাস্ত্রীয়তা প্রতিপাদনে তিনি প্রয়াসী হইয়াছিলেন। এই দুইটাই আমাদের পক্ষে চিস্তনীয় বিষয়। সম্প্রতি আমরা নীতিশাস্ত্র হইতে ‘মরাল কারেজ’ নামক একটা সামগ্রী প্রাপ্ত হইয়াছি। কর্তব্যবুদ্ধির প্ররোচনায় স্বার্থবিসর্জনে ব্যাপারটা যে কোন দেশের একচেটিয়া নহে, তাহা সদা সর্বদা আমরা ভুলিয়া যাই। আমাদের প্রাচীনা ভারতভূমিতেও এই কর্তব্যের জন্ত স্বার্থবিসর্জনের উদাহরণ ভূরি পরিমাণে পাওয়া যাইতে পারে।

তবে হুঃখের বিষয় যে, অত্যাধিক যে সব ঘটনায় ঢকানিনাদ হইয়া থাকে, এ দেশে তাহার অধিকাংশই নীরবে সম্পাদিত হয়। কিন্তু এই মরাল কারেজটা এ দেশে নূতন আমদানি এক অপূৰ্ণ জিনিষ। আরও হুঃখের বিষয় যে, একালের শিক্ষার সহিত এই মরাল কারেজের কি একটা সম্বন্ধ দাঁড়াইয়া গিয়াছে। লোকের বয়োবৃদ্ধি-সহকারে সংসারের হাইড্রলিক প্রেসের চাপ পড়িয়া ইহা অনেকটা সঙ্কুচিত ও শীর্ণ হইয়া পড়ে; কিন্তু শিক্ষানবিশ বালকগণের নৈতিক সাহসের আক্রমণটা নিরীহ পিতামাতার উপর দিয়া, নিরীহতর প্রতিবেশীর উপর দিয়া ও নিরীহতম মাষ্টার মহাশয়ের উপর দিয়াই নিষ্কিপ্ত হয়।

বলা বাহুল্য, বিদ্যাসাগর এই মরাল কারেজের প্রতি বিশেষ রাজি ছিলেন না। স্বাধীন আত্মাকেও কোন স্থানে স্বতঃপ্রবৃত্ত হইয়া পরাধীনতা স্বীকার করিতে হয়, তাহা তিনি জানিতেন। নিজের বুদ্ধি এবং নিজের প্রবৃত্তির মুখে বলা লাগাইয়া কোথায় তাহাদিগকে নিয়মিত রাখিতে হয়, তাহা তিনি বুঝিতেন। স্বর্গের দেবতায় তাঁহার কিরূপ আস্থা ছিল, জানি না; কিন্তু স্বর্গাদপি গরীয়ান্ জীবন্তদেবের তুষ্টির জন্ত সময়বিশেষে আপনার ধর্মবুদ্ধিকে পর্য্যন্ত বলিদান দেওয়ার প্রয়োজন হইতে পারে, তাহা তিনি স্বীকার করিতেন; তাঁহার গায় স্বতন্ত্র পুরুষ বঙ্গদেশে তখন ছিল না। কিন্তু মানবজীবনে এমন সময় আসিতে পারে, যখন সেই মুক্তবায়ুমাৰ্গে বিহারপ্রয়াসী স্বাভাব্যকে শৃঙ্খলাবদ্ধ করিয়া রাখিতে হয়; ইহা তিনি মানিতেন। সেই শৃঙ্খলকে কপটাচারের আয়স নিগড় মনে করিবার প্রয়োজন নাই। উহা প্রেমের শৃঙ্খল ও ভক্তির শৃঙ্খল,—মনুষ্যের প্রতি মনুষ্যের যে প্রেমের বন্ধন

প্রকৃতি আপন হাতে নির্মাণ করিয়া রাখিয়াছে, যে ভক্তির বন্ধন ব্যক্তি-নিহিত ক্ষুদ্র জীবনকে সমাজরূপী বিরাটপুরুষের ঐতিহাসিক জীবনের অভ্যন্তরে আবদ্ধ রাখিয়াছে। এই প্রেমের শিকল ও ভক্তির শিকল গলায় পরিয়া মনুষ্যজীবন ধন ও কৃতার্থ হয়; “মণিমুক্তার মোহন মালা” ইহার নিকট স্থান পায় না।

ঈশ্বরচন্দ্রের হৃদয় লইয়া আমরা সকলেই কিছু ধরাতলে অবতীর্ণ হই নাই। বালবিধবার অশ্রুজল আমাদের পাষণ্ডহৃদয়ে রেখাঙ্কন করে না; তাই আমরা ভণ্ডব্রহ্মচর্য্যার মলিন পাংশুবিক্ষেপে সেই অশ্রুজল মুছিতে যাই। ঈশ্বরচন্দ্রের বীরত্ব বিধবার দুঃখমোচনে সমর্থ হয় নাই। দেশাচারের জয়লাভ ঘটিয়াছে সত্য কথা, কিন্তু ইহাই বিধিলিপি, ইহাই প্রকৃতির নির্বন্ধ। স্বাভাবিক, সরল, ছদ্মবেশহীন মনুষ্যত্ব ইহাতে দ্রিয়মাণ হইবে, সন্দেহ নাই, কিন্তু দুঃখপ্রকাশ নিষ্ফল;—কেন না, ইহা বিধিলিপি।

এই দেশাচারগুলির সম্বন্ধে আমার কিছু বক্তব্য আছে। আমাদের মধ্যে ঠাঁহাদের বিশ্বাস যে, প্রাচীনকালে একদিন জন কয়েক ব্রাহ্মণ পরামর্শ করিয়া লাভের প্রত্যাশায় এই জঘন্য দেশাচার সকলের ব্যবস্থা করিয়াছেন, এবং জনসমাজ ভয়ে হউক বা নিবুদ্ধিতায় হউক, সেই সকল ব্যবস্থা নির্কিঁবাদের গ্রহণ করিয়াছে, ঠাঁহাদের সহিত আমি একমত নহি। ব্যক্তিবিশেষের বা শ্রেণীবিশেষের চেষ্টায় সমাজের ধারাবাহিক জীবন যে এইরূপে বিপর্য্যস্ত হইতে পারে, তাহা বিশ্বাস করিতে পারি না। আজকাল, সমাজ-শরীরের সহিত জীব-শরীরের তুলনা করা এবং সমাজের অন্তর্গত দেশাচারকে জীবশরীরোদ্গত ব্যাধিজনক বিস্ফোটকের সহিত তুলনা করা একটা প্রথা হইয়া দাঁড়াইয়াছে।

জীববিজ্ঞান অস্তর্গত আধুনিক নিদানশাস্ত্রে বিস্ফোটকের উৎপত্তির যে কারণ নির্দেশ কবে, তাহাতে এই তুলনা সঙ্গত বলিয়া বোধ হয় না। বাহির হইতে রোগের বীজ শরীর-মধ্যে লক্ষ্যপ্রবেশ হইয়া বিস্ফোটকের সৃষ্টি করে। কিন্তু সমাজশরীরের অন্তর্ভুক্ত পুরুষপরম্পরাগত প্রথাগুলিকে সকল সময়ে বাহির হইতে আগত বলিতে পারা যায় না। সমাজশরীরের বয়ঃক্রমামুসারে তাহারা জৈবিক নিয়ম মতেই আপনা হইতে উৎপত্তি, বৃদ্ধি ও লয় পায়। সমাজশরীরকেও ঠিক জীবশরীরের মত দ্রুত প্রকৃতির মধ্যে অবস্থান করিয়া সহস্র প্রতিকূল শক্তি হইতে আত্মরক্ষা করিয়া চলিতে হয়; এবং সেই আত্মরক্ষার প্রয়াসফলে তাহাতে বিবিধ অঙ্গ ও বিবিধ অবয়ব ও বিবিধ যন্ত্রের বিকাশ হয়। জীবশরীরের মধ্যে কতকগুলো অবয়বের চিহ্ন দেখা যায়, শরীরবিজ্ঞানে তাহাদিগকে vestigial organ আখ্যা দেয়। এই ক্ষুদ্র অবয়বগুলার জীবন ধারণে ও জীবন রক্ষণে কোনরূপ উপকার দেখা যায় না; বরং সময়ে সময়ে তাহারা জীবনের সংহারক হইয়া উঠে। সাধারণতঃ তাহারা তাহাদের নিরর্থক, অনাবশ্যক অস্তিত্বরক্ষার জন্য সমগ্র দেহের নিকট হইতে পুষ্টির ভাগ ও শক্তির ভাগ গ্রহণ করিয়া জীবনের প্রতিকূলতাই সাধন করে। ইহারা জীবনযাত্রার প্রতিকূল হইলেও আধুনিক জীব-বিজ্ঞান মতে বিস্ফোটকের বা ব্যাধির স্থানীয় নহে। জীবের ইতিহাসে এমন সময় ছিল, তখন তাহারা জীবনের পক্ষে আবশ্যক ছিল, তখন তাহারাও জীবনের আনুকূল্যসাধনে নিযুক্ত রহিত। তদানীন্তন বহিঃপ্রকৃতির সহিত যুদ্ধব্যাপারে জীবদেহকে সমর্থ করিবার জন্য তাহাদের আপনা হইতে বিকাশ হইয়াছিল।

বহিঃপ্রকৃতির পরিবর্তন সহ তাহাদের আবশ্যকতা অন্তর্হিত হইয়াছে, এবং প্রাকৃতিক নির্বাচনে কাজেই তাহাদের অস্তিত্বও বিলোপের অভিমুখে ক্রমশঃ অগ্রসর হইতেছে। সমাজশরীরে দেশাচারগুলিও কতকটা যেন সেইরূপ। সমাজের অতীত ইতিহাসে বিশেষ প্রয়োজন সাধনের উদ্দেশ্যে তাহাদের আবির্ভাব হইয়াছিল; এখন সেই প্রয়োজনের অভাব হওয়ায়, তাহারা অনাবশ্যক ও জীবনের যন্ত্রণাদায়ক হইয়া পড়িয়াছে। কিন্তু প্রাকৃতিক নির্বাচন বিনা অস্ত্র কোন প্রণালী নাই, যাহাতে তাহাদের উচ্ছেদ সাধন করিতে পারে। প্রাকৃতিক নির্বাচন সময়সাপেক্ষ এবং সেই দিনের প্রতীক্ষা করাই সম্ভব। সমাজ-শরীরের চিকিৎসক তুমি বিস্ফোটকভ্রমে যেখানে সেখানে ছুরিকা চালাইলে সর্বত্র সফল নাও হইতে পারে।

আমাদের দেশে জীবনচরিত লেখা প্রচলিত নাই, এবং কোন ব্যক্তির জীবনচরিত লিখিতে প্রবৃত্ত হইলেও তাহার উপকরণ উপযুক্ত পরিমাণে পাওয়া যায় না। বিদ্যাসাগরের জীবনচরিত রচনা করিয়া যাহারা জাতীয় সাহিত্যের এই কলঙ্ক অপনোদনের চেষ্টা করিয়াছেন, তাহারা বোধ হয় এই অভাবের ও অসুবিধার বিশেষ ভুক্তভোগী। এরূপ স্থলে বিদ্যাসাগরের মত মহাশয়গণের স্পর্শে যিনি কখন আসিবার সুবিধা পাইয়াছেন, যিনি কোন না কোন হুত্রে তাহার চরিত্রের কোন একটা দোষ দেখিতে পাইয়াছেন, তৎসমস্ত সাধারণের নিকট ব্যক্ত করা তাহাদের পক্ষে কর্তব্য। এই কর্তব্যের অমুরোধে আমার যাহা কিছু বলিবার আছে, ব্যক্তিগত হইলেও তাহা বলিতে সাহসী হইতেছি। বঙ্গদেশের মধ্যে ছোট বড় এমন ব্যক্তি অল্পই আছেন, যিনি কোন

না কোন প্রকারে বিদ্যাসাগরের নিকট ঋণগ্রস্ত নহেন। দূর
 মফঃস্বলের পল্লীগ্রামের মধ্যেও তাঁহার প্রভাব কতদূর বিস্তার
 লাভ করিয়াছিল, তাহা চিন্তার অগোচর। মহতের আসনভূমি
 তীর্থস্বরূপ। বঙ্গদেশের পল্লীতে পল্লীতে বিদ্যালয় প্রতিষ্ঠা যে সময়ে
 বিদ্যাসাগরের কর্ম্মবহুল জীবনের অন্ততম ব্যবসায় ছিল, সেই সময়ে
আমার পিতামহের ক্ষুদ্র কুটীর একদিন বিদ্যাসাগরের পাদম্পর্শে
 তীর্থস্থলে পরিণত হইয়াছিল। শৈশবকালে সেই গৌরবাবিহিত
 দিবসের প্রসঙ্গক্রমে বিদ্যাসাগর-সম্বন্ধে নানাকথা অন্তঃপুরবাসিনী-
 গণের মুখেও শুনিতে পাইতাম। পাঠশালায় প্রবেশলাভের পর
 বর্ণপরিচয় প্রথমভাগ, দ্বিতীয়ভাগ, কথামালা, আখ্যানমঞ্জরী প্রভৃতি
 পুস্তক পরম্পরার শুভ্র মলাটের উপর একই নাম অঙ্কিত দেখিয়া
 ঈশ্বরচন্দ্র বিদ্যাসাগরের সহিত পাঠশালা ও লেখাপড়া ও ছাপার
 বহি ও পণ্ডিতমহাশয়ের বেত্রদণ্ডের কিরূপ একটা অনির্বচনীয়
 সম্বন্ধ কল্পনায় স্থির করিয়া লইয়াছিলাম। বিদ্যাসাগরের আকৃতি
 ও পরিচ্ছদ ও কার্যাবলী-সম্বন্ধে যে সকল গল্প শুনিতাম, তৎসমুদয়
 সেই কল্পনার সহিত বিজড়িত করিয়া অন্তঃকরণ একটা বিদ্যাসাগর
 মূর্তি গড়িয়া ফেলিয়াছিল। বটতলার পুস্তকের বোঝা মাথায় করিয়া
 চটিজুতাধারী রুক্ষবেশ পরুষমূর্তি এক ব্যক্তি আমাদের পল্লীগ্রামে
 মাঝে মাঝে দেখা দিত। শ্রোতৃগণ মার্জ্জনা করিবেন, সেই
 লোকটাই যে নিশ্চিত বিদ্যাসাগর, এই ধারণা হইতে অব্যাহতি
 পাইতে আমাকে উত্তরকালে অনেক প্রয়াস পাইতে হইয়াছিল।
 আমার মনস্তত্ত্ববিৎ বন্ধুগণের উপর এই বিষম সমস্তার মীমাংসার
 ভার থাকিল। ১২৮৮ সালের ২১শে মাঘ তারিখে আমি
 কলিকাতা সহরে আসি এবং ২৩শে তারিখে তীর্থযাত্রীর আগ্রহের

সহিত পিতৃব্যদেবের সমভিব্যাহারে চিরাকাঙ্ক্ষিত বিদ্যাসাগরদর্শন-লালসা তৃপ্ত করিয়া জীবন ধৃত করি। শৈশবকালের কাল্পনিক বিদ্যাসাগরের সহিত প্রকৃত বিদ্যাসাগরের সাদৃশ্য দেখিয়াছিলাম কি না, সে কথা উত্থাপনের প্রয়োজন নাই। •কিন্তু সেই দিবস তাঁহার মুখ হইতে যে কয়েকটি বাক্য শুনিতে পাইয়াছিলাম, আজি পর্য্যন্ত তাহা আমার কর্ণবিবরে ধ্বনিত হইতেছে। আশা করি, সেই উদার প্রশস্ত স্নেহপূর্ণ হৃদয় হইতে নিঃসৃত হইয়া সেই পরিচিত কর্ণস্বর বঙ্গের যে সকল পুত্রকন্ঠ্যার শ্রবণপথে প্রবেশলাভ করিয়া হৃদয়ের ভিত্তিমূলে আঘাত দিয়াছে, তাঁহারা চিরদিন সেই কর্ণস্বরের স্মৃতিকর্তৃক প্রেরিত হইয়া সংসারের কর্মক্ষেত্রে বিচরণ করিবেন। সেই প্রাচ্য মহুশ্যের আদর্শ তাঁহাদের জীবনকে যুগপৎ প্রণোদিত ও সংযমিত রাখিবে। আমাদের এই হৃদ্বিনেও যদি মহুশ্যের সেই আদর্শের আবির্ভাব সম্ভবপর হইয়া থাকে, তাহা হইলে আমাদের প্রাচীনা পূজনীয়া জননীর দেহে নবজীবনসঞ্চারের আশা কি কখনই ফলিবে না? কিন্তু ভবিষ্যতের ঘনাক্ষকার ভিন্ন করিয়া দীপবর্তিকা আনয়ন করিবে কে? কে বলিবে, আমাদের পরিণতি কোথায়? মহাপুরুষের আবির্ভাব ভারতভূমিতে নূতন ঘটনা নহে। আশা যে, মহাপুরুষের আবির্ভাবই ভারতের উদ্ধারসাধনে সমর্থ হইবে। কিন্তু ভবিষ্যতের সেই মহাপুরুষ কোথায়? দক্ষাস্থিপঞ্জরময় ভারতের এই মহাশ্মশানে এই মৃতজাতির শবদেহে নূতন জীবন সঞ্চার করিবে কে?

রামেন্দ্রসুন্দর জিবেদী।

লক্ষ্মণ

বালকাণ্ডে লিখিত হইয়াছে, লক্ষ্মণ রামচন্দ্রের “প্রাণইবা পর:”—
অপর প্রাণের ত্রায় । ভরত ছাড়া আমরা রামকে কল্পনা
করিতে পারি, এমন কি সীতা ছাড়া রামচরিত্র কল্পনা করিবার
সুবিধাও কবিশুক্র দিয়াছেন, কিন্তু লক্ষ্মণ ছাড়া রামচরিত্র একান্ত
অসম্পূর্ণ ।

লক্ষ্মণের ভ্রাতৃত্বকর্তা মৌন এবং ছায়ার ত্রায় অমুগামী !
লক্ষ্মণ রামের প্রতি ভালবাসা কথায় জানাইবার জন্য ব্যাকুল ছিলেন
না, নিতান্ত কোনরূপ অবস্থার সঙ্কটে না পড়িলে তিনি তাঁহার
হৃদয়ের সুগভীর স্নেহের আভাস দিতে ইচ্ছুক হইতেন না ; বাধ্য
হইয়া দুই এক স্থলে তিনি ইঙ্গিতমাত্রে তাঁহার হৃদয়ের ভাব ব্যক্ত
করিয়াছেন, কিন্তু তাঁহার অপরিসীম রামপ্রেম মৌনভাবেই
আমাদিগের নিকট সর্বত্র ব্যক্ত হইয়া পড়িয়াছে ।

ভরত, সীতা এবং রামচন্দ্রও মনের আবেগ সংবরণ করিতে
জানিতেন না ; কিন্তু লক্ষ্মণ স্নেহসম্বন্ধে সংযমী—যে স্নেহ পরিপূর্ণ,
অথচ তাহা আবেগে উচ্ছ্বসিত হইয়া উঠে নাই ; এই মৌন স্নেহচিহ্ন
আমাদিগকে সর্বত্যাগী কষ্টসহিষ্ণু ভ্রাতৃত্বকর্তার অশেষ কথা
জানাইতেছে ।

লক্ষ্মণ আজন্ম রামচন্দ্রের ছায়ার ত্রায় অমুগামী ।

“ন চ তেন বিনা নিদ্রাং লভতে পুরুষোত্তমঃ ।

শ্রুটমন্নমুপানীতমন্নাতি ন হি তং বিনা ॥”

—রামের কাছে না গুইলে তাঁহার রাগে ঘুম হয় না, রামের প্রসাদ ভিন্ন কোন উপায়ে খাণ্ডে তাঁহার তৃপ্তি হয় না।

“যদা হি হয়মাক্রুতৌ মুগয়াং যাতি রাঘবঃ।

অথৈনং পৃষ্ঠতোহভ্যোতি সধনুঃ পরিপালয়ন ॥”

—রাম যখন অশ্বারোহণে মুগয়ায় যাত্রা করেন, অমনি ধনুহস্তে তাঁহার শরীর রক্ষা করিয়া বিশ্বস্ত অমুচর তাঁহার অমুগমন করেন। যে দিন বিশ্বামিত্রের সঙ্গে রাম রাক্ষসবধকল্পে নিবিড় বনপথে যাইতেছিলেন, সে দিনও কাকপক্ষধর লক্ষ্মণ সঙ্গে সঙ্গে। শৈশবদৃশ্যাবলীর এই সকল চিত্রের মধ্যে আত্মহারা লক্ষ্মণের ভ্রাতৃত্বজ্ঞির ছবি মোনভাবে ফুটিয়া উঠিয়াছে।

রামের অভিষেক-সংবাদে সকলেই কত সন্তোষ প্রকাশের জন্ত ব্যস্ত হইলেন, কিন্তু লক্ষ্মণের মুখে আশ্লাদহৃচক কথা নাই, নীরবে রামের ছায়ার শায় লক্ষ্মণ পশ্চাৎভী। কিন্তু রাম স্বল্পভাষী ভ্রাতার হৃদয় জানিতেন, অভিষেক-সংবাদে সুখী হইয়া সর্বপ্রথমেই লক্ষ্মণের কণ্ঠলগ্ন হইয়া বলিলেন,—

“জীবিতঞ্চাপি রাজ্যঞ্চ স্বদৰ্শমভিকাময়ে।”

—আমি জীবন ও রাজ্য তোমার জন্তই কামনা করি। ভ্রাতার এইরূপ দুই একটা কথাই লক্ষ্মণের অপূৰ্ণ স্নেহের একমাত্র পুরস্কার ও পরম পরিতৃপ্তি। আমরা কল্পনানয়নে দেখিতে পাই, রামের এই স্নিগ্ধ আদরে “সুবর্ণচ্ছবি” লক্ষ্মণের গণ্ডস্থ নীরব প্রকল্পতায় রক্তিমাভ হইয়া উঠিয়াছে

কিন্তু এই মোন স্বল্পভাষী যুবক, রামের প্রতি কেহ অন্তর্য করিলে, তাহা ক্ষমা করিতে জানিতেন না। যে দিন কৈকেয়ী অভিষেক-ব্রতোজ্জল প্রকল্প রামচন্দ্রকে মৃত্যুতুল্য বনবাসাজ্ঞা

গুনাইলেন, রামের মূর্তি সহসা বৈরাগ্যের শ্রীতে ভূষিত হইয়া উঠিল, তিনি ঋষিবৎ নির্লিপ্তভাবে গুরুতর বনবাসাজ্ঞা মাথায় তুলিয়া লইলেন, অভিষেক-সম্ভারের সমস্ত আয়োজন যেন তাঁহাকে ব্যস্ত করিতে লাগিল; সেই দিন সেই উৎকট মুহূর্তেও তাঁহার আর কোন সঙ্গী ছিল না, তাঁহার পশ্চাৎগে চিরস্মৃহৎ ভক্ত ক্ষুধ হইয়া দাঁড়াইয়াছিলেন, বান্ধীকি দুইটা ছত্রে সেই মোন চিত্রটা আঁকিয়াছেন—

“তং বাস্পপরিপূর্ণাক্ষঃ পৃষ্ঠতোহ্নুজগামহ ।

লক্ষ্মণঃ পরমক্রুদ্ধঃ স্মিত্ত্রানন্দবর্দ্ধনঃ ॥”

—লক্ষ্মণ অতিমাত্র ক্রুদ্ধ হইয়া বাস্পপূর্ণচক্ষে ভ্রাতার পশ্চাৎ পশ্চাৎ যাইতে লাগিলেন ।

এই অগ্রায় আদেশ তিনি সহ্য করিতে পারেন নাই । রামচন্দ্র ঐহাদিগকে অকুণ্ঠিতচিত্তে ক্ষমা করিয়াছেন, লক্ষ্মণ তাঁহাদিগকে ক্ষমা করিতে পারেন নাই । রামের বনবাস লইয়া তিনি কৌশল্যার সম্মুখে অনেক বাঞ্ছিতগুণ করিয়াছিলেন, ক্রুদ্ধ হইয়া তিনি সমস্ত অযোধ্যাপুরী নষ্ট করিতে চাহিয়াছিলেন । তিনি রামের কর্তব্য-বুদ্ধির প্রশংসা করেন নাই—এই গর্হিত আদেশপালন ধর্মসঙ্গত নহে, ইহাই বুঝাইতে চেষ্টা করিয়াছিলেন । এই তেজস্বী যুবক যখন দেখিতে পাইলেন, রামচন্দ্র একান্তই বনবাসে যাইবেন, তখন কোথা হইতে এক অপূর্ণ কোমলতা তাঁহাকে অধিকার করিয়া বসিল, তিনি বালকের ছায় রামের পদধূম্মে লুপ্ত হইয়া কাঁদিতে লাগিলেন—

“ঐশ্বর্য্যাপি লোকানাং কাময়ে ন ভয়া বিনা ।”

—অমরত্ব কিংবা ত্রিলোকের ঐশ্বর্য্যও আমি তোমাভিন্ন আকাঙ্ক্ষা

করি না। রামের পাদপীড়নপূর্বক—উহা অশ্রুসিক্ত করিয়া নববধূটির হ্রায় সেই ক্ষাত্তেজোদীপিত মূর্তি ফুলসম স্নেহকোমল হইয়া সঙ্গে বাইবার অনুমতি প্রার্থনা করিল। এই ভিক্ষা স্নেহহৃৎক দীর্ঘ বক্তৃতায় অভিব্যক্ত হয় নাই, অতি অল্প কথায় তিনি রামের সঙ্গী হইবার জ্ঞাত অনুমতি চাহিলেন, কিন্তু সেই অল্প কথায় স্নেহগভীর আত্মত্যাগী হৃদয়ের ছায়া পড়িয়াছে। রাম হাতে ধরিয়া তাঁহাকে তুলিয়া লইলেন, “প্রাণসম প্রিয়”, “বন্ধু”, “সখা” প্রভৃতি স্নেহমধুর সম্ভাষণে তাঁহাকে সম্বোধন করিয়া বনযাত্রা হইতে প্রতিনিবৃত্ত করিতে চেষ্টা পাইলেন, কিন্তু লক্ষ্মণ দুই একটা দৃঢ় কথায় তাঁহার অটল সঙ্কল্প জ্ঞাপন করিলেন, “আপনি শৈশব হইতে আমার নিকট প্রতিশ্রুত, আমি আপনার আজন্ম সহচর, আজ তাহার ব্যতিক্রম করিতে চাহিতেছেন কেন?”

লক্ষ্মণ সঙ্গে চলিলেন। এই আত্মত্যাগী দেবতার জ্ঞাত কেহ বিলাপ করিল না। যে দিন বিশ্বামিত্র রামকে লইয়া বাইবার জ্ঞাত দশরথের নিকট প্রার্থনা করিয়াছিলেন, সে দিন—

“উনষোড়শবর্ষো মে রামো রাজীবলোচনঃ।”

বলিয়া বৃদ্ধ রাজা ভীত হইয়া পড়িয়াছিলেন, কিন্তু তৎকনিষ্ঠ আর একটা রাজীবলোচন যে ছরসুরাক্ষসবধকল্পে ভ্রাতার অনুবর্তী হইয়া চলিলেন, তজ্জ্ঞাত কেহ আক্ষেপ করেন নাই। আজ রাম, লক্ষ্মণ, সীতা বনে চলিয়াছেন, অযোধ্যার যত নয়নাশ্রু, তাহা রহিয়া রহিয়া রামসীতার জ্ঞাত বর্ষিত হইতেছে। কিন্তু লক্ষ্মণের জ্ঞাত কেহ আক্ষেপ করেন নাই, এমন কি, স্মৃতিভ্রাতাও বিনায়কালে গুল্লের কর্ণলগ্ন হইয়া ক্রন্দন করেন নাই, তিনি দৃঢ় অথচ স্নেহাঙ্গিকঠে

লক্ষ্মণকে বলিয়াছিলেন—

“রামং দশরথং বিদ্ধি মাং বিদ্ধি জনকাস্বজাম্ ।

অযোধ্যামটবৌং বিদ্ধি গচ্ছ তাত যথাসুখম্ ॥”

—যাও বৎস, স্বচ্ছন্দমনে বনে যাও—রামকে দশরথের স্থায় দেখিও, সীতাকে আমার স্থায় মনে করিও এবং বনকে অযোধ্যা বলিয়া গণ্য করিও । মাতার চক্ষুর অশ্রুবিন্দু লক্ষ্মণ পাইলেন না, বরং সুমিত্রা তাঁহাকে যেন কর্তব্যপালনের জন্ত আগ্রহসহকারে স্বরাষিত করিয়া দিলেন—

“সুমিত্রা গচ্ছ গচ্ছেতি পুনঃ পুনরুবাচ তম্ ।”

—সুমিত্রা তাঁহাকে পুনঃ পুনঃ “যাও যাও” এই কথা বলিতে লাগিলেন ।

মৌন সন্ন্যাসী আত্মীয় স্নহদবর্গের উপেক্ষা পাইয়াছিলেন, কিন্তু তাহা তিনি মনেও করেন নাই, রামচন্দ্রের জন্ত যে শোকোচ্ছ্বাস, তাহার মধ্যেই তিনি আত্মহারা হইয়া পড়িয়াছিলেন । তিনি কাহারও নিকটে বিলাপ প্রত্যাশা করেন নাই, রামপ্রেমে তাঁহার নিজের সত্তা লুপ্ত হইয়া গিয়াছিল ।

আরণ্যজীবনের যাহা কিছু কঠোরতা, তাহার সমধিক ভাগ লক্ষ্মণের উপর পড়িয়াছিল,—কিংবা তাহা তিনি আহ্লাদ-সহকারে মাথায় তুলিয়া লইয়াছিলেন । গিরিসান্নদেশের পুষ্পিত বন্যতরুরাজী হইতে কুসুমচয়ন করিয়া রামচন্দ্র সীতার চূর্ণকুন্তলে পরাইয়া দিতেন ; গৈরিকরেণু-দ্বারা সীতার স্নন্দর ললাটে তিলক রচনা করিয়া দিতেন ; পদ্ম তুলিয়া সীতার সহিত মন্দাকিনী-তীরে অবগাহন করিতেন, কিংবা গোদাবরীতীরস্থ বেতসকুঞ্জে সীতার

উৎসঙ্গে মস্তক রক্ষা করিয়া স্তূপে নিদ্রা যাইতেন ; আর এদিকে মোন সন্ন্যাসী খনিত্র-দ্বারা মৃত্তিকা খনন করিয়া পর্ণশালা নির্মাণ করিতেন, কখনও পরশুহস্তে শালশাখা কঠন করিতেন, কখনও অস্ত্রশস্ত্র এবং সীতার পরিচ্ছদ ও অলঙ্কারাদিতে পূর্ণ বিপুল বংশপেটিকা হস্তে লইয়া একস্থান হইতে স্থানান্তরে যাত্রা করিতেন, কখনও বা মহিষ ও বৃষের করীষ সংগ্রহ করিয়া অগ্নি জালিবার ব্যবস্থা করিতেন। একদিন দেখিতে পাই, শীতকালের তুষারমলিন জ্যোৎস্নায় শেষরাত্রিতে যবগোধূমাচ্ছন্ন বনপন্থায় নালশেষ নলিনী-শোভিত সরসীতে কলস লইয়া তিনি জল তুলিতেছেন। অত্র একদিন দেখিতে পাই, চিত্রকূটপর্বতের পর্ণশালা হইতে সরসীতটে যাইবার পথটী চিহ্নিত করিবার জন্ত তিনি পথে পথে উচ্চ তরুশাখায় চীরখণ্ড বদ্ধ করিয়া রাখিতেছেন। কখনও বা তিনি কোমলদর্ভাস্কুর ও বৃক্ষপর্ণ-দ্বারা রামের শয্যা প্রস্তুত করিয়া অপেক্ষা করিতেছেন, কখনও বা দেখিতে পাই তিনি কালিন্দী উত্তীর্ণ হইবার জন্ত বৃহৎ কাষ্ঠগুলি গুচ্ছ বস্ত্র ও বেতসলতা-দ্বারা সুসংবদ্ধ করিয়া মধ্যভাগে জম্বুশাখা-দ্বারা সীতার উপবেশন জন্ত সুখাসন রচনা করিতেছেন। এই সংযমী স্নেহবীর ব্রাহ্মসেবায় তাঁহার নিজসত্তা হারাইয়া ফেলিয়াছিলেন। রামচন্দ্র পঞ্চবটীতে উপস্থিত হইয়া লক্ষ্মণকে বলিয়াছিলেন—“এই সুন্দর তরুরাজিপূর্ণ প্রদেশে পর্ণশালারচনার জন্ত একটী স্থান খুজিয়া বাহির করিয়া লও।” লক্ষ্মণ বলিলেন, “আপনি যে স্থানটী ভালবাসেন, তাহাই দেখাইয়া দিন, সেবকের উপর নির্দোষতার ভর দিবেন না।” ব্রাহ্মসেবায় এরূপ আত্মহার্য ভূত্য,—এমন আর কোথায় দেখিয়াছেন ? রামচন্দ্র স্থান নির্দেশ করিয়া দিলে

লক্ষ্মণ ভূমির সমতা সম্পাদন করিয়া খনিত্রহস্তে বৃত্তিকাখননে প্রবৃত্ত হইলেন ।

আর এক দিনের দৃশ্য মনে পড়ে,—গভীর অরণ্যে চারিদিকে ক্লৃষ্ণসর্প বিচরণ করিতেছে, পথহারা বিপন্ন পথিকত্রয় রাজিবাসের জন্ত জঙ্গলের নিভূতে বৃক্ষনিম্নে শুইয়া আছেন, সীতার সুন্দর মুখখানি অনশন ও পর্য্যটনে একটু হতশ্রী হইয়া পড়িয়াছে । রামচন্দ্রের এই দুঃখময়ী রজনীর কষ্ট অসহ্য হইল,—তিনি লক্ষ্মণকে অযোধ্যায় ফিরিয়া যাইবার জন্ত বারংবার পীড়াপীড়ি করিতে লাগিলেন, “এ কষ্ট আমার এবং সীতারই হউক, তুমি ফিরিয়া যাও, শোকের অবস্থায় সান্ত্বনাদান করিয়া আমার মাতাদিগকে পালন করিও ।” লক্ষ্মণ স্বীয় স্নেহ-সম্বন্ধে বেশী কথা কহিতে জানিতেন না, রামের এবম্বিধ কাতরোক্তিতে দুঃখিত হইয়া বলিলেন—

“ন হি তাতং ন শত্রুঘ্নং ন সুমিত্রাং পরন্তপ ।

দ্রষ্টুমিচ্ছ্যমগ্ৰাহং স্বর্গঞ্চাপি ত্বয়া বিনা ॥”

—আমি পিতা, সুমিত্রা, শত্রুঘ্ন, এমন কি স্বর্গও তোমাকে ছাড়িয়া দেখিতে ইচ্ছা করি না ।

কবন্ধ মরিল, জটায়ু মরিলেন ; আমরা দেখিতে পাই, লক্ষ্মণ নিঃশব্দে সমাধিস্থল খনন করিয়া কাষ্ঠ আহরণপূর্ব্বক কবন্ধ ও জটায়ুর সংকার করিতেছেন । দিবারাত্র তাঁহার বিশ্রাম ছিল না—এই ভ্রাতৃসেবাই তাঁহার জীবনের পরম আকাঙ্ক্ষার বিষয় ছিল । বনে আসিবার সময় তাহাই তিনি বলিয়া আসিয়াছিলেন—

“ভবাংস্তু সহ বৈদেহা গিরিসানুযু রংস্তসে ।

অহং সর্কং করিষ্যামি জাগ্রতঃ স্বপতশ্চ তে ।

ধনুরাদায় সগুণং খনিত্রপিটকাধরঃ ॥”

—দেবী জ্ঞানকীর সঙ্গে আপনি গিরিসান্নদেশে বিহার করিবেন, জাগরিত বা নিদ্রিতই থাকুন, আপনার সকল কৰ্ম্ম আমিই করিয়া দিব। খনিজ, পিটক এবং ধনু হস্তে আমি আপনার সঙ্গে সঙ্গে ফিরিব।

বনবাসের শেষ বৎসর বিপদ আসিয়া উপস্থিত হইল; রাবণ সীতাকে হরণ করিয়া লইয়া গেল। সীতার শোকে রাম ক্ষিপ্তপ্রায় হইয়া পড়িলেন, ভ্রাতার এই দারুণ কষ্ট দেখিয়া লক্ষ্মণও পাগলের মত সীতাকে ইতস্ততঃ খুঁজিয়া বেড়াইতে লাগিলেন। রামের অমুজ্জায় তিনি বারংবার গোদাবরীর তীরভূমি খুঁজিয়া আসিলেন। এইমাত্র গোদাবরীতীর তন্ন তন্ন করিয়া দেখিয়া আসিয়াছেন, রাম তখনই আবার বলিলেন—

“শীঘ্রং লক্ষ্মণ জানীহি গঙ্গা গোদাবরীং নদীম্।

অপি গোদাবরীং সীতা পদ্মান্ধানয়িতুং গতা ॥”

পুনরায় গোদাবরীর তটদেশে যাইয়া লক্ষ্মণ সীতাকে ডাকিতে লাগিলেন, কিন্তু তাঁহার সন্ধান না পাইয়া ভয়ে ভয়ে রামের নিকট উপস্থিত হইয়া আর্তস্বরে বলিলেন—

“কং হু সা দেশমাপন্না বৈদেহী ক্লেশনাশিনী।”

—কোন্ দেশে দেশে ক্লেশনাশিনী বৈদেহী গিয়াছেন—তাহা বুঝিতে পারিলাম না।—

“নৈতাং পশ্যামি তীর্থেষু ক্রোশতো ন শৃণোতি মে।”

—গোদাবরীর অবতরণ-স্থানসমূহের কোথাও তাঁহাকে দেখিতে পাইলাম না—ডাকিলাম, কোন উত্তর পাইলাম না।

“লক্ষ্মণস্ত বচঃ শ্রদ্ধা দীনঃ সন্তাপমোহিতঃ।

রামঃ সমভিচক্রাম স্বয়ং গোদাবরীং নদীম্ ॥”

—লক্ষ্মণের কথা শুনিয়া ত্রিয়মাণচিন্তে রাম স্বয়ং সেই গোদাবরীর
অভিমুখে ছুটিয়া গেলেন ।

ভ্রাতার এই উদ্দাম শোক দেখিয়া লক্ষ্মণ যেরূপ কষ্ট পাইতে-
ছিলেন, তাহা অনমুভবনীয় । কত করিয়া তিনি রামকে সান্তনা
দিবার চেষ্টা করিতেছেন, রাম কিছুতেই শান্ত হইতেছেন না ।
লক্ষ্মণের কণ্ঠলগ্ন হইয়া রাম বারংবার বলিতেছেন—

“হা লক্ষ্মণ মহাবাহো পশুসি ত্বং প্রিয়াং কচিৎ ।”

—লক্ষ্মণ, তুমি কি সীতাকে কোথাও দেখিতে পাইতেছ ? এই
শোকাকুল কণ্ঠের আর্তিতে লক্ষ্মণের চক্ষু জলে ভরিয়া আসিত,
তাহার মুখ শুকাইয়া যাইত ।

দধু নামক শাপগ্রস্ত যক্ষের নির্দেশানুসারে রাম লক্ষ্মণের সহিত
পম্পাতীরে স্নগ্ৰীবের সন্ধানে গেলেন । রাম কখনও বেগে পথ
পর্যটন করেন, কখনও মূর্ছিত হইয়া বসিয়া পড়েন, কখনও “সীতা
সীতা” বলিয়া আকুলকণ্ঠে ডাকিতে থাকেন, কখনও “হা দেবি,
একবার এস, তোমার শূন্য পর্ণশালার অবস্থা দেখিয়া যাও”—এই
বলিয়া কাদিতে কাদিতে বিলুপ্তসংজ্ঞ হইয়া পড়েন, কখনও
পম্পানীরবর্ত্তি-পদ্মকোষ-নিষ্ক্রান্ত-পবনম্পর্শে উল্লসিত হইয়া বলিয়া
উঠেন,—

“নিশ্বাস ইব সীতায়্য বাতি বায়ুর্মনোহরঃ ।”

সজ্জলনেত্রে চিরসুহৃৎ চিরসেবক লক্ষ্মণ রামকে এই অবস্থায় যখন
পম্পাতীরে লইয়া আসিলেন, তখন হুম্যানু স্নগ্ৰীবকর্তৃক প্রেরিত
হইয়া সেখানে উপস্থিত হইলেন এবং তাঁহাদের পরিচয় জিজ্ঞাসা
করিলেন । হুম্যানু সন্নম ও আদরের সহিত বলিলেন, “আপনারা

পৃথিবীজয়ের শক্তিসম্পন্ন, আপনারা চীর ও বদ্ধল ধারণ করিয়াছেন কেন? আপনাদের বৃত্তান্তিত মহাবাহু সর্বভূষণে ভূষিত হইবার যোগ্য, সে বাহু ভূষণহীন কেন?” এই আদরের কণ্ঠস্বর শুনিয়া লক্ষ্মণের চিররুদ্ধ হৃৎ উচ্ছ্বসিত হইয়া উঠিল। যিনি চিরদিন মৌনভাবে স্নেহাঙ্গ হৃদয় বহন করিয়া আসিয়াছেন, আজ তিনি স্নেহের ছন্দ ও ভাষা রোধ করিতে পারিলেন না। পরিচয় প্রদানের পর তিনি বলিলেন—“দম্বুর নির্দেশে আজ আমরা সূত্রীবের শরণাপন্ন হইতে আসিয়াছি। যে রাম শরণাগতদিগকে অগণিত বিত্ত অকুণ্ঠিতচিত্তে দান করিয়াছেন, সেই জগৎপূজ্য রাম আজ বানরাধিপতির শরণ পাইবার জন্ত এখানে উপস্থিত। ত্রিলোকবিশ্রুতকীর্তি দশরথের জ্যেষ্ঠ পুত্র আমার গুরু রামচন্দ্র স্বয়ং বানরাধিপতির শরণ লইবার জন্ত এখানে আসিয়াছেন। সর্বলোক ধাহার আশ্রয়লাভে কৃতার্থ হইত, যিনি প্রজাপুঞ্জের রক্ষক ও পালক ছিলেন, আজ তিনি আশ্রয়ভিক্ষা করিয়া সূত্রীবের নিকট উপস্থিত। তিনি শোকাভিভূত ও আর্ত, সূত্রীব অবশ্যই প্রসন্ন হইয়া তাঁহাকে শরণ দান করিবেন।”—বলিতে বলিতে লক্ষ্মণের চিরনিরুদ্ধ অশ্রু উচ্ছ্বসিত হইয়া উঠিল, তিনি কাঁদিয়া মৌন হইলেন। রামের দূরবাসাদর্শনে লক্ষ্মণ একান্তরূপে অভিভূত হইয়াছিলেন, তাঁহার দৃঢ়চরিত্র আর্দ্র ও করুণ হইয়া পড়িয়াছিল।

এই নিত্য হৃৎসহায় ভৃত্য, সখা ও কনিষ্ঠ ভ্রাতা রামের প্রাণপ্রিয় ছিলেন, তাহা বলা বাহুল্য। অশোকবনে হনুমানের নিকট সীতা বলিয়াছিলেন, “ভ্রাতা লক্ষ্মণ আমা অপেক্ষা রামের নিয়ত প্রিয়তর।” রাবণের শেলে বিদ্ধ লক্ষ্মণ যে দিন যুদ্ধক্ষেত্রে শূতকল্প হইয়া পড়িয়াছিলেন, সে দিন আমরা দেখিতে পাই, আহত

শাবককে ব্যাঘ্রী যেরূপ রক্ষা করে, রাম কনিষ্ঠকে সেইরূপ আশুলিয়া বসিয়া আছেন;—রাবণের অসংখ্য শর রামের পৃষ্ঠদেশ ছিন্ন ভিন্ন করিতেছিল, সেদিকে দৃকপাত না করিয়া রাম লক্ষ্মণের প্রতি সজল চক্ষু ত্রস্ত করিয়া তাঁহাকে রক্ষা করিতেছিলেন। বানরসৈন্য লক্ষ্মণের রক্ষাভার গ্রহণ করিলে তিনি যুদ্ধে প্রবৃত্ত হইলেন, এবং রাবণ পৃষ্ঠভঙ্গ দিয়া চলিয়া গেলে মৃতকল্প ভ্রাতাকে অতি স্নেহমূল্য ভাবে আলিঙ্গন করিয়া রাম বলিলেন—“তুমি যেরূপ আমাকে বনে অনুগমন করিয়াছিলে, আজ আমিও তেমনি তোমাকে যমালয়ে অনুগমন করিব, তোমাকে ছাড়িয়া আমি বাঁচিতে পারিব না। সীতার মত স্ত্রী খুঁজিলে অনেক পাওয়া যাইতে পারে, কিন্তু তোমার মত ভাই, মন্ত্রী ও সহায় পাওয়া যাইবে না। দেশে দেশে স্ত্রী ও বন্ধু পাওয়া যাইতে পারে, কিন্তু এমন দেশ দেখিতে পাই না, যেখানে তোমার মত ভাই জুটিবে। এখন উঠ, নয়ন উন্মীলন করিয়া আমায় একবার দেখ; আমি পর্বতে বা বন-মধ্যে শোকার্ত, প্রমত্ত বা বিষন্ন হইলে, তুমিই প্রবোধবাক্যে আমায় সান্ত্বনা দিতে, এখন কেন এইরূপ নীরব হইয়া আছ?”

রামের আজ্ঞাপালনে লক্ষ্মণ কোন কালে স্বিকৃতি করেন নাই, ত্রায়সঙ্গত হউক বা না হউক, লক্ষ্মণ সর্বদা মৌনভাবে তাহা পালন করিয়াছেন। রাম সীতাকে বিপুল সৈন্যসংখ্যের মধ্য দিয়া শিবিকা ত্যাগ করিয়া পদব্রজে আসিতে আজ্ঞা করিলেন। শত শত দৃষ্টির গোচরীভূত হইয়া সীতা লজ্জায় যেন মরিয়া যাইতেছিলেন, ব্রীড়া-ময়ীর সর্বাঙ্গ কম্পিত হইতেছিল। লক্ষ্মণ এই দৃশ্য দেখিয়া ব্যথিত হইলেন, কিন্তু রামের কার্যের প্রতিবাদ করিলেন না। যখন সীতা অগ্নিতে প্রাণবিসর্জন দিতে কৃতসংকল্পা হইয়া লক্ষ্মণকে চিতা

প্রস্তুত করিতে আদেশ করিলেন,—তখন লক্ষ্মণ রামের অভিপ্রায় বুঝিয়া সজলচক্ষে চিতা প্রস্তুত করিলেন, কিন্তু কোন প্রতিবাদ করিলেন না। ভ্রাতৃ-স্নেহে তিনি স্বীয় অস্তিত্বশূন্য হইয়া গিয়াছিলেন। ভরতের, এমন কি সীতারও, মৃদু অথচ তেজোব্যঞ্জক ব্যক্তিত্ব তাঁহাদের স্নগভীর ভালবাসার মধ্যে আমরা উপলব্ধি করিতে পারি, কিন্তু রামের প্রতি লক্ষ্মণের স্নেহ সম্পূর্ণরূপে আত্মহারা। ভরত রামচন্দ্রের জন্ত যে সকল কষ্ট স্বীকার করিয়াছেন, তাহা আমাদের প্রাণে আঘাত দেয়—তাদৃশ ব্যক্তির পক্ষে ঐরূপ আত্মত্যাগ আমাদের নিকট অপূর্ব পদার্থ বলিয়া বোধ হয়; ভরত স্বর্গের দেবতার গ্রায়, তাঁহার ক্রিয়াকলাপ ঠিক যেন পৃথিবীবাসীর নহে, উহা সর্বদাই ভাবের এক উচ্চগ্রামে আমাদের মনোযোগ সবলে আকর্ষণ করিয়া রাখে। কিন্তু লক্ষ্মণের আত্মত্যাগ এত সহজভাবে হইয়া আসিয়াছে, উহা বায়ু ও জলের মত এত সহজপ্রাপ্য যে, অনেক সময়ে ভরতের আত্মত্যাগের পার্শ্বে লক্ষ্মণের খনিজদ্বারা যুক্তিকাখনন প্রভৃতি সেবাবৃত্তির মধ্যে আমরা তাঁহার স্নগভীর প্রেমের গুরুত্ব অনুভব করিতে ভুলিয়া যাই। অত্যন্ত সহজে প্রাপ্ত বলিয়া যেন উহা উপেক্ষা পাইয়া থাকে। তথাপি ইহা স্থির যে, লক্ষ্মণ ভিন্ন রামকে আমরা একেবারেই কল্পনা করিতে পারি না। তিনি রামের প্রাণ ও দেহের সহিত একীভূত হইয়া গিয়াছিলেন। দীর্ঘ রজনীর পরে অকস্মাৎ তরুণ অরুণালোকে যেরূপ জগৎ উদ্ভাসিত হইয়া উঠে,—ধরাবাসিগণ সেই স্বর্গভ্রষ্ট আলোকচ্ছটায় পুলকে উন্নত হইয়া উঠে, ভরতের ভ্রাতৃপ্রীতি কতকটা সেইরূপ,—কৈকেয়ীর ষড়যন্ত্র ও রামবনবাসাদির পরে ভরতের অচিস্তিতপূর্ব প্রীতি বিচ্ছুরিত হইয়া আমাদের সহসা সেইরূপ চমৎকৃত করিয়া

ভুলে, আমরা ঠিক যেন ততটা প্রত্যাশা করি না ! কিন্তু লক্ষ্মণের প্রেম আমাদের নিত্য-প্রয়োজনীয় বায়ুপ্রবাহ, এই বিশাল অপরিসীম স্নেহতরঙ্গ আমাদের সঞ্জীবিত রাখিয়াছে, অথচ প্রতিক্ষণে আমরা ইহা ভুলিয়া যাইতেছি। লক্ষ্মণ রামকে বলিয়াছিলেন—“জল হইতে উদ্ধৃত মীনের স্থায় আপনাকে ছাড়িয়া আমি এক মুহূর্তও বাঁচিতে পারিব না।” এই অসীম স্নেহের তিনি কোন মূল্য চান নাই, ইহা আপনিই আপনার পরম পরিতোষ, ইহা আপনাতেই আপনি সম্পূর্ণ, ইহা প্রত্যাশী নহে, ইহা দাতা। কখন বহুকৃচ্ছ সাধনে অবসন্ন লক্ষ্মণকে রাম একটি স্নেহের কথা বলিয়াছেন, কিংবা একবার আলিঙ্গন দিয়াছেন, লক্ষ্মণের নেত্রপ্রান্তে একটি পুলকাক্ত ফুটিয়া উঠিয়াছে; কিন্তু তিনি রামের কাছে তাহা প্রত্যাশা করিয়া অপেক্ষা করেন নাই

লক্ষ্মণের চরিত্রের এক দিক্ মাত্র প্রদর্শিত হইল, কিন্তু তাঁহার চরিত্রের আর একটা দিক্ আছে। পূর্ববর্তী বৃত্তান্ত পাঠ করিয়া কেহ কেহ মনে করিতে পারেন, লক্ষ্মণ বিশেষ তীক্ষ্ণদীপসম্পন্ন ছিলেন না। তিনি অল্পগত ভ্রাতা ছিলেন সত্য, কিন্তু হৃদয় রাম ভিন্ন তাঁহার পক্ষে নিজেকে হারাইয়া ফেলিবার আশঙ্কা ছিল। চিরদিন রামের বুদ্ধিধারা পরিচালিত হইয়া আসিয়াছেন, সহসা একাকী সংসারের পথ পর্যটন করা তাঁহার পক্ষে দুর্লভ হইত, এইজন্যই তিনি রামগতপ্রাণ হইয়া বনগমন করিয়াছিলেন। এ কথা ত মানিবই না, বরং ভাল করিয়া আলোচনা করিলে দেখা যাইবে যে, লক্ষ্মণই রামায়ণে পুরুষকারের একমাত্র জীবন্ত চিত্র। তাঁহার বুদ্ধির সঙ্গে রামের বুদ্ধির যে সর্বদাই ঐক্য হইয়াছে, তাহা নহে, পরন্তু যে স্থানে ঐক্য না হইত, সে স্থানে

তিনি স্বীয় বুদ্ধিকে রামের প্রতিভার নিকট হতবল হইতে দেন নাই।

বনবাসজ্ঞা তাঁহার নিকট অত্যন্ত অগ্রায় বলিয়া বোধ হইয়াছিল এবং রামের পিতৃ-আদেশ-পালন তিনি ধর্মবিরুদ্ধ বলিয়া মনে করিয়াছিলেন। রাম লক্ষ্মণকে বলিয়াছিলেন, “তুমি কি এই কার্য্য দৈবশক্তির ফল বলিয়া স্বীকার করিবে না? আরক্ত কার্য্য নষ্ট করিয়া যদি কোন অসঙ্কলিত পথে কার্য্যপ্রবাহ প্রবর্তিত হয়, তবে তাহা দৈবের কর্ম্ম বলিয়া মনে করিবে। দেখ, কৈকেয়ী চিরদিনই আমাকে ভরতের গ্রায় ভালবাসিয়াছেন, তাঁহার গ্রায় গুণশালিনী মহৎকুলজাতা রাজপুত্রী আমাকে পীড়াদান করিবার জ্ঞাত ইতর ব্যক্তির গ্রায় এইরূপ প্রতিশ্রুতিতে রাজাকে কেনই বা আবদ্ধ করিবেন? ইহা স্পষ্ট দৈবের কর্ম্ম, ইহাতে মানুষের কোন হাত নাই।” লক্ষ্মণ উত্তরে বলিলেন, “অতি দীন ও অশক্ত ব্যক্তিরাই দৈবের দোহাই দিয়া থাকে, পুরুষকার-দ্বারা যাহারা দৈবের প্রতিকূলে দণ্ডায়মান হন, তাহারা আপনার গ্রায় অবসন্ন হইয়া পড়েন না। মূঢ় ব্যক্তিরাই সর্বদা নির্যাতন প্রাপ্ত হন—‘মূঢ়হি পরিভূয়তে।’ ধর্ম ও সত্যের ভান করিয়া পিতা যে ঘোরতর অগ্রায় করিতেছেন, তাহা কি আপনি বুঝিতে পারিতেছেন না? আপনি দেবতুলা, ঋজু ও দাস্ত এবং রিপুহারাও আপনার প্রশংসা করিয়া থাকে। এমন পুত্রকে তিনি কি অপরাধে বনে তাড়াইয়া দিতেছেন? আপনি যে ধর্ম পালন করিতে ব্যাকুল, ঐ ধর্ম আমার নিকট নিতান্ত অধর্ম বলিয়া মনে হয়। জীবর বশীভূত হইয়া নিরপরাধ পুত্রকে বনবাস দেওয়া—ইহাই কি সত্য, ইহাই কি ধর্ম? আমি আজই বাহুবলে আপনার অভিষেক সম্পাদন

করিব। দেখি, কাহার সাধ্য আমার শক্তি প্রতিরোধ করে ? আজ পুরুষকারের অঙ্কুশ দিয়া উদ্দাম দৈবহস্তীকে আমি স্ববশে আনিব। যাহা আপনি দৈবসংজ্ঞায় অভিহিত করিতেছেন, তাহা আপনি অনায়াসে প্রত্যাখ্যান করিতে পারেন, তবে কি নিমিত্ত তুচ্ছ অকিঞ্চিৎকর দৈবের প্রশংসা করিতেছেন ?” সাতশতেন্দ্র লক্ষ্মণ এই সকল উক্তির পর—

“হনিষ্যে পিতরং বৃদ্ধং কৈকেয়্যাসক্তমানসম্।”

বলিয়া ক্রুদ্ধ হইয়া উঠিলেন। রাম তখন হস্তধারণ করিয়া তাঁহার ক্রোধপ্রশমনের চেষ্টা পাইয়াছিলেন। এই গর্হিত আদেশ-পালন যে ধর্মসঙ্গত, ইহা তিনি কোন ক্রমেই লক্ষ্মণকে বুঝাইতে পারেন নাই। লঙ্কাকাণ্ডে মায়াসীতার মস্তক দর্শনে শোকাবুল রামচন্দ্রকে লক্ষ্মণ বলিয়াছিলেন—“হর্ষ, কাম, দর্প, ক্রোধ, শাস্তি ও ইঞ্জিয়নিগ্রহ,— এই সমস্তই অর্থের আয়ত্ত। আমার এই মত, ইহাই ধর্ম ; কিন্তু আপনি সেই অর্থমূলক ধর্ম পরিত্যাগ করিয়া সমূলে ধর্মলোপ করিয়াছেন। আপনি পিতৃ-আজ্ঞা শিরোধার্য্য করিয়া বনবাসী হওয়াতেই আপনার প্রাণাধিকা পত্নীকে রাক্ষসেরা অপহরণ করিয়াছে।” এই প্রথর ব্যক্তিত্বশালী যুবক শুধু স্নেহগুণেই একান্ত-রূপে ব্যক্তিত্বহারা হইয়া পড়িয়াছিলেন !

ভরতের চরিত্র রমণীজনোচিত কোমল মধুরতায় ভূষিত, উহা সাত্ত্বিক বৃত্তির উপর অধিষ্ঠিত। রামের মত বলশালী চরিত্র রামায়ণে আর নাই, কিন্তু সময় বিশেষে রাম দুর্বল ও মূহূর্ত্তাবাপন্ন হইয়া পড়িয়াছেন। রামচরিত্র বড় জটিল। কিন্তু লক্ষ্মণের চরিত্রে আদ্যন্ত পুরুষকারের মহিমা দৃষ্ট হয়। উহাতে ভরতের মত করুণ রসের স্নিগ্ধতা ও জীলোকস্নলভ খেদমুখর কোমলতা নাই। উহা

সত্তত দৃঢ়, পুরুষোচিত ও বিপদে নিভীক । লক্ষ্মণ অবস্থার কোন বিপর্যয়েই নমিত হইয়া পড়েন নাই । বিরাট রাক্ষসের হস্তে সীতাকে নিঃসহায়ভাবে পতিত দেখিয়া রামচন্দ্র “হায়, আজ মাতা কৈকেয়ীর আশা পূর্ণ হইল” বলিয়া অবসন্ন হইয়া পড়িলেন । লক্ষ্মণ ভ্রাতাকে তদবস্থ দেখিয়া ক্রুদ্ধ সর্পের গ্রায় নিশ্বাসত্যাগ করিয়া বলিলেন, “ইন্দ্রতুলা-পরাক্রান্ত হইয়া আপনি কেন অনাথের গ্রায় পরিতাপ করিতেছেন ? আশুন, আমরা রাক্ষসকে বধ করি ।”

শেলবিন্দু লক্ষ্মণ পুনর্জীবন লাভ করিয়া যখন দেখিতে পাইলেন, রাম তাঁহার শোকে অধীর হইয়া সজলচক্ষে জ্বীলোকের মত বিলাপ করিতেছেন, তখন তিনি সেই কাতর অবস্থাতেই রামকে এইরূপ পৌরুষহীন মোহপ্রাপ্তির জন্ত তিরস্কার করিয়াছিলেন । বিরহের অবস্থায় রামের একান্ত বিহ্বলতা দেখিয়া তিনি ব্যথিতচিত্তে রামকে কত উপদেশ দিয়াছেন—তাহা একদিকে যেমন সুগভীর ভালবাসা-ব্যঞ্জক,—অপরদিকে সেইরূপ তাঁহার চরিত্রের দৃঢ়তাসূচক । “আপনি উৎসাহশূন্য হইবেন না,” “আপনার একরূপ দৌর্বল্য-প্রদর্শন উচিত নহে,” “পুরুষকার অবলম্বন করুন” ইত্যাদিরূপ নানাবিধ স্নেহের গঞ্জন করিয়া তিনি একদিন বলিয়াছিলেন,— “দেবগণের অমৃতলাভের গ্রায় বহু তপস্তা ও কৃচ্ছ্রসাধন করিয়া মহারাজ দশরথ আপনাকে লাভ করিয়াছিলেন, সে সকল কথা আমি ভরতের মুখে শুনিয়াছি—আপনি তপস্তার ফলস্বরূপ । যদি বিপদে পড়িয়া আপনার গ্রায় ধর্ম্মাত্মা সহ্য করিতে না পারেন, তবে অল্পসম্বৎ ইতর ব্যক্তির ক্রুরূপে করিবে ?”

রামের প্রতি জ্ঞাতসারে হটক বা অজ্ঞাতসারে হটক, যে কেহ অগ্রায় করিয়াছে, লক্ষ্মণ তাহা ক্ষমা করেন নাই, এ কথা পূর্বেই

বলিয়াছি। দশরথের গুণরাশি তাঁহার সমস্তই বিদিত ছিল; ক্রোধের উত্তেজনায় তিনি যাহাই বলুন না কেন, দশরথ যে পুত্রশোকে প্রাণত্যাগ করিবেন, এ কথাও তিনি পূর্বেই অনুমান করিয়াছিলেন, তথাপি তিনি দশরথকে মনে মনে ক্ষমা করেন নাই। স্নমজ্ঞ বিদায়কালে যখন লক্ষ্মণকে জিজ্ঞাসা করিলেন, “কুমার, পিতৃসকাশে আপনার কিছু বক্তব্য আছে কি?” তখন লক্ষ্মণ বলিলেন, “রাজাকে বলিও, রামকে তিনি কেন বনে পাঠাইলেন, নিরপরাধ জ্যেষ্ঠপুত্রকে কেন পরিত্যাগ করিলেন, তাহা আমি বহু চিন্তা করিয়াও বুঝিতে পারি নাই। আমি মহারাজের চরিত্রে পিতৃষের কোন নিদর্শন দেখিতে পাইতেছি না। আমার ভ্রাতা, বন্ধু, ভর্তা ও পিতা সকলই রামচন্দ্র।”

“অহং তাবদ্ব্যহারাজে পিতৃষং নোপলক্ষয়ে।

ভ্রাতা ভর্তা চ বন্ধুশ্চ পিতা চ মম রাঘবঃ ॥”

ভরতের প্রতি তাঁহার গভীর সন্দেহ ছিল। কৈকেয়ীর পুত্র ভরত যে মাতার ভাবে অনুপ্রাণিত হইবেন, এ সম্বন্ধে তাঁহার অটল ধারণা ছিল, কেবল রামের ভৎসনার ভয়ে তিনি ভরতের প্রতি কঠোরবাক্যপ্রয়োগে নিবৃত্ত থাকিতেন। কিন্তু যখন জটাবদ্ধকেশ-কলাপ অনশনক্লশ ভরত রামের চরণপ্রান্তে পড়িয়া ধূলিলুপ্তিত হইলেন, তখন লক্ষ্মণ তাঁহাকে চিনিতে পারিয়া সলজ্জ স্নেহ-পরিভাষে স্ত্রিয়মাণ হইলেন। একদিন শীতকালের রাতে বড় তুষার পড়িতেছিল, শীতাত্তিক্যে পক্ষিগণ কুলায়ে গুপ্তিত হইয়াছিল, ভরতের জন্ম সেই সময় লক্ষ্মণের প্রাণ কাঁদিয়া উঠিল, তিনি রামকে বলিলেন—“এই তীব্র শীত সহ করিয়া ধর্ম্মাত্মা ভরত আপনার ভক্তির তপস্বী পালন করিতেছেন। রাজ্য, ভোগ, মান, বিলাস

সমস্ত ত্যাগ করিয়া নিয়তাহারী ভরত এই বিষম ক্ষীতকালের রাজ্রিতে যুক্তিকায় শয়ন করিতেছেন। পারিত্রজ্যের নিয়ম পালন করিয়া প্রত্যহ শেষরাত্রিতে ভরত সরযুতে অবগাহন করিয়া থাকেন। চিরসুখোচিত রাজকুমার শেষরাত্রের তীব্র শীতে কিরূপে সরযুতে স্নান করেন !” এই লক্ষ্মণই পূর্বে—

“ভরতস্ত বধে দোষ নাহং পশ্যামি কশ্চন”

বলিয়া ক্রোধ প্রকাশ করিয়াছিলেন। যে দিন বুঝিতে পারিলেন, তিনি বনে বনে ঘুরিয়া রামের যেরূপ সেবায় নিরত, অযোধ্যার মহাসমৃদ্ধির মধ্যে বাস করিয়াও ভরত রামভক্তিতে সেইরূপ কৃচ্ছ্রসাধন করিতেছেন, সেই দিন হইতে তাঁহার স্বর এইরূপ স্নেহার্দ্ৰ ও বিনম্র হইয়া পড়িয়াছিল। কিন্তু তিনি কৈকেয়ীকে কখনই ক্ষমা করেন নাই, রামের নিকট একদিন বলিয়াছিলেন—
“দশরথ যাহার স্বামী, সাধু ভরত যাহার পুত্র, সেই কৈকেয়ী এরূপ নির্ভর হইলেন কেন ?”

রামায়ণে লক্ষ্মণের মত পুরুষকারের উজ্জ্বল চিত্র আর দ্বিতীয় নাই। ইনি সতত নির্ভীক, বিপদে অকুণ্ঠিত, স্বীয় ক্ষুরধার তীক্ষ্ণবুদ্ধি সত্ত্বেও ভ্রাতৃস্নেহের বশবর্তী হইয়া একেবারে আত্মহারী হইয়া পড়িয়াছিলেন। নিতান্ত বিপদেও তাঁহার কণ্ঠস্বর জীলোকের জ্বালায় কোমল হইয়া পড়ে নাই। যখন তিনি কবন্ধের বিশালহস্তের সম্পূর্ণরূপ আয়ত্ত হইয়া পড়িয়াছিলেন, তখন রামের প্রতি দৃষ্টি করিয়া এইমাত্র তিনি বলিয়াছিলেন—“দেখুন, আমি রাক্ষসের অধীন হইয়া পড়িতেছি, আপনি আমাকে বলিস্বরূপ রাক্ষসের হস্তে প্রদান করিয়া পলায়ন করুন। আমার দৃঢ় বিশ্বাস, আপনি সীতাকে শীঘ্র ফিরিয়া পাইবেন। তাঁহাকে লাভ করিয়া পৈতৃক

রাজ্যে পুনরধিষ্ঠিত হইয়া আমাকে স্মরণ রাখিবেন।” এই কথায় বিলাপের ছন্দ নাই। ইহাতে রামের প্রতি অসীম প্রীতি ও স্বীয় আত্মোৎসর্গের অতুল্য ধৈর্য্য সূচিত হইয়াছে।

ক্ষাত্রভেজের এই অলস্তু মূর্তি, এই মৌন ভ্রাতৃভক্তির আদর্শ ভারতে চিরদিন পূজা পাইয়া আসিয়াছেন। “রাম-সীতা” এই কথা অপেক্ষাও বোধ হয় “রাম-লক্ষ্মণ” এই কথা এতদ্দেশে বেশী পরিচিত। সৌভ্রাতৃত্বের কথা মনে হইলে “লক্ষ্মণ” অপেক্ষা প্রশংসার্হ উপমা আমরা কল্পনা করিতে পারি না। ভরত ভ্রাতৃভক্তির পলাশ,—সুকোমল ভাবের সমৃদ্ধ উদাহরণ। কিন্তু লক্ষ্মণ ভ্রাতৃভক্তির অনব্যঞ্জন, জীবিকার সংস্থান। আজ আমরা স্বেচ্ছায় আমাদের গৃহগুলিকে লক্ষ্মণ-শূন্য করিতেছি। আজ বহুস্থানে সহধর্ম্মিণীর স্থলে স্বার্থরূপিণী, অলঙ্কারপেটিকার যক্ষীগণ আমাদের গিরিয়া গৃহে একাধিপত্য স্থাপন করিতেছে ; যাহারা এক উদরে স্থান পাইয়াছিলেন, তাহারা আজ এক গৃহে স্থান পাইতেছেন না ! হায়, কি দৈববিড়ম্বনা, যাহাদিগকে বিশ্বনিয়ন্তা মাতৃগর্ভ হইতে পরম সুহৃদরূপে গড়িয়া দিয়া আমাদের প্রকৃত সৌহার্দ্য শিখাইবেন, তাহাদিগকে বিদায় দিয়া পঞ্জাব ও পুণা হইতে আমরা সুহৃৎ সংগ্রহ করিব, এ কথা কি বিশ্বাস্ত ? আজ আমাদের রাম বনবাসী, লক্ষ্মণ প্রাসাদশীর্ষ হইতে সেই দৃশ্য উপভোগ করেন ; আজ লক্ষ্মণের অন্ন জুটিতেছে না, রাম স্বর্ণ থালে উপায়ে আহার করিতেছেন। আজ আমাদের কষ্ট, দৈন্ত, বনবাসের দুঃখ সমস্তই দ্বিগুণতর পীড়াদায়ক,—লক্ষ্মণগণকে আমাদের দুঃখের সহায় ও চিরসঙ্গী মনে ভাবিতে ভুলিয়া যাইতেছি। হে ভ্রাতৃবৎসল, মহর্ষি বায়ীকি তোমাকে আঁকিয়া গিয়াছেন—চিত্র হিসাবে নহে ; হিন্দুর

গৃহ-দেবতাস্বরূপ তুমি এ পর্য্যন্ত প্রতিষ্ঠিত ছিলে। আবার তুমি হিন্দুর ঘরে ফিরিয়া এস,—সেই প্রিয়-প্রসঙ্গ মুখরিত এক গৃহে একত্র বসিয়া আহার করি, স্বর্গ হইতে আমাদের মাতারা সেই দৃশ্য দেখিয়া আশীষ বর্ষণ করিবেন। আমাদের দক্ষিণবাহু অভিনব-বলদৃপ্ত হইয়া উঠিবে—আমরা এ হৃদ্বিনের অন্ত দেখিতে পাইব।

শ্রীদীনেশচন্দ্র সেন।

চন্দ্রগুপ্ত

স্থান—সিন্ধু-নদতট ; দূরে গ্রীক জাহাজ-শ্রেণী ।

কাল—সন্ধ্যা ।

নদতটে শিবির-সম্মুখে সেকেন্দার ও সেলুকস্

অন্তগামী স্বর্ঘ্যের দিকে চাহিয়াছিলেন ।

সেকেন্দার । সত্য সেলুকস্ ! কি বিচিত্র এই দেশ ! দিনে প্রচণ্ড
স্বর্ঘ্য এর গাঢ় নীল আকাশ পুড়িয়ে দিয়ে যায় ; আর
রাত্রিকালে গুহ্র চক্রমা এসে তাকে স্নিগ্ধ জ্যোৎস্নায়ন্নান করিয়ে
দেয় । তামসী রাত্রে অগণ্য উজ্জ্বল জ্যোতিঃপুঞ্জ যখন এর
আকাশ ঝলমল করে, আমি বিন্মিত আতঙ্কে চেয়ে থাকি ।
প্রার্টে ঘন-ক্লম্ব মেঘরাশি গুরু-গন্তীর গর্জনে প্রকাণ্ড
দৈত্য-সৈন্তের মত এর আকাশ ছেয়ে আসে, আমি নির্ঝাক
হ'য়ে দাঁড়িয়ে দেখি । এর অভ্রভেদী ধবলতুষার-মৌলি নীল
হিমাদ্রি স্থিরভাবে দাঁড়িয়ে আছে । এর বিশাল নদ নদী
ফেনিল উচ্চাসে উদ্যমবেগে ছুটেছে । এর মরুভূমি বিরাট
স্বেচ্ছাচারের মত তপ্ত বালুরাশি নিয়ে খেলা করছে ।

সেলুকস্ । সত্য সম্রাট ।

সেকেন্দার । কোথাও দেখি, তালীবন গর্জ্জভরে মাথা উচু করে
দাঁড়িয়ে আছে ; কোথাও বিরাট বট স্বেচ্ছায়ায় চারিদিকে
ছড়িয়ে পড়েছে ; কোথাও মদমত্ত মাতঙ্গ জঙ্গমগর্জতসম মত্ত
গমনে চলেছে ; কোথাও মহাভুজঙ্গম অলস হিংসার মত বক্র

রেখায় পড়ে' আছে ; কোথাও বা মহাশত্রু কুরঙ্গম মুখ্য বিন্ধয়ের মত নির্জন বনমধ্যে শূত্র-প্রেক্ষণে চেয়ে আছে। আর সবায় উপরে এক সৌম্য, গৌর, দীর্ঘকাস্তি জাতি এই দেশ শাসন করছে। তাদের মুখে শিশুর সারল্য, দেহে বজ্রের শক্তি, চক্ষে সূর্য্যের দীপ্তি, বক্ষে বাত্যার সাহস। এ শৌর্য্য পরাজয় করে' আনন্দ আছে। পুরুকে বন্দী করে' আনি যখন—সে কি বল্লেন জানো ?

সেলুকস্। কি সম্রাট ?

সেকেন্দার। আমি জিজ্ঞাসা কর্ণাম, “আমার কাছে কিরূপ আচরণ প্রত্যাশা কর ?”—সে নির্ভীক নিরুপস্বরে উত্তর দিল, “রাজার প্রতি রাজার আচরণ।” চমকিত হ'লাম! ভাবলাম—এ একটা জাতি বটে! আমি তৎক্ষণাৎ তাকে তার রাজ্য প্রত্যর্পণ কর্ণাম।

সেলুকস্। সম্রাট মহামুভব।

সেকেন্দার। মহামুভব! তারপরে তার সঙ্গে অন্তরূপ ব্যবহার সম্ভব ? মহৎ কিছু দেখলেই একটা উল্লাস আসে। আর, আমি এখানে সাম্রাজ্য স্থাপন কর্তে আসি নাই। আমি এসেছি সৌধীন দিগ্বিজয়ে। জগতে একটা কীর্ষি রেখে যেতে চাই।

সেলুকস্। তবে সে দিগ্বিজয় অসম্পূর্ণ রেখে যাচ্ছেন কেন সম্রাট ?

সেকেন্দার। সে দিগ্বিজয় সম্পূর্ণ কর্তে হ'লে নূতন গ্রীক সৈন্ত চাই।—কি আশ্চর্য্য সেনাপতি ! দূর মাসিডন্ থেকে রাজ্য, জনপদ তৃণসম পদতলে দলিত ক'রে চলে এসেছি। ঝড়ার মত এসে মহাশত্রু-সৈন্ত ধূমরাশির মত উড়িয়ে দিয়েছি।

অর্ধেক এসিয়া মাসিডনের বিজয়-বাহিনীর বীরপদভরে কম্পিত হ'য়েছে। নিয়তির মত দুর্বার, হত্যার মত করাল, দুর্ভিক্ষের মত নির্ধুর আমি অর্ধেক এসিয়ার বক্ষের উপর দিয়ে আমার রুধিরাক্ত বিজয়-শকট অবাধে চালিয়ে গিয়েছি। কিন্তু বাধা পেলাম প্রথম—সেই শতদ্রুতীরে।

(চন্দ্রশুভ্রকে ধরিয়া আন্টিগোনাসের প্রবেশ ।)

সেকেন্দার। কি সংবাদ আন্টিগোনাস ? এ কে ?

আন্টিগোনাস। শুভ্রচর।

সেলুকস্। সে কি !

সেকেন্দার। শুভ্রচর !

আন্টিগোনাস। আমি দেখলাম যে, এক শিবিরের পাশে বসে' নির্জনে শুষ্ক তালপত্রে কি লিখছিল। আমি দেখতে চাইলাম। পত্রখানি দেখাল। প'ড়তে পার্লাম না—তাই সত্রাটের কাছে নিয়ে এসেছি।

সেকেন্দার। কি লিখ'ছিলে যুবক ! সত্য বল।

চন্দ্রশুভ্র। সত্য বলব !—রাজাধিরাজ ! ভারতবাসী মিথ্যা কথা ব'ল'তে এখনও শিখে নাই।

(সেকেন্দার একবার সেলুকসের প্রতি চাহিলেন, পরে চন্দ্রশুভ্রকে কহিলেন)—“উত্তম। বল কি লিখ'ছিলে।”

চন্দ্রশুভ্র। আমি সত্রাটের বাহিনী-চালনা, ব্যূহ-রচনা-প্রণালী, সামরিক নিয়ম, এই সব মাসাবধি কাল ধরে' শিখ'ছিলাম।—

সেকেন্দার। কার কাছে ?

চন্দ্রশুভ্র। এই সেনাপতির কাছে।

সেকেন্দার। সত্য সেলুকস্ ?

সেলুকস্। সত্য।

সেকেন্দার। [চন্দ্রশুপ্তকে] তারপর !

চন্দ্রশুপ্ত। তারপর গ্রীক সৈন্য কাল এস্থান পরিত্যাগ করে' যাবে
 শুনে, আমি যা লিখেছি তা এই পত্রে লিখে নিচ্ছিলাম।

সেকেন্দার। কি অভিপ্রায়ে ?

চন্দ্রশুপ্ত। সেকেন্দার সাহার সঙ্গে যুদ্ধ করবার জন্তু নহে।

সেকেন্দার। তবে ?—

চন্দ্রশুপ্ত। তবে শুধু সন্মতি ! আমি মগধের রাজপুত্র চন্দ্রশুপ্ত।
 আমার পিতার নাম মহাপদ্ম। আমার বৈমাত্র ভাই নন্দ
 সিংহাসন অধিকার করে' আমার নির্বাসিত ক'রেছে। আমি
 তারই প্রতিশোধ নিতে বেরিয়েছি।

সেকেন্দার। তারপর !

চন্দ্রশুপ্ত। তারপর শুন্লাম মাসিডন্ ভূপতির অদ্বুত বিজয়বার্তা।
 অর্ধেক এসিয়া পদতলে দলিত করে', নদ নদী গিরি ছর্ব্বার
 বিক্রমে অতিক্রম করে', শুন্লাম তিনি ভারতবর্ষে এসে
 আর্ধ্যকুলরবি পুরকে পরাজিত ক'রেছেন। হে সন্মতি !
 আমার ইচ্ছা হ'ল যে দেখে আসি—কি সে পরাক্রম, যার
 ভ্রুকুটি দেখে, সমস্ত এসিয়া তার পদতলে লুটিয়ে পড়ে; কোথায়
 সে শক্তি লুক্কায়িত আছে, আর্থ্যের মহাবীৰ্য্যও যার সংঘাতে
 বিচলিত হ'য়েছে। তাই এখানে এসে এই সেনাপতির কাছে
 শিক্ষা করছিলাম। আমার ইচ্ছা শুদ্ধ আমার হত রাজ্য
 পুনরুদ্ধার করা। এই মাত্র।

(সেকেন্দার সেলুকসের পানে চাহিলেন।)

সেলুকস্। আমি এরূপ বুঝি নাই। যুবকের চেহারা, কথাবার্তা আমার
মিষ্ট লাগত। আমি সরলভাবে গ্রীক সামরিক প্রথা-সম্বন্ধে
যুবকের সঙ্গে আলোচনা কর্তাম। বুঝি নাই যে এ বিশ্বাসঘাতক।

আন্টিগোনাস। কে বিশ্বাসঘাতক ?

সেলুকস্। এই যুবক।

আন্টিগোনাস। এই যুবক না তুমি ?

সেলুকস্। আন্টিগোনাস ! আমার বয়স না মানো, পদবী মেনে চ'লো।

আন্টিগোনাস। জানি, তুমি গ্রীক সেনাপতি, তা সন্দেহও তুমি
বিশ্বাসঘাতক।

সেলুকস্। আন্টিগোনাস ! [তরবারি বাহির করিলেন।]

(আন্টিগোনাস ক্ষিপ্তর হস্তে তরবারি বাহির করিয়া
সেলুকসের শির লক্ষ্য করিয়া তরবারি ক্ষেপণ করিলেন।
ততোধিক ক্ষিপ্তহস্তে চন্দ্রগুপ্ত নিজ তরবারি বাহির করিয়া
সে আঘাত নিবারণ করিলেন। আন্টিগোনাস তাঁহাকে
ছাড়িয়া চন্দ্রগুপ্তকে আক্রমণ করিলেন।)

সেকেন্দার। নিরস্ত হও।

(সেই মুহূর্তেই আন্টিগোনাসের তরবারি চন্দ্রগুপ্তের তরবারির
আঘাতে ভূপতিত হইল।)

সেকেন্দার। আন্টিগোনাস !

(আন্টিগোনাস লজ্জায় শির অবনত করিলেন।)

সেকেন্দার। আন্টিগোনাস ! তোমার এই ঔদ্ধত্যের জন্ত তোমার
আমার সাম্রাজ্য থেকে নির্বাসিত কর্তাম। একজন সামান্য
সৈন্যাধ্যক্ষের এতদূর স্পর্ধা !—আমি—এতক্ষণ বিষয়ে অবাক
হ'য়ে চেয়েছিলাম। তোমার এতদূর স্পর্ধা হ'তে পারে, তা

আমার স্বপ্নেরও অগোচর ছিল।—যাও, এই মুহূর্তেই তোমায়
নির্কাসিত ক'ল্যাম। [আন্টিগোনাসের প্রস্থান।]

সেকেন্দার। আর সেলুকস! তোমার অপরাধ তত নয়। কিন্তু
ভবিষ্যতে স্মরণ রেখো যে, গ্রীক সম্রাটের সম্মুখে চক্ষু রক্তবর্ণ
করা গ্রীক সেনাপতির শোভা পায় না—আর যুবক!

চন্দ্রগুপ্ত। সম্রাট।

সেকেন্দার। তোমায় যদি বন্দী করি?

চন্দ্রগুপ্ত। কি অপরাধে সম্রাট?

সেকেন্দার। আমার শিবিরে তুমি শত্রুর গুপ্তচর হ'য়ে প্রবেশ
ক'রেছো, এই অপরাধে।

চন্দ্রগুপ্ত। এই অপরাধে!—ভেবেছিলাম যে সেকেন্দার সাহা
বীর, দেখছি যে তিনি ভীক। এক গৃহহীন নিরাশ্রয় হিন্দু
রাজপুত্র ছাত্র হিসাবে তাঁর কাছে উপস্থিত, তাতেই তিনি
দ্রস্ত। সেকেন্দার সাহা এত কাপুরুষ, তা ভাবি নাই।

সেকেন্দার। সেলুকস! বন্দী কর।

চন্দ্রগুপ্ত। সম্রাট! আমায় বধ না ক'রে বন্দী কর্তে পার্কেন না।
[তরবারি বাহির করিলেন।]

সেকেন্দার। [সোল্লাসে] চমৎকার!—যাও বীর! তোমায়
বন্দী করব না। আমি পরীক্ষা কচ্ছিলাম মাত্র। নির্ভয়ে
তুমি তোমার রাজ্যে ফিরে যাও। আর আমি এক ভবিষ্যৎ
বাণী করি, মনে রেখো। তুমি হত রাজ্য উদ্ধার করবে।
তুমি দুর্জয় দিগ্বিজয়ী হবে।—যাও বীর! মুক্ত তুমি।

দ্বিজেন্দ্রলাল রায়।

চন্দ্রগুপ্ত ও চাণক্য

চাণক্য। এক মাতৃগর্ভে জন্ম ব'লেই ভাইয়ের সঙ্গে সখ্যক না ?
মায়ের চেয়ে ভাই বড় ? জগতে এই প্রথম হ'ল যে, সন্তান
মায়ের অপমানের প্রতিশোধ নেয় না !—[মুরাকে] কঁাদো
অভাগিনী নারী ! এই তোমার পুত্র ! মা চিনে না !—
জানে না যে জগতে যত পবিত্র জিনিষ আছে, মায়ের কাছে
কেউ না।

চন্দ্রগুপ্ত। তা জানি গুরুদেব।

চাণক্য। না জানো না ! নহিলে মায়ের অপমানের প্রতিশোধ
নিতে সন্তান দ্বিধা করে ? মা—যার সঙ্গে একদিন এক অঙ্গ
ছিলে—এক প্রাণ, এক মন, এক নিশ্বাস, এক আত্মা—যেমন
সৃষ্টি একদিন বিষ্ণুর যোগনিদ্রায় অভিভূত ছিল, তার পর
পৃথক্ হ'য়ে এলে—অগ্নির ফুলিঙ্গের মত, সঙ্গীতের মূর্ছনার
মত, চিরন্তন প্রহেলিকার প্রশ্নের মত ; মা—যে তার দেহের
রক্ত নিংড়ে, নিভূতে, বন্ধের কটাছে চড়িয়ে মেহের উত্তাপে
জ্বাল দিয়ে সুধা তৈরি করে' তোমায় পান করিয়েছিল, যে
তোমার অধরে হাস্ত দিয়েছিল, রসনায় ভাবা দিয়েছিল,
ললাটে আশীষ-চুষন দিয়ে সংসারে পাঠিয়েছিল ; মা—রোগে,
শোকে, দৈন্তে, দুর্দিনে তোমার হুঃখ যে নিজের বক্ষ পেতে
নিতে পারে, তোমার শ্লান মুখখানি উজ্জ্বল দেখ'বার জন্য যে
প্রাণ দিতে পারে, যার স্বচ্ছ স্নেহ-মন্ডাকিনী এই শুষ্ক তপ্ত

মরুভূমিতে শত ধারায় উচ্ছ্বসিত হ'য়ে যাচ্ছে ; মা—বার
অপার শুভ্র করুণা মানবজীবনে প্রভাত-সূর্য্যের মত কিরণ
দেয়—বিতরণে কার্পণ্য করে না, বিচার করে না, প্রতিদান
চায় না, উন্মুক্ত, উদার কম্পিত আগ্রহে হৃহাতে আপনাকে
বিলাতে চায় ;—এ সেই মা !

চন্দ্রশুশু । গুরুদেব ! রক্ষা করুন ।

বিক্রমলাল রায় ।



ফ্রান্সে রাষ্ট্রবিপ্লব

১৭৮৯ অব্দের পর হইতে প্রায় ২৬ বৎসর কাল সমগ্র যুরোপের ইতিহাস ফ্রান্সের ইতিহাসের সহিত সংশ্লিষ্ট। ঐ বৎসর সুপ্রসিদ্ধ ফরাসী রাষ্ট্রবিপ্লব আরম্ভ হয় এবং সেই মহাবিপ্লবতরঙ্গে সমস্ত যুরোপ মহাদেশ নিমগ্ন-প্রায় হইয়া উঠে। সুতরাং যুরোপের ভূপতিবর্গ আত্মরক্ষার জন্ত ফ্রান্সের বিরুদ্ধে অস্ত্রধারণ করেন এবং অতি কষ্টে অজস্রশোণিতক্লয়ের পর শত্রুদমন করিয়া অব্যাহতি পান। নিম্নে এই প্রসিদ্ধ ঘটনা সবিস্তর বর্ণিত হইতেছে।

পুরাকালে গল্ দেশ রোমান্দিগের অধিকারে ছিল এবং তদ্রূপে কেণ্টজাতীয় অধিবাসীরা রোমান্দিগের ভাষা ও রীতিনীতি শিক্ষা করিয়াছিল। শেষে বর্ষর জাতিগণ রোম সাম্রাজ্যের অধিকাংশ আত্মসাৎ করে এবং সেই সময়ে ফ্রান্সজাতি গল্ অধিকার করিয়া সেখানে বাস করিতে থাকে। ইহাদিগের নামানুসারে গল্ দেশ ফ্রান্স নামে অভিহিত হয়। কালক্রমে ইহারা বিজিত-দিগের সহিত মিশিয়া যায় এবং তাহাদের ভাষা, ধর্ম ও সভ্যতা অবলম্বন করে। বলবীৰ্য্যে ফ্রান্সেরা এংগ্লোসাক্সন্দিগের অপেক্ষা কোন অংশে নূন ছিল না।

ইংল্যান্ডের ত্রায় এখানেও সৈনিক-ভূম্যধিকার-প্রথা প্রচলিত ছিল এবং রাজাকে প্রজার মতানুসারে রাজকার্য্য নির্বাহ করিতে হইত। কিন্তু ইংল্যান্ডে যেমন সমগ্র প্রদেশ অতি প্রাচীন সময়ে এক রাজার অধিকারে যায়, ফ্রান্সে সেরূপ হয় নাই। তৎকালে

ফ্রান্স দেশ বহুসংখ্যক ক্ষুদ্র ক্ষুদ্র প্রদেশে বিভক্ত ছিল, এবং ইহার অনেক প্রদেশে ফ্রান্স-রাজ্যের কোন স্বত্বই ছিল না। শেষে পঞ্চদশ শতাব্দীতে শতবর্ষব্যাপি-যুদ্ধাবসানে সমগ্র ফ্রান্স এক রাজ্যের অধিকারভুক্ত হইলো ও শাসন-প্রণালী-সম্বন্ধে প্রদেশগত স্বাভাব্য লুপ্ত হয় নাই। প্রত্যেক প্রদেশের স্বতন্ত্র পার্লামেন্ট ছিল এবং রাজাকে তাঁহাদের পরামর্শ লইয়া কর নির্ধারণ বা ব্যবস্থা প্রণয়ন করিতে হইত। সুতরাং সর্বত্র করভার সমান ছিল না এবং ব্যবস্থা-বৈলক্ষ্য ও বিস্তর ছিল। সবিশেষ প্রয়োজন হইলে রাজা এই সমস্ত প্রদেশ হইতে প্রতিনিধি আহ্বান করিয়া “ষ্টেট্‌স্ জেনারল্”-নামক এক মহাসভার গঠন করিতেন এবং এই সভার সদস্যদিগের পরামর্শানুসারে সমগ্র দেশের সম্বন্ধে নূতন নিয়মাদির প্রবর্তন করিতেন। এই ষ্টেট্‌স্ জেনারলের সহিত ইংল্যান্ডের পার্লামেন্টের অনেক সৌসাদৃশ্য ছিল। কিন্তু ইংল্যান্ডে ভূম্যধিকার-প্রধার অতিশীঘ্রই পতন হয় এবং পার্লামেন্ট ভিন্ন দেশের শাসনকার্য্য নির্বাহ করা কঠিন হইয়া উঠে। ফ্রান্সে তাহা হয় নাই। সেখানে রাজ্য প্রজায় কোন সাক্ষাৎ সম্বন্ধ ছিল না। ভূম্যধিকারীরাও স্ব স্ব জমিদারীতে প্রায়ই বাস করিতেন না। তাঁহারা রাজসভায় ভোগস্বখে মত্ত থাকিতেন এবং তাঁহাদের কর্মচারিবৃন্দ প্রজার প্রতি অশেষবিধ অত্যাচার করিত। সুতরাং প্রাচীন সময় হইতেই জনসাধারণ জমিদার ও রাজার প্রতি জাতক্রোধ হইয়াছিল; তবে সুবিধা পাইত না বলিয়া প্রতিবিধানের চেষ্টা করিত না।

ষাজকেরাও জমিদারদিগের দ্বায় দৃণর্থাই ছিলেন। সমগ্র যুরোপে প্রোটেস্ট্যান্ট মত প্রচলিত হইল, কিন্তু ফ্রান্স রাজ ও

যাজকমণ্ডলী বলপ্রয়োগে লোকের মনোবৃত্তি রুদ্ধ করিয়া রাখিলেন। ধর্মমতসম্বন্ধে স্বাধীনতা নষ্ট হইলে ভণ্ডতার আধিক্য হয়। ফ্রান্সেও তাহাই হইয়াছিল। সেখানে লোকে হয় ভণ্ড, নয় ধর্মবিষয়ে বীতশ্রদ্ধ হইয়াছিল। যাজকদিগেরও অনেক ভূম্যধিকার ছিল এবং তাঁহারা ঘোরতর বিলাসী হওয়ায় লোকের নিতান্ত অশ্রদ্ধাজন হইয়াছিলেন।

রাজা ভূম্যধিকারী ও যাজকদিগেরই সহায়তা করিতেন, এবং তাঁহাদের সাহায্যে কালে এরূপ যথেষ্টাচারী হইয়া উঠেন যে ষ্টেট্‌স্ জেনারলের কথা লোকে একপ্রকার ভুলিয়া যায়। তিনি ইচ্ছামত কর নির্দ্ধারণ করিতেন এবং ইচ্ছামত ব্যয় করিতেন। কেহ তাহাতে আপত্তি করিতে সাহস করিত না। যাজক ও ভূম্যধিকারীদিগকে অনেক কর দিতে হইত না। রাজ্যের উচ্চপদসমূহে ভূম্যধিকারীদিগের একাধিকার ছিল। গুণ থাকিলেও অপর লোকে উচ্চপদ পাইতে পারিত না। অনেক ভূম্যধিকারী রাজসংসার হইতে বৃত্তি পাইতেন। সুতরাং তাঁহারা যে একমনে কেবল রাজপ্রভুত্বেরই বর্দ্ধন করিতে চেষ্টা করিয়াছিলেন, তাহা বিচিত্র নহে।

বিশেষতঃ চতুর্দশ লুইএর সময়ে রাজকীয় ক্ষমতা একেবারে অপ্রতিহত হইয়া উঠে। তিনি অনবরত যুদ্ধবিগ্রহে লিপ্ত থাকিতেন, এবং তদুপলক্ষে প্রজার করভার উত্তরোত্তর বৃদ্ধি পাইতে থাকে। এডিঙ্ট্‌ অব্‌ নস্তন্স্ রদ করিয়া তিনি প্রোটেস্টান্ট মতাবলম্বীদিগের উপরও অনেক অত্যাচার করেন। পাপাচার পঞ্চদশ লুইএর সময়ে ফ্রান্সের অবস্থা আরও শোচনীয় হয়। এই সময়ে ফ্রান্সে অনেক বিখ্যাত লেখক ও পণ্ডিতের আবির্ভাব

হইয়াছিল। তাঁহারা সরল, অথচ চিত্তগ্রাহিনী ভাষায়, এই সমস্ত অত্যাচার কাহিনী লোকের হৃদয়ঙ্গম করাইতে লাগিলেন। তাঁহারা দেখাইলেন যে, ইতর, ভদ্র ইত্যাদি কেবল কাল্পনিক প্রভেদ; পূর্বে সকল লোকেই সমান ছিল এবং এখনও চেষ্টা করিলে সকলেই সমান হইতে পারে। রাজশাসন শুদ্ধ প্রজার মঙ্গলের নিমিত্ত; অমঙ্গল হইলে শাসন-পরিবর্তন ত্রায়সঙ্গত। নগরে নগরে, গ্রামে গ্রামে, এই সমস্ত কথা আন্দোলিত হইতে লাগিল এবং সকলেই একটা মহাবিপ্লবের জন্ত প্রস্তুত হইয়া রহিল।

ফ্রান্সের এইরূপ অবস্থা; এমন সময়ে হতভাগ্য বোড়শ লুই ও তাঁহার পত্নী, অষ্ট্রিয়াধীশ্বরী মেরায়া টেরিসার কন্যা, মেরী আণ্টোয়ানেট পূর্বপুরুষদিগের পাপাচারের ফল ভোগ করিবার নিমিত্তই যেন, ফ্রান্সের সিংহাসনে অধিরোহণ করিলেন। আমেরিকার সহিত ইংল্যান্ডের বিবাদ উপস্থিত হইলে কুক্ষণে ইঁহারা আমেরিকার সাহায্য করিতে প্রবৃত্ত হইলেন। করাসী সেনা আমেরিকায় স্বাধীনতার বিজয়সাধন করিয়া স্বদেশেও সেইরূপ করিতে ব্যগ্র হইল।

এদিকে যুদ্ধের ব্যয়ভারে রাজভাণ্ডারে অর্থের অনটন হইল এবং নূতন করসংগ্রহের জন্ত প্রজাবৎসল লুই প্রজার ইচ্ছানুসারে স্টেট্‌স্ জেনারলের আহ্বান করিয়া আপনার সর্বনাশের পথ প্রশস্ত করিলেন। ভূগর্ভ-নিরুদ্ধ উৎপত্তনোন্মুখ অগ্নিরাশি একবার নিঃসৃত হইলে সর্বসংহার না করিয়া প্রশমিত হয় না। স্টেট্‌স্ জেনারল্ শাসনসংস্কারে প্রবৃত্ত হইলেন, এবং তাঁহাদের কার্য শেষ হইতে না হইতেই বিপ্লবকারীরা প্রশ্রয় পাইয়া নূতন নূতন পরিবর্তন সাধন করিতে লাগিলেন। রাজা বন্দী হইলেন, ভূম্যধিকার-প্রথা উঠিয়া

গেল, সাধারণতঃ প্রবর্তিত হইল, সকলে সমান বলিয়া প্রচারিত হইল, খ্রীষ্টধর্ম উঠিয়া গেল, যাজকেরা ভূম্যধিকার হইতে বঞ্চিত হইলেন, রাজশাসনপ্রিয় লোকের শোণিতস্রোতে ফ্রান্স প্লাবিত হইল, রাজার ও রাণীর শিরশ্ছেদ হইল এবং ফরাসীরা অদম্য উৎসাহের সহিত নিকটবর্তী রাজ্যসমূহে সাম্য-মৈত্রী-স্বাধীনতা-মূলক বিপ্লব-নীতি প্রচারিত করিবার নিমিত্ত অগ্রসর হইলেন (১৭৮৯-১৭৯৩) ।

শ্রীঈশানচন্দ্র ঘোষ :

মধ্যাহ্ন-সঙ্গীত

(১৮৮৭)

একটি বন্ধুর সহিত অনেকদিন একসঙ্গে বাস করিয়াছিলাম। লোকের যেরূপ স্বর থাকিলে গান গাইতে পারে, বলা যায়, সে স্বর তাঁহার কণ্ঠে ছিল। অনেক প্রকার জাতীয়, বিজাতীয়, পাঠ্য ও অপাঠ্য সঙ্গীত তাঁহার অভ্যাস ছিল। একতন্ত্রী হইতে বহুতন্ত্রী পর্য্যন্ত, খোল হইতে ঢোল পর্য্যন্ত, এমন কোন যন্ত্র ছিল না, যাহার সাক্ষাৎ পাইলে একবার তিনি করাঘাত না করিয়া ছাড়িতেন। একসঙ্গে থাকিতাম বলিয়াই হউক, অথবা অন্য কোন অজ্ঞাত কারণেই হউক, আমি কখন তাঁহাকে গান শুনাইতে অস্বরোধ করি নাই। কখনও অস্বরোধ করি নাই, তবে একদিন করিয়াছিলাম। একদিন চৈত্র মাসের দ্বিপ্রহর; প্রচণ্ড মার্ত্তণ্ড পৃথিবীকে লণ্ডভণ্ড করিয়া তুলিয়াছেন, পড়িতে পারা যায় না, ঘুম পায়, শুইয়া সুখ নাই, বিছানা বড় গরম; কিন্তু তখনও সেই রোদ্দে অন্ধখের ডালে বসিয়া অনেক কিচির-মিচির শব্দ পরাভূত করিয়া, বসন্তের প্রিয়পাখী বিরহিণীর হৃদয় অপেক্ষাও অধিক উত্তপ্ত বালুকাময় প্রান্তরে তাহার কুহরব ছড়াইতেছিল। শুনিয়াই আমার কবিতা লিখিতে ইচ্ছা গেল; অল্লায়াসেই এক চরণ লিখিয়া ফেলিলাম :—“কি সুখে ডাকরে পাখা ছুপূরের রোদে।” তাহার পর পদের মিল খুঁজিয়া লিখিলাম :—“থাম তুমি বাছা মোর খেতে দিব বোদে।” কিন্তু যে সকল কথা লিখিক

ভাবিয়াছিলাম, তাহার একটিও প্রকাশ করা গেল না। ফুল, পাখী, সমীরণ, জ্যোৎস্নালোক, হাসি-হাসি মুখখানি, এগুলির একটিকেও স্থান দিয়া উঠিতে পারিলাম না, কাজেই সেই সুমিষ্ট বোদেকে ছাড়িতে হইল। অতৃদিকে আমার কবিতাবাতালোড়িত হৃদয় কিছুতেই শান্ত হইল না। দুর্ভিক্ষ আমার, তাই কখনও যাহা সম্ভ্রানে অভ্রানে, শয়নে স্বপনে করি নাই, তাহা করিলাম। বহু গম্ভীরভাবে বসিয়াছিলেন, তাঁহাকে একটি গান গাইতে বলিলাম; গান গাইবার পরিবর্তে তিনি আমার অনুরোধের যে উত্তর দিয়াছিলেন, জীবনে তাহা ভুলিব না। যদি তিনি সেই উত্তরটি তাঁহার স্মৃতিতে চাপিয়া রাখিয়া, তৎপরিবর্তে তাঁহার বিবিধ বাস্তব-পীড়নজনিত কিঞ্চিৎকরগরিষ্ঠ শ্রীহস্তে চপেটাঘাত করিতেন, তবে আমার কোন অসন্তোষের কারণ থাকিত না; বরং তাঁহাকে “বিদ্যালয়ের শিক্ষক হও” বলিয়া আলীকাদ করিতাম। বহু আমাকে একটু বিজ্ঞপের হাসি হাসিয়া বলিলেন যে, মধ্যাহ্নে সঙ্গীত হয় না। মানুষ সকল ক্লেশ সহিতে পারে, কিন্তু যাহাতে তাহার আত্মাভিমানের ঘাড়ে হাত পড়ে, তাহা কিছুতেই সহিতে পারে না। সঙ্গীতে আমার স্বরও নাই, অভিমানও নাই। কিন্তু সকল বিষয়েরই একটু সাধারণ জ্ঞান আছে, এমন অহঙ্কার ক’জনার নাই? গান গাইতে না পারি, কিন্তু তাই বলিয়া আমার ক্ষুদ্র একটি প্রশ্নে একরাশি ব্যাকরণ ও অলঙ্কারে ভুল থাকিবে, অথবা বুদ্ধি-নামক হুম্ম পদার্থের অভাব বুঝাইবে, ইহা কি প্রাণে সহে?

মধ্যাহ্নে কি সঙ্গীত হয় না? অরুণের তরুণচ্ছটা, উষার কিশোর কান্তি ও তদীয় চম্পক-অঙ্গুলি-স্পর্শোদ্দীপ্ত মেঘমালায়

ত্রিধ্ব শ্রামলাঙ্গ-পরিশোভিনী রক্ত-রেখা না থাকিলে কি কবিতা হয় না ? সঙ্গীত কোটে না ? দিবসের শ্রান্তির অবসানে বিশ্ব যদি অন্ধকারের গর্ভে একবার না ডুবিয়া যায়, যদি চন্দ্রালোক, অলস হৃদয়ে, ক্লাস্তিপূর্ণ স্তম্ভ বিধের মুখচূষন না করে, তবে কি, কণ্ঠস্বর একটু ঘুরিয়া পেন্‌চিয়া, একটু অষ্টবক্র হইয়া, পৌঁ পৌঁ খেন্-খেন্ সমভিব্যাহারে, শ্রোতার শ্রবণ-বিবর তাড়না করিতে পারে না ? আর স্মিল বা অমিল চতুর্দশটি অক্ষর-সম্বলিত পদ বিলম্বিত হয় না ? মধ্যাহ্নের কি সঙ্গীত নাই ? শুনিয়াছি প্রাচীনেরা কোন কোন রাগিনীকে মধ্যাহ্নে স্থান দিয়াছিলেন, কিন্তু একালের সুরসিকেরা, আর বিশেষ ভাবে আমার বন্ধু, তাঁহাদিগকে অগ্রাহ্য করিয়াছেন। কে সুরসিক, কে অরসিক, বুঝিতে পারিলাম না। ষাহারা বৈশাখের রোদ্রে, দরজা জানালা বন্ধ করিয়া পাখার বাতাস সেবন করিতে করিতে, কস্ম্ময় পৃথিবীর বন্ধে নিস্তব্ধ হইয়া, একমাত্র নাসিকাটি সচেতন রাখেন, তাঁহারাই সুরসিক ? না, ষাহারা মধ্যাহ্নের প্রস্ফুটরূপে পূর্ণ যৌবনের শোভা সন্দর্শন করেন, রোদ্রের অগ্নিময় তাপে প্রপীড়িত, পরিশ্রান্ত, ভূষিত স্বর্ণ-মর্ত্যে বিশ্বপ্রাণের রুদ্রমূর্ত্তি দেখিতে পান, আর কোলাহলময়, অবিরত কস্ম্মনিরত, স্বেদসিক্ত মস্তৃষ্ণলোকে জীবন-গৌরবের উৎসাহময় সঙ্গীত, সাকার সচল ও স্পর্শকম দেখিতে পান, তাঁহারাই সুরসিক ?

বড় রাগ হইল ; একখানি বেত পড়িয়াছিল, অশ্রুমনে সেখানি হাতে তুলিয়া গৃহমধ্যে পাদচারণ করিতে লাগিলাম। বেত্র বে বন্ধুপৃষ্ঠে পড়িয়া, করণ-রসাত্মক সঙ্গীত উদ্গিরণ করিবে, তাহার কোন সম্ভাবনা ছিল না। তবে ঘরের ইটি-সেটি, টেবিলখানি,

চেয়ারখানি একটু ধীরে ধীরে নিপীড়িত হইতেছিল, এইমাত্র । কিন্তু তাহাতে ঠক্-ঠক্ ঢেব-ঢেব ভিন্ন অন্ত কোন শ্রুতিমধুর শব্দ নিঃসৃত হয় নাই । সহসা বেত্রখানি একখানি মোটা রকম পুস্তকের বাঁধা মলাটে লাগিয়া ঠক্ করিয়া উঠিল । অমুসন্ধানে দেখিলাম, সেখানি মেকলে সাহেবের প্রবন্ধ-পুস্তক । এই দ্বিপ্রহরের সময়ে, কি পাপে সেই মহাপুরুষের এই দণ্ড, ভাবিয়া পুস্তক উদ্ঘাটন করিলাম, প্রথমেই চোখে পড়িল Milton ! হুঁচরি ছত্র পড়িয়াই ক্রোধ অধিক উদ্দীপ্ত হইল ; যদি পুস্তকখানি নিজের না হইত তবে উহাকে বেত্রাঘাত-বিদারিত-হৃদয় করিয়া ছাড়িতাম । দেখিলাম, মেকলে একজন মধ্যাহ্ন-সঙ্গীত-বিরোধী । তাঁহার বিশ্বাস এই যে, পৃথিবীর যখন শৈশব ছিল, যখন মাহুঘেরা সরল কুসংস্কার-পূর্ণ ক্ষেত্রে জগজ্জ্ববি নিরীক্ষণ করিত, তখনই প্রকৃত কবিতা ফুটিতে পারিয়াছিল । আর একালে, সভ্যতার চাপে, বিজ্ঞানের তাপে, দর্শনের শাপে, কবিতা বিদায় লইতেছেন । যিনি প্রাচীন ইতিহাসের গোটাকতক বাছাবাছা ঘটনা খুঁজিয়া পাতিয়া নিয়মিত অক্ষরের কারাগারে ফেলিয়া, কবি হইবেন বলিয়া সাধ করিয়াছিলেন, একথা তাঁহার উপযোগী বটে । শৈশব হউক, যৌবন হউক, বার্দ্ধক্য হউক, কোন্ অবস্থায় কবিত্ব নাই ? যাহা হোমার ও বাস্মীকিতে ছিল, সেক্সপীয়র ও কালিদাসে তাহার ক্ষয় দৃষ্ট হয় না ; এবং গেটে, হিউগো, টেনিসন, লংফেলো ও বিস্তাপতিতে তাহা পাওয়া যায় না কে বলিবে ? কবিতা কেবল “রাকাশশিশোভনা গতঘনা যামিনী” লইয়াই ব্যস্ত নয়, অমাবস্তার হৃদ্বিন্দে ও চৈত্রের দ্বিপ্রহরেও তিনি সর্বত্র বিচরণ করেন । সঙ্গীত কোকিলেও আছে, পেচকেও আছে ; চন্দ্রে আছে, জোনাকিতেও

আছে। বিধাতার মহিমা রচিত এমন কোন পদার্থ নাই, যাহা কবিতাশূভ। নাটকের নায়ক, কেবল পরম রূপবান্ ধীরোদাত্ত গুণসম্পন্ন পুরুষই হইবেন, কে বলিল? যাহারা অন্ধ খজ, দীন দুঃখী, চপল পাপাসক্তচিত্ত, তাহাদেরও অন্তরে কত দেবদ্ব, কত মাহাত্ম্য আছে; যাহার চক্ষু নাই, সে দেখিবে কিরূপে? তোমার সীতা, হেলেন, শকুন্তলা, দেস্‌দিমোনা, মার্গারেট একদিকে; আর ফান্টাইন্, ইপোনাইন্, এলিস্, ভ্রমর ও জেন্‌এয়ারে আর একদিকে। কুটিলান্স বলিয়া মন্তরা কুটীলা, কিন্তু সৌন্দর্য্যের প্রতিমা হইয়াও শুইনিভিয়র দুঃশীলা। সেকালে একালে এই স্থানে প্রভেদ। পূর্বে যেগুলি কবিতার অবিস্মৃত ছিল, অথবা নীচ বলিয়া তাহাদের চক্ষে ঠেকিত না, একালের দৃষ্টি সেই পরিত্যক্ত জঞ্জালের মধ্য হইতে রত্ন বাছিয়া বাহির করিতেছে। বালক-কবি লিখিয়াছিলেন:—“A thing of beauty is joy for ever.” (চির আনন্দে নন্দিত, যাহা সুন্দর); আর প্রাচীন কবি লিখিয়াছেন:—“The mind's internal heaven shall shed her dews of inspiration on the humblest lay.” (মানবের গুঢ় স্বর্গ সঞ্চারিবে রস,—ক্ষুদ্র গীতিকায়)। কবিতা ফুরায় না। এ জগৎ নিত্য কবিতা-পরিপূর্ণ। আধ আলো আধচ্ছায়ার কবিত্ব, প্রথর কিরণের কবিত্বকে অগ্রাহ করিতে পারে না। আর যদি আধ আলো আধচ্ছায়া লইয়াই কবিতা, তবে সে ছায়া কি বিপ্রহরেও নাই? চক্ষু দিবসের রোজে বলদিয়া যায়; তখন দূর-দূরান্তরে পড়ে অন্ধকারের ছায়া। দর্শন-বিজ্ঞান অনেক কুসংস্কার ভাঙ্গিয়া দিয়াছে, সত্য; কিন্তু প্রাচীন সংশয় এখনও দূর হইল না। ছায়া এখনও রহিয়াছে। দর্শন-বিজ্ঞানে

চক্ষু ঝলসিয়া যায় ; কিন্তু জগৎতত্ত্ব, সৃষ্টিতত্ত্ব, জীবন-মরণের তত্ত্ব চিরদিনই অন্ধকারে । শ্রেষ্ঠ কবিতা চিরদিনই জীবন-রহস্য লইয়া ; কাজেই কবিতার উৎস অফুরন্ত ।

অনেকে বলেন যে দেখ, চারিদিকে ব্যবসা-বাণিজ্যের শ্রোত ; আমদানি-রপ্তানি ও বোঝাই লইয়া পৃথিবী ব্যস্ত । রাত্রি-দিন চাকার খড়-খড় ঘড়-ঘড়, এঞ্জিনের বংশী-নিনাদে, এ সভ্যতার বৃন্দাবনে, প্রাণও গেল, উপরন্তু কাণও গেল । এ টাকা-পয়সার ঝন্ঝনানিতে কি কোকিলের স্বর শুনিতে পাওয়া যায় ? এঞ্জিনের ধোঁয়ার গন্ধে মাথা ভার, মল্লিকাদির সুবাস পাইবার উপায় কি ? আমি বলি যে, কোকিল ও ফুল লইয়া ত অনেক কবিতা হইয়াছে, কিন্তু সেগুলি ছাড়িয়া, একালের ব্যবসা-বাণিজ্যের কবিতা কি লেখা যায় না ? কল-কারখানার কি কবিতা নাই ? আমার বন্ধু কখন কখন গাইয়া থাকেন :—“কি কল গ’ড়েছে সাহেব কোম্পানি ।” আমি সে গানের কথা বলিতেছি না । আমি যে কবিতার কথা বলিতেছি, মার্কিন কবি হুইটম্যান তাহার পথ দেখাইয়াছেন । হুইটম্যান খুব বড় কবি না হইলেও মধ্যাহ্নের কবি । যে দৃশ্যে তোমার আমার রস শুকাইয়া যায়, সেই দৃশ্যে তাহার কবিত্বের প্রতিভা ফুটিয়া উঠে । তিনি সহরের রাস্তায়, ঘাটে, বাজারে ও কর্মক্ষেত্রে, যে কোলাহল, তাহাকে লইয়াই কবিতা লিখিয়াছেন । এই কোলাহলের মধ্যে যে জীবন বিকশিত, এই পরিশ্রমের মধ্যে যে আনন্দ প্রকাশিত, তিনি তাহারই উজ্জল চিত্র আঁকিয়াছেন । যে দিন ভারতবর্ষ এই সঙ্গীতের মাহাত্ম্য বুঝিবে, সেই দিন অনেক হৃদশার শেষ হইবে । সকলে মিলিয়া চৈত্বের স্বপ্নহরে এই অধীনতার প্রথর স্বর্য্যতলে, একবার কর্ষের

মধ্যাহ্ন-সঙ্গীত গাও, একবার গৌড়-নারাজ ধর, হে আমার সঙ্গীত-
অভিমানী বন্ধু, এ ছন্দেহরে ঘুমাইও না; আমার এই প্রথম ও
শেষ অঙ্গুরোধ রক্ষা কর, একবার গাও।

শ্রীবিজয়চন্দ্র মজুমদার

শ্রীকান্তের নিশীথ অভিযান

কয়েক মুহূর্তেই ঘনাক্ষকারে সম্মুখ এবং পশ্চাৎ লেপিয়া একাকার হইয়া গেল। রহিল শুধু দক্ষিণ ও বামে সীমান্তরাল-প্রসারিত বিপুল উদ্দাম জলশ্রোত এবং তাহারই উপর তীব্র গুতিশীলা এই ক্ষুদ্র তরগীটী এবং কিশোরবয়স্ক ছ'টী বালক। প্রকৃতিদেবীর সেই অপরিমেয় গম্ভীর রূপ উপলব্ধি করিবার বয়স তাহা নহে, কিন্তু সে কথা আমি আজও ভুলিতে পারি নাই। বায়ুলেশহীন, নিরুদ্ভ, নিস্তব্ধ, নিঃশব্দ নিশীথিনীর সে যেন এক বিরীচ কালীমূর্তি। নিবিড় কালো চুলে দ্ব্যলোক ও ভুলোক আচ্ছন্ন হইয়া গেছে, এবং সেই সূচিভেদ্য অন্ধকার বিদীর্ণ করিয়া করাল দংষ্ট্রারেখার জ্বায় দিগন্তবিস্তৃত এই তীব্র জলধারা হইতে কি এক প্রকারের অপরূপ স্তিমিত ছাতি নির্ভর চাপা হাসির মত বিচ্ছুরিত হইতেছে। আশে পাশে সম্মুখে কোথায় বা উন্মত্ত জলশ্রোত গভীর তলদেশে ঘা খাইয়া উপরে উঠিয়া ফাটিয়া পড়িতেছে, কোথায় বা প্রতিকূল গতি পরস্পরের সংঘাতে আবর্ত রচিয়া পাক খাইতেছে, কোথাও বা অপ্রতিহত জলপ্রবাহ পাগল হইয়া ধাইয়া চলিয়াছে।

আমাদের নৌকা কোণাকুণি পাড়ি দিতেছে, এইমাত্র বুঝিয়াছি। কিন্তু, পরপারের ঐ দুর্ভেদ্য অন্ধকারের কোন্‌খানে যে লক্ষ্য স্থির করিয়া ইন্দ্র হাল ধরিয়া নিঃশব্দে বসিয়া আছে, তাহার কিছুই জানি না। এই বয়সেই সে যে কত বড় পাকা

মাঝি, তখন তাহা বুঝি নাই। হঠাৎ সে কথা কহিল—“কিরে, শ্রীকান্ত, ভয় করে ?”

আমি বলিলাম, “না:—”

ইন্দ্র খুসি হইয়া কহিল, “এই ত চাই—সাঁতার জানলে আবার ভয় কিসের !” প্রত্যুত্তরে আমি শুধু একটা ছোট্ট নিঃশ্বাস চাপিয়া ফেলিলাম—পাছে সে শুনিতে পায়। কিন্তু এই পাচ অঙ্ককার রাত্রিতে, এই জলরাশি এবং এই হুর্জর স্রোতের সঙ্গে সাঁতার জানা এবং না-জানার পার্থক্য যে কি, তাহা ভাবিয়া পাইলাম না। সেও আর কোন কথা কহিল না। বহুক্ষণ এইভাবে চলার পরে কি একটা যেন শোনা গেল—অস্ফুট এবং ক্ষীণ ; কিন্তু নৌকা যত অগ্রসর হইতে লাগিল, ততই সে শব্দ স্পষ্ট এবং প্রবল হইতে লাগিল। যেন বহুদূরগত কাহাদের ক্রুদ্ধ আহ্বান। যেন কত বাধাবিঘ্ন ঠেলিয়া ডিঙাইয়া সে আহ্বান আমাদের কানে আসিয়া পৌছিয়াছে—এমনি শাস্ত, অথচ বিরাম নাই, বিচ্ছেদ নাই—ক্রোধ যেন তাহাদের কমেও না, বাড়েও না—ধামিতেও চাহে না। মাঝে-মাঝে এক একবার ঝুপ-ঝাপ শব্দ। জিজ্ঞাসা করিলাম, “ইন্দ্র, ও কিসের আওয়াজ শোনা যায় ?” সে নৌকার মুখটা আর একটু সোজা করিয়া দিয়া কহিল, “জলের স্রোতে ওপারের বালির পাড় ভাঙার শব্দ।”

জিজ্ঞাসা করিলাম, “কত বড় পাড় ? কেমন স্রোত ?”

“সে ভয়ানক স্রোত। ওঃ, তাইত কালো জল হয়ে গেছে, আজ ত তার তলা দিয়ে যাওয়া যাবে না। একটা পাড় ভেঙে পড়লে ডিঙি শুদ্ধ আমরা সব শুঁড়িয়ে যাব। তুই দাঁড় টানতে পারিস ?”

“পারি।”

“তবে টান্।”

আমি টানিতে সুরু করিলাম। ইন্দ্র কহিল, “উই—উই যে কালো মত বাঁ-দিকে দেখা যায়, ওটা চড়া। ওরি মধ্যে দিগে একটা খালের মত আছে, তারি ভিতর দিগে বেরিয়ে যেতে হবে—কিন্তু খুব আস্তে—জেলেরা টের পেলে আর ফিরে আসতে হবে না। লগির ঘায়ে মাথা ফাটিয়ে পাকে পুতে দেবে।”

এ আবার কি কথা! সভয়ে বলিলাম, “তবে, ওর ভিতর দিগে নাই গেলে!” ইন্দ্র বোধ করি একটু হাসিয়া কহিল, “আর ত পথ নেই। এর মধ্যে দিগে যেতেই হবে। বড় চড়ার বাঁ-দিকের রেত ঠেলে জাহাজ যেতে পারে না—আমরা যাব কি ক’রে? ফিরে আসতে পারা যাবে, কিন্তু যাওয়া যাবে না।”

“তবে মাছ চুরি ক’রে কাজ নেই ভাই” বলিয়াই আমি দাঁড় ভুলিয়া ফেলিলাম। চক্ষের পলকে নৌকা পাক খাইয়া পিছাইয়া গেল। ইন্দ্র বিরক্ত হইয়া ফিস্-ফিস্ করিয়া তর্জ্জন করিয়া উঠিল, “তবে এলি কেন? চল—তাকে ফিরে রেখে আসি—কাপুরুষ!” তখন চোদ্দ পার হইয়া পনরয় পড়িয়াছি—আমাকে কাপুরুষ? ঝপাৎ করিয়া দাঁড় জলে ফেলিয়া প্রাণপণে টান দিলাম। ইন্দ্র খুসি হইয়া বলিল, “এই ত চাই। কিন্তু আস্তে ভাই—ব্যাটারা তারি পাজী। আমি ঝাউবনের পাশ দিগে মক্কাক্কেতের ভেতর দিগে এমনি বার ক’রে নিগে যাব যে, শালারা টেরও পাবে না।” একটু হাসিয়া কহিল, “আর টের পেলেই বা কি? ধরা কি মুখের কথা! ঝাখ্ শ্রীকান্ত, কিছু ভয় নেই—ব্যাটারাদের চার-খানা ডিঙি আছে বটে—কিন্তু, যদি দেখিস্ ঘিরে ফেললে ব’লে—আর

পালাবার যো নেই, তখন রূপ ক'রে লাফিয়ে পড়ে একডুবে ষতদূর পারিস্ গিয়ে ভেসে উঠলেই হ'ল। এ অন্ধকারে আর দেখবার জোটি নেই—তারপর মজা ক'রে সতুয়ার চড়ার উঠে ভোরবেলায় সাত্রে এপারে এসে গঙ্গার ধারে ধারে বাড়ী ফিরে গেলেই বাস্ ! কি করবে ব্যাটারা ?”

চড়াটার নাম শুনিয়াছিলাম ; কহিলাম, “সতুয়ার চড়া ত ঘোর নালাস সম্মুখে, সে ত অনেক দূর।” ইহ্ন তাহ্মল্যভরে কহিল, “কোথায় অনেক দূর ? ৬৭ কোশও হবে না বোধ হয়। হাত ভেরে গেলে চিত হয়ে থাকলেই হ'ল—তা ছাড়া, মড়া-পোড়ানো বড়-বড় গুঁড়ি কত ভেসে যাবে দেখতে পাবি।”

আত্মরক্ষার যে সোজা রাস্তা সে দেখাইয়া দিল, তাহাতে প্রতিবাদের আর কিছু রহিল না। এই দিক্-চিহ্নহীন অন্ধকার নিশীথে আবর্তসঙ্কুল গভীর তীব্র জলপ্রবাহে সাত ক্রোশ ভাসিয়া গিয়া ভোরের জ্ঞাত প্রতীক্ষা করিয়া থাকা। ইহার মধ্যে আর এদিকের তীরে উঠিবার জো নাই। দশ পনর হাত খাড়া উচু বালির পাড় মাথায় ভাঙ্গিয়া পড়িবে—এই দিকেই গঙ্গার ভীষণ ভাঙ্গন ধরিয়া জলশ্রোত অর্ধবৃত্তাকারে ছুটিয়া চলিয়াছে।

বস্তুটা অস্পষ্ট উপলব্ধি করিয়াই আমার বীর-হৃদয় সঙ্কুচিত হইয়া বিম্বুবৎ হইয়া গিয়াছিল। কিছুক্ষণ দাঁড় টানিয়া বলিলাম, “কিন্তু আমাদের ডিঙির কি হবে ?”

ইহ্ন কহিল, “সে দিন ত আমি ঠিক এমনি করেই পালিয়েছিলাম। তার পর দিন এসে ডিঙি কেড়ে নিয়ে গেলাম—বললাম, নৌকা ষাট থেকে চুরি ক'রে আর কেউ এনেছিল—আমি নয়।”

তবে, এ সকল এর কল্পনা নয়—একেবারে হাতে-নাতে প্রত্যক্ষ করা সত্য ! ক্রমশঃ ডিঙ্গি খাঁড়ির সম্মুখীন হইলে দেখা গেল, জেলেদের নৌকাগুলা সারি দিয়া খাঁড়ির মুখে বাধা আছে—মিট্-মিট্ করিয়া আলো জ্বলিতেছে। দুইটা চড়ার মধ্যবর্তী এই জলপ্রবাহটা খালের মত হইয়া প্রবাহিত হইতেছিল। ঘুরিয়া তাহার অপর পারে গিয়া উপস্থিত হইলাম।

সে স্থানটায় জলের বেগে অনেকগুলা মোহনার মত হইয়াছে এবং সব কয়টাকেই বুনো ঝাউ গাছে একটা হইতে আর একটাকে আড়াল করিয়া রাখিয়াছে। একটার ভিতর দিয়া খানিকটা বাহিয়া গিয়াই আমরা খালের মধ্যে পড়িলাম। জেলেদের নৌকাগুলা তখন অনেকটা দূরে কালো-কালো ঝোপের মত দেখাইতেছে। আরও খানিকটা অগ্রসর হইয়া গন্তব্য স্থানে পৌঁছান গেল।

ধীবর-প্রভুরা খালের সিংহদ্বার আশুলিয়া আছে মনে করিয়া এ স্থানটায় পাহারা রাখে নাই। ইহাকে মায়াজাল বলে। খালে যখন জল থাকে না, তখন এ-ধার হইতে ও-ধার পর্য্যন্ত উচু উচু কাঠি শক্ত করিয়া পুতিয়া দিয়া তাহারই বহির্দিকে জাল টাঙাইয়া রাখে। পরে বর্ষার জলস্রোতে বড়-বড় রুই-কাতলা ভাসিয়া আসিয়া এই কাঠিতে বাধা পাইয়া লাফাইয়া এদিকে পড়িতে চায় এবং দড়ির জালে আবদ্ধ হইয়া থাকে।

দশ, পনের, বিশ সের রুই-কাতলা গোটা পাঁচ ছয় ইন্ড চক্ষের নিমিষে নোকায় তুলিয়া ফেলিল। সেই বিরাটকায় মৎস্যরাজেরা তখন পুচ্ছতাড়নায় ক্ষুদ্র ডিঙিখানা যেন চূর্ণ বিচূর্ণ করিয়া দিবার উপক্রম করিতে লাগিল ; এবং তাহার শব্দও বড় কম হইল না।

“এত মাছ কি হবে ভাই ?”

“কাজ আছে। আর না, পালাই চল।” বলিয়া সে জাল ছাড়িয়া দিল। আর দাঁড় টানিবার প্রয়োজন নাই। আমি চুপ করিয়া বসিয়া রহিলাম। তখন, তেমনি গোপনে আবার সেই পথেই বাহির হইতে হইবে। অল্পকূল স্রোতে মিনিট দুই তিন ধরবেগে ভাঁটাইয়া আসিয়া হঠাৎ এক স্থানে একটা দমক্ মারিয়া যেন আমাদের এই ক্ষুদ্র ডিঙিটা পাশের ভুট্টা-ক্ষেতের মধ্যে গিয়া প্রবেশ করিল। তাহার এই আকস্মিক গতি-পরিবর্তনে আমি চকিত হইয়া প্রশ্ন করিলাম, “কি ? কি হ’ল ?” ইঙ্গ আর একটা ঠেলা দিয়া নৌকাখানা আরও খানিকটা ভিতরে পাঠাইয়া দিয়া কহিল, “চুপ। শালারা টের পেয়েছে—চারখান ডিঙি খুলে দিয়েই এদিকে আসছে—ঐ ঝাখ্।” তাই ত বটে ! প্রবল জলতাড়নার ছপাছপ্ শব্দ করিয়া তিনখানা নৌকা আমাদের গিলিয়া ফেলিবার জন্ত যেন কৃষ্ণকায় দৈত্যের মত ছুটিয়া আসিতেছে। ওদিকে জাল দিয়া বন্ধ, স্রুমুখে ইহারা—পলাইয়া নিষ্কৃতি পাইবার এতটুকু স্থান নাই। এই ভুট্টা-ক্ষেতের মধ্যেই যে আত্ম-গোপন করা চলিবে, তাহাও সম্ভব মনে হইল না।

“কি হবে ভাই ?” বলিতে বলিতেই অদম্য বাম্পোচ্ছ্বাসে আমার কর্ণনালী রুদ্ধ হইয়া গেল। এই অন্ধকারে এই ফাঁদের মধ্যে খুন করিয়া এই ক্ষেতের মধ্যে পুতিয়া ফেলিলেই বা কে নিবারণ করিবে ?

ইতিপূর্বে পাঁচছয় দিন ইঙ্গ ‘চুরি বিত্তা বড় বিত্তা’ সপ্রমাণ করিয়া নির্দ্বিগ্নে গ্রহণ করিয়াছে, এত দিন ধরা পড়িয়াও পড়ে নাই, কিন্তু আজ ?

সে যুখে একবার বলিল, “ভয় নাই।” কিন্তু গলাটা তাহার বেন কাঁপিয়া গেল। কিন্তু সে থামিল না। প্রাণপণে লগি ঠেলিয়া ক্রমাগত ভিতরে নুকাইবার চেষ্টা করিতে লাগিল। সমস্ত চড়াটা জলে জলময়। তাহারই উপর ৮।১০ হাত দীর্ঘ ভুট্টা এবং জনারের গাছ। ভিতরে এই দু’টা চোর। কোথাও জল একবুক, কোথাও এককোমর, কোথাও হাঁটুর অধিক নয়। উপরে নিবিড় অন্ধকার, সম্মুখে পশ্চাতে দক্ষিণে বামে দুর্ভেদ্য জঙ্গল। পাঁকে লগি পুতিয়া বাইতে লাগিল, নৌকা আর এক হাতও অগ্রসর হয় না। পিছন হইতে জেলেদের অস্পষ্ট কথাবার্তা কানে আসিতে লাগিল। কিছু একটা সন্দেহ করিয়াই যে তাহারা আসিয়াছে এবং তখনও খুঁজিয়া ফিরিতেছে, তাহাতে লেশমাত্র সংশয় নাই।

সহসা নৌকাটা একটু কাত হইয়াই সোজা হইল। চাহিয়া দেখি, আমি একাকী বসিয়া আছি, দ্বিতীয় ব্যক্তি নাই। সভয়ে ডাকিলাম, “ইন্দ্র!” হাত পাঁচ ছয় দূরে বনের মধ্য হইতে সাড়া আসিল, “আমি নীচে।”

“নীচে কেন?”

“ডিঙি টেনে বার করতে হবে। আমার কোমরে দড়ি বাঁধা আছে।”

“টেনে কোথায় বার করবে?”

“ও গঙ্গায়। খানিকটা যেতে পারলেই বড় গাঙে পড়ব।”

তিনিয়া চুপ করিয়া গেলাম। ক্রমশঃ ধীরে ধীরে অগ্রসর হইতে লাগিলাম। অকস্মাৎ কিছুদূরে বনের মধ্যে ক্যানোজা পিটানো ও চেয়া-বাঁশের কটাকট শব্দে চম্কাইয়া উঠিলাম। সভয়ে জিজ্ঞাসা

করিলাম, “ওকি ভাই ?” সে উত্তর দিল, “চাবীরা মাচার উপর ব’সে বুনো শূয়ার তাড়াচ্ছে।”

“বুনো শূয়ার ! কোথায় সে ?” ইন্দ্র নৌকা টানিতে টানিতে তাচ্ছল্যভরে কহিল, “আমি কি দেখতে পাচ্ছি, যে বলব ! আছেই কোথাও এই খানে।” জবাব শুনিয়া স্তব্ধ হইয়া রহিলাম। ভাবিলাম কা’র মুখ দেখিয়া আজ প্রভাত হইয়াছিল ! তথাপি আমি ত নৌকায় বসিয়া ; কিন্তু, ঐ লোকটা একবুক কাদা ও জলের মধ্যে এই বনের ভিতরে। এক পা নড়িবার চড়িবার উপায় পর্য্যন্ত তাহার নাই। মিনিট পনের এইভাবে কাটিল। আর একটা জিনিষ লক্ষ্য করিতেছিলাম। প্রায়ই দেখিতেছি, কাছাকাছি এক-একটা জনার বা ভুট্টা গাছের ডগা ভয়ানক আন্দোলিত হইয়া ‘ছপাৎ’ করিয়া শব্দ হইতেছে। একটা প্রায় আমার হাতের কাছেই। শঙ্কিত হইয়া সে দিকে ইন্দ্রর মনোযোগ আকৃষ্ট করিলাম। খাড়ী শূয়ার না হইলেও বাচ্চা-টাচ্চা নয় ত ?

ইন্দ্র অত্যন্ত সহজভাবে কহিল, “ও কিছু না—সাপ জড়িয়ে আছে ; তাড়া পেয়ে জলে ঝাঁপিয়ে পড়ছে।”

কিছু না—সাপ ! শিহরিয়া নৌকার মাঝখানে জড়সড় হইয়া বসিলাম। অক্ষুটে কহিলাম, “কি সাপ, ভাই ?”

ইন্দ্র কহিল, “সব রকম আছে। ঢোঁড়া, বোড়া, গোখরো, করৈত—জলে ভেসে এসে গাছে জড়িয়ে আছে—কোথাও ডাঙা নেই, দেখছিন্ নে ?”

সে ত দেখছি। কিন্তু ভয়ে যে পারের নথ হইতে মাথার চুল পর্য্যন্ত আমার কাঁটা দিয়া রহিল। সে লোকটা কিন্তু জরুপমাত্র করিল না, নিজের কাজ করিতে করিতে বলিতে লাগিল—“কিন্তু,

কামড়ায় না। ওরা নিজেরাই ভয়ে মরুচে—ছুটো-তিনটে ত আমার গা-ঘেসে পালাল। এক-একটা মস্ত বড়—সেগুলো বোড়া-টোড়া হবে বোধ হয়। আর কামড়ালেই বা কি করব! মরতে এক দিন ত হবেই ভাই!”—এমনি আরও কত কি সে যত্ন স্বাভাবিক কণ্ঠে বলিতে বলিতে চলিল, আমার কানে কতক পৌছিল, কতক পৌছিল না। আমি নির্ঝাঁক নিষ্পন্দ কাঠের মত আড়ষ্ট হইয়া একস্থানে একভাবে বসিয়া রহিলাম। নিঃশ্বাস ফেলিতেও যেন ভয় করিতে লাগিল—ছপাৎ করিয়া একটা যদি নোকার উপরেই পড়ে!

কিন্তু সে যাই হোক, ওই লোকটা কি! মানুষ? দেবতা? পিশাচ? কে ও? কার সঙ্গে এই বনের মধ্যে ঘুরিতেছি! যদি মানুষই হয়, তবে ভয় বলিয়া কোন বস্তু যে বিশ্বসংসারে আছে, সে কথা কি ও জানেও না! বুকখানা কি পাথর দিয়া তৈরি? সেটা কি আমাদের মত সঙ্কুচিত-বিস্ফারিত হয় না? তবে যে সে দিন মাঠের মধ্যে সকলে পলাইয়া গেলে সে নিতান্ত অপরিচিত আমাকে একাকী নির্ঝিল্লি বাহির করিবার জন্ত শত্রুর মধ্যে প্রবেশ করিয়াছিল, সে দয়া-মায়াজ্ঞ কি ওই পাথরের মধ্যেই নিহিত ছিল! আর আজ? সমস্ত বিপদের বার্তা তন্ন-তন্ন করিয়া জানিয়া গুনিয়া নিঃশব্দে অকুণ্ঠিতচিত্তে এই ভয়াবহ, অতি ভীষণ যত্নের মুখে নামিয়া দাঁড়াইল; একবার একটা মুখের অমুরোধও করিল না—“শ্রীকান্ত, তুই একবার নেবে যা।” সে ত জোর করিয়াই আমাকে নামাইয়া দিয়া নোকা টানিতে পারিত! এ ত শুধু খেলা নয়! জীবন্মুত্থার মুখোমুখি দাঁড়াইয়া এই স্বার্থত্যাগ এই বয়সে কয়টা লোক করিয়াছে? ঐ যে

বিনা আড়ম্বরে সামান্তভাবে বলিয়াছিল, ‘মরুতে এক দিন ত হবেই,’ এমন সত্য কথা বলিতে কয়টা মানুষকে দেখা যায়? সে-ই আমাকে এই বিপদের মধ্যে টানিয়া আনিয়াছে সত্য, কিন্তু, সে যাই হোক, তাহার এতবড় স্বার্থত্যাগ আমি মানুষের দেহ ধরিয়া ভুলিয়া যাই কেমন করিয়া? কেমন করিয়া ভুলি, যাহার হৃদয়ের ভিতর হইতে এত বড় অযাচিত দান এতই সহজে বাহির হইয়া আসিল—সে হৃদয় কি দিয়া কে গড়িয়া দিয়াছিল! তার পরে কত কাল কত সুখ-দুঃখের ভিতর দিয়া আজ এই বার্ককে উপনীত হইয়াছি। কত দেশ, কত প্রান্তর, কত নদ-নদী-পাহাড়-পর্বত-বন-জঙ্গল ঘাঁটিয়া ফিরিয়াছি, কত প্রকারের মানুষই না এই ছটো চোখে পড়িয়াছে—কিন্তু, এত বড় মহাপ্রাণ ত আর কখনও দেখিতে পাই নাই! কিন্তু সে আর নাই। অকস্মাৎ এক দিন যেন বৃষ্ণদের মত শূণ্ণে মিলাইয়া গেল। আজ মনে পড়িয়া এই ছটো গুরু চোখ জলে ভাসিয়া যাইতেছে—কেবল একটা নিষ্ফল অভিমান হৃদয়ের তলদেশ আলোড়িত করিয়া উপরের দিকে ফেনাইয়া উঠিতেছে। সৃষ্টিকর্তা! এই অদ্ভুত অপার্থিব বস্তু কেনই বা সৃষ্টি করিয়া পাঠাইয়াছিলে, এবং কেনই বা তাহা এমন ব্যর্থ করিয়া প্রত্যাহার করিলে! বড় ব্যথায় আমার এই অসহিষ্ণু মন আজ বারংবার এই প্রশ্নই করিতেছে—ভগবান! টাকা-কড়ি, ধন-দৌলত, বিদ্যা-বুদ্ধি ঢের ত তোমার অকুরন্ত ভাণ্ডার হইতে দিতেছ দেখিতেছি; কিন্তু এত বড় একটা মহাপ্রাণ আজ পর্যন্ত তুমিই বা কয়টা দিতে পারিলে? যাক্ সে কথা। ক্রমশঃ, ঘোর কল-কল্লোল নিকটবর্তী হইতেছে, তাহা উপলব্ধি করিতে-ছিলাম; অতএব আর প্রশ্ন না করিয়াই বুঝিলাম, এই

বনাস্তুরালেই সেই ভীষণ প্রবাহ—যাহাকে অতিক্রম করিয়া ষ্টীমার যাইতে পারে না—তাহাই প্রধাবিত হইতেছে। বেশ অল্পভব করিতেছিলাম, জলের বেগ বদ্ধিত হইতেছে এবং ধূসর ফেনপুঞ্জ বিস্তৃত বালুকারাশির ভ্রমোৎপাদন করিতেছে। ইন্দ্র আসিয়া নৌকায় উঠিল এবং বোটে হাতে করিয়া সম্মুখবর্তী উদ্দাম শ্রোতের জন্ত প্রস্তুত হইয়া বসিল। কহিল, “আর ভয় নেই; বড় গাঙে এসে পড়েছি।” মনে মনে কহিলাম, ভয় না থাকে ভালই। কিন্তু, কিসে যে তোমার ভয় আছে, তা’ও ত বুঝিলাম না। পরক্ষণেই সমস্ত নৌকাটা আপাদমস্তক একবার যেন শিহরিয়া উঠিল, এবং চক্ষের পলক না ফেলিতেই দেখিলাম, তাহা বড় গাঙের শ্রোত ধরিয়া উল্কাবেগে ছুটিয়া চলিয়াছে।

তখন ছিন্ন-ভিন্ন মেঘের আড়ালে বোধ করি যেন চাঁদ উঠিতেছিল। কারণ, যে অন্ধকারের মধ্যে যাত্রা করিয়াছিলাম, সে অন্ধকার আর ছিল না। এখন অনেক দূর পর্য্যন্ত অস্পষ্ট হইলেও দেখা যাইতেছিল। দেখিলাম, বনঝাউ এবং ভুট্টা-জনারের চড়া ডান দিকে রাখিয়া নৌকা আমাদের সোজা চলিতেই লাগিল।

শ্রীশরৎচন্দ্র চট্টোপাধ্যায়।

অশ্রুজল

জীবনের-সুখ দুঃখের স্মৃতিতে মুখ লুকাইয়া একবারও কাঁদে নাই, সংসারে একরূপ লোক দেখা যায় না। সকল মনুষ্যেরই হৃদয়তন্ত্রীতে এক একটা সুর কেমন লাগিয়া থাকে, সেই সুরে যেদিন আঘাত পড়ে সেইদিন সহসা যেন তাহার জীবনে কি পরিবর্তন সাধিত হয়, তাহার হৃদয়ের মর্মে মর্মে কি যেন তড়িৎ-স্রোত ছুটিয়া বেড়ায় ; আপনাকে কোথায় যেন ধরিতে পাইয়া সে একবার পশ্চাতে ফিরিয়া দেখে, তাহার নয়ন বাহিয়া অশ্রুজল ঝরিতে থাকে। কিন্তু কোন্‌খানে কবে কি আঘাত লাগিয়া তাহার হৃদয় চঞ্চল হইয়া উঠে, সে কি তাহা বুঝিতে পারে ? সে আপনার মনে কাঁদিয়া যায়—না কাঁদিয়া সে থাকিতে পারে না—কিন্তু তাহার সেই হৃদয়মণ্ডিত অশ্রুবিন্দুতে কত দিনের হয়ত গভীর সুখ-দুঃখের স্মৃতি আছে, সে তাহা জানেও না। প্রথম উচ্ছ্বাস যখন সংযত হইয়া আসে, তখন যদি সে ভাবিয়া দেখে, তবে হয়ত দেখিতে পায়, বিন্দুর মধ্যে হারাইয়া যাওয়া যায় এমন কিছু আছে—সেখানে সকলই শূন্য নহে।

অশ্রুজল ত আর কিছু নহে, হৃদয়ের নীরব ভাষা। হৃদয় উথলিয়া উঠিয়া আপনাতে আর থাকিতে পারে না, বাহির হইয়া পড়ে। সুতরাং অশ্রুবিন্দুর মধ্যে হৃদয় কতখানি লুকাইয়া আছে বলিতে হইবে না। কিন্তু হৃদয়ের এই অশ্রুভাষায় কি ভাব ব্যক্ত হয় ? হৃদয়ের ভাষা ত আরও আছে। নৈরাশ্রের বিজন কাননে

যখন আত্মহারা দীর্ঘনিশ্বাস শিহরিয়া উঠিয়া মিলাইয়া যায়, তখন সেও ত সেই হৃদয়ের ভাষা ; আসন্ন নির্বাণের বিবর্ণ অধরে যখন ক্ষীণ দীপশিখার মত একটা ম্লান অশ্রুট রক্ত-সৌন্দর্য্য বিকশিয়া উঠে, তখন সেও ত সেই অবসন্ন হৃদয়ের নীরব ভাষা । তাই বলিয়া এসব ভাষাই ত আর সম্পূর্ণ এক নহে—ভাবের সাদৃশ্য থাকিতে পারে মাত্র, কিন্তু একভাব হওয়ার সম্ভাবনা বিরল । অশ্রুজলের মর্ম্মের ভাব দীর্ঘনিশ্বাসের সহিত এক নয়—বেশ একটু তফাৎ আছে ।

নয়নে অশ্রু বহে কখন ? অভিমান, অমুতাপ, হৃদয়ের স্নগভীর বেদনাতেই ত অশ্রুজলের উচ্ছ্বাস । আনন্দেও অশ্রু ঝরে । সুখের শুধু অশ্রু নাই । দীর্ঘনিশ্বাসও হৃদয়ের বেদনা-উচ্ছ্বাস । কিন্তু হৃদের মধ্যে ভাবের তারতম্য কি ? দীর্ঘনিশ্বাসে অতৃপ্তির ভাব কিছু বিশেষরূপে অভিব্যক্ত, অশ্রুজলে শান্তির ভাব । হৃদয় যখন ব্যথিত হইয়া আপনার মধ্যে মিলাইয়া থাকিতে চায়, একা একা আপনার মধ্যে যখন সে অজ্ঞাতবাস করে, তখন তাহার গ্রস্থিতে গ্রস্থিতে দীর্ঘনিশ্বাস হাহাকার করিয়া মরে । দীর্ঘনিশ্বাসে হৃদয়ের ভয়ানক অন্তর্দাহ হয়, হৃদয় জলিয়া পুড়িয়া থাকে হইয়া যায় । অশ্রুজলে এ দাবানলভাব নাই, হৃদয় যেন গলিয়া গিয়া অশ্রুরূপে ঝরিয়া যায় ; বেদনার অনেকটা উপশম হয় । দীর্ঘনিশ্বাসে অশ্রুজলের এ তৃপ্তি কোথায় ? হৃদয় গুমরিয়া গুমরিয়া প্রতিদিন অবসন্ন হইয়া আসে, প্রাণে যে শেল বিধিয়া থাকে, তাহার জ্বালা আরও বৃদ্ধি পায়, কিন্তু সে শেল ঘুচে না । এই দীর্ঘনিশ্বাস যখন বৃকে আসিয়া আটকাইয়া যায়, সহসা আসিতে আসিতে আর আসিতে পারে না, তখন লোকে উদ্গাদ-হাসি হাসিয়া উঠে । তখন সে এক দারুণ যন্ত্রণার অবস্থা—ভাবিতে

কল্পনা শিহরিয়া উঠে। সহসা উখলিয়া উচ্ছ্বাস রুদ্ধ হইয়া গিয়া হৃদয়-পাখাণের মত যেন হিম হইয়া যায়। অশ্রু যখন ঝরিতে পায় না, হৃদয়েই শুকাইয়া আসে, তখন উন্মাদ হাসি দেখা দেয় না, অধরে হাসি মিলাইয়া যায়—ম্লান, ক্ষীণ, নিভ-নিভ। সে যাতনায় শান্তি আছে,—দীর্ঘনিশ্বাসের রৌদ্রতপ্ত মরুভূমি-ভাব নাই।

অভিমান যখন চোখের জল মুছিতে থাকে, তখন নৈরাশ্রের মধ্যেও কিছু আশা আছে—তখন অভিমানকে শাস্ত করা যাইতে পারে, পুরাতন স্মৃতির উপর একটা আবরণ টানিয়া দেওয়া যায়। কিন্তু অভিমানের চোখে যখন জল নাই, হৃদয়ে শুধু দীর্ঘনিশ্বাস উঠিয়া মিলাইয়া যায়, তখন তাহাকে শাস্ত করা দায়, তখন অবস্থা বড় ভাল নয়। অহুতাপও চোখের জল ফেলিলে, ভরসা হয়, পুরাতন স্মৃতি ভুলিয়া এইবারে সে বুঝি নব-উজ্জ্বলে কাজে লাগে। আর অহুতাপের হৃদয়ে যখন কেবলই দীর্ঘনিশ্বাস উখলিয়া উঠে, তখন স্মৃতির দংশনে দংশনে সে কাতর, তাহার অবস্থা মৃত্যুর সন্নিকট।

কিন্তু হৃৎকের গভীরতা কোথায়—অশ্রুজলে কি দীর্ঘনিশ্বাসে? এ কথা বলা কিছু কঠিন। দীর্ঘনিশ্বাসের মধ্যেও যেমন অশ্রুজলের হৃদয়েও সেইরূপ দুঃখ লুকাইয়া থাকিতে পারে। স্বতন্ত্র ভাবের হৃদয়ে স্বতন্ত্র ভাবের উচ্ছ্বাস। তবে রুদ্ধ প্রবাহ, রুদ্ধ উচ্ছ্বাস যন্ত্রণাই যে অধিক কষ্টদায়ক সে বিষয়ে কোন সন্দেহ নাই। যেখানে হৃদয় বড়ই গভীর সেখানে উচ্ছ্বাস ততই কম বলিয়া উপলব্ধি হয়, যন্ত্রণাও সেখানে অধিক বলিয়া বোধ হয় না, কিন্তু বাস্তবিক সেখানে যন্ত্রণার অবসান নাই। লঘু হৃদয় সহজেই

ঝরিয়া যায়, যন্ত্রণা সেখানে আঁকড়িয়া থাকিতে পারে না। গভীর হৃৎকের দীর্ঘনিশ্বাসে বড়ই কষ্ট—চোখে জল আসিলে কষ্টের কতকটা উপশম হয়।

দীর্ঘনিশ্বাসে প্রাণ কাঁপিয়া উঠে—হৃদয়ের মধ্যে এমন একটা উলটপালট হয় যে, কিছুই যেন ধরিয়া ছুঁইয়া পাওয়া যায় না। দীর্ঘনিশ্বাসে সাস্থনা পায় না। অশ্রুজলে কতকটা তবু সাস্থনা আছে—আপনাকে ব্যক্ত করিয়া তৃপ্তি হয়। সমদ্রঃসীর নিকট কাঁদিয়া অনেক সময় সুখ আছে, কিন্তু দীর্ঘনিশ্বাস আপনার বাহিরে প্রায় বাহির হয় না। দীর্ঘনিশ্বাসে জীবন যেন বাহির হইতে চায়, কিন্তু পারে না, প্রতি উত্তমে আঘাত খাইয়া ফিরিয়া আসে।

অশ্রুজলে প্রেমের মধুর ভাবটী বড় পরিস্ফুট—নৈরাশ্র নয়, হাহাকার নয়, প্রেমের মধ্যে যে একটা পবিত্র সৌন্দর্য চিরবিকশিত—সেই ভাবটী। সে ভাবে উগ্রভাবের একেবারে অভাব; তাহা বড়ই কোমল, মধুর, পবিত্র। তাহার তুলনায় দীর্ঘনিশ্বাসের কতকটা রোদ্র ভাব বলা যাইতে পারে। অশ্রুজলের এই মধুর ভাবেই প্রধান সৌন্দর্য। এ ভাবে বতই ডুবা যায় ততই তাহার গভীরতা উপলব্ধি হয়। সমস্ত জগৎকে আপনার মধ্যে আনিয়া আমরা এই ভাবে ডুবিয়া যাই, যত ডুবি আপনাকে ততই ভুলিতে থাকি। এমন আত্মবিস্মৃতি আর কোথাও বুঝি নাই।

দীর্ঘনিশ্বাসে আপনাতে আর আপনি থাকি না, কিন্তু আপনাকে পাঁচজনের মধ্যে হারাইয়া ফেলি না। দীর্ঘনিশ্বাসে আত্মহত্যা; অশ্রুজলে আত্মবিসর্জন। দীর্ঘনিশ্বাসে হৃদয় ছারখার হইয়া পিয়াছে, প্রতীকারাশা বিরল; অশ্রুজলে হৃদয়ের মোহ

ধুইয়া গিয়াছে, কিন্তু হৃদয় যায় নাই। অশ্রুজলে জগৎ ডুবিতে পারে; দীর্ঘনিশ্বাসের কাছে জগৎ ঘেসিতে পারে না—তাপ বড় প্রবল।

কিন্তু এ ছলনার সংসারে স্বর্গের অশ্রুজল ত প্রায় মিলে না। এখানে সকল বিষয়েই প্রতারণা আছে, হৃদয়ের ভাষায় ভাণ না থাকিবে কেন? হৃদয়হীন লোকে হৃদয় লইয়া উপহাস করে, হৃদয়ের বিরুদ্ধে সারি সারি শাণিত দস্ত ও নির্ভুর বৃদ্ধাঙ্গুষ্ঠ খাড়া করিয়া দিয়া তামাসা দেখে। এই জগৎ হৃদয়ের অশ্রুজল বিজন অরণ্যের শান্তিনিকেতনেই ঝরিয়া যায়। আর লোকালয়ে তার কণ্ঠ স্ফীত বদন চোখ মিটিমিটি করিয়া দু'এক ফোঁটা নীরস জল বাহির করে; তাহার চারিদিকে পরহৃদয়ছিদ্রাঙ্গুসন্ধিৎসুর আইনবদ্ধ বাহবাগুলি চাটুকোরের মত ঘিরিয়া বসে, ইহাই তাহার অভিলাষ। কিন্তু যেমন লোকই হোক তাহার হৃদয়ে স্বর্গের অশ্রুজল একদিন না একদিন দেখা দিবেই।

অশ্রুজলের মত আমাদের বন্ধু কেহ নাই। এই অসীম সংসার-সমুদ্র মন্থন করিয়া অমৃত যাহা উঠে—অশ্রুজল। দীর্ঘনিশ্বাসের তীব্র দংশন সেখানে নাই—সেখানে কি স্নগভীর স্নেহ, শান্তিময় প্রেম! রোষে, ক্ষোভে, অভিমানে আমরা যখন আপনাকে ছাড়িয়া দি, তখন অশ্রুজল যদি দেখা না দেয়, তাহা হইলে প্রাণ কি বাঁচে? আমরা পদে পদে হৃদয়ে অনন্ত নরককুণ্ড রচনা করিতে বসি, কিন্তু এ সংসারে নাকি অশ্রুজল আজিও শুকায় নাই, তাই নরকযন্ত্রণার মধ্যে স্বর্গের সোপান দেখিয়া বিস্মিত হই। অশ্রুজলে যে কি পবিত্রতা আছে তাহা বলিয়া শেষ করা যায় না।

বুকে যাহার দীর্ঘনিশ্বাস বিঁধিয়া আছে, তাহার জীবন শেষ হইয়া গিয়াছে। তাহার আশা ভরসা কিছুই নাই। অশ্রুজলে দলিত হৃদয় নবজীবন লাভ করে। অশ্রুজল সম্পদে সুখ, বিপদে বদ্ধ, রোগে আরাম, শোকে শান্তি। অশ্রুধৌত হৃদয় ঋণবলোকের ছায়া।

হে অশ্রুজল ! নিশ্বাস-শপ্ত হৃদয়ে তুমি চিরদিন শান্তি বর্ষণ কর, সেখান হইতে নিশ্চয় হাহাকার ঘুচিয়া যাক। সংসারের শোক-তাপ-ভয়ে জরজর প্রাণে তুমি সেই অভয়পদের প্রতিষ্ঠা কর, ধরণীর পাপভার লঘু হোক। তুমি এস, এই ক্ষুদ্র মানব-শিশুর মলিন হৃদয়ে একবার এস, এ মরাভূমি ঘুচিয়া যাইবে। একবার শুধু এস, তুমি এস।

বলেন্দ্রনাথ ঠাকুর।

কাব্যের উপেক্ষিতা

কবি তাঁহার কল্পনা-উৎসবের যত করুণাবারি সমস্তই কেবল জনকতনয়ার পুণ্য অভিষেকে নিঃশেষ করিয়াছেন। কিন্তু আর একটি যে গ্লানমুখী ঐহিকের সর্বস্বথবঞ্চিতা রাজবধু সীতাদেবীর ছায়াতলে অবগুপ্তিতা হইয়া দাঁড়াইয়া আছেন, কবি-কমণ্ডলু হইতে একবিন্দু অভিষেকবারিও কেন তাঁহার চিরজুখাতিতপ্ত নম্রললাটে সিঞ্চিত হইল না! হায় অব্যক্তবেদনা দেবী উর্শ্বিলা, তুমি প্রভুঘের তারার মত মহাকাব্যের সুরমেশিখরে একবারমাত্র উদিত হইয়াছিলে, তারপরে অরুণালোকে আর তোমাকে দেখা গেল না! কোথায় তোমার উদয়াচল, কোথায় বা তোমার অন্তাচল তাহা প্রশ্ন করিতেও সকলে বিস্মৃত হইল।

কাব্যসংসারে এমন ছুটি একটি রমণী আছে যাহারা কবিকর্তৃক সম্পূর্ণ উপেক্ষিত হইয়াও অমরলোক হইতে ভ্রষ্ট হয় নাই। পক্ষপাত-রূপণ কাব্য তাহাদের জন্ত স্থানসঙ্কোচ করিয়াছে বলিয়াই পাঠকের হৃদয় অগ্রসর হইয়া তাহাদিগকে আসন দান করে।

কিন্তু এই কবিপরিত্যক্তাদের মধ্যে কাহাকে কে হৃদয়ে আশ্রয় দিবেন, তাহা পাঠকবিশেষের প্রকৃতি এবং অভিরুচির উপর নির্ভর করে। আমি বলিতে পারি, সংস্কৃত সাহিত্যে কাব্যযজ্ঞশালার প্রান্তভূমিতে যে কয়টি অনাদৃতার সহিত আমার পরিচয় হইয়াছে, তাহার মধ্যে উর্শ্বিলাকে আমি প্রধান স্থান দিই।

বোধ করি তাহাই একটা কারণ, এমন মধুর নাম সংস্কৃত কাব্যে আর দ্বিতীয় নাই। নামকে ধাঁহাঝাঁ নামমাত্র মনে করেন

আমি তাঁহাদের দলে নই। সেক্সপিয়র বলিয়া গেছেন—গোলাপকে যে-কোনো নাম দেওয়া যাক তাহার মাধুর্য্যের তারতম্য হয় না। গোলাপ সম্বন্ধে হয়ত তাহা খাটিতেও পারে, কারণ গোলাপের মাধুর্য্য সঙ্কীর্ণসীমাবদ্ধ। তাহা কেবল গুটীকতক সুস্পষ্ট প্রত্যক্ষগম্য গুণের উপর নির্ভর করে। কিন্তু মাহুঘের মাধুর্য্য এমন সৰ্ব্বাংশে সুগোচর নহে, তাহার মধ্যে অনেকগুলি সূক্ষ্ম সূকুমার সমাবেশে অনির্বচনীয়তার উদ্বেক করে। তাহাকে আমরা কেবল ইন্দ্রিয় দ্বারা পাই না, কল্পনা দ্বারা সৃষ্টি করি। নাম সেই সৃষ্টিকার্য্যের সহায়তা করে। একবার মনে করিয়া দেখিলেই হয় দ্রোপদীর নাম যদি উর্শ্বিলা হইত তবে সেই পঞ্চবীরপতিগর্ভিতা ক্ষত্রনারীর দীপ্ত তেজ এই তরুণ কোমল নামটির দ্বারা পদে পদে খণ্ডিত হইত।

অতএব এই নামটির জন্ত বাল্মীকির নিকট কৃতজ্ঞ আছি। কবিশঙ্কর ইহার প্রতি অনেক অবিচার করিয়াছেন, কিন্তু দৈবক্রমে ইহার নাম যে মাণ্ডবী অথবা ঐতকীর্তি রাখেন নাই সে একটা বিশেষ সৌভাগ্য। মাণ্ডবী ও ঐতকীর্তি সম্বন্ধে আমরা কিছু জানি না, জানিবার কৌতূহলও রাখি না।

উর্শ্বিলাকে কেবল আমরা দেখিলাম বধূবেশে, বিদেহনগরীর বিবাহসভায়। তারপরে যখন হইতে সে রঘুরাজকুলের সুবিপুল অন্তঃপুরের মধ্যে প্রবেশ করিল তখন হইতে আর তাহাকে একদিনও দেখিয়াছি বলিয়া মনে হয় না। সেই তাহার বিবাহ-সভার বধূবেশের ছবিটিই মনে রহিয়া গেল। উর্শ্বিলা চিরবধু—নিরীকাকুণ্ঠিতা নিঃশব্দচারিণী। ভবভূতির কাব্যেও তাহার সেই ছবিটুকুই মুহূর্ত্তের জন্ত প্রকাশিত হইয়াছিল—সীতা কেবল সম্মুখে কৌতুকে একটবার মাত্র তাহার উপরে তর্জনী রাখিয়া দেবরকে

জিজ্ঞাসা করিলেন, “বৎস ! ইনি কে ?” লক্ষ্মণ লজ্জিত-হাস্তে মনে মনে কহিলেন, ওহো উর্শ্বিলার কথা আৰ্য্য জিজ্ঞাসা করিতেছেন ! এই বলিয়া তৎক্ষণাৎ লজ্জায় সে ছবি ঢাকিয়া ফেলিলেন ; তাহার পর রামচন্দ্রের এত বিচিত্র সুখদুঃখচিত্রশ্রেণীর মধ্যে আর একটিবারও কাহারও কোতূহল-অঙ্গুলী এই ছবিটির উপরে পড়িল না । সে ত কেবল বধু উর্শ্বিলা মাত্র ।

তরুণ গুলুভালে যেদিন প্রথম সিন্দূরবিন্দুটি পরিয়াছিলেন, উর্শ্বিলা চিরদিনই সেইদিনকার নববধু । কিন্তু রামের অভিষেক-মঙ্গলাচরণের আয়োজনে যেদিন অন্তঃপুরিকাগণ ব্যাপৃত ছিল সেদিন এই বধুটিও কি সীমন্তের উপর অঙ্কবগুণ্টন টানিয়া রঘুকুললক্ষ্মীদের সহিত প্রসন্নকল্যাণমুখে মাঙ্গল্য রচনায় নিরতিশয় ব্যস্ত ছিল না ? আর যেদিন অযোধ্যা অন্ধকার করিয়া দুই কিশোর রাজভ্রাতা সীতাদেবীকে সঙ্গে লইয়া তপস্বিবেশে পথে বাহির হইলেন সেদিন বধু উর্শ্বিলা রাজহর্ম্যের কোন্ নিভৃত শয়নকক্ষে ধূলিশয্যায় বস্তুচ্যুত মুকুলাটির মত লুপ্তিত হইয়া পড়িয়াছিল তাহা কি কেহ জানে ? সেদিনকার সেই বিশ্বব্যাপী বিলাপের মধ্যে এই বিদীর্ঘমাণ ক্ষুদ্র কোমল হৃদয়ের অসহ্য শোক কে দেখিয়াছিল ? যে ঋষিকবি ক্রৌঞ্চবিরহিণীর বৈধব্যদুঃখ মুহূর্তের জন্ত সহ্য করিতে পারেন নাই, তিনিও একবার চাহিয়া দেখিলেন না ।

লক্ষ্মণ রামের জন্ত সর্বপ্রকারে আত্মবিলোপসাধন করিয়াছিলেন, সে গৌরব ভারতবর্ষের গৃহে গৃহে আজও ঘোষিত হইতেছে, কিন্তু সীতার জন্ত উর্শ্বিলার আত্মবিলোপ কেবল সংসারে নহে, কাব্যেও । লক্ষ্মণ তাঁহার দেবতাসুগলের জন্ত কেবল নিজেকে উৎসর্গ করিয়াছিলেন, উর্শ্বিলা নিজের চেয়ে অধিক নিজের স্বামীকে দান

করিয়াছিলেন। সে-কথা কাব্যে লেখা হইল না। সীতার
অশ্রুজলে উন্মিল্লা একেবারে মুছিয়া গেল।

লক্ষণ ত বারো বৎসর ধরিয়া তাঁহার উপাশ্রু প্রিয়জনের
প্রিয়কার্য্যে নিযুক্ত ছিলেন—নারী-জীবনের সেই বারোটি শ্রেষ্ঠ
বৎসর উন্মিল্লার কেমন করিয়া কাটিয়াছিল? সলজ্জ নবপ্রেমে
আমোদিত বিকাসোন্মুখ হৃদয়মুকুলটি লইয়া স্বামীর সহিত যখন
প্রথমতম মধুরতম পরিচয়ের আরম্ভসময় সেই মুহূর্ত্তে লক্ষণ
সীতাদেবীর রক্তচরণক্ষেপের প্রতি নত দৃষ্টি রাখিয়া বনে গমন
করিলেন—যখন ফিরিলেন তখন নববধূর সূচির প্রণয়ালোকবঞ্চিত
হৃদয়ে আর কি সেই নবীনতা ছিল? পাছে সীতার সহিত উন্মিল্লার
পরম দুঃখ কেহ তুলনা করে, তাই কি কবি সীতার স্বর্গমন্দির
হইতে এই শোকোজ্জ্বলা মহাভূখিনিীকে একেবারে বাহির করিয়া
দিয়াছেন—জ্ঞানকীর পাদপীঠপার্শ্বেও বসাইতে সাহস করেন নাই?

সংস্কৃত কাব্যের আর দুইটি তপস্বিনী আমাদের চিত্তক্ষেত্রে
তপোবন রচনা করিয়া বাস করিতেছে। প্রিয়ংবদা আর অননুয়া।
তাহারা ভর্তৃহৃৎগামিনী শকুন্তলাকে বিদায় দিয়া পথের মধ্য হইতে
কাঁদিতে কাঁদিতে ফিরিয়া আসিল, নাটকের মধ্যে আর প্রবেশ
করিল না, একেবারে আমাদের হৃদয়ের মধ্যে আসিয়া আশ্রয়
গ্রহণ করিল।

জানি, কাব্যের মধ্যে সকলের সমান অধিকার থাকিতে পারে
না। কঠিনহৃদয় কবি তাঁহার নায়ক-নায়িকার জন্ত কত অক্ষয়
প্রতিমা গড়িয়া গড়িয়া নিঃশ্বমচিন্তে বিসর্জন দেন! কিন্তু তিনি
যেখানে বাহাকে কাব্যের প্রয়োজন বুঝিয়া নিঃশেষ করিয়া ফেলেন
সেইখানে কি তাহার সম্পূর্ণ শেষ হয়? দীপ্তরোষ ঋষিশিষ্যদ্বয়

এবং হতবুদ্ধি রোহিণীমানা গৌতমী যখন তপোবনে কিরিয়ী আসিয়া উৎসৃষ্ট উৎকণ্ঠিত সখী দুইটিকে রাজসভার বৃত্তান্ত জ্ঞানাইল তখন তাহাদের কি হইল, সে-কথা শকুন্তলা নাটকের পক্ষে একেবারেই অনাবশ্যক, কিন্তু তাই বলিয়া কি সেই অকথিত অমের বেদনাই সেই খানেই ক্রান্ত হইয়া গেল ? আমাদের হৃদয়ের মধ্যে কি বিনা ছন্দে বিনা ভাষায় চিরদিন তাহা উদ্ভাস্ত হইয়া ফিরিতে লাগিল না ?

কাব্য হীরার টুকরার মত কঠিন। যখন ভাবিয়া দেখি, প্রিয়ংবদা অননুয়া, শকুন্তলার কতখানি ছিল—তখন সেই কথ-হুহিতার পরমতম দুঃখের সময়েই সেই সখীদিগকে একেবারেই অনাবশ্যক অপবাদ দিয়া সম্পূর্ণরূপে বর্জন করা কাব্যের পক্ষে ন্যায়বিচারসঙ্গত হইতে পারে, কিন্তু তাহা নিরতিশয় নিষ্ঠুর।

শকুন্তলার সুখসৌন্দর্য্য গৌরবগরিমা বৃদ্ধি করিবার জন্তই এই দুটি লাভ্যাশ্রতিমা নিজের সমস্ত দিয়া তাহাকে বেষ্টন করিয়াছিল। তিনটি সখী যখন জলের ঘট লইয়া অকালবিকসিত নবমালতীর তলে আসিয়া দাঁড়াইল, তখন দৃশ্যস্ত কি একা শকুন্তলাকে ভালবাসিয়াছিলেন ? তখন হাশ্বে কোঁতুকে নব ঘোবনের বিলোল-মাধুর্য্যে কাহারো শকুন্তলাকে সম্পূর্ণ করিয়া তুলিয়াছিল ? এই দুটি তাপসী সখী। একা শকুন্তলা শকুন্তলার এক-তৃতীয়াংশ ! শকুন্তলার অধিকাংশই অননুয়া এবং প্রিয়ংবদা, শকুন্তলাই সর্কোপেক্ষা অল্প। বারো আনা প্রেমালাপ ত তাহারাই সুচারুরূপে সম্পন্ন করিয়া দিল। তৃতীয় অঙ্কে যেখানে একাকিনী শকুন্তলার সহিত দৃশ্যস্তের প্রেমাঙ্কলতা বর্ণিত আছে সেখানে কবি অনেকটা হীনবল হইয়াছিলেন—কোনো মতে অচিরে গৌতমীকে আনিয়া তিনি

রক্ষা পাইলেন—কারণ শকুন্তলাকে যাহারা আবৃত করিয়া সম্পূর্ণ করিয়াছিল তাহারা সেখানে ছিল না। বৃত্তচ্যুত ফুলের উপর দিবসের সমস্ত প্রথর আলোক সহ হয় না—বৃন্তের বন্ধন এবং পল্লবের ঈষৎ অন্তরাল ব্যতীত সে আলোক তাহার উপর তেমন কমনীয় কোমল ভাবে পড়ে না। নাটকের ঐ কটি পত্রে সখী-বিরহিতা শকুন্তলা এতই সুস্পষ্টরূপে অসহায় অসম্পূর্ণ অনাবৃতভাবে চোখে পড়ে যে, তাহার দিকে যেন ভাল করিয়া চাহিতে সঙ্কোচ বোধ হয়—মাঝখানে আর্য্য গোতমীর আকস্মিক আবির্ভাবে পাঠকমাত্রেই মনে মনে আরাম লাভ করে।

আমি ত মনে করি, রাজসভায় দৃশ্যস্ত শকুন্তলাকে যে চিনিতে পারেন নাই তাহার প্রধান কারণ, সঙ্গে অননুয়া প্রিয়ংবদা ছিল না। একে তপোবনের বাহিরে, তাহাতে খণ্ডিতা শকুন্তলা, চেনা কঠিন হইতে পারে।

শকুন্তলা বিদায় লইলেন, তাহার পরে সখীরা যখন শূত্র তপোবনে ফিরিয়া আসিল তখন কি তাহাদের শৈশবসহচরীর বিরহই তাহাদের একমাত্র দুঃখ? শকুন্তলার অভাব ছাড়া ইতিমধ্যে তপোবনের আর কি কোনো পরিবর্তন হয় নাই? হায় তাহারা জ্ঞানবৃক্ষের ফল খাইয়াছে, যাহা জানিত না, তাহা জানিয়াছে। কাব্যের কাল্পনিক নায়িকার বিবরণ পড়িয়া নহে, তাহাদের প্রিয়তমা সখীর বিদীর্ণ হৃদয়ের মধ্যে অবতরণ করিয়া! এখন হইতে অপরাহ্নে আলবালে জল সেচন করিতে কি তাহারা মাঝে মাঝে বিস্মৃত হইবে না? এখন কি তাহারা মাঝে মাঝে পত্রমর্ম্মরে সচকিত হইয়া অশোক তরুর অন্তরালে প্রচ্ছন্ন কোনো আগন্তকের আশঙ্কা করিবে না? মৃগশিঙ আর কি তাহাদের পরিপূর্ণ আদর পাইবে?

এখন সেই সম্মীভাবনিমুক্ত স্বতন্ত্রা অনন্য এবং প্রিয়বদাকে মর্শ্বরিত তপোবনে তাহাদের নিজের জীবনকাহিনীহুত্রে অন্বেষণ করিয়া ফিরিতেছি। তাহারা ত ছায়া নহে ; শকুন্তলার সঙ্গে সঙ্গে তাহারা এক দিগন্ত হইতে অত্র দিগন্তে অন্ত যায় নাই ত। তাহারা জীবন্ত, মূর্তিমতী। রচিত কাব্যের বহির্দেশে, অনভিনীত নাট্যের নেপথ্যে এখন তাহারা বাড়িয়া উঠিয়াছে—অতিপিনক বন্ধলে এখন তাহাদের যৌবনকে আর বাধিয়া রাখিতে পারিতেছে না—এখন তাহাদের কলহাস্ত্রের উপর অন্তর্ধন ভাবের আবেগ নববর্ষার প্রথম মেঘমালার মত অশ্রুগন্তীর ছায়া ফেলিয়াছে। এখন এক এক দিন সেই অন্তমনস্কাদের উটজপ্রাঙ্গণ হইতে অতিথি আসিয়া ফিরিয়া যায়। আমরাও ফিরিয়া আসিলাম।

সংস্কৃত সাহিত্যে আর একটি অনাদৃত আছে। তাহার সহিত পাঠকদের পরিচয়-সাধন করাইতে আমি কুণ্ঠিত। সে বড় কেহই নহে, সে কাদম্বরী-কাহিনীর পত্রলেখা। সে যেখানে আসিয়া অতি স্বল্প স্থানে আশ্রয় লইয়াছে সেখানে তাহার আসিবার কোনোপ্রকার প্রয়োজন ছিল না। স্থানটি তাহার পক্ষে বড় সংকীর্ণ, একটু এদিকে ওদিকে পা ফেলিলেই সঙ্কট।

এই আখ্যানিকার পত্রলেখা যে শকুন্তলার সম্বন্ধহুত্রে আবদ্ধ হইয়া আছে সেরূপ সম্বন্ধ আর কোনো সাহিত্যে কোথাও দেখি নাই। অথচ কবি অতি সহজে সরল চিত্তে এই অপূর্ণ সম্বন্ধবন্ধনের অবতারণা করিয়াছেন, কোনোখানে এই উর্গাতন্ত্র প্রতি এতটুকু টান পড়ে নাই যাহাতে মুহূর্তেকের জন্ত ছিন্ন হইবার আশঙ্কা মাত্র ঝটিতে পারে।

স্বব্রাজ চন্দ্রাপীড় বখন অধ্যয়ন সম্পূর্ণ করিয়া প্রাসাদে ফিরিয়া

আসিলেন তখন একদিন প্রভাতকালে তাঁহার গৃহে কৈলাস নামে এক কঙ্কুকী প্রবেশ করিল—তাঁহার পশ্চাতে, একটি কণ্ঠা, অনতিযৌবনা, মস্তকে ইন্দ্রগোপ কীটের মত রক্তাশ্বরে অবগুষ্ঠন, ললাটে চন্দন-তিলক, কটিতে হেমমেখলা, কোমলতমুলতার প্রত্যেক রেখাটি যেন সত্ত্ব নূতন অঙ্কিত ;—এই তরুণী লাবণ্যপ্রভাপ্রভাবে ভবন পূর্ণ করিয়া কণিতমগিন্‌পুরাকলিত চরণে কঙ্কুকীর অমুগমন করিল ।

কঙ্কুকী প্রণাম করিয়া ক্ষিতিতলে দক্ষিণ কর রাখিয়া জ্ঞাপন করিল—“কুমার, আপনার মাতা মহাদেবী বিলাসবতী জানাইতেছেন—এই কণ্ঠা পরাজিত কুলুতেশ্বরের দুহিতা, বন্দিনী, ইহার নাম পত্রলেখা ! এই অনাথা রাজদুহিতাকে আমি দুহিতা-নির্কির্দেশে এতকাল পালন করিয়াছি । এক্ষণে ইহাকে তোমার তাশুলকরত্নবাহিনী করিয়া প্রেরণ করিলাম । ইহাকে সামান্য পরিজনের মত দেখিয়ে না, বালিকার মত লালন করিয়া নিজের চিত্তবৃত্তির মত চাপল্য হইতে নিবারণ করিয়ো, শিষ্যার শ্রায় দেখিও, সুহৃদের শ্রায় সমস্ত বিশ্রম্ভব্যাপারে ইহাকে অভ্যস্তরে লইয়ো, এবং এই কল্যাণীকে এমত সকল কার্যে নিযুক্ত করিয়ো যাহাতে এ তোমার অতিথির পরিচারিকা হইতে পারে !” কৈলাস এই কথা বলিতেই পত্রলেখা তাঁহাকে অভিজাতপ্রণাম করিল এবং চন্দ্রাপীড় তাহাকে অনিমেষলোচনে সূচিরকাল নিরীক্ষণ করিয়া “অহা যেমন আজ্ঞা করিলেন তাহাই হইবে” বলিয়া দূতকে বিদায় করিয়া দিলেন ।

পত্রলেখা পত্নী নহে, প্রণয়িনীও নহে, কিঙ্করীও নহে, পুরুষের সহচরী । এই প্রকার অপরূপ সখীত্ব দুই সমুদ্রের মধ্যবর্তী একটি

বালুতটের মত—কেমন করিয়া তাহা রক্ষা পায়? নবযৌবন কুমারকুমারীর মধ্যে অনাদিকালের যে চিরন্তন প্রবল আকর্ষণ আছে তাহা দুই দিক হইতেই এই সঙ্কীর্ণ বাঁধটুকুকে ক্ষয় করিয়া লঙ্ঘন করে না কেন?

কিন্তু কবি সেই অনাথা রাজকন্যাকে চিরদিনই এই অপ্রশস্ত আশ্রয়ের মধ্যে বসাইয়া রাখিয়াছেন, এই গণ্ডীর রেখামাত্র বাহিরে তাহাকে কোনো দিন টানেন নাই। হতভাগিনী বন্দিণীর প্রতি কবির ইহা অপেক্ষা উপেক্ষা আর কি হইতে পারে? একটি স্তম্ভ ঘবনিকার আড়ালে বাস করিয়াও সে আপনার স্বাভাবিক স্থান পাইল না। পুরুষের হৃদয়ের পার্শ্বে সে জাগিয়া রহিল, কিন্তু ভিতরে পদার্পণ করিল না। কোনো দিন একটা অসতর্ক বসন্তের বাতাসে এই সখীস্ব-পর্দার একটা প্রান্তও উড়িয়া পড়িল না।

অথচ সখীস্বের মধ্যে লেশমাত্র অন্তরাল ছিল না। কবি বলিতেছেন পত্রলেখা সেই প্রথম দিন হইতে চন্দ্রাপীড়ের দর্শনমাত্রেই সেবারসসমুপজাতানন্দা হইয়া দিন নাই রাত্রি নাই উপবেশনে উত্থানে ভ্রমণে ছায়ার মত রাজপুত্রের পার্শ্ব পরিত্যাগ করিল না। চন্দ্রাপীড়েরও তাহাকে দেখা অবধি প্রতিরূপে উপচীয়মানা মহতী প্রীতি জন্মিল। প্রতিদিন ইহার প্রতি প্রসাদ রক্ষা করিলেন এবং সমস্ত বিশ্বাসকার্য্যে ইহাকে আত্মহৃদয় হইতে অব্যতিরিক্ত মনে করিতে লাগিলেন।

এই সম্বন্ধটি অপূর্ণ স্তম্ভুর, কিন্তু ইহার মধ্যে নারী-অধিকারের পূর্ণতা নাই। নারীর সহিত নারীর বৈরূপ লজ্জাবোধহীন সখীসম্পর্ক থাকিতে পারে পুরুষের সহিত তাহার সেইরূপ অসঙ্কোচ অনবচ্ছিন্ন নৈকট্যে পত্রলেখার নারী-মর্যাদার

প্রতি কাদম্বরীকাব্যের যে একটা অবজ্ঞা প্রকাশ পায় তাহাতে কি পাঠককে আঘাত করে না ? কিসের আঘাত ? আশঙ্কার নহে, সংশয়ের নহে। কারণ কবি যদি আশঙ্কা-সংশয়ের লেশমাত্র স্থান রাখিতেন তবে সেটা আমরা পত্রলেখার নারীত্বের প্রতি কথঞ্চিৎ সম্মান বলিয়া গ্রহণ করিতাম। কিন্তু এই দুটি তরুণ-তরুণীর মধ্যে লজ্জা আশঙ্কা এবং সন্দেহের দোহল্যমান স্নিগ্ধ ছায়াটুকু পর্য্যন্ত নাই। পত্রলেখা তাহার অপূর্ব সঙ্কলিত অস্তঃপুর ত্যাগই করিয়াছে কিন্তু স্ত্রী পুরুষ পরস্পর সমীপবর্তী হইলে স্বভাবতই যে একটি সঙ্কোচে সাধ্বসে এমন কি সহাস্ত্র ছলনায় একটি লীলাস্বিত কম্পমান মানসিক অন্তরাল আপনি বিরচিত হইতে পারে ইহাদের মধ্যে সেটুকুও হয় নাই। সেই কারণেই এই অস্তঃপুরবিচ্যুতা অস্তঃপুরিকার জন্ত সর্বদাই ক্ষোভ জন্মিতে থাকে।

চন্দ্রাপীড়ের সহিত পত্রলেখার নৈকট্যও অসামান্য। দিগ্বিজয়যাত্রার সময় একই হস্তিপৃষ্ঠে পত্রলেখাকে সম্মুখে বসাইয়া রাজপুত্র আসন গ্রহণ করেন। শিবিরে রাত্রিকালে চন্দ্রাপীড় যখন নিজশয্যার অনতিদূরে শয়ননিষ্পন্ন পুরুষ সখা বৈশম্পায়নের সহিত আলাপ করিতে থাকেন তখন নিকটে ক্ষিতিলবণিস্ত কুথার উপর সখী পত্রলেখা প্রস্তুত থাকে।

অবশেষে কাদম্বরীর সহিত চন্দ্রাপীড়ের যখন প্রণয়সংঘটন হইল তখনও পত্রলেখা আপন ক্ষুদ্র স্থানটুকুর মধ্যে অব্যাহতভাবে রহিল। কারণ, পুরুষ-চিস্তে নারী যতটা আসন পাইতে পারে তাহার সঙ্গীর্ণতম প্রান্তটুকুমাত্র সে অধিকার করিয়াছিল,— সেখানে যখন মহামহোৎসবের জন্ত স্থান করিতে হইল, তখন ঐটুকু প্রান্ত হইতে বঞ্চিত করা আবশ্যকই হইল না।

পত্রলেখার প্রতি কাদম্বরীর ঈর্ষ্যার আভাসমাত্রও ছিল না। এমন কি, চন্দ্রাপীড়ের সহিত পত্রলেখার প্রীতিসম্বন্ধ বলিয়াই কাদম্বরী তাহাকে প্রিয়সখীজ্ঞানে সাদরে গ্রহণ করিল। কাদম্বরীকাব্যের মধ্যে পত্রলেখা যে অপরূপ ভূখণ্ডের মধ্যে আছে যেখানে ঈর্ষ্যা সংশয় সঙ্কট বেদনা কিছুই নাই, তাহা স্বর্গের ত্রায় নিষ্কণ্টক, অথচ সেখানে স্বর্গের অমৃতবিন্দু কই?

প্রেমের উচ্ছ্বাসিত অমৃতপান তাহার সম্মুখেই চলিতেছে। স্বাণেও কি কোনো দিনের জ্ঞাত তাহার কোনো একটা শিরার রক্ত চঞ্চল হইয়া উঠে নাই? সে কি চন্দ্রাপীড়ের ছায়া? রাজপুত্রের তপ্তযৌবনের তাপটুকুমাত্র কি তাহাকে স্পর্শ করে নাই? কবি সে প্রশ্নের উত্তরটুকুও দিতে উপেক্ষা করিয়াছেন। কাব্যসৃষ্টির মধ্যে সে এত উপেক্ষিত।

পত্রলেখা যখন কিয়ৎকাল কাদম্বরীর সহিত একত্রবাসের পর বার্তাসহ চন্দ্রাপীড়ের নিকট ফিরিয়া আসিল, যখন স্মিতহাস্তের দ্বারা দূর হইতেই চন্দ্রাপীড়ের প্রতি প্রীতি প্রকাশ করিয়া সে নমস্কার করিল, তখন পত্রলেখা প্রকৃতিবল্লভা হইলেও কাদম্বরীর নিকট হইতে প্রসাদলব্ধ আর একটি সৌভাগ্যের ত্রায় বল্লভতরতা প্রাপ্ত হইল এবং তাহাকে অতিশয় আদর দেখাইয়া যুবরাজ আসন হইতে উত্থিত হইয়া আলিঙ্গন করিলেন।

চন্দ্রাপীড়ের এই আদর, এই আলিঙ্গনের দ্বারাই পত্রলেখা কবিকর্তৃক অনাদৃত। আমরা বলি কবি অন্ধ। কাদম্বরী এবং মহাশ্বেতার দিকেই ক্রমাগত একদৃষ্টে চাহিয়া তাঁহার চক্ষু ঝলসিয়া গেছে, এই ক্ষুদ্র বন্দিনীটিকে তিনি দেখিতে পান নাই। ইহার মধ্যে যে প্রণয়তৃষার্ত চিরবঞ্চিত একটি নারীহৃদয় রহিয়া গেছে সে-কথা

তিনি একেবারে বিস্মৃত হইয়াছেন। বাণভট্টের কল্পনা মুক্তহস্ত—
 অস্থানে অপাত্রেও তিনি অজস্র বর্ষণ করিয়া চলিয়াছেন। কেবল
 তাঁহার সমস্ত রূপগতা এই বিগতনাথ রাজহুহিতার প্রতি। তিনি
 পক্ষপাতদূষিত পরম অন্ধতাবশত পত্রলেখার হৃদয়ের নিগূঢ়তম কথা
 কিছুই জানিতেন না। তিনি মনে করিতেছেন তরঙ্গলীলাকে তিনি
 যে-পর্য্যন্ত আসিবার অমুমতি করিয়াছেন, সে সেই পর্য্যন্ত
 আসিয়াই থামিয়া আছে—পূর্ণ চন্দ্রোদয়েও সে তাঁহার আদেশ
 অগ্রাহ করে নাই। তাই কাদম্বরী পড়িয়া কেবলই মনে হয় অল্প
 সমস্ত নায়িকার কথা অনাবশ্যক বাহুল্যের সহিত বর্ণিত হইয়াছে
 কিন্তু পত্রলেখার কথা কিছুই বলা হয় নাই।

শ্রীরবীন্দ্রনাথ ঠাকুর।

আগ্নেয় গিরি

মহর্ষি বাম্বীকির আশ্রমে আজ অধ্যয়নশীল মুনিবালকগণের বড়ই আমোদ। ঋষ্যশৃঙ্গের আশ্রম হইতে ফিরিবার কালে, বশিষ্ঠ, একবার বাম্বীকির সহিত সাক্ষাৎকারের নিমিত্ত, তদীয় আশ্রমে উপস্থিত হইয়াছেন। সঙ্গে তাঁহার ভগবতী অরুন্ধতী এবং কৌশল্যা স্নমিত্রা প্রভৃতি। তাঁহাদিগকে দেখিবার মানসে কত তপোবন হইতে কত ঋষিপত্নীরা আসিয়াছেন। কত লোক আসিয়াছে, আশ্রম লোকে লোকারণ্য। স্মতরাং আজ আর কাঠের পুতুলের মত স্থির হইয়া, ‘স্বাধ্যায়’ পড়িতে হইবে না। সমাগত অতিথিদিগকে লইয়াই আচার্য্য ব্যতিব্যস্ত,—পড়াইবেন কখন? তাই তাপসবটুরদের এত আনন্দ। তাহাদের কেহ বলিতেছে—‘আজ শিষ্টানধ্যায়’—বিশিষ্ট ব্যক্তির আগমনে অধ্যয়ন বন্ধ; কেহ বলিতেছে—“ভাগ্যে এই ‘জীর্ণকুর্চ্চগণ’ আসিয়াছেন, একদিন তবুও অবসর পাইলাম।” মহাকবি অতি অল্প কথায়, আৰ্য্য আশ্রমের কেমন সুন্দর একখানি মূর্ত্তি আঁকিয়া দিলেন। সেই সঙ্গে, মুগ্ধ-প্রকৃতি, নিৰ্ম্মল-হৃদয় বিজ্ঞার্থীগণেরও সজীব চিত্র যেন দর্শকগণের সমক্ষে তুলিয়া বরিলেন। পূৰ্ণ দৃষ্টে, পঞ্চবটীবনে, স্বপ্নের মত আত্মীয়ী, বাসন্তী, রামসীতা, তমসা, মুরলা প্রভৃতি দেখা দিয়া চলিয়া গিয়াছেন। বিষাদের একটা গাঢ় আবরণে সকলেরই হৃদয় আবৃত।—সেই কথা, সেই শোক, সেই কান্না, সেই বিলাপ, ক্ষণে ক্ষণে, প্রাবণের ধারার মত, দর্শকগণের চিত্ত আগ্রুভ

করিতেছে। রামের সেই শোকশীর্ণ পতিতপ্রায় কলেবর, মূর্তিমতী করুণার ছায়, শরীরিণী বিরহব্যথার ছায়, সীতার সেই শোক-পাণ্ডুর আকৃতি, আর সেই সঙ্গে গুত্রবসনা, সজলনয়না, বিষণ্ণমুখী বনদেবতার সেই করুণমূর্তি—নিমিষে নিমিষে দর্শকবৃন্দের হৃদয়ে জাগিতেছে। তাঁহারা যেন জাগিয়া জাগিয়া, স্বপ্নে সেই শোকের চিত্র দেখিতে পাইতেছেন। সকলেই শোকে ও সমবেদনায় একান্ত মগ্ন। এভাবে, এমন ঘোরতর বিষাদে, সামাজিক-দিগকে দীর্ঘকাল রাখা অসম্ভব। সুতরাং রসান্তরের প্রয়োজন। তাই ভবভূতি এক অভিনব চিত্র উন্মুক্ত করিলেন। আশ্রম-শিল্প-দিগের নিষ্পল মুখ, শরৎ-কমলের ছায়, দর্শকবৃন্দের নয়নের জড়তা দূর করিল। বালক যাহারা, দেবতা যাহারা, তাহাদের প্রসন্ন বদন দর্শনে, শোক ছুঁখ, ক্ষণেকের জন্তও বিস্তৃত না হয়, এ সংসারে এমন পাষাণ কয় জন আছে? দেবতাদর্শনে মনের পাপভার লঘু হয়, দেবতারূপী বালকের দর্শনেও মনের বেদনার ভার, শোকের ভার কমিয়া যায়। ঋষিবালকদিগের দর্শনে এবং অমৃতবর্ষী আলাপনে, দর্শকগণেরও চিত্তের অবসাদ কিয়ৎকালের জন্ত মল্লীভূত হইল। দর্শকবৃন্দ, অনিমেষ-নয়নে তাহাদের মুখের দিকে চাহিয়া রহিলেন। তাহাদের মূর্তি দেখিতে দেখিতে এবং তাহাদের অধ্যয়নের কথা শুনিতে শুনিতে দর্শকদিগের মনে কত-কি ভাবনা আসিতে-যাইতে লাগিল।

বনদেবতা বাসন্তীর সহিত কথোপকথনকালে, তাপসী আত্মীয়ী সেই যে বলিয়াছিলেন, “বান্দ্রীকির আশ্রমে এখন আর আমাদের মত জড়বুদ্ধি রমণীর লেখাপড়া চলে না, তথায় অধ্যয়নের নানা-প্রকার প্রতিবন্ধক। কোথা হইতে এক দেবতা আসিয়া ছইটী

শিশুকে মহর্ষির নিকটে রাখিয়া গিয়াছেন। সে শিশুদ্বয়ের সকলই অঙ্কুত। তাহাদের প্রতিভার তুলনা নাই, মাধুর্য্যের সীমা নাই। শুধু ঋষিদিগের নহে, চরাচর সকল প্রাণীর চিত্তই তাহারা বশীভূত করিয়া ফেলিয়াছে। তাহাদিগকে দেখিলে, এমন কেহ নাই, যে স্নেহ না করিয়া থাকিতে পারে, মুগ্ধ না হইয়া থাকিতে পারে। তাহাদের একটির নাম কুশ, অপরটির নাম লব।”—আজ বাম্বোঁকির আশ্রমের বালকদিগের দিকে চাহিয়া চাহিয়া, দর্শকগণ, তাপসীর সেই সমস্ত কথা ভাবিতে লাগিলেন।

সেই যে কথা-প্রসঙ্গে, তমসা মুরলাকে কহিয়াছিলেন, “লক্ষণ বাম্বোঁকির আশ্রমের সন্নিকটে সীতাদেবীকে পরিত্যাগ করিয়া যাওয়ার পর প্রসববেদনা উপস্থিত হওয়ায়, মনের দুঃখে একপ্রকার অজ্ঞান হইয়া, দুঃখিনী অনন্তশরণা সীতা গঙ্গার স্রোতে ঝাঁপ দিয়াছিলেন, তথায় গঙ্গার বক্ষেই তাঁহার দুইটি পুত্র জন্মে, সীতার জননী পৃথিবী এবং পতিকুল-দেবতা ভাগীরথী তৎক্ষণাৎ তথায় উপস্থিত হইয়া, পুত্রবতী সীতাকে পাতালে লইয়া যান, এবং স্তম্ভত্যাগের পর, গঙ্গাদেবী স্বয়ং বাইয়া, সেই পুত্রদ্বয়কে মহর্ষি প্রাচেতসের হস্তে সমর্পণ করিয়া আসেন। নাম তাহাদের কুশলব, বয়স তাহাদের এখন প্রায় দ্বাদশ বৎসর।”—সেই কথা, সেই বাম্বোঁকিরই আশ্রমের বালকদিগকে দেখিয়া দর্শকগণের মনে পড়িল। নানাবিধ ভাবের যুগপৎ উদয়ে, তাঁহারা কেমন একটা গোলমালে পড়িয়া গেলেন। কখন হর্ষ, কখন বিষাদ আসিয়া, তাঁহাদিগকে প্রসন্ন ও বিষন্ন করিতে লাগিল। অথবা তাঁহারা প্রসাদবিষাদের যেন মধ্যস্থলে উপনীত হইলেন।

সেই যে বাসন্তীর প্রম্লে আত্মীয়ী বলিয়াছিলেন, ‘সে শিশু দুইটি

এখন বেশ বড় হইয়াছে, মুনি স্বয়ং তাহাদিগকে সকল বিজ্ঞা শিক্ষা দিয়াছেন, একাদশ বর্ষবয়ঃক্রমে ক্ষত্রিয়-বিধান-মতে উপনয়ন দিয়া, গুরুদেব বাণ্মীকি তাহাদিগকে বেদবিজ্ঞায় পর্য্যন্ত পারদর্শী করিয়াছেন। তাহাদের মেধা, তাহাদের জ্ঞান,—সকলই বিস্ময়কর। তাহাদের সঙ্গে আমরা পড়িয়া উঠিতে পারি না,—সেই বাণ্মীকিরই আশ্রমে এই অধ্যয়নশীল বালকদিগকে দেখিয়া, দর্শকগণ নিজ নিজ মনে সেই কথার আলোচনা করিতে লাগিলেন। ‘এও ত বাণ্মীকির তপোবন, ইহারাও ত বেদাধ্যয়ন-তৎপর, প্রতিভাশালী বিদ্বান্, ইহাদের অনেকেরও ত বয়ঃক্রম ১২।১৩ বৎসরের অধিক নহে ! এ সব কি ?—একি কোন মায়া না মোহ, ইন্দ্রজাল না বাস্তব, কিছুই ত ঠিক বুঝিতে পারিতেছি না।’—এইরূপ নানা বিতর্কে, নানা চিন্তায়, দর্শকগণ ক্রমে একান্ত সন্দিহান হইয়া পড়িলেন।

কি সুন্দর কোশলে, সৃষ্টিনিপুণ শ্রীকণ্ঠ, ধীরে ধীরে গ্রন্থের প্রতিপাত্ত বিষয় ক্রমে ক্ষুটতর করিতে লাগিলেন, এবং সেই সঙ্গে, বেদনা-কাতর সামাজিকসমূহের সবেদন হৃদয়েও আশ্বাসের শীতল প্রলেপ দিলেন, শাস্তির জল প্রোক্ষণ করিলেন। দর্শকবৃন্দ উষা-সমীর-স্নাত পর্য্যটকের ছায় সাঁকাজ্জ-হৃদয়ে ঐ সব দৃশ্য দেখিতে এবং বালকগণের ঐ সুধা-নিশ্চন্দিনী বচন-পরম্পরা শ্রবণ করিতে লাগিলেন। যখন কথায় কথায়, তাহাদের একজন বালক বলিল, “ভাই, স্নাতক ব্যক্তি অতিথিরূপে উপস্থিত হইলে, মাংস-মিশ্রিত মধুপর্কের দ্বারাই তাঁহার অভ্যর্থনার নিয়ম। বশিষ্ঠ প্রভৃতি আসিলেও সেই প্রথা দেখিয়াছিলাম, আজ মহর্ষি জনক আসিলেন, এক্ষেত্রে অত্র প্রকার অভ্যর্থনা কেন ? নিরামিষ মধুপর্ক কেন ?” তখন সমবেত দর্শকমণ্ডলীর হৃদয়, যেন কোন

বৈদ্যতী শক্তির প্রভাবে, ঐ দিকে ঝটিতি আরুণ্ট হইল। তাঁহারা চমকিয়া উঠিলেন। জনক ? নির্কাসিতা সীতার পিতা জনক ? ধনুর্ভঙ্গপণ-পূর্বক রামের হস্তে সীতার সম্প্রদান-কর্তা জনক ? মিথিলার অধীশ্বর, পুণ্যপ্লোক, হুহিত-গত-সদয় জনক ? তিনি এখানে ? এ না বাম্বীকির আশ্রম ? এই আশ্রমের সন্নিধানেই না ভ্রাতৃভক্ত লক্ষ্মণ, জ্যেষ্ঠের আদেশে, অযোধ্যার মূর্তিমতী কমলাকে ফেলিয়া গিয়াছিলেন ? এই আশ্রমেই না ভগবতী জাহ্নবী, সীতাকুমারদিগকে বাম্বীকির করে সঁপিয়া গিয়াছিলেন ? এই আশ্রমেই না ভগবান্ বশিষ্ঠ, কৌশল্যা স্মিত্রা প্রভৃতির দহিত, কয়েক দিন হইল, আসিয়া বাস করিতেছেন ? এই আশ্রমেই আবার আজ জনকও আসিলেন ? ব্যাপার কি ? একি বাস্তবিক ঘটনা, না কোন অলৌক কল্পনার পরিণাম—স্বপ্ন ? এতাদৃশ বিচিত্র সমবায়ের কি কোন কারণ আছে ? না ইহা কাকতালীয় ?—এইরূপ নানা আন্দলোনে দর্শকগণের হৃদয় আলোড়িত হইতে লাগিল। তাঁহারা ভূতাবিষ্টের স্থায়, বিকারগ্রস্তের স্থায় তীব্রনয়নে ঐ দিকে চাহিয়া রহিলেন।

বালকের কথায় অপর একজন বলিল, “জান না ? মহর্ষি জনক যে অনেক দিন আমিষ ত্যাগ করিয়াছেন, যেদিন হুহিতা সীতার তাদৃশ দৈবহুর্ষিপাক শ্রবণ করেন, সেইদিন হইতেই হুহিতবৎসল রাজর্ষি বানপ্রস্থ হইয়াছেন। বিশাল সাম্রাজ্য, অতুল বিভব, সব ত্যাগ করিয়া, গত দ্বাদশ বৎসর যাবৎ তিনি চন্দ্রদ্বীপ-তপোবনে তপস্যায় নিরত ছিলেন। মহর্ষি বাম্বীকি তাঁহার চিরন্তন স্নহদ। তাই আজ একবার তাঁহার দহিত দাক্ষাৎ করিতে আসিয়াছেন। জনকের আগমন-বার্তা শুনিয়া কুলগুরু বশিষ্ঠ ভগবতী অরুন্ধতীর মুখে কৌশল্যাদেবীকে বলিয়া পাঠাইয়াছেন যে, মা, তুমি নিজে যাইয়া সর্ক্সাগ্রে মিথিলেশ্বরের

দহিত সাক্ষাৎ করিও। সামাজিকগণের হৃদয়ে এতক্ষণ যে একটা ঘোর উৎকণ্ঠা, একটা প্রবল উদ্বেগ জন্মিয়াছিল, তাহা, জনকের এই পরিচয়শ্রবণে, দারুণ শোকে পরিণত হইল। যাহা নিমিষের জন্ত বৃষ্টি বা ভুলিয়াছিলেন, সেই সীতাবিসর্জন-কাহিনী আবার তাঁহাদের মনে পড়িল। রাম যে গুরুতর কৰ্ম্ম করিয়া বসিয়াছেন, তপঃ-প্রভাব-সম্পন্ন জনকের সাধ্বী দুহিতাকে নির্বাসিত করিয়া, যে অমার্জনীয় অপরাধে স্বয়ং অপরাধী হইয়াছেন, এবং সমগ্র সূর্য্য-বংশকেও অপরাধ করিয়াছেন, তাহার ক্ষালন কোন দিন না হইলেও, কুলগুরু বশিষ্ঠের কর্তব্য সৰ্ব্বত্র সামঞ্জস্য-বিধান। সীতা ত আর ফিরিয়া আসিবেন না। এ জন্মের মত সীতা নাম সংসার হইতে মুছিয়া গিয়াছে। যাহার জন্ত রামের সহিত জনকের সম্বন্ধ, তাহার বিলোপ হইয়াছে। দুর্কীসার শ্রায় অপর কোন ঋষি হইলে, হয় ত রামের শকুন্তলার মত দুর্দশার চরম হইত, প্রশান্ত জনকের নিকট তাদৃশ তাপস-বিরোধী ভাবের সম্ভাবনা নাই। সূর্য্য-কুলের রাজকুমার জনকের কণ্ঠার পাণিপীড়ন করায়, সূর্য্যবংশীয়দিগের গৌরব শতগুণ বর্দ্ধিত হইয়াছিল। সে গৌরবের পতাকা প্রবল ঝঙ্কার কোথায় চলিয়া গিয়াছে, পতাকাশূন্য, দুর্দর্শ স্তম্ভের শ্রায়, সে বংশ এখন একান্ত শোচনীয় হইয়া পড়িয়া আছে; শোকে, দুঃখে, বিষাদে, নিরন্তর বিড়ম্বিত হইতেছে। যাহার অমুগ্রহে একদিন সূর্য্য-বংশের এত গৌরব হইয়াছিল, আজ তিনি,—সেই রাজর্ষি বানপ্রস্থ জনক আসিয়াছেন। সম্পদের যিনি বিধাতা ছিলেন, বিপদের সময়ে তাঁহার নিকটে যাও, তাঁহার সম্মানরক্ষা কর। সীতাকে বনবাস দিয়া রাম যে অপরাধ করিয়াছেন, তাহার অপনোদন না হউক, সে অপরাধের যতদূর সম্ভব, প্রতিপ্ৰসব কর; দোষী

পক্ষেরই অগ্রে আত্মসমর্পণ বিধেয়। তাই কুলগুরু বশিষ্ঠ
কৌশল্যাকে অগ্রে জনকের নিকটে বাইতে অন্নমতি করিয়াছেন।
কি সুন্দর কল্পনা ! কি মন্থস্পর্শী ভাব !

দর্শকবৃন্দ যখন সবেদন-হৃদয়ে এইভাবে বালকগণের দিকে
চাহিয়া আছেন, আর তাহাদের ঐ সকল কথাবার্তা শুনিতেছেন,
শুনিয়া শুনিয়া এক একবার দীর্ঘনিশ্বাস ছাড়িতেছেন, চোক যেন
ফাটিয়া বাইতেছে, কিন্তু তাহা হইতে এক বিন্দুও অশ্রু নিপতিত
হইতেছে না, হৃদয়ের দারুণ বেদনায় বুক যেন শুকাইয়া গিয়াছে,
সীতার কথা, সেই অযোধ্যার রাজলক্ষ্মীর বনবাসের কথা ভাবিতে
ভাবিতে একান্ত কাতর হইয়া পড়িয়াছেন ;—ঠিক সেই সময়ে,
ঐ ঋষিকুমারদিগের একজন বলিয়া উঠিল,—“ঐ দেখ, আশ্রমের
বহির্দেশে বৃক্ষের মূলে, ঐ রাজর্ষি জনক একাকী বসিয়া আছেন।
আহা, দুঃসহ সীতাশোকে রাজর্ষির দেহের কি শোচনীয় দশাই
না ঘটয়াছে ! দেখিলে মনে হয়, যেন বনস্পতি অন্তর্জালিত
অনলে অহনিশ দগ্ধ হইতেছে, হয়ত অচিরেই ভস্মীভূত হইবে।”

শোকাকুল দর্শকমণ্ডলী উন্নতকণ্ঠে সেই দিকে চাহিলেন।—
দেখিলেন যথার্থই জনক। অগ্ন্যুৎপাতের পূর্বে আগ্নেয়গিরির
ত্ৰায়, শিলাবৃষ্টির পূর্বে অন্তঃস্তুভিতবর্ষণ বারিবাহের ত্ৰায়, সীতা-
বৎসল রাজর্ষি বসিয়া আছেন। তাঁহার মুখমণ্ডল প্রশান্ত, গভীর,
নয়ন যেন বহির্দর্শনে নিবৃত্ত হইয়া, কোনও অন্তঃপদার্থ-নিরীক্ষণে
নিহিত। ললাটকলক আকুঞ্চিত, রেখামণ্ডিত ; ধূসর কায়, ধূসর
কাস্তি। তুবারমণ্ডিত নগপতির ত্ৰায়, সেই ধীর প্রশান্ত চিন্তাকুল
রাজর্ষির দিকে দর্শকবৃন্দ একলক্ষ্যে চাহিয়া রহিলেন।

শ্রীরাজেন্দ্রনাথ বিজ্ঞাভূষণ ।

সীতার বনবাস

(ষষ্ঠ পরিচ্ছেদ)

রাজা রামচন্দ্র, অশ্বমেধ যজ্ঞের অনুষ্ঠানে কৃতসংকল্প হইয়া বশিষ্ঠ, জাবালি, কাশ্যপ, বামদেব প্রভৃতি মহর্ষিবর্গের নিকট আপন অভিপ্রায় ব্যক্ত করিলেন। বশিষ্ঠদেব শ্রবণমাত্র সাধুবাদ প্রদান পূর্বক কহিলেন, মহারাজ ! উত্তম সংকল্প করিয়াছেন। আপনি সদাগরা সদ্বীপা পৃথিবীর অধিপতি, অথও ভূমণ্ডলে যেরূপ একাধিপত্য বিস্তার করিয়াছেন, পূর্ববর্তী কোন নরপতি সেরূপ করিতে পারেন নাই। রামরাজ্যে প্রজালোকে যেরূপ সুখে ও স্বচ্ছন্দে কালযাপন করিতেছে, তাহা অদৃষ্টচর ও অশ্রুতপূর্ব। রাজ্যভার গ্রহণ করিয়া যে যে বিষয় অনুষ্ঠান করিতে হয়, আপনি তাহার কিছুই অসম্পাদিত রাখেন নাই ; রাজকর্তব্যের মধ্যে অশ্বমেধমাত্র অবশিষ্ট আছে, এক্ষণে তাহা সম্পন্ন হইলেই আপনার রাজ্যাধিকার আর কোন অংশে হীন থাকে না। আমরা ইতিপূর্বে ভাবিয়াছিলাম, এ বিষয়ে মহারাজকে অনুরোধ করিব। বাহা হউক, মহারাজ যখন স্বয়ং সেই অভিলষিত বিষয়ের অনুষ্ঠানে উদযুক্ত হইয়াছেন, তখন আর তদ্বিষয়ে বিলম্ব করা বিধেয় নহে ; অবিলম্বে তদুপযোগী আয়োজনের অনুমতি প্রদান করুন।

বশিষ্ঠদেব বিরত হইবামাত্র, রামচন্দ্র পার্শ্বোপবিষ্ট অনুজদিগের প্রতি দৃষ্টিপাত করিয়া কহিলেন, বৎসগণ ! ইনি বাহা কহিলেন, শ্রবণ করিলে ; এক্ষণে তোমাদিগের অভিপ্রায় অবগত হইলেই

কর্তব্য নিরূপণ করি। আজ্ঞানুবর্তী অনুজেরা তৎক্ষণাৎ আন্তরিক অনুমোদন প্রদর্শন করিলেন। তখন রাম, কুলপুরোহিত বশিষ্ঠ-দেবকে সঙ্ঘোদন করিয়া কহিলেন, ভগবন্! যখন আমার অভিলাষ আপনাদিগের অভিমত ও অনুজদিগের অনুমোদিত হইতেছে, তখন আর তদনুযায়ী অনুষ্ঠানের কর্তব্যতা বিষয়ে সন্দেহমাত্র নাই। এক্ষণে আমার বাসনা এই, নৈমিশ্যারণ্যে অভিপ্রোত মহাগজের অনুষ্ঠান হয়। নৈমিশ্যারণ্য পরম পবিত্র যজ্ঞক্ষেত্র। এ বিষয়ে আপনার কি অনুমতি হয়? বশিষ্ঠদেব তদ্বিষয়ে তৎক্ষণাৎ সম্মতি প্রদান করিলেন।

অনন্তর রামচন্দ্র অনুজদিগকে কহিলেন, দেখ অনর্থক কালহরণ করা বিধেয় নহে; অতএব তোমরা সত্বর সমুদয় আয়োজন কর। অনুগত, শরণাগত ও মিত্রভাবাপন্ন নৃপতিদিগকে নিমন্ত্রণ কর; সময় নির্ধারণ পূর্বক যাবতীয় নগরে ও জনপদে এই সংবাদ ঘোষণা করিয়া দাও; লঙ্কাসমরসহায় স্ত্রীদম্বর্গকে পরম সমাদরে আহ্বান কর; তাঁহারা আমাদের যথার্থ বন্ধু, আমাদের জন্তে অকাতরে কতই ক্লেশ সহ করিয়াছেন; তাঁহারা আসিলে আমি পরম সুখী হইব। তদ্ব্যতিরিক্ত, যাবতীয় ঋষিদিগকেও নিমন্ত্রণ কর; তাঁহারা যজ্ঞদর্শনে আগমন করিলে, আমি আপনাকে চরিতার্থ জ্ঞান করিব। ভারত! তুমি অবিলম্বে নৈমিশ্যক্ষেত্রে গমন করিয়া, যজ্ঞভূমি নির্মাণের উদ্যোগ কর। লক্ষ্মণ! তুমি অত্যাশ্রয় সমস্ত আয়োজন করিয়া, সত্বর তথায় প্রেরণ কর। দেখ, যজ্ঞদর্শনের নিমিত্ত নৈমিশ্যে অসংখ্য লোকের সমাগম হইবেক; অতএব যজ্ঞপূর্বক যাবতীয় বিষয়ের একরূপ আয়োজন করিবে, যেন কোন বিষয়ের অসঙ্গতি নিবন্ধন কাহারও কোন ক্লেশ বা অসুবিধা ঘটে

না। তুমি সকল বিষয়ে পারদর্শী, তোমায় অধিক উপদেশ দিবার প্রয়োজন নাই।

এই বলিয়া রাম বিরত হইলে, বশিষ্ঠদেব তাঁহাকে সম্ভাষণ করিয়া কহিলেন, মহারাজ ! সকল বিষয়েরই উচিতাধিক আয়োজন হইবেক, সন্দেহ নাই ; কিন্তু আমি এক বিষয়েরই একান্ত অসঙ্গতি দেখিতেছি। তখন রাম কহিলেন, আপনি কোন্ বিষয়ে অসঙ্গতি আশঙ্কা করিতেছেন, বলুন। বশিষ্ঠ কহিলেন, মহারাজ ! শাস্ত্রকারেরা কহেন, সঙ্গীক হইয়া ধর্মকার্যের অনুষ্ঠান করিতে হয়। অতএব জিজ্ঞাসা করি, সে বিষয়ের কি উপায় ভাবিয়া রাখিয়াছেন ? শ্রবণমাত্র রামের মুখকমল ম্লান ও নয়নযুগল অশ্রু-জলে পরিপ্লুত হইয়া উঠিল। তিনি কিয়ৎক্ষণ অবনত বদনে মোনাবলম্বন করিয়া রহিলেন ; অনন্তর, দীর্ঘ নিশ্বাস পরিত্যাগ পূর্বক, নয়নের অশ্রু মার্জ্জন ও উচ্ছলিত শোকাবেগ সংবরণ করিয়া কহিলেন, ভগবন্ ! ইতিপূর্বে এ বিষয়ে আমার উদ্বোধনমাত্র হয় নাই ; এক্ষণে কি কর্তব্য, উপদেশ করুন। বশিষ্ঠদেব অনেকক্ষণ একাগ্র চিত্তে চিন্তা করিয়া কহিলেন, মহারাজ ! ভাৰ্য্যাস্তরপরিগ্রহ ব্যতিরেকে উপায়ান্তর দেখিতেছি না।

বশিষ্ঠবাক্য শ্রবণ করিয়া, সকলেই এক কালে মোনাবলম্বন করিয়া রহিলেন। রাম নিতান্ত সীতাগতপ্রাণ, লোকবিরাগ-সংগ্রহ ভয়ে সীতাকে বনবাসে প্রেরণ করিয়া জীবন্মৃত হইয়া ছিলেন। তাঁহার প্রতি রামের যে অবিচলিত স্নেহ ও ঐকান্তিক অনুরাগ ছিল, এ পর্য্যন্ত তাহার কিছুমাত্র ব্যতিক্রম ঘটে নাই। সীতার মোহন মূর্তি অহোরাত্র তাঁহার অন্তঃকরণে জাগরুক ছিল। তিনি যে উপস্থিত কার্য্যানুরোধে ভাৰ্য্যাস্তরপরিগ্রহে সম্মত হইবেন,

তাহার কোন সম্ভাবনা ছিল না। যাহা হউক, বশিষ্ঠদেব দার-
পরিগ্রহ বিষয়ে বারংবার অমুরোধ করিতে লাগিলেন; কিন্তু রাম,
তদ্বিষয়ে ঐ কাস্তিকী অনিচ্ছা প্রদর্শন করিয়া, মৌনভাবে অবনত-
বদনে অবস্থিত রহিলেন। অনন্তর, বহুবিধ বাদানুবাদের পর,
হিরণ্ময়ী সীতা প্রতিকৃতি সমভিব্যাহারে যজ্ঞানুষ্ঠান করাই সর্ব্বাংশে
শ্রেয়ঃকল্প বলিয়া মীমাংসিত হইল।

এইরূপে সমুদায় স্থিরীকৃত হইলে, ভরত সৰ্ব্বাগ্রে নৈমিষে প্রস্থান
করিলেন, এবং সমুচিত স্থানে যজ্ঞভূমি নিরূপণ করিয়া, অমুরূপ
অন্তরে পৃথক্ পৃথক্ প্রদেশে এক এক শ্রেণীর লোকের নিমিত্ত,
তাহাদের অবস্থোচিত বাসশ্রেণী নিৰ্ম্মাণ করাইলেন। লক্ষ্মণও
অনতিবিলম্বে অশেষবিধ অপৰ্য্যাপ্ত আহারসামগ্রী ও শয্যাসনাদি
সংগ্রহ করিয়া যজ্ঞক্ষেত্রে প্রেরণ করিলেন। অনন্তর রামচন্দ্র,
লক্ষ্মণকে রক্ষক নিযুক্ত করিয়া, যথাবিধানে যজ্ঞীয় অশ্ব মোচন
পূৰ্ব্বক, মাতৃগণ ও অপরাপর পরিবারবর্গ সমভিব্যাহারে সসৈন্ত
নৈমিষারণ্যে প্রস্থান করিলেন।

কিয়ৎ দিন পরেই, নিমন্ত্রিতগণের সমাগম হইতে আরম্ভ হইল।
শত শত নৃপতি, বহুবিধ মহামূল্য উপহার লইয়া, অমুচরগণ ও
পরিচারকবর্গ সমভিব্যাহারে উপস্থিত হইতে লাগিলেন; সহস্র
সহস্র ঋষি, যজ্ঞদর্শনমানসে, ক্রমে ক্রমে নৈমিষে আগমন করিতে
লাগিলেন; অসংখ্য নগরবাসী ও জনপদবাসীরাও সমাগত
হইলেন। ভরত ও শক্রয়, নরপতিগণের পরিচর্য্যার ভার গ্রহণ
করিলেন; বিভীষণ, ঋষিগণের কিঙ্করকার্য্যে নিযুক্ত হইলেন;
সুগ্রীব অপরাপর যাবতীয় নিমন্ত্রিতবর্গের তত্ত্বাবধানে ব্যাপৃত
রহিলেন।

এ দিকে, মহর্ষি বায়্মৌকি, সীতার অবস্থা অবলোকন করিয়া, এবং কুশ ও লবের বয়ঃক্রম দ্বাদশ বৎসর পূর্ণ দেখিয়া, মনে মনে সর্বদা এই আন্দোলন করেন যে, সীতার যেরূপ অবস্থা দেখিতেছি, তাহাতে তিনি অধিক দিন জীবিত থাকিবেন, এরূপ বোধ হয় না ; আর কুশ ও লব, রাজাধিরাজতনয় হইয়া যাবজ্জীবন তপোবনে কালাযাপন করিবেক, ইহাও কোন ক্রমে উচিত নহে ; তাহাদের ধনুর্বেদ ও রাজধর্ম্ম শিক্ষার সময় বহিয়া যাইতেছে। অতএব, যাহাতে সপুত্রা সীতা অবিলম্বে রামচন্দ্র-পরিগৃহীতা হন, আশু তাহার কোন উপায় উদ্ভাবন করা আবশ্যক। অথবা, উপায়ান্তর উদ্ভাবনের প্রয়োজন কি ? শিশু দ্বারা সংবাদ দিয়া রামচন্দ্রকে আমার আশ্রমে আনাই, অথবা স্বয়ং রাজধানীতে গিয়া তাঁহার সহিত সাক্ষাৎ করিয়া, সপুত্রা সীতার পরিগ্রহ প্রার্থনা করি। রামচন্দ্র অবশ্যই আমার অনুরোধ রক্ষা করিবেন। এইরূপ ভাবিয়া, ক্ষণকাল মৌনভাবে থাকিয়া মহর্ষি পুনরায় চিন্তা করিতে লাগিলেন, কিন্তু তিনি অত্যন্ত লোকানুরাগপ্রিয় ; কেবল লোকবিরাগসংগ্রহ-ভয়ে পূর্ণগর্ভ অবস্থায়, নিতান্ত নিরপরাধে জানকীরে পরিত্যাগ করিয়াছেন ; এখন আমার কথায়, তাঁহারে সহজে গ্রহণ করিবেন, তাহাও সম্পূর্ণ সন্দেহস্থল। যাহা হউক, কোন সংবাদ না দিয়া নিশ্চিন্ত থাকা উচিত হইতেছে না। এই ছই বালক উত্তরকালে অবশ্যই কোশলসিংহাসনে অধিরোহণ করিবেক। এই সময়ে পিতৃসমীপে নীত হইয়া, নীতিশাস্ত্রাদি বিষয়ে বিধিপূর্বক উপদিষ্ট না হইলে, ইহারা রাজকার্য্য নির্বাহে একান্ত অপটু ও রাজমর্য্যাদা-রক্ষণে নিতান্ত অক্ষম হইবেক। বিশেষতঃ রাজা রামচন্দ্র আমাকে কোশলরাজ্যের হিতসাধনে যত্নবিহীন বলিয়া অমুযোগ করিতে

পারেন। এতএব এ বিষয়ে আর উপেক্ষা প্রদর্শন করা বিধেয় নহে। এক্ষণে রামচন্দ্রের নিকট সকল বিষয়ের সবিশেষ সংবাদ প্রেরণ করা উচিত। অথবা, একবারেই তাঁহার নিকট সংবাদ না পাঠাইয়া, বশিষ্ঠ বা লক্ষ্মণের সহিত পরামর্শ করা কর্তব্য; তাঁহারাই বা কিরূপ বলেন, দেখা আবশ্যক।

একদিন মহর্ষি সায়ংসন্ধ্যা ও সন্ধ্যাকালীন হোমবিধি সমাধান করিয়া, আসনে উপবেশন পূর্বক একাকী এই চিন্তায় মগ্ন আছেন, এমন সময়ে এক রাজভৃত্য আসিয়া রামনামাস্কিত অশ্বমেধনিমন্ত্রণপত্র তদীয় হস্তে সমর্পণ করিল। মহর্ষি, পত্র পাঠ করিয়া, পরম প্রীতি প্রদর্শন পূর্বক, সেই লোককে বিশ্রাম করিবার নিমিত্ত বিদায় দিলেন, এবং শিষ্যদিগকে তাহার আহ্বারাদির সমবধানে আদেশ প্রদান করিয়া, মনে মনে কহিতে লাগিলেন, আমি যে বিষয়ের নিমিত্ত উৎকণ্ঠিত হইয়াছি, দৈব অনুকূল হইয়া তৎসিদ্ধির বিলক্ষণ উপায় করিয়া দিলেন। এক্ষণে বিনা প্রার্থনায় কার্যসাধন করিতে পারিব। কুশ ও লবকে শিষ্যভাবে সমভিব্যাহারে লইয়া যাইব। রামের ও ইহাদের আকারগত যেরূপ সৌসাদৃশ্য, দেখিলেই সকলে ইহাদিগকে রামের তনয় বলিয়া অনায়াসে বুঝিতে পারিবেক, আর অবলোকন মাত্র রামেরও হৃদয় নিঃসন্দেহ দ্রবীভূত হইবেক; এবং তাহা হইলেই আমার অভিপ্রেতসিদ্ধির পথ স্বতঃ পরিস্কৃত হইয়া আসিবেক।

মনে মনে এইরূপ সিদ্ধান্ত করিয়া, মহর্ষি জানকীর কুটীরে উপস্থিত হইলেন, এবং কহিলেন, বৎসে! রাজা রামচন্দ্র, অশ্বমেধ মহাযজ্ঞের অনুষ্ঠান করিয়া, নিমন্ত্রণপত্র পাঠাইয়াছেন; কল্যাণপ্রদ্যবে প্রস্থান করিব; মানস করিয়াছি, অপরাপর শিষ্যের ভ্রায়,

তোমার পুত্রদ্বয়কেও যজ্ঞদর্শনে লইয়া যাইব। সীতা তৎক্ষণাৎ সম্মতি প্রদান করিলেন। মহর্ষি, আশ্বকুটীরে প্রতীগমন করিয়া, শিষ্ণুদিগকে আহ্বান পূর্বক প্রস্তুত হইয়া থাকিতে কহিয়া দিলেন, এবং কুশ ও লবকে সম্বোধন করিয়া কহিলেন, দেখ, এ পর্য্যন্ত তোমরা জনপদের কোন ব্যাপার অবলোকন কর নাই; রামায়ণ-নায়ক রাজা রামচন্দ্র অশ্বমেধের অনুষ্ঠান করিয়াছেন; ইচ্ছা করিয়াছি, তোমাদিগকে যজ্ঞদর্শনে লইয়া যাইব। তোমাদের যজ্ঞদর্শন ও আশ্বমজিক রাজদর্শন সম্পন্ন হইবে, এবং তথায় যে অসংখ্য জনপদবাসী লোক সমবেত হইবেক, তাহাদিগকে দেখিয়া তোমরা অনেক অংশে লৌকিক বৃত্তান্ত অবগত হইতে পারিবে। তাহারা দুই সহোদরে, রামায়ণে রামের অলৌকিক কীর্ত্তি পাঠ করিয়া, তাঁহাকে সর্ব্বাংশে অদ্বিতীয় পুরুষ বলিয়া স্থির করিয়া রাখিয়াছিল, তাঁহাকে স্বচক্ষে প্রত্যক্ষ করিব, এই ভাবিয়া তাহাদের আত্মাদের আর সীমা রহিল না। তদ্ব্যতিরিক্ত, যজ্ঞানুষ্ঠানসংক্রান্ত সমারোহ ও নানাদেশীয় বিভিন্নপ্রকার অসংখ্য লোকের একত্র সমাগম অবলোকন করিব, এই কৌতূহলও বিলক্ষণ প্রবল হইয়া উঠিল।

বান্দীকিমুখে রামের নাম শ্রবণ করিয়া, সীতার শোকানল প্রবল বেগে প্রজ্জ্বলিত হইয়া উঠিল, নয়নযুগল হইতে অনর্গল অশ্রুজল নির্গলিত হইতে লাগিল। কিয়ৎক্ষণ পরেই তাঁহার অন্তঃকরণে সহসা ভাবান্তর উপস্থিত হইল। রাম সীতাগত-প্রাণ বলিয়া তাঁহার মনে দৃঢ় বিশ্বাস ছিল; আর তিনি ইহাও স্থির করিয়া রাখিয়াছিলেন যে, নিতান্ত অনায়ত্ত হওয়াতেই রাম তাঁহাকে পরিত্যাগ করিয়াছেন। কিন্তু যজ্ঞানুষ্ঠানবার্ত্তা শ্রবণে,

রাম অবশ্যই ভাষ্যান্তর পরিগ্রহ করিয়াছেন, এই ভাবিয়া তিনি একবারে ত্রিয়মাণ হইলেন। যে সীতা অকাতরে পরিত্যাগভ্রম সহ্য করিয়াছিলেন, রাম পুনরায় দারপরিগ্রহ করিয়াছেন, এই শোক সেই সীতার পক্ষে একান্ত অসহ্য হইয়া উঠিল। পূর্বে তিনি মনে ভাবিতেন, যদিও নিতাস্ত নিরপরাধে নির্দাসিত হইয়াছি, কিন্তু আমার প্রতি তাহার যেরূপ অবিচলিত স্নেহ ও ঐকান্তিক অনুরাগ ছিল, তাহার কিছুমাত্র ব্যতিক্রম ঘটে নাই। এক্ষণে স্থির করিলেন, যখন পুনরায় দারপরিগ্রহ করিয়াছেন, তখন অবশ্যই সেই স্নেহের ও অনুরাগের অত্যাধিকার ঘটিয়াছে।

সীতা নিতাস্ত আকুল চিন্তে এই চিন্তা করিতেছেন, এমন সময়ে কুশ ও লব সহসা তদীয় কুটীরে প্রবিষ্ট হইয়া কহিল, মা ! মহর্ষি কহিলেন, কল্যাণামাদিগকে রাজা রামচন্দ্রের অশ্বমেধদর্শনে লইয়া যাইবেন। যে লোক নিমন্ত্ৰণপত্র আনিয়াছিল, আমরা কোতূহলবিষ্ট হইয়া তাহার নিকটে গিয়া রাজা রামচন্দ্রের বিষয়ে কত কথা জিজ্ঞাসা করিলাম। দেখিলাম, রাজা রামচন্দ্রের সকলই অলৌকিক কাণ্ড ! কিন্তু, মা ! এক বিষয়ে আমরা মোহিত ও চমৎকৃত হইয়াছি। রামায়ণ পাঠ করিয়া তাহার উপর আমাদের যে প্রগাঢ় ভক্তি জন্মিয়াছিল, এক্ষণে সেই ভক্তি সহস্র গুণে বৃদ্ধি প্রাপ্ত হইয়াছে। কথায় কথায় শুনিলাম, রাজা প্রজারঞ্জন-হুরোধে নিজ প্রেয়সী মহিষীকে পরিত্যাগ করিয়াছেন। তখন, আমরা জিজ্ঞাসা করিলাম, তবে বুঝি রাজা পুনরায় দারপরিগ্রহ করিয়াছেন, নতুবা যজ্ঞানুষ্ঠানকালে সহধর্মিণী কে হইবেক। সে কহিল, যজ্ঞসমাধানার্থ বশিষ্ঠদেব রাজাকে পুনরায় দারপরিগ্রহের জন্ত অনেক অনুরোধ করিয়াছিলেন ; কিন্তু রাজা তাহাতে কোন

ক্রমেই সম্মত হন নাই। হিরণ্যগী সীতাপ্রতিকৃতি নির্মাণ করাইয়াছেন, সেই প্রতিকৃতি সহধর্ম্মীকীর্ষা নির্বাহ করিবেক। দেখ মা ! এমন মহাপুরুষ কোনকালে ভ্রমণে জন্মগ্রহণ করেন নাই। রামচন্দ্র রাজধর্ম্মপ্রতিপালনে যেমন তৎপর, দাম্পত্যধর্ম্ম-প্রতিপালনেও তদনুরূপ যত্নশীল। আমরা ইতিহাস গ্রন্থে অনেকানেক রাজার ও অনেকানেক মহাপুরুষের বৃত্তান্ত পাঠ করিয়াছি, কিন্তু কেহই কোন অংশে রাজা রামচন্দ্রের সমকক্ষ নহেন। প্রজারঞ্জনানুরোধে প্রেয়সী পরিত্যাগ ও সেই প্রেয়সীর স্নেহে যাবজ্জীবন ভাৰ্য্যাস্তরপরিগ্রহে বিমুখ হইয়া কালহরণ করা, এ উভয়ই অভূতপূর্ব ব্যাপার। যাহা হউক, মা ! রামায়ণ পাঠ করিয়া অবধি আমাদের একান্ত বাসনা ছিল, একবার রাজা রামচন্দ্রকে দর্শন করিব ; এক্ষণে সেই বাসনা পূর্ণ করিবার এই বিলক্ষণ সুযোগ ঘটয়াছে ; অনুমতি কর; আমরা মহর্ষির সহিত রামদর্শনে যাই। সীতা অনুমতি প্রদান করিলেন, তাহারাও দুই সহোদরে সাতিশয় হর্ষিত হইয়া মহর্ষি-সমীপে গমন করিল।

রামচন্দ্র পুনরায় দারপরিগ্রহ করিয়াছেন, এই আশঙ্কা জন্মিবার যে অতি বিষম বিবাদবিষে সীতার সর্কশরীর আচ্ছন্ন হইয়াছিল। হিরণ্যগী প্রতিকৃতির কথা শ্রবণ করিয়া তাহা সম্পূর্ণরূপে অপসারিত এবং তদীয় চিরপ্রদীপ্ত শোকানল অনেক অংশে নির্বাপিত হইল ! তখন, তাঁহার নয়নযুগল হইতে আনন্দবাস্প বিগলিত হইতে লাগিল এবং নির্বাসনক্ষোভ তিরোহিত হইয়া তদীয় হৃদয়ে অভূতপূর্ব সৌভাগ্যগর্ভ আবিভূত হইল।

পরদিন প্রভাত হইবামাত্র, মহর্ষি বান্দীকি কুশ, লব ও শিষ্যবর্গ সমভিব্যাহারে নৈমিষে প্রস্থান করিলেন। দ্বিতীয় দিবস অপরাহ্ন

সময়ে তথায় উপস্থিত হইলে, বশিষ্ঠদেব পরম সমাদর প্রদর্শনপূর্বক তাঁহাকে ও তাঁহার শিষ্যদিগকে নির্দিষ্ট বাসস্থানে লইয়া গেলেন। কুশ ও লব দূর হইতে রাম দর্শন করিয়া পুলকিত হইল, এবং পরস্পর কহিতে লাগিল, দেখ ভাই ! রামায়ণে রাজা রামচন্দ্রের যে সমস্ত অলৌকিক গুণ কীর্তিত হইয়াছে, তাহা ইঁহার আকারে স্পষ্টাক্ষরে লিখিত আছে ; দেখিলেই, অলৌকিক গুণসমুদায়ের একাধার বলিয়া স্পষ্ট প্রতীতি জন্মে। ইনি যেমন সৌম্যমূর্তি, তেমনই গম্ভীরাকৃতি। আমাদের গুরুদেব যেরূপ অলৌকিক-কবিশ্ব-শক্তিসম্পন্ন, রাজা রামচন্দ্র তেমনই অলৌকিকগুণসমুদায়-সম্পন্ন। বলিতে কি, একরূপ মহাপুরুষ নায়কস্থলে পরিগৃহীত না হইলে, ভগবৎপ্রণীত মহাকাব্যের এত গৌরব হইত না। রাজা রামচন্দ্রের অলৌকিক গুণকীর্তনে নিয়োজিত হওয়াতেই, মহাবীর অলৌকিক কবিশ্বশক্তির সম্পূর্ণ সার্থকতা সম্পাদিত হইয়াছে। যাহা ইউক, এত দিনে আমাদের নয়নের চরিতার্থতা লাভ হইল।

ক্রমে ক্রমে বাবতীয় নিমন্ত্রিতগণ সমবেত হইলে, নিরুপিত দিবসে মহাসমারোহে সংকল্পিত মহাযজ্ঞের আরম্ভ হইল। অসংখ্য অসংখ্য দীন দরিদ্র অনাথগণ পৃথক্ পৃথক্ প্রার্থনায় যজ্ঞক্ষেত্রে উপস্থিত হইতে লাগিল। অনার্থী অপরিপাণ্ড অন্নলাভ, অর্থ্যভিলাষী প্রার্থনাধিক অর্থলাভ, ভূমিকাঙ্ক্ষী অভিলষিত ভূমিলাভ করিতে লাগিল। ফলতঃ, যে ব্যক্তি যে অভিলাষে আগমন করিতে লাগিল, আগমনমাত্র তাহার সেই অভিলাষ পূর্ণ হইতে লাগিল। অনবরত চতুর্দিকে নৃত্য গীত বাজনা হইতে লাগিল। সকলেই মনোহর বেশ ভূষা ধারণ করিল। সকলেরই মুখে আমোদ ও আনন্দের সম্পূর্ণ লক্ষণ স্পষ্ট লক্ষিত হইতে লাগিল ; কাহারও

অন্তঃকরণে কোনপ্রকার দুঃখ বা ক্ষোভের সঞ্চার আছে, এরূপ বোধ হইল না। যে সকল দীর্ঘজীবী রাজা, ঋষি বা অত্যাশ্রিত লোক যজ্ঞদর্শনে আসিয়াছিলেন, তাঁহারা মুক্তকণ্ঠে কহিতে লাগিলেন, আমরা কখন এরূপ যজ্ঞ দর্শন করি নাই; অতীতবেদী ব্যক্তিরও কহিতে লাগিলেন, কোন কালে কোন রাজা ঈদৃশ সমৃদ্ধি ও সমারোহ সহকারে যজ্ঞ করিতে পারেন নাই, রাজা রামচন্দ্রের সকলই অদ্ভুত কাণ্ড।

এইরূপে প্রত্যহ মহাসমারোহে যজ্ঞক্রিয়া হইতে লাগিল, এবং দ্বাবতীয় নিমন্ত্রিতগণ, সভায় সমবেত হইয়া, যজ্ঞসংক্রান্ত সমৃদ্ধি ও সমারোহ দর্শন করিতে লাগিলেন।

ঈশ্বরচন্দ্র বিদ্যাসাগর।

প্রহ্লাদ-চরিত

(কালিফোর্নিয়ায় প্রদত্ত বস্তুতা ।)

হিরণ্যকশিপু দৈত্যগণের রাজা ছিলেন। দেব ও দৈত্য—
উভয়েই এক পিতা হইতে উৎপন্ন হইলেও সর্বদাই পরস্পরের
প্রতি স্পষ্টপ্রকাশ ও পরস্পরে যুদ্ধ করিতেন। সচরাচর দৈত্য-
গণের মানবগণ-প্রদত্ত যজ্ঞভাগে অথবা জগতের শাসনে অধিকার
ছিল না। কিন্তু কখন কখন তাঁহারা প্রবল হইয়া দেবগণকে স্বর্গ
হইতে বিতাড়িত করিয়া তাঁহাদের সিংহাসন অধিকার ও কিছু-
কালের জন্য জগৎ শাসন করিতেন। তখন দেবগণ বাইয়া সমগ্র
জগতের সর্বব্যাপী প্রভু বিষ্ণুর শরণ গ্রহণ করিতেন, তিনিও
তাঁহাদিগকে উক্ত বিপদ হইতে উদ্ধার করিতেন। দৈত্যগণ
তৎকর্তৃক পরাস্ত হইয়া বিতাড়িত হইতেন, দেবগণ আবার স্বর্গরাজ্য
অধিকার করিতেন। পূর্বোক্ত দৈত্যরাজ হিরণ্যকশিপু এইরূপে
তাঁহার জ্ঞাতি দেবগণকে জয় করিয়া স্বর্গের সিংহাসনে অধিরোহণ
করিয়া ত্রিভুবন—অর্থাৎ মানব ও অস্ত্রাত্ম জীবজন্তুগণ দ্বারা
অধ্যুষিত মর্ত্যলোক, দেব ও দেবতুল্য ব্যক্তিগণ দ্বারা অধ্যুষিত
স্বর্গলোক এবং দৈত্যগণ দ্বারা অধ্যুষিত পাতাললোক—শাসনে সমর্থ
হইয়াছিলেন। হিরণ্যকশিপু আপনাকেই সমগ্র জগতের অধীশ্বর
বলিয়া ঘোষণা করিলেন—তিনি ইহাও ঘোষণা করিলেন যে, তিনি
ছাড়া আর ঈশ্বর নাই, আর চারিদিকে এই আদেশ প্রচার করিলেন

যে, কোন স্থানে কেহ যেন সর্বব্যাপী বিষ্ণুর উপাসনা না করে, এখন হইতে সমুদয় পূজা একমাত্র তাঁহারই প্রাপ্য।

হিরণ্যকশিপুর প্রহ্লাদ নামে এক পুত্র ছিলেন। তিনি অতি শৈশবাবস্থা হইতে স্বভাবতঃই ভগবান্ বিষ্ণুতে অমুরক্ত ছিলেন। অতি শৈশবাবস্থায়ই প্রহ্লাদের বিষ্ণুভক্তির লক্ষণ দেখিয়া তদীয় পিতা হিরণ্যকশিপু ভাবিলেন, আমি সমগ্র জগৎ হইতে বিষ্ণুর উপাসনা বাহাতে উঠিয়া যায়, তাহার চেষ্টা করিতেছি; কিন্তু আমার নিজগৃহেই যদি ইহা প্রবেশ করে, তবেই ত সর্বনাশ—অতএব প্রথম হইতেই সাবধান হওয়া কর্তব্য। এই ভাবিয়া তিনি তাঁহার পুত্র প্রহ্লাদকে ষণ্ড ও অমর্ক নামক দুইজন কঠোর ছাত্রশাসনদক্ষ আচার্য্যের হস্তে সমর্পণ করিয়া তাঁহাদিগকে আদেশ করিলেন যে প্রহ্লাদ যেন বিষ্ণুর নাম পর্য্যন্ত কখন শুনিতে না পায়। আচার্য্যদ্বয় সেই রাজপুত্রকে নিজগৃহে লইয়া গিয়া তাঁহার সমবয়স্ক অন্ত্যাত্ম বালকগণের সহিত রাখিয়া অধ্যাপনা করিতে লাগিলেন। কিন্তু শিশু প্রহ্লাদ তাঁহাদের প্রদত্ত শিক্ষাগ্রহণে মনোযোগী না হইয়া সদাসর্বদা অপর বালকগণকে বিষ্ণুর উপাসনা-প্রণালী শিখাইতে নিযুক্ত রহিলেন। আচার্য্যগণ যখন এই ব্যাপার জানিতে পারিলেন, তখন তাঁহারা অতিশয় ভীত হইলেন। কারণ, তাঁহারা প্রবলপ্রতাপ রাজা হিরণ্যকশিপুকে অতিশয় ভয় করিতেন—অতএব, তাঁহারা প্রহ্লাদকে উক্ত অধ্যবসায় হইতে নিবৃত্ত করিবার জন্ত যতদূর সাধ্য চেষ্টা করিলেন। কিন্তু বিষ্ণু-উপাসনা ও তদ্বিবরক উপদেশদান প্রহ্লাদের নিকট স্বাস-প্রস্থাসের জ্ঞান স্বাভাবিক হইয়া গিয়াছিল—সুতরাং তিনি কিছুতেই উহা ত্যাগ করিতে পারিলেন না। তাঁহারা তখন নিজেদের দোষকাশনার্থ

রাজার নিকট গিয়া এই ভয়ঙ্কর সমাচার নিবেদন করিলেন যে, তাঁহার পুত্র যে কেবল নিজেই বিষ্ণুর উপাসনা করিতেছে, তাহা নহে, অপর বালকগণকেও বিষ্ণুর উপাসনা শিক্ষা দিয়া নষ্ট করিয়া ফেলিতেছে।

যখন রাজা ষণ্ডামর্কের নিকট পুত্রের এই চরিত্র শ্রবণ করিলেন, তখন তিনি অতিমাত্র ক্রুদ্ধ হইয়া তাঁহাকে নিজ সমীপে আহ্বান করিলেন। তিনি প্রথমতঃ তাঁহাকে মিষ্ট বাক্যে বুঝাইয়া বিষ্ণুর উপাসনা হইতে নিবৃত্ত করিবার চেষ্টা করিতে লাগিলেন—তিনি বুঝাইবার চেষ্টা করিলেন যে, দৈত্যরাজ আমিই এক্ষণে ত্রিভুবনের অধীশ্বর—অতএব আমিই একমাত্র উপাস্ত—কিন্তু এই উপদেশে কোন ফল হইল না। বালক বার বার বলিতে লাগিলেন—সমগ্র জগতের অধিষ্ঠার সর্বব্যাপী বিষ্ণুই একমাত্র উপাস্ত; কারণ, তাঁহার রাজ্যপ্রাপ্তিও বিষ্ণুরই ইচ্ছাধীন—আর যতদিন বিষ্ণুর ইচ্ছা হইবে, ততদিনই তাঁহার রাজত্ব। প্রহ্লাদের বাক্য শুনিয়া হিরণ্যকশিপু ক্রোধে উন্মত্ত হইয়া নিজ অমুচরবর্গকে তৎক্ষণাৎ পুত্রকে বধ করিতে আদেশ করিলেন। আদেশ পাইয়াই দৈত্যগণ স্তম্ভীকৃত শস্ত্রের দ্বারা তাঁহাকে প্রহার করিল, কিন্তু প্রহ্লাদের মন বিষ্ণুতে এতদূর নিবিষ্ট ছিল যে, তিনি শস্ত্রাঘাতজনিত বেদনা কিছুমাত্র উপলব্ধি করিতে পারিলেন না।

যখন প্রহ্লাদের পিতা দৈত্যরাজ হিরণ্যকশিপু দেখিলেন যে, শস্ত্রাঘাতে প্রহ্লাদের কিছু হইল না, তখন তিনি ভীত হইলেন। কিন্তু আবার দৈত্যজনোচিত অসৎপ্রবৃত্তির বশীভূত হইয়া বালককে বিনাশ করিবার নানাবিধ পৈশাচিক উপায়ের আবিষ্কার করিতে লাগিলেন। তিনি প্রথমে তাঁহাকে হস্তিপদতলে কেলিয়া দিতে

আদেশ করিলেন—ইচ্ছা—হস্তী তাঁহাকে পদতলে পিষিয়া বিনাশ করিয়া ফেলিবে। কিন্তু যেমন লৌহপিণ্ডকে পিষিয়া ফেলা হস্তীর অসাধ্য, প্রহ্লাদের দেহও তজ্জপ হস্তিপদতলে লৌহপিণ্ডবৎ পিষ্ট হইল না। সুতরাং প্রহ্লাদকে বিনাশ করিবার এই উপায় বিফল হইল। পরে রাজা প্রহ্লাদকে এক উচ্চ গিরিশৃঙ্গ হইতে ভূতলে ফেলিয়া দিতে আদেশ করিলেন—তাঁহার এই আদেশও যথার্থ প্রতিপালিত হইল। কিন্তু প্রহ্লাদের হৃদয়ে বিষ্ণু বাস করিতেন—সুতরাং—পুষ্প যেমন ধীরে ধীরে তৃণের উপর পতিত হয়, প্রহ্লাদও তজ্জপ অক্ষতদেহে ভূতলে পতিত হইলেন। প্রহ্লাদকে বিনাশ করিবার জন্ত অতঃপর বিষ, অগ্নি, অনশন, কুপপাতন, অভিচার ও অত্যাচার নানাবিধ উপায় একটার পরে একটা অবলম্বিত হইল, কিন্তু এই সকল উপায়ে কোন ফল হইল না। প্রহ্লাদের হৃদয়ে বিষ্ণু বাস করিতেন, সুতরাং কিছুতেই তাঁহার কিছুমাত্র অনিষ্ট করিতে পারিল না।

অবশেষে কোনরূপে পুত্রের নিধনসাধন করিতে না পারিয়া রাজা আদেশ করিলেন, পাতাল হইতে নাগগণকে আহ্বান করিয়া সেই নাগপাশে প্রহ্লাদকে বদ্ধ করিয়া সমুদ্রের নীচে ফেলিয়া দেওয়া হউক এবং তাহার উপর বড় বড় পাহাড় শুণুপাকার করিয়া দেওয়া হউক। এই অবস্থায় তাহাকে রাখা হউক—তাহা হইলে এখনই না হউক, কিছুকাল পরে সে বিনষ্ট হইতে পারে। কিন্তু পিত্রাদেশে এই অবস্থায় পতিত হইয়াও তিনি “হে বিষ্ণো, হে জগৎপতে, হে সৌন্দর্য্যনিধে” ইত্যাদি বলিয়া সম্বোধন করিয়া তাঁহার পরম প্রিয়তম বিষ্ণুর স্তব করিতে লাগিলেন। এইরূপে বিষ্ণুর চিন্তা ও তাঁহার ধ্যান করিতে করিতে তিনি ক্রমে অম্লভব করিলেন, বিষ্ণু তাঁহার

অতি নিকটে রহিয়াছেন, আরও চিন্তা করিতে করিতে অমুভব করিলেন, বিষ্ণু তাঁহার আত্মার ভিতরেই রহিয়াছেন। অবশেষে তাঁহার অমুভব হইল যে, তিনিই বিষ্ণু, তিনিই সকল বস্তু এবং তিনিই সর্বত্র।

যেমন প্রহ্লাদের এইরূপ অষ্টমতামুভব হইল, অমনি তাঁহার নাগপাশ খুলিয়া গেল—তাঁহার উপর যে পর্কতরাশি চাপাইয়া দেওয়া হইয়াছিল, তাহা গুঁড়াইয়া গেল, তখন সমুদ্র স্ফীত হইয়া উঠিল ও তিনি ধীরে ধীরে তরঙ্গরাজ্যের উপর উত্থিত হইয়া নিরাপদে সমুদ্রকূলে নীত হইলেন। প্রহ্লাদ তখন, তিনি যে একজন দৈত্য, তাঁহার যে একটা মর্ত্যদেহ আছে, একথা একেবারে ভুলিয়া গিয়াছিলেন—তিনি উপলব্ধি করিতেছিলেন যে, তিনি সমগ্র ব্রহ্মাণ্ডস্বরূপ—ব্রহ্মাণ্ডের সমুদয় শক্তি তাঁহা হইতেই নির্গত হইতেছে। জগতে এমন কিছুই নাই, যাহা তাঁহার কোন অনিষ্ট করিতে পারে—তিনিই সমগ্র জগতের—সমগ্র প্রকৃতির শাস্তা-স্বরূপ। প্রহ্লাদ এইরূপ উপলব্ধিবলে সমাধিজনিত অবিচ্ছিন্ন পরমানন্দের নিমগ্ন হইয়া বহুকাল যাপন করিলেন—বহুকাল পরে ধীরে ধীরে তাঁহার দেহজ্ঞান আবির্ভূত হইতে লাগিল, তিনি আপনাকে প্রহ্লাদ বলিয়া বুঝিতে লাগিলেন। এইরূপে দেহজ্ঞান আবার আবির্ভূত হইলে তিনি দেখিতে লাগিলেন, ভগবান্ অন্তরে বাহিরে সর্বত্র রহিয়াছেন, তখন জগতের সকল বস্তুই তাঁহার বিষ্ণু বলিয়া বোধ হইতে লাগিল।

যখন দৈত্যরাজ হিরণ্যকশিপু দেখিলেন যে, তাঁহার শত্রু ভগবান্ বিষ্ণুর পরম ভক্ত নিজ পুত্র প্রহ্লাদের বিনাশার্থ যত প্রকার উপায় হইতে পারে, তৎসমুদয়ই বিফল হইল, তখন তিনি পরম ভীতিগ্রস্ত

ও কিংকর্তব্যবিমূঢ় হইয়া পড়িলেন। তখন দৈত্যরাজ পুনরায় পুত্রকে নিজ সন্নিধানে আনয়ন করাইলেন এবং নানাপ্রকার মিষ্ট-বাক্য বলিয়া তাঁহাকে আবার বুঝাইবার চেষ্টা করিলেন। কিন্তু প্রহ্লাদ পূর্বে পিতার নিকট যেরূপ উত্তর দিতেন, এক্ষণেও সেই একই উত্তর তাঁহার মুখ দিয়া নির্গত হইল। হিরণ্যকশিপু ভাবিলেন, শিক্ষা ও বয়োবৃদ্ধির সঙ্গে সঙ্গে ইহার শিঙজনোচিত এই সব খেলা চলিয়া যাইবে। এই ভাবিয়া তিনি পুনরায় প্রহ্লাদকে ষণ্ডামর্কের হস্তে অর্পণ করিয়া তাঁহাদিগকে প্রহ্লাদকে রাজধর্ম শিক্ষা দিতে অমুমতি করিলেন। ষণ্ডামর্কও প্রহ্লাদকে লইয়া রাজধর্মসম্বন্ধে উপদেশ দিতে লাগিলেন, কিন্তু সেই উপদেশ প্রহ্লাদের ভাল লাগিত না, তিনি স্মরণে পাইলেই সহপাঠী বালকগণকে ভগবান্ বিষ্ণুর প্রতি ভক্তিয়োগ শিক্ষা দিয়া কালযাপন করিতে লাগিলেন।

যখন হিরণ্যকশিপুর নিকট এই সমাচার পহঁছিল যে, প্রহ্লাদ নিজ সহপাঠী শিঙগণকে পর্যন্ত বিষ্ণুর উপাসনা করিতে শিখাইতেছে, তখন তিনি আবার ক্রোধে উন্নত হইয়া উঠিলেন এবং প্রহ্লাদকে নিজ সমীপে ডাকাইয়া আনিয়া তাঁহাকে মারিয়া ফেলিবার ভয় দেখাইতে এবং বিষ্ণুকে অকথা ভাষায় নিন্দা করিতে লাগিলেন। প্রহ্লাদ তখনও দৃঢ়তার সহিত বলিতে লাগিলেন যে, “বিষ্ণুই সমগ্র জগতের অধীশ্বর, তিনি অনাদি, অনন্ত, সর্বশক্তিমান্ ও সর্বব্যাপী এবং তিনিই একমাত্র উপাস্ত।” এই কথা শুনিয়া হিরণ্যকশিপু ক্রোধে তর্জ্জন গর্জন করিয়া বলিতে লাগিলেন, “রে ছুষ্ট, যদি তোর বিষ্ণু সর্বব্যাপী হন, তবে তিনি এই স্তম্ভে নাই কেন ?” প্রহ্লাদ বিনীতভাবে কহিলেন, “হাঁ, তিনি অবশ্যই এই স্তম্ভে আছেন।” তখন হিরণ্যকশিপু কহিলেন, “আচ্ছা, তাহাই:

যদি হয়, তবে এই আমি তোকে তরবারি আঘাত করিতেছি, তোমার বিষ্ণু তোকে রক্ষা করুক।” এই বলিয়া দৈত্যরাজ তরবারিহস্তে প্রহ্লাদের দিকে বেগে অগ্রসর হইলেন এবং স্তম্ভের উপর প্রচণ্ড তরবারির আঘাত করিলেন। তৎক্ষণাৎ স্তম্ভমধ্য হইতে বজ্রনিখৌষ উখিত হইল, বিষ্ণু নৃসিংহমূর্ত্তি ধারণ করিয়া স্তম্ভমধ্য হইতে নির্গত হইলেন। সহসা এই ভীষণ মূর্ত্তিদর্শনে চকিত ও ভীত হইয়া দৈত্যগণ ইতস্ততঃ পলায়ন করিতে লাগিল। হিরণ্যকশিপু তাঁহার সহিত বহুক্ষণ ধরিয়া প্রাণপণে যুদ্ধ করিলেন, কিন্তু অবশেষে ভগবান্ নৃসিংহ কর্তৃক পরাভূত ও নিহত হইলেন।

তখন স্বর্গ হইতে দেবগণ আগমন করিয়া বিষ্ণুর স্তব করিতে লাগিলেন। প্রহ্লাদও ভগবান্ নৃসিংহদেবের চরণে নিপতিত হইয়া পরম মনোহর স্তব করিলেন। তখন ভগবান্ প্রসন্ন হইয়া প্রহ্লাদকে বলিলেন, “বৎস প্রহ্লাদ, তুমি আমার নিকট যাহা ইচ্ছা বর প্রার্থনা কর। বৎস, তুমি আমার পরম প্রিয়পাত্র। অতএব তোমার যাহা ইচ্ছা হয়, তাহাই আমার নিকট প্রার্থনা কর।” প্রহ্লাদ ভক্তি-গদগদস্বরে বলিলেন, “প্রভো, আমি আপনাকে দর্শন করিলাম। এক্ষণে আমার আর কি প্রার্থনীয় থাকিতে পারে? আপনি আর আমাকে ঐহিক বা পারত্রিক কোনরূপ ঐশ্বৰ্য্যের প্রলোভন দেখাইবেন না।” ভগবান্ পুনরায় কহিলেন, “প্রহ্লাদ, তোমার নিষ্কামভক্তি দেখিয়া পরম প্রীত হইলাম। তথাপি আমার দর্শন বিফল হয় না। অতএব আমার নিকট যে কোন একটি বর প্রার্থনা কর।” তখন প্রহ্লাদ বলিলেন,—

যা প্রীতিরবিবেকানাং বিষয়েধনপায়িনী।

স্বামিন্মরতঃ সা মে হৃদয়ান্বাপসর্পতু ॥ বিষ্ণুপুরাণ, ১, ২০, ১২।

অর্থাৎ অস্ত্রানী ব্যক্তির বিষয়ে যেসকল তীব্র আসক্তি থাকে
তোমাকে স্মরণ করিবার সময় যেন সেইরূপ তীব্র অনুরাগ আমার
হৃদয় হইতে অপসৃত না হয়।

তখন ভগবান্ কহিলেন, “বৎস প্রহ্লাদ, যদিও আমার পরম
ভক্তগণ ইহলোক বা পরলোকের কোনরূপ কাম্যবস্তু আকাঙ্ক্ষা
করেন না, তথাপি তুমি আমার আদেশে সর্বদা আমাতে মন রাখিয়া
কল্লাস্ত পর্যাস্ত ঐশ্বর্য্যভোগ ও পুণ্যকর্ম্মসমূহের অনুষ্ঠান কর।
যথাসময়ে কল্লাস্তে দেহপাত হইলে আমায় লাভ করিবে।” এইরূপে
প্রহ্লাদকে বর দিয়া ভগবান্ বিষ্ণু অন্তর্হিত হইলেন। তখন
ব্রহ্মাপ্রমুখ দেবগণ প্রহ্লাদকে দৈত্যরাজ্যে অভিষিক্ত করিয়া স্ব স্ব
লোকে প্রস্থান করিলেন।

স্বামী বিবেকানন্দ।

ପଢ଼ାଂଶ

প্রার্থনা

ধরে মানুষের দেহ মানুষে করিয়ে মেহ
মিছা কাল করিলাম বই ।

স্বরূপ মানুষ কই এমন মানুষ কই ?
আমি তো মানুষ নিজে নই ॥

কোথা বিভূ বিশ্বকর, আমায় করিয়া নর,
বেদনা দিতেছ কেন আর ?

কর দেখি উপদেশ, কেন দিলে রাগ ঘেঘ,
কেন দিলে দস্ত অহঙ্কার ?

তুমি নাথ ইচ্ছাময়, কর যাহা ইচ্ছা হয়,
ইচ্ছায় চালিছ, এ সংসার ।

যে কলে চালাও চলি, যে বলে বলাও বলি,
সম্ভাবনা কি আছে আমার ?

হা হোক তা হোক নাথ, আজ কিবা সুপ্রভাত,
প্রণিপাত চরণে তোমার ।

মধুর মধুর ভাব, তুমি তায় আবির্ভাব,
সকলেতে করিছ বিহার ॥

কান্তপ্রিয় এই কান্ত, অতি শান্ত ঋতুকান্ত,
মরি কিবা কান্ত মনোহর ।

যার বলে বলাকান্ত, নাশিয়া নিশির ধ্বাস্ত,
নিশাকান্ত কান্ত করে কর ॥

প্রসূতি তোমার যেই, তাহার প্রসূতি এই,
বসুমাতা মাতা সবাকার ।

কে বুঝে ক্ষিত্তির রীতি, তোমার জননী ক্ষিত্তি,
জনকের জননী তোমার ॥

কত শস্ত ফলমূল, না হয় ঘাহার মূল
হীরকাদি রজত কাঞ্চন ।

বাঁচাতে জীবের অম্ম, বক্ষেতে বিপুল বস্ম,
বস্মমতী করেন ধারণ ॥

সুগভীর রত্নাকর, হইয়াছে রত্নাকর,
রত্নময়ী বস্মধার বরে ।

শূন্তে করি অবস্থান, করে করে কর দান,
তরুণি ধরণীবাসী-করে ॥

বরিয়া ধরার পদ, পেয়ে পদ, নদী, নদ,
জীবনে জীবন রক্ষা করে ।

মোহিনী মহীর মোহে, বহি বারি বন্ধ দৌহে,
প্রেমভাবে চরে চরাচরে ॥

প্রকৃতির পূজা ধর, পূলকে প্রণাম কর,
প্রেমময়ী পৃথিবীর পদে ।

বিশেষতঃ নিজদেশে, প্রীতি রাখ সবিশেষে,
মুগ্ধ জীব বার মোহমদে ॥

ইন্দ্রের অমরাবতী, ভোগেতে না হয় মতি,
স্বর্গভোগ উপসর্গ সার ।

শিবের কৈলাস ধাম, শিবপূর্ণ বটে নাম,
শিবধাম স্বদেশ তোমার ॥

মিছা মণি মুক্তা হেম, স্বদেশের প্রিয় প্রেম,
 তার চেয়ে রত্ন নাই আর ।
 সুধাকরে কত সুধা, দূর করে তৃষ্ণা কুধা,
 স্বদেশের শুভ সমাচার ॥
 ভ্রাতৃত্বাব ভাবি মনে, দেখ দেশবাসীগণে,
 প্রেমপূর্ণ নয়ন মেলিয়া ।
 কতরূপ স্নেহ করি, দেশের কুকুর ধরি,
 বিদেশের ঠাকুর ফেলিয়া ॥
 স্বদেশের প্রেম যত, সেই মাত্র অবগত,
 বিদেশেতে অধিবাস যার ।
 ভাব তুলি ধ্যানে ধরে, চিন্তাগটে চিত্র করে,
 স্বদেশের সকল ব্যাপার ॥
 স্বদেশের শাস্ত্রমতে, চল সত্য ধর্মপথে,
 সুখে কর জ্ঞান আলোচন ।
 বৃদ্ধি কর মাতৃভাষা, পূরাও তাহার আশা,
 দেশে কর বিজ্ঞাবিতরণ ॥
 দিন গত হয় ক্রমে, কেন আর ভ্রম ভ্রমে,
 স্থির প্রেমে কর অবধান ।
 বাস করি এই বর্ষে, এই ভাবে এই বর্ষে,
 হর্ষে কর বিভূষণগান ॥
 উপদেশ বাক্য ধর, দেশে কেন ঘেঁষ কর,
 শেষ কর মিছে সুখ-আশা ।
 তোমার যে ভালবাসা, সে হোলনা ভালবাসা,
 আর কোথা পাবে ভাল বাসা ?

এ বাসা ছাড়িবে যবে, আর কি হে আশা রবে-
 প্রাপ্ত হয়ে আশা-নাশা বাসা ।
 কেবা আর পায় দেখা, এলে একা, যাবে একা,
 পুনর্বার নাহি আর আসা ॥

ঈশ্বরচন্দ্র গুপ্ত ।

বঙ্গভাষা

হে বঙ্গ ! ভাঙারে তব বিবিধ রতন ;—
 তা সবে, (অবোধ আমি !) অবহেলা করি,
 পর-ধন-লোভে মত্ত, করিহু ভ্রমণ
 পরদেশে, ভিক্ষাবৃত্তি কুক্ষণে আচরি' ।
 কাটাইহু বহুদিন সুখ পরিহরি'
 অনিদ্রায়, অনাহারে সঁপি' কায়, মনঃ,
 মজিহু বিকল তপে অবরেণ্যে বরি',—
 কেলিহু শৈবালে, ভুলি, কমল-কানন ।
 স্বপ্নে তব কুললক্ষ্মী ক'য়ে দিলা পরে,—
 “ওরে বাছা, মাতৃ-কোষে রতনের রাজি ;
 এ ভিখারী-দশা তবে কেন তোর আজি ?
 যা কিরি, অজ্ঞান তুই, যা রে, কিরি, ঘরে !”
 পালিলাম আজ্ঞা স্মৃথে ; পাইলাম কালে
 মাতৃ-ভাষারূপে থনি, পূর্ণ মণিজালে ।

মাইকেল মধুসূদন দত্ত

কাশীরাম দাস

চন্দ্রচূড়-জটাজালে আছিল। যেমতি
 জাহ্নবী, ভারত-রস ঋষি হৈপায়ন,
 চালিয়া সংস্কৃত হ্রদে রাখিলা তেমতি,
 তৃণায় আকুল বঙ্গ করিত রোদন ।
 কঠোরে গঙ্গায় পূজি' ভগীরথ ব্রতী,
 (অধস্ত তাপস ভবে, নয়-কুল-ধন !)
 সগর-বংশের যথা সাধিলা মুকতি ;
 পবিত্রিলা আনি' মায়ে, এ তিন ছুবন ;
 সেইরূপে ভাষা-পথ খননি' স্ব-বলে,
 ভারত-রসের স্রোতঃ আনিয়াছ তুমি
 ছুড়াতে গোড়ের তৃষা সে বিমল জলে ।
 নারিবে শোধিতে ধার কভু গোড়ভূমি ।
 মহাভারতের কথা অমূল্য-সমান ।—
 হে কাশী ! কবীন্দ্রলে তুমি পূণ্যবান !

মাইকেল মধুসূদন দত্ত ।

কালিদাস

কবিতা-নিকুঞ্জে তুমি, পিককুল-পতি !
 কার গো না মজে মন ও মধুর-স্বরে ?
 গুনিয়াছি লোক-মুখে,—আপনি ভারতী,
 সৃজি' মায়া-বলে সরঃ বনের ভিতরে,
 নব নাগরীর বেশে তুষিলেন বয়ে
 তোমায়; অমৃত-রসে রসনা সিকতি',
 আপনার স্বর্ণ-বীণা অরপিলা করে !—
 সত্য কি হে, এ কাহিনী, কহ মহামতি ?
 মিথ্যা বা কি ব'লে বলি ? শৈলেন্দ্র-সদনে,
 লভি' জন্ম মন্দাকিনী (আনন্দ জগতে !)
 নাশেন কলুষ যথা এ তিন ভুবনে;
 সঙ্গীত-তরঙ্গ তব উথলি' ভারতে
 (পুণ্যভূমি !), হে কবীন্দ্র, সুধা-বরিষণে
 দেশ-দেশান্তরে কর্ণ তোষে সেই মতে !

মাইকেল মধুসূদন দত্ত ।

দশরথের প্রতি কেকয়ী

এ কি কথা শুনি আজি মহরার মুখে,
 রঘুরাজ ? কিন্তু দাসী নীচকুলোদ্ভবা,
 সত্য-মিথ্যা-জ্ঞান তার কভু না সম্ভবে !
 কহ তুমি,—কেন আজি পুরবাসী যত
 আনন্দ-সলিলে মগ্ন ? ছড়াইছে কেহ
 ফুলরাশি রাজপথে ; কেহ বা গাঁথিছে
 মুকুল-কুসুম-ফল-পল্লবের মালা
 সাজাইতে গৃহদ্বার,—মহোৎসবে যেন ?
 কেন বা উড়িছে ধ্বজ প্রতি গৃহচূড়ে ?
 কেন পদাতিক, হয়, গজ, রথ, রথী
 বাহিরিছে রণবেশে ? কেন বা বাজিছে
 রণবাণ ? কেন আজি পুরনারী-ব্রজ
 মুহুমূর্ছ হলাহলি দিতেছে চৌদিকে ?
 কেন বা নাচিছে নট, গায়িছে গায়কী ?

* কোন সময়ে রাজর্ষি দশরথ কেকয়ী দেবীর নিকট এই প্রতিজ্ঞা করিয়া-
 ছিলেন যে, তিনি তাঁহার গর্ভজাত পুত্র ভরতকে যুবরাজ-পদে অভিষিক্ত করিবেন।
 কালক্রমে রাজা স্ব-সত্য বিন্দুত হইয়া কোশল্যানন্দন রামচন্দ্রকে সে পদপ্রদানের
 ইচ্ছা প্রকাশ ও তদানুযায়িক উৎসবের আয়োজন করিলে, কেকয়ী দেবী,
 মহুরা-নারী দাসীর মুখে সংবাদ পাইয়া, এই পত্রিকাখানি রাজসমীপে প্রেরণ
 করিয়াছিলেন।

কেন এত বীণা-ধ্বনি ? কহ, দেব, শুনি,
 কৃপা করি কহ যোরে,—কোন্ ব্রতে ব্রতী
 আজি রঘু-কুল-শ্রেষ্ঠ ? কহ, হে নৃমণি,
 কাহার কুশল-হেতু কৌশল্যা মহিষী
 বিতরেন ধন-জাল ? কেন দেবালয়ে
 বাজিছে ঝাঁঝরী, শঙ্খ, ঘণ্টা, ঘটারোলে ?
 কেন রঘু-পুরোহিত রত স্বস্ত্যয়নে ?
 নিরন্তর জন-শ্রোত কেন বা বহিছে
 এ নগর-অভিযুখে ? রঘু-কুল-বধু
 বিবিধ ভূষণে আজি কি হেতু সাজিছে—
 কোন্ রঙ্গে ? অকালে কি আরস্তিলা, প্রভু,
 যজ্ঞ ? কি মঙ্গলোৎসব আজি তব পুরে ?
 কোন্ রিপু হত রণে, রঘু-কুল-রথি ?
 জন্মিল কি পুত্র আর ? কাহার বিবাহ
 দিবে আজি ? আইবড় আছে কি হে গৃহে
 হ্রিহিতা ? কোতুক বড় বাড়িতেছে মনে !
 হা ধিক্ ! কি কবে দাসী—গুরুজন তুমি,
 নতুবা কেকয়ী, দেব, মুক্তকণ্ঠে আজি
 কহিত—“অসত্য-বাদী রঘু-কুল-পতি !
 নিলজ্জ ! প্রতিজ্ঞা তিনি ভাঙ্গেন সহজে !
 ধর্ম্ম-শব্দ মুখে,—গতি অধর্ম্মের পথে !”

অযথার্থ কথা যদি বাহিরায় মুখে
 কেকয়ীর, মাথা তার কাট তুমি আসি,
 নররাজ ; কিংবা দিয়া চূণ-কালি গালে

খেদাও গহন বনে । যথার্থ যত্নপি
 অপবাদ, তবে কহ, কেমনে ভঞ্জিবে
 এ কলঙ্ক ? লোকমাঝে কেমনে দেখাবে
 ও-মুখ, রাঘবপতি, দেখ ভাবি মনে ।
 ধর্ম্মশীল বলি, দেব, বাখানে তোমারে
 দেব নর,—জিতেন্দ্রিয়, নিত্য সত্যপ্রিয় !
 তবে কেন, কহ মোরে, তবে কেন শুনি,
 যুবরাজ-পদে আজি অভিষেক কর
 কোশল্যা-নন্দন রামে ? কোথা পুত্র তব
 ভরত,—ভারত-রত্ন, রঘু-চূড়ামণি ?
 পড়ে কি হে মনে এবে পূর্বকথা যত ?
 কি দোষে কেকয়ী দাসী দোষী তব পদে ?
 কোন্ অপরাধে পুত্র, কহ অপরাধী ?

তিন রাণী তব, রাজা ! এ তিনের মাঝে,
 কি ত্রুটি সেবিতে পদ করিল কেকয়ী
 কোন্ কালে ? পুত্র তব চারি, নরমণি !
 গুণশীলোত্তম রাম, কহ, কোন্ গুণে ?
 কি কুহকে, কহ শুনি, কোশল্যা-মহিষী
 ভূলাইলা মন তব ? কি বিশিষ্ট গুণ
 দেখি রামচন্দ্রে, দেব, ধর্ম্ম নষ্ট কর
 অতীষ্ট পূর্ণিতে তার, রঘুশ্রেষ্ঠ তুমি ?

কিঙ্ক বাক্য-ব্যয় আর কেন অকারণে ?—
 যাহা ইচ্ছা কর, দেব ; কার সাধ্য রোধে
 তোমায় ? নরেন্দ্র তুমি ! কে পারে ফিরাতে

প্রবাহে ? বীতংসে কেবা বাধে কেশরীরে ?
 চলিল ত্যজিয়া আজি তব পাপ-পুরী
 ভিখারিণী-বেশে দাসী ! দেশ-দেশান্তরে
 ফিরিব ; যেখানে যাব, কহিব সেখানে,
 ‘পরম অধর্ম্মাচারী রঘু-কুল-পতি !’
 গম্ভীরে অন্ধরে যথা নাদে কাদম্বিনী,
 এ মোর দুঃখের কথা, কব সর্ব্বজনে !
 পথিকে, গৃহস্থে, রাজে, কাঙালে, তাপসে,—
 যেখানে যাহারে পাব, কব তার কাছে—
 ‘পরম অধর্ম্মাচারী রঘু-কুল-পতি !’
 পুষি সারী-শুক, দৌহে শিখাব যতনে
 এ মোর দুঃখের কথা, দিবস-রজনী ।
 শিথিলে এ কথা, তবে দিব দৌহে ছাড়ি
 অরণ্যে, গাইবে তারা বসি বৃক্ষ-শাখে,—
 ‘পরম অধর্ম্মাচারী রঘু-কুল-পতি !’
 শিথি পক্ষিমুখে গীত গাবে প্রতিধ্বনি,—
 ‘পরম অধর্ম্মাচারী রঘু-কুল-পতি !’
 লিখিব গাছের ছালে, নিবিড় কাননে,
 ‘পরম অধর্ম্মাচারী রঘু-কুল-পতি !’
 গোদিব এ কথা আমি তুঙ্গ-শৃঙ্গ-দেহে ।
 রচি গাথা শিখাইব পল্লী-বাল-দলে ।
 করতালি দিয়া তারা গাইবে নাচিয়া,—
 ‘পরম অধর্ম্মাচারী রঘু-কুল-পতি !’

থাকে যদি ধর্ম, তুমি অবশ্য ভুঞ্জিবে
এ কর্মের প্রতিফল ! দিয়া আশা মোরে,
নিরাশ করিলে আজি ; দেখিব নয়নে
তব আশা-বৃক্ষে ফলে কি ফল, নৃমণি !

বাড়ালে যাহার মান, থাক তার সাথে
গৃহে তুমি । বামদেশে কৌশল্যা মহিষী,—
যুবরাজ পুত্র রাম, জনক-নন্দিনী
সীতা প্রিয়তমা বধু—এ সবারে লয়ে
কর ঘর নরবর, যাই চলি আমি ।
পিতৃ-মাতৃ-হীন পুত্রে পালিবেন পিতা—
মাতামহালয়ে পাবে আশ্রয় বাছনি ।
দিব্য দিয়া মানা তারে করিব খাইতে
তব অন্ন ; প্রবেশিতে তব পাপ-পুরে ।

চিরি বক্ষঃ মনোহঃখে লিখিছু শোণিতে
লেখন । না থাকে যদি পাপ এ শরীরে,
পতি-পদ-গতা যদি পতিব্রতা দাসী,
বিচার করুন ধর্ম ধর্ম-রীতি-মতে !

মাইকেল মধুসূদন দত্ত

লক্ষ্মণ ও ইন্দ্রজিৎ

বিস্ময়ে কহিলা শূর,—“সত্য যদি তুমি
 রামামুজ, কহ, রথি, কি ছলে পশিলা
 রক্ষোরাজপুরে আজি ? রক্ষঃ শত শত,
 যক্ষপতিজ্ঞাস বলে, ভীম-অঙ্গপানি,
 রক্ষিছে নগর-দ্বার ; শৃঙ্গধরসম
 এ পুর-প্রাচীর উচ্চ ;—প্রাচীর উপ
 ভ্রমিছে অমৃত যোধ চক্রাবলীরূপে ;—
 কোন্ মায়াবলে, বলি, ভুলালে এ সবে ?
 মানবকুলসম্ভব, দেবকুলোদ্ভবে
 কে আছে রথী এ বিশ্বে, বিমুখয়ে রণে
 একাকী এ রক্ষোরূন্দে ? এ প্রপঞ্চে তবে
 কেন বঞ্চাইছ দাসে, কহ তা দাসেরে,
 সর্বভুক ? কি কৌতুক এ তব, কৌতুকি ?
 নহে নিরাকার দেব, সৌমিত্রি, কেমনে
 এ মন্দিরে পশিবে সে ? এখনও দেখ
 রুদ্ধদ্বার ! বর, প্রভু, দেহ এ কিঙ্করে,
 নিঃশঙ্কা করিব লঙ্কা বধিয়া রাঘবে
 আজি, খেদাইব দূরে কিঙ্কিঙ্ক্যা-অধিপে,
 বাধি আনি রাজপদে দিব বিভীষণে—
 রাজদ্রোহী । ওই শুন, নাদিছে চৌদিকে

শৃঙ্গ শৃঙ্গনাদিগ্রাম ! বিলম্বিলে আমি,
 ভগ্নোত্তম রক্ষঃ-চমু, বিদাও আমারে !”
 উত্তরিল। দেবাকৃতি সৌমিত্রি কেশরী,—
 “কৃতান্ত আমি রে তোৱ, হরন্ত রাবণি !
 মাটী কাটি দংশে সর্প আয়ুহীন জনে !
 মদে মত্ত।সদা তুই ; দেব-বলে বলী,
 তবু অবহেলা, মূঢ়, করিস্ সতত
 দেবকূলে ! এত দিনে মজিলি হুস্মতি !
 দেবাদেশে রণে আমি আহ্বানি রে তোরে !”

এতেক কহিয়া বলী উলঙ্ঘিলা অসি
 ভৈরবে ! বলসি আঁখি কালানল-তেজে,
 ভাতিল রূপাণবর, শত্রুকরে যথা
 ইরশ্মদময় বজ্র ! কহিলা রাবণি,—
 “সত্য যদি রামানুজ তুমি, ভীমবাহ
 লক্ষ্মণ ; সংগ্রাম-সাধ অবশ্য মিটাব
 মহাহবে আমি তব, বিরত কি কভু
 রণরঙ্গে ইন্দ্রজিৎ ? আতিথেয় সেবা,
 তিষ্ঠি, লহ, শূরশ্রেষ্ঠ, প্রথমে এ ধামে—
 রক্ষোরিপু তুমি, তবু অতিথি হেঁ এবে ।
 সাজি বীরসাজে আমি । নিরস্ত যে অরি,
 নহে রথিকুল-প্রথা আঘাতিতে তারে ।
 এ বিধি, হে বীরবর, অবিদিত নহে,
 ক্ষত্র তুমি, তব কাছে ;—কি আর কহিব ?”
 জলদ-প্রতিমস্থনে কহিলা সৌমিত্রি,—

“আনায়-মাঝারে বাঘে পাইলে কি কত
ছাড়ে রে কিরাত তারে ? বধিব এখনি,
অবোধ, তেমতি তোরে ! জন্ম রক্ষকুলে
তোর, ক্ষত্রধর্ম, পাপি, কি হেতু পালিব
তোর সঙ্গে ? মারি অরি, পারি যে কোশলে ।”

কহিলা বাসবজেতা,—(অভিমন্যু যথা
হেরি সপ্ত শূরে শূর তপ্তলৌহাকৃতি
রোষে !)—“ক্ষত্রকুলম্মানি, শত ধিক্ তোরে,
লক্ষ্মণ ! নির্লজ্জ তুই । ক্ষত্রিয়-সমাজে
রোধিবে শ্রবণপথ ঘুণায়, গুণিলে
নাম তোর রথিবৃন্দ ! তস্কর যেমতি,
পশিলি এ গৃহে তুই ; তস্কর সদৃশ
শাস্তিয়া নিরস্ত তোরে করিব এখনি !
পশে যদি কাকোদর গরুড়ের নীড়ে,
ফিরি কি সে যায় কভু আপন বিবরে,
পামর ? কে তোরে হেথা আনিল দুর্ন্যতি ?”

চক্ষের নিমিষে কোষা তুলি ভীমবাহু
নিষ্কেপিল ঘোর-নাদে লক্ষ্মণের শিরে ।
পড়িলা ভূতলে বলী ভীম প্রহরণে,
পড়ে তরুরাজ যথা প্রভঞ্জনবলে
মড়মড়ে ! দেব-অস্ত্র বাজিল ঝনঝনি,
কাঁপিল দেউল যেন ঘোর ভূকম্পনে !
বহিল রুধির-ধার’ রিলা সঙ্ঘরে
দেব-অসি ইন্দ্রজিৎ ;—নারিলা তুলিতে

তাহার ! কান্দুক ধরি করিলা ; রহিল
 সৌমিত্রির হাতে ধনুঃ ! সাপটিলা কোপে
 ফলক ; বিফল বল সে কাজ-সাধনে !
 যথা শুণ্ডধর টানে শুণ্ডে জড়াইয়া
 শৃঙ্গধরশৃঙ্গে বৃথা, টানিলা তুণীরে .
 শূরেন্দ্র ! মায়ার মায়া কে বুঝে জগতে !
 চাহিলা ছয়ার-পানে অভিমানে মানী ।
 সচকিতে বীরবর দেখিলা সন্মুখে
 ভীমতম শূল-হস্তে, ধূমকেতুসম
 খুল্লতাত বিভীষণে—বিভীষণ রণে !

“এতক্ষণে”—অরিন্দম কহিলা বিধাদে
 “জানিহু কেমনে আসি লক্ষ্মণ পশিল
 রক্ষ:-পুরে ! হায়, তাত, উচিত কি ত
 এ কাজ, নিকষা সতী তোমার জননী,
 সহোদর রক্ষ:শ্রেষ্ঠ ? শূলিশস্ত্রনিভ
 কুস্তকর্ণ ? ভ্রাতৃপুত্র বাসববিজয়ী ?
 নিজগৃহপথ, তাত, দেখাও তক্ষরে ?
 চণ্ডালে বসিও আনি রাজার আলয়ে ?
 কিন্তু নাহি গঞ্জি তোমা, গুরুজন তুমি
 পিতৃতুল্য । ছাড় দ্বার, যাব অঙ্গাগারে,
 পাঠাইব রামাঙ্গুজে শমন-ভবনে,
 গঙ্কার কলঙ্ক আজি তঞ্জিব আহবে ।”

উত্তরিলা বিভীষণ,—“বৃথা এ সাধনা,
 ধীমান্ ! রাঘবদাস আমি ; কি প্রকারে

তাঁহার বিপক্ষ কাজ করিব, রক্ষিতে
 অতুরোধ ?” উত্তরিল। কাতরে রাবণি,—
 “হে পিতৃব্য, তব বাক্যে ইচ্ছি মরিবারে !
 রাঘবের দাস তুমি ? কেমনে ও-মুখে
 আনিলে এ কথা, তাত, কহ তা দাসেরে !
 স্থাপিলা বিধুরে বিধি স্থাগুর ললাটে ;
 পড়ি কি ভূতলে শশী যান গড়াগড়ি
 ধ্বলায় ? হে রক্ষোরথি, ভুলিলে কেমনে
 কে তুমি ? জনম তব কোন্ মহাকূলে ?
 কেবা সে অধম রাম ? স্বচ্ছ সরোবরে
 করে কেলি রাজহংস পঙ্কজ-কাননে ;
 যায় কি সে কভু, প্রভু, পঙ্কিল-সলিলে,
 শৈবালদলের ধাম ? যুগেন্দ্র কেশরী,
 কবে, হে বীরকেশরি, সম্ভাষে শৃগালে
 মিত্রভাবে ? অজ্ঞ দাস, বিজ্ঞতম তুমি,
 অবিদিত নহে কিছু তোমার চরণে ।
 কুদ্রমতি নর, শূর, লক্ষ্মণ ; নহিলে
 অজ্ঞহীন যোধে কি সে সম্বোধে সংগ্রামে ?
 কহ, মহারথি, একি মহারথি-প্রথা ?
 নাহি শিশু লঙ্কাপুরে, গুনি না হাসিবে
 এ কথা ! ছাড়হ পথ ; আসিব ফিরিয়া
 এখনি ! দেখিব আজি কোন্ দেববলে,
 বিমুখে সমরে মোরে সৌমিত্রি কুমতি !
 দেব-দৈত্য-নর-রণে, স্বচক্ষে দেখেছ,

রক্ষঃশ্রেষ্ঠ, পরাক্রম দাসের ! কি দেখি
 ডরবে এ দাস হেন দুর্বল মানবে ?
 নিকুন্তিলা যজ্ঞাগারে প্রগল্ভে পশিল
 দম্ভী ; আজ্ঞা কর দাসে শান্তি নরাধমে ।
 তব জন্মপুরে, তাত, পদার্পণ করে
 বনবাসী ! হে বিধাতঃ, নন্দন-কাননে
 ভ্রমে ছুরাচার দৈত্য ? প্রফুল্ল-কমলে
 কোটবাস ? কহ, তাত, সহিব কেমনে
 হেন অপমান আমি,—ভ্রাতৃপুত্র তব ?
 তুমিও, হে রক্ষোমণি, সহিছ কেমনে ?”

মহামন্ত্র-বলে যথা নত্রশিরঃ ফণী,
 মলিনবদন লাজে, উত্তরিলে রথী
 রাবণ-অমুজ, লক্ষ্মি রাবণ-আত্মজে,—

“নহি দোষী আমি, বৎস ! বৃথা ভৎস মোরে
 তুমি ! নিজ-কর্মদোষে, হায়, মজাইলা
 এ কনক-লঙ্কা রাজা, মজিলা আপনি !
 বিরত সতত পাপে দেবকুল ; এবে
 পাপপূর্ণ লঙ্কাপুরী ; প্রলয়ে যেমতি
 বসুধা, ডুবিছে লঙ্কা এ কালসলিলে !
 রাঘবের পদাশ্রয়ে রক্ষার্থে আশ্রয়ী
 তেঁই আমি ! পরদোষে কে চাহে মজিতে ?”

রুঘিলা বাসবজ্ঞাস ! গম্ভীরে যেমতি
 নিশীথে অন্ধরে মস্ত্রে জৌমুতেন্দ্র কোপি,
 কহিলা বীরেন্দ্র বলী,—“ধর্মপথগামী,

হে রাক্ষসরাজাভুজ, বিখ্যাত জগতে
তুমি ;—কোন্ ধর্ম-মতে, কহ দাসে, শুনি,
জ্ঞাতিত্ব, ভ্রাতৃত্ব, জাতি—এ সকলে দিলা
জলাঞ্জলি ? শাস্ত্রে বলে, গুণবান্ যদি
পরজন, গুণহীন স্বজন, তথাপি
নিগুণ স্বজন শ্রেয়ঃ পর পর সদা !
এ শিক্ষা হে রক্ষোবর ! কোথায় শিখিলে ?
কিস্তি বৃথা গঞ্জি তোমা ! হেন সহবাসে,
হে পিতৃব্য, বর্করতা কেন না শিখিবে ?
গতি যার নীচ সহ নীচ সে দুর্ন্যতি ।”

হেথায় চেতন পাই মায়া'র যতনে
সৌমিত্রি, ছঙ্কারে ধনু টঙ্কারিলা বলী ।
সন্ধানি বিক্লিলা শূর খরতর শরে
অরিন্দম ইন্দ্রজিতে, তারকারি যথা
মহেষ্বাস শরজালে বিধেন তারকে !
হায় রে, রুধির-ধারা (ভূধর-শরীরে
বহে বরিষার কালে জলশ্রোতঃ যথা,)
বহিল, তিতিয়া বজ্র, তিতিয়া মেদিনী !
অধীর ব্যথায় রথী, সাপটি সঙ্করে
শঙ্কা, ঘণ্টা, উপহারপাত্র ছিল যত
যজ্ঞাগারে, একে একে নিক্ষেপিলা কোপে ;
যথা অভিমত্য় রথী, নিরঙ্গ সমরে
সপ্তরথী অঙ্গবলে, কভু বা হানিলা
রথচূড়া, রথচক্র ; কভু ভগ্ন অসি,

ছিন্ন চর্ম, ভিন্ন বর্ম, যা পাইলা হাতে !
 কিন্তু মায়াময়ী মায়া, বাহু-প্রসরণে,
 ফেলাইলা দূরে সবে, জননী যেমতি
 খেদান মশকবৃন্দে স্তম্ভ স্তম্ভ হ'তে
 কর পদ্ম-সঞ্চালনে ! সরোষে রাবণি
 ধাইলা লক্ষ্মণপানে গর্জি ভীমনাদে,
 প্রহারকে হেরি যথা সন্মুখে কেশরী !
 মায়ায় মায়ায় বলী হেরিলা চৌদিকে
 ভাষণ মহিষাকূট ভীম দণ্ডধরে,
 শূল হস্তে শূলপাণি ; শঙ্খ, চক্র, গদা
 চতুর্ভুজে চতুর্ভুজ ; হেরিলা সভয়ে
 দেবকুল রথিবৃন্দে সুদিব্য বিমানে ।
 বিষাদে নিশ্বাস ছাড়ি দাঁড়াইলা বলী
 নিশ্ফল, হায় রে মরি, কলাধর যথা
 রাহুগ্রাসে ; কিংবা সিংহ আনায়-মাঝারে !
 ত্যজি ধনুঃ, নিক্ষেপিয়া অসি মহাতেজাঃ
 রামানুজ ; বলসিলা ফলক-আলোকে
 নয়ন ! হায় রে, অন্ধ অরিন্দম বলী
 ইন্দ্রজিৎ, খড়্গাঘাতে পড়িলা ভূতলে
 শোণিতাঙ্গ । থরথরি কাঁপিলা বসুধা ;
 গর্জিলা উথলি সিদ্ধ ! ভৈরব-আরবে
 সহসা পূরিল বিশ্ব ! ত্রিদিবে, পাতালে,
 মর্ত্যে, মরামর জীব প্রমাদ গণিলা
 আতঙ্কে ! যথায় বসি হৈম সিংহাসনে

সভায় কর্ণরূপতি, সহসা পড়িল
 কনক-মুকুট খসি, রথচূড়া যথা
 রিপূরখী কাটি যবে পাড়ে রথতলে !
 সশঙ্ক লঙ্কের শূর অরিল শঙ্করে !
 প্রমীলার বামেতর নয়ন নাচিল !
 আত্মবিস্মৃতিতে, হায়, অকস্মাৎ সতী
 মুছিল সিদ্ধুর-বিন্দু সুন্দর ললাটে !
 মুর্ছিলা রাক্ষসেন্দ্রাণী মন্দোদরী দেবী
 আচম্বিতে ; মাতৃকোলে নিদ্রায় কাঁদিল
 শিশুকুল আর্তনাদে, কাঁদিল যেমতি
 ব্রজে ব্রজকুলশিশু, যবে শ্রামমণি,
 াধারি সে ব্রজপুর, গেলা মধুপুরে !
 অগ্রায়-সমরে পড়ি, অশ্রুয়ারি-রিপু,
 রাক্ষস-কুল-ভরসা, পরুষ-বচনে
 কহিলা লক্ষ্মণ শূরে,—“বীর-কুলধানি,
 স্মিত্রানন্দন, তুই ! শত ধিক্ তোরে !
 রাবণনন্দন আমি, না ডরি শমনে !
 কিন্তু তোর অজ্ঞাঘাতে মরিছ যে আজি
 পামর, এ চিরছঃখ রহিল রে মনে !
 দৈত্যকুলদল ইন্দ্রে দমিছ সংগ্রামে
 রিতে কি তোর হাতে ? কি পাপে বিধাতা
 দিলেন এ তাপ দাসে, বুঝিব কেমনে ?
 আর কি কহিব তোরে ? এ বারতা যবে
 পাইবেন রক্ষোনাথ, কে রক্ষিবে তোরে,

নরাদম ? জলধির অতল সলিলে
 ডুবিস্ যদিও তুই, পশিবে সে দেশে
 রাজরোষ—বাড়বাগ্নিরাশিসম তেজে !
 দাবান্নিসদৃশ তোরে দন্ধিবে কাননে
 সৈ রোষ, কাননে যদি পশিস্, কুমতি !
 নারিবে রজনী, মুঢ়, আবরিতে তোরে ।
 দানব, মানব, দেব, কার সাধ্য হেন
 জ্বাণিবে, সৌমিত্রি, তোরে, রাবণ রুষিলে
 কেবা এ কলঙ্ক তোর ভঞ্জিবে জগতে,
 কলঙ্কি ?” এতেক কহি, বিষাদে স্তমতি
 মাতৃপিতৃপাদপদ্ম সরিলা অস্তিমে ।
 অধীর হইলা ধীর ভাবি প্রমীলারে
 চিরানন্দ ! লোহ সহ মিশি অশ্রুধারা,
 অনর্গল বহি, হায়, আদ্রিল মহৌরে ।
 লঙ্কার পঙ্কজ-রবি গেলা অস্তাচলে ।
 নির্ঝাণ পাবক যথা, কিংবা ত্বিষাম্পতি
 শাস্তরশ্মি, মহাবল রহিলা ভূতলে ।

মাইকেল মধুসূদন দত্ত ।

হিমালয়

(১)

অসীম নীরদ নয়,
ও-ই গিরি হিমালয় !
উধুলে উঠেছে যেন অনন্ত জলধি ;
ব্যোপে দিগ্দিগন্তর,
তরঙ্গিয়া ঘোরতর,
প্লাবিয়া গগনাস্তন জাগে নিরবধি ।

(২)

বিশ্ব যেন ফেলে পাছে
কি এক দাঁড়ায়ে আছে !
কি এক প্রকাণ্ড কাণ্ড মহান্ ব্যাপার !
কি এক মহান্ মূর্তি,
কি এক মহান্ স্ফুর্তি,
মহান্ উদার সৃষ্টি প্রকৃতি তোমার !

(৩)

পদে পৃথ্বী, শিরে ব্যোম,
তুচ্ছ তারা সূর্য্য সোম
নক্ষত্র, নখাগ্রে যেন গণিবারে পারে !
সম্মুখে সাগরাস্বর
ছড়িয়ে রয়েছে ধরা,
কটাক্ষে কখন যেন দেখিছে তাহারে !

(৪)

ঝটিকা ছরস্তু মেয়ে
 বুকে খেলা করে ধেয়ে,
 ধরিজী গ্রাসিয়া সিদ্ধ লোটে পদতলে !
 জলস্তু অনল-ছবি
 ধব্ ধব্ জলে রবি,
 কিরণ জলন জালা মালা শোভে গলে ।

(৫)

ও-ই কিবা ধবধব
 তুঙ্গ তুঙ্গ শৃঙ্গ সব
 ঈমুখে ধেয়ে গেছে কুঁড়িয়া অম্বর !
 দাঁড়াইয়ে পাদ-দেশে
 ললিত হরিত বেশে
 নধর নিকুঞ্জ রাজি সাজে ধরে ধর

(৬)

ও-ই গগুশৈল-শিরে
 গুল্মরাজি চিরে চিরে.
 বিকশে গৈরিক ঘটা ছটা রক্তময় !
 তৃণ তরু লতা-জাল,
 অপরূপ লালে লাল ;
 মেথের আড়ালে যেন অরুণ উদয় !

(৭)

কিবা ও-ই মনোহারী
 দেবদারু সারি সারি,
 দেদার চলিয়া গেছে কাতারে কাতার।
 দূর দূর আলবালে,
 কোলাকুলি ডালে ডালে,
 পাতায় মন্দির মাঁথা মাথায় সবার !

(৮)

তলে তৃণ লতা পাতা
 সবুজ বিছানা পাতা,
 ছোট ছোট কুঞ্জবন হেথায় হোথায়।
 কেমন পেখম ধরি,
 কেকারব করি করি,
 ময়ূর ময়ূরী সব নাচিয়া বেড়ায়।

(৯)

ফেনিল সলিল-রাশি,
 বেগভরে পড়ে আসি,
 চন্দ্রলোক ভেঙ্গে যেন পড়ে পৃথিবীতে !
 অধাংগ প্রবাহ-পারা
 শত শত ধায় ধারা,
 ঠিকরে অসংখ্য তারা ছোটো চারি ভিতে !

(১০)

শৃঙ্গে শৃঙ্গে ঠেকে ঠেকে,
 লম্ফে লম্ফে ঝেঁকে ঝেঁকে,
 জেলের জালের মত হয়ে ছত্রাকার,

ঘুরিয়ে ছড়িয়ে পড়ে,
ফেনার আরশি ওড়ে,
উড়েছে মরাল যেন হাজার হাজার !

(১১)

নেমে নেমে ধারাগুলি,
করি করি কোলাকুলি,
একবেগী হয়ে হয়ে নদী বয়ে যায় ;
ঝরঝর কলকল
ধোর রবে ভাঙ্গে জল,
পশু পক্ষী কোলাহল করিয়া বেড়ায় ।

(১২)

কিবা ভৃগু-পাদ-মূলে
উথুলে উথুলে ছলে
টলে চলে চলেছেন দেবী সুরধুনী ;
কবির যোগীর প্যান,
ভোলা মহেশ্বর প্রাণ,
ভারত-স্মরতি-গাভী, পতিত পাবনী ।
পুণ্যতোয়া গিরিবালা !
জুড়াও প্রাণের জালা !
জুড়াও ত্রিতাপ জালা মা তোমার জলে ।

বিহারীলাল চক্রবর্তী ।

সিদ্ধার্থের বৈরাগ্য

রাজপথ

(বৃদ্ধের প্রবেশ)

সিদ্ধা । এ কি ভীষণ আকার সম্মুখে আমার !
 নরাকার কিঙ্ক নহে নর !
 শুষ্ক চর্ম্ম অঙ্গে আবরণ ;
 অবনত যেন মহাভারে—
 উন্নত করিতে নারে শির ।
 কহ হে সারথি, কোন্ জাতি জীব এই ?

সার । নর-জাতি গুন হে কুমার,
 অবনত বার্কাক্যের ভারে,
 অসহায় ভ্রমে ধরা' পরে,
 জরাজীর্ণ শোচনীয় দশা ।

সিদ্ধা । এ দশা কি হয় সবাকার ?
 অথবা কি দৈবের বিপাকে
 এ দশা ইহার ?
 নর-জাতি সবে কি হে বার্কাক্য-অধীন ?

সার । হায় প্রভু, কাল বলবান্ !
 কৈশোর যৌবন কালের নিয়ম,
 বার্কাক্য তেমতি মতিমান্ !
 এ দশা সবার,

নিস্তার নাহিক এতে কার,—

দেহিমাত্র বার্ক্য-অধীন ।

সিদ্ধা । আমি—গোপা—ফুল্লকান্তি সহচরী সবে—

জরাগ্রস্ত হব কি সময়ে ?

সার । যুবরাজ, সবে সমনয়ম-অধীন ;

রাজা কিংবা প্রজা—সমভাবে স্পর্শ করে কালে !

সিদ্ধা । এই স্মৃথ ধরে কি সংসার ?

জরার নিস্তার নাহি কার !

এই হেতু জীবনধারণ !

স্মৃথের যৌবন—এইমাত্র পরিণাম !

হায়, হেন কারাগারে,

কোন্ স্মৃথে বাস করে নরে ?

কি কারণ শাসন-আলয়ে

উঠে জয়-জয়-ধ্বনি ?

(জনৈক রুগ্ণের প্রবেশ)

রুগ্ণ । আমার ধর, আমার প্রাণ যায়, আমার চারুদিকে
আশ্রয় জলছে—আমার অস্থিগ্রস্থি সব শিথিল হচ্ছে—আমায় ধর ।

সিদ্ধা । জীর্ণ-জীর্ণ হের চমৎকার !

দেহ-ভার চরণ না বহে ;

কহে—অনল চৌদিকে,

কম্পে ঘন ঘন,

মহাহিমে জর-জর তহু যেন !—

বার্ক্য কি স্পর্শিল ইহারে !

সার হারোগে শীর্ণ কলেবর—

অস্থিগ্রস্থি কাঁপে নিরন্তর,

কিন্তু দেহে ঘোর তাপ

বল-ক্ষয় রোগের প্রভাবে !

সিদ্ধা । কহ বিচক্ষণ,

এও কি হে দেহের নিয়ম ?

এ দশা কি হয় সবাকার ?

সার । চলে দেহ যজ্ঞের সমান,

হে ধীমান,

কেবা জানে কবে প্রাপ্ত হইবে বিকার !

দেহমাত্রে রোগ করে অধিকার,

এ নিয়ম না হয় খণ্ডন ।

সিদ্ধা । এই ছার দেহের গৌরব ?

এই হেতু বৈভব-লালসা ?

কলেবর রোগের আগার,

যত্ন এত তার, পীড়ার পোষণ হেতু ?

কুসুম-সৌরভ, তপন-গৌরব,

চন্দ্রমার হাসি,

চিত্তফুল্লকর কহে বাহা ভ্রান্ত নরে,

ব্যক্তি করে রুগ্ণ জনে !

বুঝিতে না পারি,

কি হেতু এ ধরাধামে বাস,

রুগ্নস্থায়ী সুখ-আশ কেন করে নরে !

(অদূরে মৃত দেহ দেখিয়া)

- স্পন্দহীন, হের পথমাঝে,
 জড় বা চেতন
 নির্ণয় করিতে নারি !
 রুদ্ধকেশা বিবশা রমণী
 পাশে বসি করিছে রোদন !
 'কহ বিবরণ, কিবা এই শোচনীয় ছবি ?
 দেখ—দেখ, বস্ত্রে করি আচ্ছাদন
 কাষ্ঠ সম ল'য়ে যায় স্পন্দহীন দেহ !
 সার । বিচিত্র কালের গতি, শুন যুবরাজ !
 আছিল চেতন,
 এবে অচেতন—মৃত্যুর পরশে ।
 মহানিদ্রাগত !
 এ অভাগা আর না জাগিবে
 সিদ্ধা । কহ সত্য ছন্দক আশায়,
 এ কি এই অভাগার কুলরীতি,
 কিংবা সবাকার ওই পরিণাম ?
 মহানিদ্রা-কোলে আমিও কি করিব শয়ন ?
 সার । কৈশোর, যৌবন, বার্দ্ধক্য, মরণ—
 ক্রমে ক্রমে ফলে কালে যুবরাজ !
 এই মানবের পরিণাম—
 মৃত্যু ফেরে সাথে,
 নাহিক নির্ণয় কবে কার হরিবে চেতন ।
 সিদ্ধা । বুঝিলাম—জলবিশ্ব সম এ শরীর !
 গৌরব ইহার কিবা ?

অম্বুবিষ প্রায় নর উঠে,
 অম্বুবিষ প্রায় পুনঃ টোটে ।
 পাছে মৃত্যু ফিরে লক্ষ্য নাহি করে ;
 ত্রাস্ত নরে তবু করে সুখ-আশা !
 জেনে শুনে অন্ধ রহে চিরদিন !
 না জানি কি অলক্ষ্য প্রভাবে
 ভুলায় মানবে,
 দেখেও না দেখে,
 জেনেও না জানে ;
 আচরণে হয় অহুমান,
 যেন অনন্ত সময়ে
 ক্ষয় না হইবে কায় !
 ধিক্—ধিক্ সংসার-প্রয়াস,
 ধিক্ সুখ-আশা,
 ধিক্ এ জীবন, ধিক্ এ চেতন !
 শত ধিক্ ভঙ্গুর এ দেহে !
 ভাবি মনে আমার—আমার !
 কেবা কার মৃত্যু পরে ?
 ও-ই হাহাকারে কাঁদিছে রমণী—
 কর্ণমূলে না পরশে ধ্বনি,
 ধরায় সম্বন্ধ নাহি আর !

(ভিক্ষুর প্রবেশ)

দেখ—দেখ,
 গৈরিক বসন, প্রশান্ত বদন,

কমণ্ডলু করে—ধীরে করে আগমন !

কহ মোরে এ রহস্য কিবা ?

সার । বাসনা করিয়ে পরিহার,

ভ্রমে দ্বার দ্বার,

ভিক্ষাজীবী সংসার-সম্বন্ধ-হীন ;

সুখ-আশে দিয়া জলাঞ্জলি,

নির্জনে ঈশ্বরে পূজে ;

ব্রহ্ম-উপাসনা বিনা নাহিক কামনা ।

সিদ্ধা । কোথা ব্রহ্ম ? কোথা তাঁর স্থান ?

শুনি ত্রিভুবন সৃজন তাঁহার ;

তবে কেন রোগ শোক জরা,

দুঃখের আগার ধরা ?

মৃত্যু কেন এ জীবনের পরিণাম ?

জীবকুল কিবা অপরাধী,

নিরবধি সহে দুঃখ ?

সন্তানের দুর্গতি দেখিতে

পিতা কভু নাহি পারে !!

এ সংসার সন্তাপ-সাগর

সহে নর অশেষ যন্ত্রণা,

কেন ব্রহ্ম না করে মোচন ?

রোগ-শোকে করে আর্তনাদ,

এ সংবাদ ব্রহ্ম নাহি পায় ?

কিংবা ব্রহ্ম,

শক্তিহীন দুঃখের মোচনে ?

তবু আছে অবশ্য ইহার ;
 শাস্ত্রব্যাখ্যা সকলি অসার,
 শাস্ত্রকার অজ্ঞান সকলে !
 সৰ্ব্বশক্তিমান্ যদি ভগবান্,
 দয়াবান্ কতু সে ত নয় !
 সত্বর চালাও রথ—
 যাব আমি পিতার সদনে ;
 লইব বিদায়, ভ্রমিব ধরায়
 জ্ঞানালোক অন্বেষণে ।
 দুঃখের উপায়
 পারি যদি করিতে নির্ণয়,
 দেশে দেশে জনে জনে দিব উপদেশ ;
 কাঁদে প্রাণ এ দুর্গতি হেরি,
 আর গৃহে রহিতে না পারি ;
 মমতায় আর নাহি বদ্ধ রব !
 মহাকাব্য সন্মুখে আমার,
 অলসে না হরিব জীবন ।
 মহাকাব্যে যদি মম তনু হয় ক্ষয়,
 বৃত্তাকালে প্রবোধিব মনে,
 যথাসাধ্য করেছি উত্তম

[সকলের প্রস্থান ।]

পদ্মের মৃণাল

(১)

পদ্মের মৃণাল এক স্নানীল হিল্লোলে ;
 দেখিলাম সরোবরে ঘন ঘন দোলে—
 কখন ডুবায় কায়, কভু ভাসে পুনরায়,
 হেলে ছলে আশেপাশে তরঙ্গের কোলে—
 পদ্মের মৃণাল এক স্নানীল হিল্লোলে ।
 খেত আভা স্বচ্ছ পাতা, পদ্ম শতদলে মীথা
 উলটি পালটি বেগে স্রোতে ফেলে তোলে—
 পদ্মের মৃণাল এক স্নানীল হিল্লোলে ।
 একদৃষ্টে কতক্ষণ, কোতুকে অবশ মন
 দেখিতে শোকের বেগ ছুটিল কল্লোলে—
 পদ্মের মৃণাল এক তরঙ্গের কোলে ।

(২)

সহসা চিন্তার বেগ উঠিল উথলি ;
 পদ্ম, জল, জলাশয় ভুলিয়া সকলি,
 অদৃষ্টের নিবন্ধন, ভাবিয়া ব্যাকুল মন,
 অই মৃণালের মত হায় কি সকলি ?
 রাজা রাজমন্ত্রিলীলা বলবীৰ্য্য স্রোতঃশীলা
 সকলি কি ক্ষণস্থায়ী দেখিতে কেবলি ?
 অই মৃণালের মত নিস্তেজ সকলি !

অদৃষ্ট বিরোধী যার, নাহিক নিস্তার তার,
 কিবা পশু পক্ষী আর মানবমণ্ডলী ?
 লতা পশু কীট সম মানবেরো পরাক্রম,
 জ্ঞান, বুদ্ধি, ষড়্‌-বলে বাধা কি সকলি ?
 অই মৃণালের মত হায় কি সকলি ?

(৩)

কোথা সে প্রাচীন জাতি মানবের দল,
 শাসন করিত যারা অবনীমণ্ডল ?
 বলবীৰ্য্য-পরাক্রমে ভবে অবলীলাক্রমে
 ছড়াইত মহিমার কিরণ উজ্জল—
 কোথা সে প্রাচীন জাতি মানবের দল ?
 বাধিয়ে পাষাণস্তূপ অবনীতে অপরূপ
 দেখাইল মানবের কি কৌশল বল—
 প্রাচীন মিসরবাসী—কোথা সে সকল ?
 পড়িয়া রয়েছে স্তূপ, অবনীতে অপরূপ
 কোথা তারা, এবে কারা হয়েছে প্রবল,
 শাসন করিতে এই অবনীমণ্ডল ?

(৪)

জগতের অলঙ্কার আছিল যে জাতি,
 আলিল উন্নতিদীপ অরুণের ভাতি ;
 অতুল অবনীতলে, এখনও মহিমা অলে,
 কে আছে সে নর ধন্ত কুলে দিতে বাতি ?
 এই কি কালের গতি এই কি নিয়তি ?

ম্যারাথন্ থাম'পলি, হয়েছে অশানস্থলী,
 গিরীশ আঁধারে আজ পোহাইছে রাত্রি,—
 এই কি কালের গতি এই কি নিয়তি ?
 যার পদচিহ্ন ধ'রে অত্ন জাতি দস্ত করে,
 আকাশ পয়োধি-নীরে ছড়াইত ভাতি—
 জগতের অলঙ্কার কোথায় সে জাতি ?

(৫)

দোর্দণ্ড প্রতাপ যার কোথায় সে রোম ?
 কাঁপিত বাহার তেজে মহী সিদ্ধু বোম ?
 ধরণীর সামা যার, ছিল রাজ্য অধিকার,
 সহস্র বৎসরাবধি একাদি নিয়ম—
 দোর্দণ্ড প্রতাপ আজি কোথায় সে রোম !
 সাহস ঐশ্বর্যে যার ত্রিভুবন চমৎকার—
 সে জাতি কোথায় আজি কোথা সে বিক্রম,
 এমনি অব্যর্থ কিরে কালের নিয়ম ?
 কি চিহ্ন আছে রে তার ? রাজপথ ছুর্গে যার
 পৃথিবী বন্ধন ছিল কোথায় সে রোম ?—
 নিয়তির কাছে নর এত কি অক্ষম ?

(৬)

আরবের পারস্তের কি দশা এখন ?
 সে তেজ নাহিক আর নাহি সে তর্জুন !
 সৌভাগ্য কিরণজালে উহারাই কোনকালে,
 করেছিল মহাতেজে পৃথিবী শাসন ।
 আরবের পারস্তের কি দশা এখন !

পশ্চিমে হিম্পানীশেষ পূর্বে সিদ্ধ হিম্মুদেশ
 কাফের ঘবনবন্ধে করিল দমন,
 উদ্ধাসম অকস্মাৎ হইল পতন ।
 দীন ব'লে মহীতলে, যে কাণ্ড করিলা বলে,
 সে দিনের কথা এবে হয়েছে স্বপন !
 আরবের উপগ্রাস অদ্ভুত যেমন॥

(৭)

আজি এ ভারতে হার, কেন হাহাধ্বনি
 কলঙ্ক লিখিতে কার কাঁদিছে লেখনী ?
 তরঙ্গে তরঙ্গে নত পদ্মযুগালের মত
 পড়িয়া পরের পায় লুটায় ধরণী ।
 আজি এ ভারতে কেন হাহাকার ধ্বনি ?
 জগতের চক্ষু ছিল, কত রশ্মি ছড়াইল,
 সে দেশে নিবিড় আজ আঁধার রজনী—
 পূর্ণগ্রাসে প্রভাকর নিস্তেজ যেমনি ।
 বুদ্ধি বীৰ্য্য বাহুবলে সুধন্ত জগতীতলে,
 ছিল যারা আজি তারা অসার তেমনি ।
 আজি এ ভারতে কেন হাহাকার ধ্বনি !

(৮)

কোথা বা সে ইজ্রায়ল কোথা সে কৈলাস,
 কোথা সে উন্নতি আশা কোথা সে উল্লাস ?
 দস্তে বসুন্ধরা 'পরে বেড়াইত ভেজতরে
 আজি তারা ভরে ভীত হয়েছে হতাশ—
 কোথা বা সে ইজ্রায়ল কোথা সে কৈলাস ?

কত যত্নে কত যুগে বনবাসে কষ্ট ভুগে,
 কালজয়ী হলো ব'লে করিত বিশ্বাস—
 হায় রে সে ঋষিদের কোথা অভিলাষ ?
 সে শাজ্ঞ সে দরশন, সে বেদ কোথা এখন ?
 পড়ে আছে ইন্দ্রালয় ভাবিয়া হতাশ—
 কোথা বা সে হিমালয় কোথা সে কৈলাস ?

(৯)

নিয়তির গতিরোধ হবে না কি আর ?
 উঠিবে না কেহ কি রে উজলি আবার ?
 মিসর পারস্য ভাতি গিরীক রোমীয় জাতি
 ভারত থাকিবে কি রে চির-অন্ধকার ?
 জাপান জিলঙে নিশি পোহাবে এবার ?
 বহু আশা পরিশ্রমে, খণ্ডিয়া নিয়তি ক্রমে,
 উঠিয়া প্রবল হ'তে পাবে না কি আর,
 অই মৃণালের মত সহিবে প্রহার ?
 না জানি কি আছে ভালে তাই গো মা এ কাকালে
 মিশাইছে অশ্রুধারা ভস্মেতে তোমার,
 ভারত কিরণময় হবে কি আবার ?

(১০)

তোর তরে কাঁদি আয় ফরাসি-জননি,
 কোমল-কুসুম-আভা প্রহুন্ন-বদনৌ ।
 এত দিনে বুঝি সতি, ফিরিল কালের গতি,
 হলে বুঝি দশাহীন ভারত যেমনি !
 সভ্যজাতি মাঝে তুমি সভ্যতার খনি ।

হলো যবে মহীতলে রোম দখল কালানলে,
 তুমিই উজ্জল ক'রে আছিলে ধরণী,
 বীরমাতা প্রভাময়ী সূচিরযৌবনী ।

ঐশ্বর্যভাণ্ডার ছিলে কতই যে প্রসবিলে
 শিল্প নীতি নৃত্যগীত চকিত অবনী—
 তোর তরে কাঁদি আয় ফরাসি-জননি !
 বৃষ্টি বা পড়িলে এবে কালের হিল্লোলে;
 পদ্মের মৃণাল যথা তরঙ্গের কোলে ।

হেমচন্দ্র বন্দ্যোপাধ্যায় ।

ভারতসঙ্গীত *

“আর ঘুমাইও না দেখ চক্ষু মেলি
 দেখ দেখ চেয়ে অবনীমণ্ডলী,
 কিবা স্নসজ্জিত কিবা কুতূহলী,
 বিবিধ-মানব-জাতিরে লয়ে ।
 মনের উল্লাসে, প্রবল আশ্বাসে,
 প্রচণ্ড বেগেতে, গভীর বিশ্বাসে,
 বিজয়ী পতাকা উড়ায়ে আকাশে,
 দেখ হে ধাইছে অকুতোভয়ে ।

কোথা আমেরিকা নব অভ্যুদয়,
 পৃথিবী গ্রাসিতে করিছে আশয়,
 হয়েছে অধৈর্য্য নিজ বীৰ্য্যবলে,

* ভারতবর্ষে যখন মোগল বাদসাহদিগের অত্যন্ত প্রাচুর্য্য এবং মোগল সৈন্যগণ ক্রমে ক্রমে ভারতভূমি আচ্ছন্ন করিয়া মহারাষ্ট্র অঞ্চল আক্রমণ করে, তখন মাধবাচার্য্য নামে একজন মহারষ্ট্রীয় ব্রাহ্মণ স্বদেশের স্বাধীনতা একান্ত দুঃখিত হইয়া স্বদেশের স্বাধীনতা রক্ষার নিমিত্ত নগরে নগরে এবং পর্ব্বতে পর্ব্বতে ভ্রমণ করিয়া বীরত্ব এবং উৎসাহ-প্রবর্তক গান করিয়া বেড়াইতেন। শিবাজীর সময় হইতে তাঁহার প্রণীত সঙ্গীত মহারষ্ট্রীয়দিগের মধ্যে সর্ব্বত্র প্রচলিত এবং অত্যন্ত আদরলীয় হয়। মাধবাচার্য্যের মৃত্যুর পর অন্তান্ত গায়কেরা দেশে দেশে সেই গান করিয়া বেড়াইতেন। এই প্রবাদ অবলম্বন করিয়া ভারত-সঙ্গীত লিখিত হইয়াছে।

ছাড়ে হুহুকার, ভূমণ্ডল টলে,
যেন বা টানিয়া হিঁড়িয়া ভূতলে,
নতন করিয়া গড়িতে চায় ।

মধ্যস্থলে হেথা আজন্মপূজিতা
চির-বীৰ্য্যবতী বীর-প্রসবিতা,
অনন্তরে বিনা যুনানী-মণ্ডলী,
মহিমা-ছটাতে জগৎ উজলি
কোতুকে তাসিয়া চলিয়া যায় ।

আরব্য, মিশর, পারস্ত, তুরকী,
তাতার, তিব্বত—অন্ত কব কি ?
চীন, ব্রহ্মদেশ, নবীন জাপান,
তারাও স্বাধীন তারাও প্রধান,
দাসত্ব করিতে করে হেয়জ্ঞান,
ভারত শুধুই সূমায়ে রয় !

বাজ্ রে শিক্ষা বাজ্ এই রবে,
সবাই স্বাধীন এ বিপুল ভবে,
সবাই জাগ্রত মানের গৌরবে,
ভারত শুধুই সূমায়ে রয় ।*

কথা বলি মুখে শিক্ষা তুলি,
পথের পাড়ায় গায়ে নামাবলী,
নয়ন-জ্যোতিতে হানিয়ে বিজলী,
গায়িতে লাগিল জনেক বুবা ।

আয়তলোচন উন্নতলগাট,
 অগোরাঙ্গ তনু সন্ন্যাসীর ঠাট,
 শিখরে দাঁড়িয়ে গায়ে নামাবলী,
 নয়নজ্যোতিতে হানিল বিজলী,
 বদনে ভাতিল অতুল আভা।

নিনাদিল শৃঙ্গ করিয়া উচ্ছ্বাস,
 “বিংশতি কোটী মানবের বাস,
 এ ভারতভূমি যবনের দাস ?
 রয়েছে পড়িয়া শৃঙ্খলে বাধা ।

আর্য্যাবর্তজয়ী পুরুষ যাহারা
 সেই বংশোদ্ভব জাতি কি ইহারা
 জন কত গুণু গ্রহরী পাহারা
 দেখিয়া নয়নে লেগেছে ধাঁধা

ধিক হিন্দুকুলে ! বীরধর্ম্ভ ভুলে
 আত্ম-অভিমান ডুবায়ে সলিলে
 দিয়াছে সঁপিয়া শত্রু-করতলে
 সোনার ভারত করিতে ছার ।

হীনবীৰ্য্য সম হয়ে কৃতাজলি
 মস্তকে ধরিতে বৈরি-পদধূলি,
 ছাদে দেখ ধায় মহাকুতূহলী
 ভারতনিবাসী বত কুলাঙ্গার ?

এসেছিল যবে আখ্যাবর্তভূমে
 দিক্ অঙ্ককার করি তেজোধূমে,
 রণ-রঙ্গ-মত্ত পূর্ব-পিতৃগণ,
 যখন তাহারা করেছিল রণ,
 করেছিল জয় পঞ্চনদগণ,
 তখন তাহারা ক'জন ছিল ?

আবার যখন জাহ্নবীর কূলে,
 এসেছিল তারা জয়ডঙ্কা তুলে
 যমুনা, কাবেরী, নর্মদা পুলিনে,
 দ্রাবিড়, তৈলঙ্গ, দাক্ষিণাত্য বনে,
 অসংখ্য বিপক্ষ পরাজয়ি রণে,
 তখন তাহারা ক'জন ছিল ?

এখন তোরা যে শত কোটি তার,
 স্বদেশ উদ্ধার করা কোন্ ছার,
 পারিস্ শাসিতে হাসিতে হাসিতে,
 জুমেৰু অবধি কুমেৰু হইতে,
 বিজয়া পতাকা ধরায় তুলিতে,
 বারেক জাগিয়া করিলে পণ ।

তবে ভিন্নজাতি শত্রুপদতলে,
 কেন রে পড়িয়া থাকিস্ সকলে ?
 কেন না ছিঁড়িয়া বন্ধন-শৃঙ্খলে,
 স্বাধীন হতে করিস্ না মন ?

অই দেখ সেই মাথার উপরে,
 রবি, শশী, তারা, দিন দিন ষোরে,
 ঘুরিত যেক্রপে দিক্ শোভা করে
 ভারত যখন স্বাধীন ছিল ।

সেই আৰ্ধ্যাবর্ত এখন(ও) বিস্তুত,
 সেই বিক্ষাগিরি এখন(ও) উন্নত,
 সেই ভাগীরথী এখন(ও) ধাবিত,
 পুরাকালে তারা যেক্রপ ছিল ।

কোথা সে উজ্জল হতাশন সম
 হিন্দু-বীরদর্প বুদ্ধি পরাক্রম ;
 কাঁপিত যাহাতে স্থাবর জঙ্গম,
 গান্ধার অবধি জলধি-সীমা ?
 সকলি ত আছে সে সাহস কই ?
 সে গম্ভীর জ্ঞান নিপুণতা কই ?
 প্রবল তরঙ্গ সে উন্নতি কই ?
 কোথা রে আজি সে জাতি-মহিমা !

হয়েছে শ্মশান এ ভারতভূমি,
 কারে উঁচৈঃস্বরে ডাকিতেছি আমি ?
 গোলামের জাতি শিখেছে গোলামি !—
 আর কি ভারত সজীব আছে ?
 সজীব থাকিলে এখনি উঠিত,
 বীরপদভরে মেদিনী হুলিত,

ভারতের নিশি প্রভাত হইত,
হায় রে সে দিন শুচিয়া গেছে।”

এই কথা বলি অশ্রুবিম্ব ফেলি,
ক্লমমাত্র যুবা শৃঙ্গনাদ তুলি,
পুনর্ব্বার শৃঙ্গ মুখে নিল তুলি,
গর্জিয়া উঠিল গম্ভীর স্বরে,
“এখন(ও) জাগিয়া উঠ রে সবে,
এখন(ও) সৌভাগ্য উদয় হবে,
রবি-কর-সম দ্বিগুণ প্রভাবে,
ভারতের মুখ উজ্জ্বল ক’রে।

একবার শুধু জাতিভেদ ভুলে,
ক্লত্রিয়, ব্রাহ্মণ, বৈশ্য, শূদ্র মিলে
কর দৃঢ় পণ এ মহীমণ্ডলে
তুলিতে আপন মহিমা-ধ্বজা।

জপ তপ আর যোগ আরাধনা,
পূজা, হোম, যাগ, প্রতিমা-অর্চনা
এ সকলে এবে কিছুই হবে না,
তুণীর-কুপাণে কর রে পূজা।

ষাও সিদ্ধনীরে ভূধর-শিখরে
গগনের গ্রহ তন্ন তন্ন ক’রে,
বায়ু উদ্ধাপাত বজ্রশিখা ধ’রে
স্বকার্য্য-সাধনে প্রবৃত্ত হও।

তবে সে পারিবে বিপক্ষ নাশিতে
 প্রতিদ্বন্দ্বী সহ সমকক্ষ হতে,
 স্বাধীনতারূপ রতনে মণ্ডিতে,
 যে শিরে এক্ষণে পাছকা বণ্ড ।

ছিল বটে আগে তপস্তার বলে,
 কার্যাসিদ্ধি হ'ত এ মহীমণ্ডলে,
 আপনি আসিয়া ভক্ত-রণস্থলে
 সংগ্রাম করিত অমরগণ ।
 এখন সে দিন নাহিক রে আর,
 দেব-আরাধনে ভারত-উদ্ধার
 হবে না—হবে না—খোল তরবার,
 এ সব দৈত্য নহে তেমন ।

অস্ত্র-পরাক্রমে হও বিশারদ
 রণ-রঙ্গ-রসে হও রে উন্মাদ—
 তবে সে বাঁচিবে ঘুচিবে বিপদ
 জগতে যত্বপি থাকিতে চাও ।
 কিসের লাগিয়া হলি দিশেহারা,
 সেই হিন্দুজাতি সেই বহুজ্ঞানী,
 জ্ঞানবুদ্ধিজ্যোতিঃ তেমতি প্রথরা,
 তবে কেন ভ্রমে পড়ে নুটাও ।

অই দেখ সেই মাথার উপরে,
 রবি, শশী, তারা, দিন দিন ষোরে,

ঘুরিত ঘেরাপে দিক্ শোভা করে,
ভারত যখন স্বাধীন ছিল।
সেই আৰ্য্যাবর্ত এখন (ও) রিহত,
সেই বিদ্যাচল এখন (ও) উন্নত,
সেই জাহ্নবী-বারি এখন (ও) ধাবিত,
কেন সে মহত্ত্ব হবে না উজ্জল ?

বাজ্ রেঁ শিক্কা বাজ্ এই রবে,
শুনিয়া ভারতে জাগুক সবে,
সবাই স্বাধীন এ বিপুল ভবে,
সবাই জাগ্রত মানের গৌরবে,
ভারত শুধু কি ঘুমায়ে রবে ?
হেমচন্দ্র বন্দ্যোপাধ্যায়।

সিন্ধুতট

নির্মল আনন্দরাশি, নির্মল আনন্দ হাসি,
প্রভাসের মহাসিন্ধু ! আনন্দ নির্মল,—
জলরাশি ; হাসি,—লীলা তরঙ্গ চঞ্চল ;
অপরাক্ত,—বসন্তের গুরু চতুর্দলী।

আনন্দ রবির কর, আনন্দ সুনীলাশ্বর,
 প্রকৃতি আনন্দময়ী ষোড়শী রূপসী ।
 আনন্দের সচঞ্চল লীলা রত্নাকর !
 আনন্দের অচঞ্চল লীলা নীলাশ্বর ।
 নীলিমায় নীলিমায়, মহিমায় মহিমায়,
 মিশাইয়া পরস্পরে—মহা আলিঙ্গন !
 মহাদৃশ্য !—অনন্তের অনন্ত মিলন !
 নীলসিন্ধু, ষ্বেতবেলা ; বেলায় তরঙ্গ-খেলা
 দিতেছে বেলায় সিন্ধু ষ্বেতপুষ্পহার,
 গাহিয়া আনন্দগীত, চুষ্টি অনিবার ।
 সিন্ধু-বক্ষে বেলা, যেন বিষ্ণু-বক্ষে বাণী,
 সাক্ষ্য রবিকরে হাসে বেলা সিন্ধুরাণী ।
 বিচিত্র শিবিরশ্রেণী, শত সংখ্যাতীত,
 বিচিত্র কেতন শিরে, শোভিতেছে সিন্ধুতীরে,
 সিন্ধু মত সিন্ধুপ্রিয়া করি তরঙ্গিত ।
 আসিছে যাদবগণ—আসিয়াছে কত,—
 গজপৃষ্ঠে, অশ্বে, রথে, নানা দিকে, নানা পথে,
 কল্লোলিত সিন্ধুপ্রিয়া করি সিন্ধু মত ।
 কিছু দূর মনোহর বঙ্কিম বেলায়,
 নীল গগনের পটে অমল বিভায়,
 কুণ্ডলের শিবিরশ্রেণী তুলি উর্দ্ধে শির
 শোভিতেছে যেন দেব পবিত্র মন্দির ।
 শিবির-চূড়ায় স্বর্ণ-ধ্বজে নিরুপম,
 নীল কেতনের বক্ষে, পীত সূদর্শন,

কি লীলা সমুদ্রতীরে, সমুদ্র-অনিলে ধীরে,
করিছে মহিমময় ! সিদ্ধু অবিরাম
অসংখ্য তরঙ্গ-করে করিছে প্রণাম ।

নবীনচন্দ্র সেন ।

মহম্মদ ঘোরীর মন্ত্রণা-সভা

সম্বোধিয়া দূতগণে জিজ্ঞাসিলা ঘোরী,
মধুর গম্ভীর ভাষে,—

“হিন্দুস্থান মাঝে
ছিলে সবে, এতদিন ; কি দেখিলে সেথা ?
কেমন সে দেশ বল ; সম্পদ, বিভব,
লোকের প্রকৃতি, ধর্ম, যা’ কিছু দেখেছ,
বল বিস্তারিয়া সবে ; অগ্রে বল, আলি !”

সম্মুখে নোয়ায়ে শির, ভূমি স্পর্শ করি’,
আরম্ভিলা আলি :—

“কি কহিব, জাঁহাপনা !
অদ্ভুত, অপূর্ণ দেশ । বিশ্বশ্রষ্টা যেন
সৌন্দর্য্যে, মাধুর্য্যে তা’রে নিরুপম করি’
গড়েছেন ধরাধামে । সুনীল আকাশ,
সমুজ্জল, দিবাভাগে, তপন-কিরণে ;
জ্যোতির্ময়, নিশাকালে, নক্ষত্রনিকরে ;

দীপ্তিমান্ চন্দ্রালোকে । তুবার-ঝটিকা
না জানে সে দেশে কেহ । মধুর পবন
বহে সেথা সংবৎসর ; স্রোতস্বতী যত
অমৃত-সলিলে পূর্ণ । তরুলতাগণ
ফলে ফুলে শোভাময় । নাহি জানি নাম,
আস্বাদে, সৌরভে কিন্তু চিত্ত বিমোহিত ।
বিশাল সে দেশ ; কোথা গিরি সুমহান,
গগনে তুলিয়া শির, আছে বিরাজিত ;
কোথা বনভূমি, পূর্ণ ভীষণ স্বাপদে ;
কোথা রম্য উপবন, পুষ্পে সুশোভিত,
মুখরিত বিহগের মধুর সঙ্গীতে ।
যোজন-যোজন-ব্যাপী ক্ষেত্র স্নিগ্ধ-শ্রাম
শোভে কোথা ; কোথা নদী বহে কল কলে ;
ধনি-গর্ভে জন্মে মণি ; সাগরে মুকুতা ;
নারী সোথা নিরুপমা । সমৃদ্ধা নগরী ;
ফলে, শস্ত্রে পূর্ণ পল্লী । কি ক'ব অধিক,
স্বর্গ স্বর্গ বলে লোক, স্বর্গ হিন্দুস্থান ।”

হাসিয়া কহিলা ঘোরী ?—

“হেন স্বর্গ, হতে

কেন, তবে, এলে ফিরি’ ?”

উত্তরিলা দূত,—

“আসিলাম, জাঁহাপনা ! পথ দেখাইতে,
সঙ্গে পুনঃ যাব বলে ।”

কহিলেন ঘোরী,—

“কহ, দূত ! কহ শুনি, কোন্ কোন্ স্থান
দেখিয়া এসেছ তুমি ।”

নিবেদিল দূত,—

“এসেছি হেরিয়া, প্রভো ! যমুনার তীরে
প্রাচীন নগরী দিল্লী, পূর্ণ ধনে, জনে ;
জয়ন্তস্তে, দেবালয়ে, সুরম্য প্রাসাদে
অহুপম ধরা-মাঝে । দেখেছি কনোজ,
অবস্থিত গঙ্গাতটে ; নানা দেশজাত
পণ্য-দ্রব্যে পরিপূর্ণ । দেখেছি আজমীর,
মরুসিদ্ধ-বক্ষে রম্য, শ্রাম দ্বীপ সম
শোভাময় । হেরিয়াছি মথুরা নগরী,
বারাণসী, পুণ্যতীর্থ উভয় হিন্দুর ;
আর(ও) কত শত স্থান । হিন্দুস্থানে গিয়া
এসেছি যা’ নিরখিয়া বর্গিবান্ নয় ।”

“কি তুমি দেখেছ, এবে, বলহ, হানিক ।”
সম্বোধি দ্বিতীয় দূতে কহিলেন ঘোরী,—
“কোন্ বেশে ছিলে সেথা ?”

উত্তরিল দূত,—

“মৌলী সন্ন্যাসীর বেশে । করেছি ভ্রমণ
তীর্থে তীর্থে, গ্রামে গ্রামে, নগরে প্রান্তরে ;
দেখিয়াছি রাজা, প্রজা, ব্রাহ্মণ, ভ্রমণ ।
পশি’ কভু যজ্ঞশালা, কভু দেবালয়ে,
হেরিয়াছি ধর্ম, কর্ম, আচার হিন্দুর ;
শুনিয়াছি শাস্ত্রপাঠ, হ্রীং, ক্লীং, ওঁ ।

কিন্তু, জাঁহাপনা ! আমি না পারি বুঝিতে
 কেন বিশ্বস্ততা, হেন মনোহর দেশে,
 এ হেন অধম জাতি করিলা সৃজন,
 ধর্মহীন, জ্ঞানহীন ! এক, অধিতীয়
 ভুলি' পরমেশে আছে মূর্তি-পূজা লয়ে ।
 অদ্ভুত তা'দের ধর্ম ; কেহ পূজে শিলা,
 কেহ নদী, কেহ তরু । কেহ আঁখি মুদি'
 করে মহাশূন্য ধ্যান । বিচিত্র তা'দের
 মনোভাব, পূজারীতি । কহে কোন জন,
 'অহিংসা পরমো ধর্মঃ ;' আবার কেহ বা
 নৃত্য করে নরবলি করিয়া প্রদান ।
 কেহ শাক্ত, কেহ শৈব, বৈষ্ণব কেহ বা ;
 কেহ পূজে বুদ্ধে, কেহ পূজে জিনদেবে ।
 নাহি হিতাহিত-জ্ঞান ; মুক্তি লাভ তরে
 কেহ ডুবে নদীজলে ; গিরিশঙ্ক হ'তে
 পড়ে কেহ লক্ষ দিয়া ; রথচক্রতলে
 হয় কেহ নিষ্পেষিত ; বক্ষে বিঁধে শূল ;
 বিদারে রসনা বাণে । নিশ্চয় নিষ্ঠুর ;
 পুত্রে দেয় ভাসাইয়া সাগরের জলে ;
 দণ্ড করে, অবিভেদে, মাতায়, স্ত্রীতায়,
 বাঁধি' চিতা কাঠে, তা'র মৃত পতি সনে ;
 বাজায় দামামা, যদি করে আর্তনাদ ।
 বলে সবে হিন্দু মোরা, কিন্তু পরস্পর
 জাতিধর্মঘেঁষে, নিত্য, রত বিসংবাদে ;

নাহি সখা, নাহি প্রেম । উচ্চবর্ণ, যদি
চামার, চণ্ডাল আদি হীনজাতি নরে
স্পর্শে কভু, স্নান করি' গুচি হয় তবে ।
নহে বুদ্ধিহীন তা'রা, তর্কে স্নানিপুণ ;।
রচিয়াছে বহু গ্রন্থ । কিন্তু নাহি জানি,
কেন হেন মতিভ্রান্ত ! ব্যথিত অন্তর,
হিন্দুর হৃদয় হেরি' । সুলতান মামুদ,
ভাজি' দেবালয়, অর্থ করিয়া হরণ,
দণ্ডিলা বিধর্মীগণে । কিন্তু, জাঁহাপনা !
ফলে নাহি ফল তাহে । থামিলে ঝটিকা
দাঁড়ায় যেমন তরু, পুনঃ, তুলি' শির,
তেমনি উঠেছে হিন্দু । তীব্র শাস্তি বিনা
না করিবে জ্ঞানলাভ । মসলিম-সমাজে
ধার্মিকের বন্ধু এক জাঁহাপনা বিনা
এ অধর্ম, অনাচার করিতে উচ্ছেদ
না আছে অপর কেহ । কালক্ষেপ আর
না হয় উচিত, প্রভো ! সঙ্কটে, বিপদে,
মসলিমের বল যিনি, মহান্ জৈশ্বর,
হ'বেন সহায় তিনি ।”

নীরবিলা দূত ।

ঘোরীর ললাট দেশ হইল কুণ্ঠিত । •
তাজি' মালা জপ, ফিরি', কুতবের পানে
চাহিলেন মৈয়ুদ্দিন । কহিলেন ঘোরী,—
“কি তুমি দেখেছ সেখা, বল, জাঁহান্নর !”

কহিলা তৃতীয় দূত,—

“সত্য, জাঁহাপনা !

হিন্দুস্থানসম দেশ নাহি এ ধরায় !
 কিন্তু যে ফণীর শিরে থাকে মহামণি
 দস্ত তা’র বিষে ভরা । নিরখি’ তা’দের
 বলবীৰ্য্য, বুঝিয়াছি বীর হিন্দুজাতি ;
 দুর্দর্শ সমরক্ষেত্রে । বুঝিয়াছি আর(ও)
 ধর্মপ্রাণ হিন্দু ; হ’ক ধর্ম তাহাদের
 ভ্রমাত্মক, তবু প্রাণ দিবে তা’র তরে
 প্রজা সেখা রাজ-ভক্ত ; রাজার আদেশে
 অনলে, গরলে, জলে না ডরে মরিতে ।
 আছে জাতিভেদ সত্য, কিন্তু হিন্দু নামে
 এক স্ত্রে বঁধা সবে । না বুঝি’, না ভাবি’
 হিন্দুস্থান-আক্রমণ উপযুক্ত নয় ।
 দেখিয়াছি হিন্দুস্থানে আছে তরু এক,
 বট নামে ; মহাবাহু করিয়া বিস্তার,
 আবরিয়া রাখে গ্রাম ; শাখা হ’তে তা’র
 স্তম্ভ স্তম্ভসম মূল, পরশিয়া ভূমি,
 ক্রমে হয় মহাতরু ; আকর্ষিয়া রস,
 রহে সঞ্জীবিত, মূল বৃক্ষ ধ্বংস হ’লে ।
 তেমতি এ হিন্দুজাতি ধরে, জাঁহাপনা !
 অপূর্ব জীবনী শক্তি ; হ’ক মূলচ্ছেদ
 উৎপাটন, শাখা তবু রহিবে বাঁচিয়া ।
 কি কাজ বিবাদে তবে হেন শত্রুসহ ?

কি ফল প্রতিমাভঙ্গে, লুণ্ঠনে, পীড়নে ?”

“ওন, দূত !”

জাঁহান্নরে কহিলেন ঘোরী,—

“লভিয়াছ অভিজ্ঞতা, রহি’ হিন্দুস্থানে ;

পার কি বলিতে তুমি সমর-কৌশল

কিরূপ হিন্দুর ? অশ্ব, গজ, পদাতিক

শিক্ষিত কেমন ? অসি, শূল, ধনুর্কাণ—

কোন্ অঙ্গে পটু তা’রা ?”

উত্তরিল দূত,—

“নহি যোদ্ধা আমি, প্রভো ! বর্ণিব তথাপি

দেখিয়াছি যাহা ; হিন্দু বলী গজবলে ।

সচল পর্বত সম গজযুথ যবে

হয় যুদ্ধে অগ্রসর, নাহি শক্তি কা’র(ও)

রোধিতে তা’দের বেগ ; প্রতিদ্বন্দী সেনা

চূর্ণ হয় দণ্ডমাত্রে । দেখিয়াছি আর(ও)!

শরক্ষেপে অদ্বিতীয় হিন্দু পদাতিক,

অব্যর্থ সন্ধানী সবে । বিশ্বাস আমার

না পারিবে মুসলমান আঁটিতে হিন্দুরে

গজে, পদাতিক সৈন্তে । দ্বিতীয় রস্তম

জাঁহাপনা ! করুন তা’ উচিত যা’ হয় ।”

ইঙ্গিতে বিদায় করি’ রাজদূতগণে

কহিলেন তবে ঘোরী,—

“ওনিলে ত সবে,

যা কহিলা দূতগণ ? কিবা যুক্তি বল ।”

কহিলা কুতব,—

“বীরভোগ্যা বসুন্ধরা

চিরদিন ঘোষে লোক ।

এ সৌন্দর্য্য-ভোগ যদি, পুরুষ হইয়া,

না করিহু, বৃথা জন্ম অবনীমণ্ডলে ।”

শ্রীযোগীন্দ্রনাথ বসু ।

অহল্যার প্রতি

কি স্বপ্নে কাটালে তুমি দীর্ঘ দিবানিশি,
অহল্যা, পাষণরূপে ধরাতলে মিশি’,
নির্ঝাপিত-হোম-অগ্নি তাপস-বিহীন
শূন্য তপোবনচ্ছায়ে ? আছিলে বিলীন
বৃহৎ পৃথ্বীর সাথে হয়ে এক-দেহ,
তখন কি জেনেছিলে তা’র মহাস্নেহ ?
ছিল কি পাষণ-তলে অস্পষ্ট চেতনা ?
জীবধাত্রী জননীর বিপুল বেদনা,
মাতৃধৈর্য্যে মোন মুক হুঃখ স্নখ যত
অনুভব করেছিলে স্বপনের মত
সুপ্ত আত্মা মাঝে ? দিবারাত্রি অহরহ
লক্ষ কোটী পরাণীর মিলন, কলহ,

আনন্দ-বিবাদ-ক্ষুব্ধ ক্রন্দন, গর্জ্জন,
 অব্যুত পাঙ্কের পদধ্বনি অক্ষুণ্ণ
 পশিত কি অভিষাপ-নিদ্রা ভেদ ক'রে
 কর্ণে তোর, জাগাইয়া রাখিত কি তোরে
 নেত্রহীন মূঢ় রূঢ় অন্ধ জাগরণে ?
 বুঝিতে কি পেরেছিলে আপনার মনে
 নিত্য নিদ্রাহীন ব্যথা মহা জননীর ?
 যে দিন বহিত নব বসন্ত-সমীর,
 ধরণীর সর্বাস্থের পুলক-প্রবাহ
 স্পর্শ কি করিত তোরে ? জীবন-উৎসাহ
 জাগা'ত কি অপরূপ কম্প তব দেহে ?
 যামিনী পশিত যবে মানবের ঘেহে,
 ধরণী লহিত টানি' শ্রান্ত তনুগুলি
 আপনার বক্ষপরে, হুঃখ শ্রম ভুলি'
 ঘুমাত অসংখ্য জীব—জাগিত আকাশ—
 তাদের শিথিল অঙ্গ, স্তম্ভগুণ নিশ্বাস
 বিভোর করিয়া দিত ধরণীর বুক,
 মাতৃ-অঙ্গে সেই কোটা জীবস্পর্শ সুখ—
 কিছু তা'র পেয়েছিলে আপনার মাঝে ?
 যে গোপন অন্তঃপুরে জননী বিরাজে,—
 বিচিত্রিত যবনিকা পত্রপুষ্পজালে
 বিবিধ বর্ণের লেখা, তা'রি অন্তরালে
 রহিয়া অস্বপ্নাম্পাশ, নিত্য চুপে চুপে
 ভরিছে সম্ভ্রান্ত গৃহ ধনধান্যরূপে

জীবনে যৌবনে,—সেই গূঢ় মাতৃকক্ষে
 স্তম্ভ ছিলে এত কাল ধরণীর বক্ষে,
 চিররাত্রিসুশীতল বিস্থিতি-আগ্নেয় ;
 যেথায় অনন্তকাল ঘুমায় নির্ভয়ে
 লক্ষ জীবনের ক্লাস্তি ধূলির শয়্যায় ;
 নিমেষে নিমেষে যেথা ঝরে' পড়ে যায়
 দিবসের তাপে শুষ্ক ফুল, দগ্ধ তারা,
 জীর্ণ কীর্তি, শান্ত সুখ, দুঃখ দাহহারা ।
 সেথা স্নিগ্ধ হস্ত দিয়ে পাপতাপরেখা
 মুছিয়া দিয়াছে মাতা ; দিলে আজি দেখা
 ধরিত্রীর সজ্জাজাত কুমারীর মত
 সুন্দর সরল শুভ্র ; হ'য়ে বাক্যহত
 চেয়ে আছ প্রভাতের জগতের পানে ;
 যে শিশির পড়ে ছিল তোমার পাশে
 রাত্রিবেলা, এখন সে কাঁপিছে উল্লাসে
 আজানুচুষিত মুক্ত কৃষ্ণ কেশপাশে ।
 যে শৈবাল রেখেছিল ঢাকিয়া তোমায়
 ধরণীর শ্রাম শোভা অঞ্চলের প্রায়
 বহু বর্ষ-হ'তে—পেয়ে বহু বর্ষাধারা
 সতেজ, সরস, ঘন—এখনো তাহারা
 লগ্ন হয়ে আছে তব নগ্ন গৌর দেহে
 মাতৃদত্ত বস্ত্রখানি সুকোমল স্নেহে ।

শ্রীরবীন্দ্রনাথ ঠাকুর ।

হিমালয়

হে নিমন্তক গিরিরাজ, অত্রভেদী তোমার সঙ্গীত
 তরঙ্গিয়া চলিয়াছে অমুদাত্ত উদাত্ত স্বরিত
 প্রভাতের দ্বার হ'তে সন্ধ্যার পশ্চিম নীড়পানে
 দুর্গম দুর্গহ পথে কি জানি কি বাণীর সন্ধানে !
 হঃসাধ্য উচ্ছ্বাস তব শেষপ্রান্তে উঠি আপনার
 সহসা মুহূর্ত্তে যেন হারায় ফেলেছে কণ্ঠ তার
 ভুলিয়া গিয়াছে সব সুর,—সামগীত, শব্দহারা
 নিয়ত চাহিয়া শূন্যে বরষিছে নিঃস্রিণী ধারা !
 হে গিরি, যৌবন তব যে হৃদম অগ্নিতাপবেগে
 আপনারে উৎসারিয়া মরিতে চাহিয়াছিল মেঘে—
 সে তাপ হারায় গেছে, সে প্রচণ্ড গতি অবসান,
 নিরুদ্ধেশ চেষ্টা তব হয়ে গেছে প্রাচীন পাষণ !
 পেয়েছ আপন সীমা, তাই আজি মোন শাস্ত হিয়া
 সীমাবিহীনের মাঝে আপনারে দিয়েছ সঁপিয়া !

শ্রীরবীন্দ্রনাথ ঠাকুর

শেষ খেয়া

দিনের শেষে ঘুমের দেশে ঘোমটা-পর্য ঐ ছায়া
 ভুলাল রে ভুলাল মোর প্রাণ ।
 ও পারেতে সোনার কূলে আঁধার মূলে কোন্ মায়া
 গেয়ে গেল কাজ-ভাঙানো গান ।
 নামিয়ে মুখ চুকিয়ে স্নুখ যাবার মুখে যায় যারা
 ফেরার পথে ফিরেও নাহি চায়,
 তাদের পানে ভাঁটার টানে যাব রে আজ ঘর-ছাড়া,
 সন্ধ্যা আসে দিন যে চলে যায় ।
 ওরে আয় !
 আমায় নিয়ে যাবি কেরে
 দিন-শেষের শেষ খেয়ায় !

সাঁজের বেলা ভাঁটার স্রোতে ও পার হ'তে এক-টানা
 একটি ছুটি যায় যে তরী ভেসে ।
 কেমন ক'রে চিন্বে ওরে ওদের মাঝে কোন্‌খানা
 আমার ঘাটে ছিল আমার দেশে ।
 অস্তাচলে তীরের তলে ঘন গাছের কোল ঘেঁসে
 ছায়ায় যেন ছায়ার মত যায়,
 ডাকলে আমি ক্ষণেক থামি হেথায় পাড়ি ধরবে সে
 এমন নেয়ে আছে রে কোন্‌ লায় ?

ওরে আয় !

আমায় নিয়ে যাবি কেরে

দিন-শেষের শেষ খেয়ায় !

ঘরেই যারা যাবার তারা কখন্ গেছে ঘরপানে

পারে যারা যাবার গেছে পারে ;

ঘরেও নহে পারেও নহে যে জন আছে মাঝখানে

সন্ধ্যাবেলা কে ডেকে নেয় তারে !

ফুলের বার নাইক আর ফসল যার ফল্ না,

চোখের জল ফেলতে হাসি পায়,

দিনের আলো যার ফুরালো সাজের আলো জ্বল ৷

সেই বসেছে ঘাটের কিনারায় ।

ওরে আয় !

আমায় নিয়ে যাবি কেরে

বেলা-শেষের শেষ খেয়ায় !

শ্রীরবীন্দ্রনাথ ঠাকুর ।

বৈরাগ্য

কহিল গভীর রাত্রে সংসারে বিরাগী—
 “গৃহ তেয়াগিব আজি ইষ্টদেব লাগি” ।
 কে আমারে ভুলাইয়া রেখেছে এখানে !”
 দেবতা কহিলা “আমি !”—শুনিল না কানে !
 স্মৃতিমগ্ন শিশুটিরে আঁকড়িয়া বুকে
 প্রেয়সী শয্যার প্রান্তে ঘুমাইছে স্নেহে ।
 কহিল—“কে তোরা ওরে মায়ার ছলনা !”
 দেবতা কহিলা “আমি !” কেহ শুনিল না !
 ডাকিল শয়ন ছাড়ি’—“তুমি কোথা প্রভু !”—
 দেবতা কহিলা—“হেথা !”—শুনিল না তবু !
 স্বপনে কাঁদিল শিশু জননীরে টানি’,—
 দেবতা কহিলা “ফির !”—শুনিল না বানী !
 দেবতা নিশ্বাস ছাড়ি’ কহিলেন—“হায়,
 আমারে ছাড়িয়া ভক্ত চলিল কোথায় !”

শ্রীরবীন্দ্রনাথ ঠাকুর ।

ভারতলক্ষ্মী

অগ্নি ভুবনমনমোহিনী !
অগ্নি নিশ্চল সূর্য্যকরোজ্জ্বল ধরণী
জনক-জননী-জননী !

নীল-সিন্ধু-জল-ধৌত চরণতল,
অনীল-বিকম্পিত শ্রামল অঞ্চল,
অম্বর-চুষ্টিত ভাল হিমাচল,
শুভ্র-তুষার-কিরীটিনী !

প্রথম প্রভাত উদয় তব গগনে,
প্রথম সামরব তব তপোবনে,
প্রথম প্রচারিত তব বনভবনে,
জ্ঞানধর্ম্য কত কাব্যকাহিনী !

চিরকল্যাণময়ী তুমি ধন্ত,
দেশ বিদেশে বিতরিছ অন্ন,
জাহ্নবী যমুনা বিগলিত করুণা
পুণ্যপীযুষ স্তম্ভবাহিনী ।

শ্রীরবীন্দ্রনাথ ঠাকুর ।

সমুদ্রমন্থনে শিব

সুরাসুর যক্ষ রক্ষ ভুজঙ্গ কিন্নর ।
 সবে মথিলেক সিদ্ধ না জানে শঙ্কর ॥
 দেখিয়া নারদ মুনি হইয়া চিস্তিত ।
 কৈলাস-শিখরে গিয়া হৈল উপনীত ॥
 প্রণমিয়া শিবদুর্গা হুঁহার চরণে ।
 আশীর্বাদ করি দেবী দিলেন আসনে ॥
 নারদ বলিলা আছিলাম সুরপুরে ।
 শুনিল মথিলা সিদ্ধ যত সুরাসুরে ॥
 বিষ্ণু পাইলা কমলা কৌস্তুভ মণি আদি ।
 হয় উচ্চৈঃশ্রবা ঐরাবত গজনিধি ॥
 দেবে নানা রত্ন পাইল মেঘে পাইল জল ।
 অমৃত অমরবৃন্দ কল্পতরুবর ॥
 নানা ধাতু মহৌষধি পাইল নরলোকে ।
 এই হেতু হৃদয়ে জন্মিল বহু শোকে ॥
 স্বর্গ মর্ত্য পাতালে নিবসে যতজনে ।
 সবে ভাগ পাইল কেবল তোমা বিনে ॥
 তে কারণে তত্ত্ব লইতে আইলাম হেথা ।
 সভার ঈশ্বর তুমি বিধাতার ধাতা ॥
 তোমারে না দিয়া ভাগ বাঁটি সবে নিল ।
 এই হেতু মোর মন ধৈর্য্য না হইল ॥

এতেক নারদ মুনি বলিলা বচন ।
 শুনিয়া উত্তর না করিল ত্রিলোচন ॥
 দেখি ক্রোধে কম্পিতা কহেন ত্রিলোচনা ।
 নারদেরে কহে দেবী করি অভ্যর্থনা ॥
 কাহারে এতেক বাক্য কহিলে মুনিবর ।
 রক্ষেরে কহিলে যেন না পায় উত্তর ॥
 কঠেতে হাড়ের মালা বিভূষণ যার ।
 কৌস্তভের মণিরত্ন কিবা কাজ তার ॥
 কি কাজ চন্দনে যার বিভূষণ ধূলি ।
 অমৃতে কি কাজ তার ভক্ষ্য সিদ্ধিমূলী ॥
 মাতঙ্গে কি কাজ যার বলদ বাহন ।
 পারিজাতে কিবা কাজ ধুস্তুর ভূষণ ॥
 সকল চিস্তিয়া মোর অঙ্গ জরজর ।
 পূর্বের বৃত্তান্ত সব জান মুনিবর ॥
 জানিয়া ইহায়ে দক্ষ পূজা না করিল ।
 সেই অভিমানে আমি শরীর ত্যজিল ॥
 দেবীর বচনে হাসি বলেন ভগবান্ ।
 যে বলিলা হৈমবতী কিছু নহে আন ॥
 বাহন ভূষণ মোর কোন প্রয়োজন ।
 আমি লই যাছা নাহি লয় অন্তজন ॥
 ভক্তিতে করিয়া বশ মাগি নিল দাস ।
 অগ্নান অশ্বর পটাস্বর দিব্যবাস ॥
 স্বর্ণা করি ব্যাঘ্রচৰ্ম্ম কেহ না লইল ।
 তেঞি মোর বাঘাশ্বর পরিতে হইল ॥

অগুরু চন্দন লইল কুঙ্কুম কস্তুরী ।
 বিভূতি না লয় তেঁই বিভূষণ করি ॥
 মণিরত্ন সতে লইল মুকুতা প্রবাল ।
 কেহ না লইল তেঁই আছে হাড়মাল ॥
 বিষ্ণুপত্র ধুস্তুরা-কুসুম ঘন ঘসি ।
 কেহ না লইল তেঁই অঙ্গেতে বিভূষি ॥
 রথ গজ লইল বাহন পরিচ্ছদ ।
 কেহ না লইল তেঁই আছয়ে বলদ ॥
 কহিলা যে দক্ষ মোরে পূজা না করিল ।
 অজ্ঞান-তিমিরে দক্ষ মোহিত আছিল ॥
 তেঁই মোকে না জানিয়া পূজা না করিল
 তাহার উচিত ফল তৎক্ষণে পাইল ॥
 দেবী বলে দারাপুত্র গৃহী যেইজন ।
 তাহারে না হয় যুক্ত এসব বচন ॥
 বিভব বিভূতি আদি সঞ্চে যতজনে ।
 সংসারে বিমুখ ইথে আছে কোন্ জনে ॥
 সংসারেতে বিমুখ যেজন এ সকলে ।
 কাপুরুষ বলিয়া তাহারে লোকে বলে ॥
 ব্রহ্মা বিষ্ণু ইন্দ্রে তুমি যেমত পূজিত ।
 সাক্ষাতেতে সে সকল হৈতেছে বিদিত ॥
 রত্নাকর মথিয়া লভিল রত্নগণ ।
 কেহ না পুছিল তোমা করিয়া হেলন ॥
 পার্শ্বতীর এই বাক্য শুনিয়া শঙ্কর ।
 ক্রোধেতে অবশ অঙ্গ কাঁপে ধরধর ॥

কাশীরামকহে কাশীপতি ক্রোধমুখে ।

বৃষভ সাজিতে আজ্ঞা করিলা নন্দীকে ॥

পার্বতীর কটুভাষ শুনি ক্রোধে দিখাস
টানিয়া আনিল বাঘবাস ।

বাসুকি নাগের দড়ি কাঁকালি বাঁধিল বেড়ি
তুলিয়া লৈল যুগপাশ ॥

কপালে কলঙ্কি-কলা কণ্ঠেতে হাড়ের মালা
করযুগে কঙ্কুকি কঙ্কণ ।

ভানু বৃহত্তানু শশী ত্রিবিধ প্রকার ভূষি
ক্রোধে যেন প্রলয়-কিরণ ॥

যেন গিরি হেমকুটে আকাশে লহরী উঠে
উথে মধ্যে গঙ্গা জটাজুটে ।

রজত-পর্বত আভা কোটি-চন্দ্র-মুখ-শোভা
ফণি-মণি বিরাজে মুকুটে ॥

গলে দিল হার সাপ টঙ্কারি ফেলিল চাপ
ত্রিশূল জ্রুকুটি লইয়া করে ।

পদভরে ক্ষিতি লড়ে চিৎকার ছাড়িয়া চলে
অতিশয় বেগে ভয়ঙ্করে ॥

ডব্বুরের ডিমি ডিমি আকাশ পাতাল ভূমি
কম্প হইল ত্রৈলোক্য মণ্ডলে ।

অমর ঈশ্বর ভীত আর সভে সচিস্তিত
এ কোন্ প্রলয় হৈল বলে ॥

বৃষভ সাজিয়া বেগে নন্দী আনি দিল আগে
নানা রত্ন করিয়া ভূষণ ।

ক্রোধে কাঁপে ভূতনাথ যেন কদলীর পাত
অতি শীঘ্র কৈলা আরোহণ ॥

আগু-দলে সেনাপতি ময়ূর বাহনে গতি
শক্তি করে করি যড়ানন ।

গণেশ চড়িয়া মুষ করে ধরি পাশাকুশ
দক্ষিণ ভাগেতে ক্রোধ-মন ॥

বামে নন্দী মহাকাল করে শূল গলে মাল
পাছে জুরাসুর ষট্ পদে ।

চলিলা দেবের রাজ দেখিয়া শিবের কাজ
তিন লোকে গণেন প্রমাদে ॥

ক্ষণেকে ক্ষীরোদ-কূলে উত্তরিলা সহ দলে
যথায় মথনে সুরাসুর ।

কাশীরাম দাস কয় শীঘ্রগতি প্রণময়
সর্বদেবে দেখিয়া ঠাকুর ॥

করজোড়ে দাণ্ডাইলা সর্ব দেবগণ ।

শিব বলে মথ সিদ্ধু রহাইলে কেন ॥

ইন্দ্র বলে মথন হৈল দেব শেষ ।

নিবারিয়া আপনে গেলেন হৃষীকেশ ॥

একে ক্রোধে আছিলেন দেব মহেশ্বর ।

দ্বিতীয় ইন্দ্রের বাক্যে কম্পে কলেবর

শিব বলে এত গৰ্ব তোমা সভাকার ।
 আমারে হেলন কর এত অহঙ্কার ॥
 রত্নাকর মথি সভে রত্ন লৈলে বাটি ।
 হেন চিত্তে না করিলে আছয়ে ধূর্জটি ॥
 যে করিলে তাহা কিছু না করিয়ে মনে ।
 আমি মস্থিবারে কৈনু করহ হেলনে ॥
 এতেক বলিলা যদি দেব মহেশ্বর ।
 ভয়েতে দেবতা সব না করে উত্তর ॥
 নিঃশব্দে রহিলা সব দেবের সমাজ ।
 করজোড়ে বলয়ে কণ্ঠপ মুনিরাজ ॥
 অবধান কর দেব পার্শ্বতীর কান্ত ।
 কহিব ক্ষীরোদ-সিন্ধু-মথন-বৃত্তান্ত ॥
 পারিজাত মালা দুর্কাসার গলে ছিল ।
 স্নেহেতে সেই পুষ্পমালা ইন্দ্র গলে দিল ॥
 গজরাজ আরোহণে ছিল পুরন্দর ।
 সেই মাল্য দিল তার দন্তের উপর ॥
 সহজে মাতঙ্গ অগুক্ষণ মদে মত্ত ।
 পশুজাতি না জানিল মালার মহত্ত্ব ॥
 শুণ্ডে জড়াইয়া মালা ফেলিলা ভূতলে ।
 দেখিয়া দুর্কাসা ক্রোধে অগ্নি হেন জলে ॥
 অহঙ্কারে ইন্দ্র মোরে অবজ্ঞা করিল ।
 মোর দত্ত মাল্য ইন্দ্র ছিঁড়িয়া ফেলিল ॥
 সম্পদে হইয়া মত্ত গৰ্ব কৈল মোরে ।
 দিল শাপ হতলক্ষ্মী হও পুরন্দরে ॥

ব্রহ্মশাপে লোকমাতা প্রবেশিল জলে ।
 লক্ষ্মী বিনা কষ্ট হৈল ত্রৈলোক্য মণ্ডলে ॥
 লোকের কারণ ব্রহ্মা ক্রোধে নিবেদিল ।
 সমুদ্র মথিতে আজ্ঞা নারায়ণ কৈল ॥
 এই হেতু ক্ষীরোদ মথিল মহেশ্বর ।
 শেষ মথনের দড়ি মন্তন মন্দার ॥
 অনেক উৎপাত হৈল বরুণের পুরে ।
 লক্ষ্মী দিয়া স্তুতি কৈল দেব বিশ্বেশ্বরে ॥
 নিবারি মথন তেঁই গেলা নারায়ণ ।
 পুনঃ তুমি আজ্ঞা কর মথন কারণ ॥
 বিষ্ণু-বলে বলবান্ আছিল অমর ।
 ইবে বিষ্ণু বিনা শ্রমযুক্ত কলেবর ॥
 দ্বিতীয় মথন-দড়ি নাগরাজ শেষ ।
 সাক্ষাতে আপনে প্রভু দেখ তার ক্রেশ ॥
 অঙ্গের যতেক হাড় সব হৈল চুর ।
 সহস্র মুখেতে লাল বহয়ে প্রচুর ॥
 বরুণের যত কষ্ট না যায় কথন ।
 আর আজ্ঞা নহে দেব মথন কারণ ॥
 শিব বলে আমি হেতু মথ একবার ।
 আসিবার অকারণ না হয় আমার ॥
 হরবাক্য কার শক্তি লজ্জিবারে পারে ।
 পুনরপি মন্দার ধরিল দেবাসুরে ॥
 শ্রমেতে অশক্ত কলেবর সর্বজন ।
 ঘনশ্বাস বহে যেন আঙুনের কণা ॥

অত্যন্ত ঘর্ষণে পুনঃ মন্দার পর্বত ।
 তপত হইল যেন জলদগ্নিবৎ ॥
 ছিঁড়ি খণ্ড খণ্ড হইল নাগের শরীর ।
 ক্ষীরোদ সাগরে সব বহিল ক্রধির ॥
 অত্যন্ত ঘর্ষণ নাগ সহিতে নারিল ।
 সহস্র মুখের পথে গরল অবিল ॥
 সিদ্ধুর ঘর্ষণ-অগ্নি সর্পের গরল ।
 দেবের নিশ্বাস আর মন্দার-অনল ॥
 চারি অগ্নি মিশ্রিত হইয়া এক হৈল
 সমুদ্র হৈতে আচন্নিতে বাহিরিল ॥
 প্রোতঃ হৈতে যেন দিনকর তেজ বাড়ে ।
 দাবানল বাড়ে যেন গুহ বন পোড়ে ॥
 যুগান্তের কালে যেন সমুদ্রের জল ।
 মুহূর্ত্তেকে ব্যাপিলেক সংসার সকল ॥
 দহিল সভার অঙ্গ বিষম জ্বলনে ।
 সহিতে না পারি ভঙ্গ দিল সর্বজনে ॥
 পলায় সহস্রচক্ষু কুবের বরুণ ।
 পবন শমন অগ্নি পলায় অরুণ ॥
 অষ্টবসু নবগ্রহ অশ্বিনীকুমার ।
 অনুর কিন্নর যক্ষ যত ছিল আর ॥
 পলাইয়া গেল যত ত্রৈলোক্যের জন ।
 বিষম বদনে চাহে দেব ত্রিলোচন ॥
 দূর হৈতে সব দেবগণ করে স্তুতি ।
 রক্ষা কর ভূতনাথ অনাথের পতি ॥

* * * * *

* * * * *

আপন অর্জিত সৃষ্টি বিষে করে নাশ ।
 হৃদয়ে চিস্তিয়া আশু হৈলা কুন্তিবাস ॥
 সমুদ্র জুড়িয়া বিষ আকাশ পরশে ।
 আঁকষণ করি হর করিল গণ্ডু যে ॥
 দূর হৈতে সুরাসুর দেখয়ে কোতুকে ।
 করিল গরল পান একই চুষকে ॥
 অঙ্গীকৃত কারণ লৈল ধর্ম দেখাবারে ।
 কণ্ঠেতে রাখিলা বিষ না লৈলা উদরে ॥
 নীলবর্ণকণ্ঠ অত্মাপিহ বিশ্বনাথ ।
 নীলকণ্ঠ নাম সেই হৈতে হৈল খ্যাত ॥

কাশীরাম দাস

প্রমীলার চিতারোহণ

খুলিল পশ্চিম-দ্বার অশনি-নিনাদে ।
 বাহিরিল লক্ষ লক্ষ স্বর্ণ-দণ্ড করে,
 কৌষিক পতাকা তাহে উড়িছে আকাশে !
 রাজ-পথ-পার্শ্বদ্বয়ে চলে সারি সারি !
 নীরবে পতাকিকুল । সর্বাঙ্গে ছন্দুভি

করিপৃষ্ঠে, পূরে দেশ গভীর আরাবে ।
 পদব্রজে পদাতিক কাতারে কাতারে ;
 বাজিরাজী সহ গজ ; রথিবৃন্দ রথে
 মৃদুগতি, বাজে বাত্ম সক্রমণ কণে !
 যত দূর চলে দৃষ্টি, চলে সিদ্ধিমুখে
 নিরানন্দে রক্ষোদল ! ঝক ঝক ঝকে
 স্বর্ণবন্দ্য ঝাঁধি ঝাঁধি ! রবি-কর-তেজে
 শোভে হৈমধ্বজদণ্ড ; শিরোমণি শিরে ;
 অসিকোষ সারসনে ; দীর্ঘ শূল হাতে ;—
 বিগলিত অশ্রুধারা, হায় রে, নয়নে !

বাহিরিল বীরাজনা (শ্রীমীলার দাসী)
 পরাক্রমে ভীমাসমা, রূপে বিত্তাধরী,
 রণ-বেশে—কৃষ্ণ-হয়ে নুমুণ্ডমালিনী,—
 মলিন বদন, মরি শশিকলাভাবে
 নিশা যথা ! অবিরল ঝরে অশ্রুধারা,
 তিতি বজ্র, তিতি অশ্ব, তিতি বসুধারে !
 উচ্ছ্বাসিছে কোন বামা ; কেহ বা কাঁদিছে
 নীরবে ; চাহিছে কেহ রঘুসৈন্য পানে
 অগ্নিময় ঝাঁধি রোষে, বাঘিনী যেমন
 (জালাবৃত) ব্যাধবর্গে হেরিয়া অদূরে !
 হায় রে কোথা সে হাসি—সৌদামিনী-ছটা ।
 কোথা সে কটাক্ষ-শর, কামের সমরে
 সর্বভেদী ? চেড়ীবৃন্দ, মাঝারে বড়বা,
 শূত্রপৃষ্ঠ, শোভাশূত্র, কুসুম-বিহনে

বৃন্ত যথা ! ঢুলাইছে চামর চৌদিকে
 কিঙ্করী, চলিছে সঙ্গে বামাত্রজ কাঁদি,
 পদব্রজে ; কোলাহল উঠিছে গগনে ।
 প্রমীলার বীর-বেশ শোভে ঝলমলে
 বড়বার পৃষ্ঠে—অসি, চন্দ্র, তুণ, ধনুঃ,
 কিরীট মণ্ডিত মরি, অমূল্য রতনে ।
 সারসন মণিময় ; কবচ খচিত
 স্তবর্ণে—মলিন দৌছে । সারসন স্মরি,
 হায় রে, সে সরু কাটি ! কবচ ভাবিয়া
 সে স্র-উচ্চ কুচযুগে—গিরিশৃঙ্গ সম !
 ছড়াইছে খই, কড়ি, স্বর্ণমুদ্রা-আদি
 অর্থ, দাসী ; সক্রোধে গাইছে গায়কী ;
 পেশল-ভঁরস হানি কাঁদিছে রাক্ষসী ।
 বাহিরিল যুদ্ধগতি রথবৃন্দ-মাঝে
 রথবর ঘনবর্গ, বিজলীর ছটা
 চক্রে ; ইন্দ্রচাপরূপী ধ্বজ চূড়দেশে ;—
 কিন্তু কাস্তিশূত্র আজি, শূত্রকাস্তি যথা
 প্রতিমাপঞ্জর, মরি, প্রতিমাবিহনে
 বিসর্জন-অন্তে ! কাঁদে ঘোর কোলাহলে
 রক্ষোরথী, ক্ষণ বক্ষঃ হানি মহাক্ষেপে
 হতজ্ঞান ! রথমধ্যে শোভে ভীমধনুঃ,
 তুণীর, ফলক, ধড়গ, শঙ্খ, চক্র, গদা-
 আদি অস্ত্র ; স্রুবচ ; সৌরকর-রাশি-
 সদৃশ কিরীট ; আর বার-ভূষা যত ।

সকরণ গীতে গীতী গাইছে কাদিয়া
রক্ষোহুঃখ ! স্বর্ণমুক্তা ছড়াইছে কেহ,
ছড়ায় কুসুম যথা নড়ি ঘোর ঝড়ে
তরু ! সুবাসিত জল ঢালে জলবহ,
দমি উচ্চগামী রেণু, বিরত সহিতে
পদভর । চলে রথ সিদ্ধ-তীর-মুখে ।

সুবর্ণ শিবিকাসনে, আবৃত কুসুমে,
বসেন শবের পাশে প্রমীলা সুন্দরী,—
মর্ন্ত্যে রতি মৃত-কাম সহ সহগামী !
ললাটে সিন্দূর-বিন্দু, গলে ফুলমালা ;
কঙ্কণ মৃণালভূজে ; বিবিধ ভূষণে
ভূষিতা রাক্ষসবধু । ঢুলাইছে কাদি
চামরিগী সুচামর ; কাদি ছড়াইছে
ফুলরাশি বামাবৃন্দ । আকুল বিবাদে,
রক্ষঃকুল-নারীকুল কাদে হাহারবে ।
হায় রে, কোথা সে জ্যোতিঃ ভাতিত যে সদা
মুখচন্দ্রে ? কোথা, মরি, সে সুচারু হাসি,
মধুর অধরে নিত্য শোভিত যে, যথা
দিনকরকররাশি তোর বিশ্বাধরে,
পঙ্কজিনি ? মৌনব্রতে ব্রতী বিধুমুখী—
পতির উদ্দেশে প্রাণ ও-বরাজ ছাড়ি
গেছে যেন যথা পতি বিরাজেন এবে ।
শুকাকইলে তরুরাজ, শুকায় রে লতা,
স্বপ্নস্বরা বধু ধনী । কাতারে কাতারে,

চলে রক্ষোরথী সাথে, কোষশূন্য অসি
 করে রবিকর তাহে ঝলে ঝল ঝলে,
 কাঞ্চন কঙ্ককবিভা নয়ন ঝলসে !
 উচ্চে উচ্চারয়ে বেদ বেদজ্ঞ চৌদিকে ;
 বহে হবির্বহ হোজী মহামন্ত্র জপি ;
 বিবিধ ভূষণ, বস্ত্র, চন্দন, কঙ্করী,
 কেশর, কুঙ্কুম, পুষ্প বহে রক্ষোবধু
 স্বর্ণপাত্রে ; স্বর্ণকুন্তে পুত অস্তোরাশি
 গাজেয় । স্তবর্ণদীপ দীপে চারিদিকে ।
 বাজে ঢাক, বাজে ঢোল, কাড়া কড়কড়ে ;
 বাজে করতাল, বাজে মৃদঙ্গ, তুম্বকী ;
 বাজিছে ঝাঁঝরী, শঙ্খ ; দেয় ছলাছলি
 সধবা রাক্ষসনারী আর্দ্র অশ্রুনীরে—
 হায় রে, মঙ্গলধ্বনি অমঙ্গল দিনে !

বাহিরিলা পদব্রজে রক্ষঃকুলরাজা
 রাবণ ;—বিশদ বস্ত্র, বিশদ উত্তরী,
 ধুতুরার মালা যেন ধূর্জটির গলে ;
 চারিদিকে মস্ত্রিদল দূরে নতভাবে ।
 নীরব কর্ণরূপতি অশ্রুপূর্ণ আঁখি,
 নীরব সচিববৃন্দ, অধিকারী যত
 রক্ষঃশ্রেষ্ঠ । বাহিরিল কাঁদিয়া পশ্চাতে
 রক্ষোগুরবাসী রক্ষঃ—আবাল-বনিতা-
 বৃদ্ধ ; শূন্য করি পুরী, আঁধার রে এবি
 গোকুলভবন যথা শ্রামের বিহনে !

ধীরে ধীরে সিদ্ধমুখে, তিতি অশ্রুধীরে,
চলে সবে, পুরি দেশ বিবাদ-নিনাদে !

কহিলা অঙ্গদে প্রভু স্নমধুর স্বরে ;—
“দশ শত রথী সঙ্গে যাও মহাবলি,
যুবরাজ, রক্ষসহ মিত্রভাবে তুমি,
সিদ্ধতীরে ! সাবধানে যাও হে সুরথি !
আকুল পরাণ মম রক্ষঃকুলশোকে ।
এ বিপদে পরাপর নাই ভাবি মনে,
কুমার ! লক্ষ্মণশূরে হেরি পাছে রোষে,
পূর্ব কথা স্মরি মনে কর্বু রাধিপতি,
যাও তুমি, যুবরাজ । রাজচূড়ামণি,
পিতা তব বিমুখিলা সমরে রাক্ষসে,
শিষ্টাচারে, শিষ্টাচার, তোষ তুমি তারে ।”

দশ শত রথী সূথে চলিলা সুরথী
অঙ্গদ সাগরমুখে । আইলা আকাশে
দেবকুল ;—ঐরাবতে দেবকুলপতি,
সঙ্গে বরাজনা শচী অনন্তযৌবনা,
শিখিধ্বজে শিখিধ্বজ স্বন্দ তারকারি
সেনানী ; চিত্রিত রথে চিত্ররথ রথী ;
মৃগে বায়ুকুলরাজ ; ভীষণ মহিষে
কৃতাস্ত ; পুষ্পকে যক্ষ, অলকার পতি ;—
আইলা রজনীকান্ত শাস্ত সূধানিধি,
মলিন তপনভেজে ; আইলা সুহাসী
অশ্বিনীকুমারমুগ্ধ, আর দেব যত ।

আইলা সুরসুন্দরী, গন্ধর্ব, অম্বর,
কিন্নর, কিন্নরী । রঙ্গে বাজিল অম্বরে
দিব্য বাত । দেব-ঋষি আইলা কোতুকে,
আর আর প্রাণী যত ত্রিদিবনিবাসী ।

উতরি সাগরতীরে, রচিলা সঙ্ঘরে
যথাবিধি চিতা রক্ষঃ ; বহিল বাহকে
সুগন্ধ চন্দনকাষ্ঠ, স্নাত ভারে ভারে ।
মন্দাকিনী পূতজলে ধুইয়া যতনে
শবে, স্নকৌষিক বজ্র পরাই, থুইল
দাহস্থানে রক্ষদল ; পড়িলা গম্ভীরে
মন্ত্র রক্ষঃ-পুরোহিত । অবগাহি দেহ
মহাতীর্থে সাধবী সতী প্রমীলা সুন্দরী
খুলি রত্ন-আভরণ, বিতরিলা সবে ।
প্রণমিয়া গুরুজনে মধুর ভাষিনী,
সম্ভাষি মধুরভাষে দৈত্যবালাদলে,
কহিলা ;—“লো সহচরী, এতদিনে আজি
ফুরাইল জীব-লীলা জীবলীলা-স্থলে
আমার ! কিরিয়া সবে যাও দৈত্যদেশে ।
কহিও পিতার পদে এ সব বারতা,
বাসন্তি ! মায়েরে মোর—”হায় রে, বহিল
সহসা নয়নজল ! নীরবিলা সতী ;—
কাঁদিল দানববালা হাহাকার রবে !
মূহুর্তে সম্বর শোক কহিলা সুন্দরী ;—
“কহিও মায়েরে মোর, এ দাসীর ভালে

লিখিলা বিধাতা যাহা, তাই লো ঘটিল
 এত দিনে ! যাহার হাতে সঁপিলা দাসীরে
 পিতা মাতা, চলিলু লো আজি তাঁর সাথে ;—
 পতি বিনা অবলার কি গতি জগতে ?
 আর কি কহিব, সখি ! ভুল না লো তারে—
 প্রমীলার এই ভিক্ষা তোমা সব কাছে ।”
 চিতায় আরোহি সতী (ফুলাসনে যেন !)
 বসিলা আনন্দমতি পতি-পদ-তলে ;
 প্রফুল্ল কুসুমদাম কবরী-প্রদেশে ।
 বাজিল রাক্ষসবাণ ; উচ্চে উচ্চারিল
 বেদ বেদী ; রক্ষোনারী দিল ছলাছলি ;
 সে রবের সহ মিশি উঠিল আকাশে
 হাহারব ! পুষ্পবৃষ্টি হইল চৌদিকে ।
 বিবিধ ভূষণ, বস্ত্র, চন্দন, কস্তুরী,
 কেশর, কুঙ্কুম-আদি দিল রক্ষোবালা
 যথাবিধি ; পশুকুলে নাশি তীক্ষ্ণশরে
 স্বতাক্ত করিয়া রক্ষঃ যতনে খুইল
 চারিদিকে, যথা মহানবমীর দিনে,
 শাক্ত ভক্ত-গৃহে, শক্তি, তব পিঠতলে !
 অগ্রসরি রক্ষোরাজ কহিলা কাতরে ;—
 “ছিল আশা, মেঘনাদ, মুদিব অস্তিমে
 এ নয়নদ্বয় আমি তোমার সন্মুখে,—
 সঁপি রাজ্যভার, পুত্র, তোমায়, করিব
 মহাধাত্রা ! কিন্তু বিধি—বুঝিব কেমনে

তাঁর লীলা ?—ভাড়াইলা সে স্মৃতি আমারে !
 ছিল আশা, রক্ষঃকুলরাজসিংহাসনে
 ছুড়াইব আঁখি, বৎস, দেখিয়া তোমারে,
 বামে রক্ষঃকুললক্ষ্মী রক্ষোরাণীরূপে
 পুত্রবধূ ! বৃথা আশা ! পূর্বজন্ম-ফলে
 হেরি তোমা দৌহে আজি এ কাল-আসনে !
 কর্ণ-গৌরব-রবি চির-রাহু-গ্রাসে !
 সেবিহু শিবেরে আমি বহু যত্ন করি,
 লভিতে কি এই ফল ? কেমনে ফিরিব,—
 হায় রে, কে কবে মোরে, ফিরিব কেমনে
 শূত্র লঙ্কাধামে আর ? কি সাস্তনাচ্ছলে
 সাস্তনিব মায়ে তব, কে কবে আমারে ?
 ‘কোথা পুত্র পুত্রবধূ আমার ?’ স্মৃতিবে
 যবে রাণী মন্দোদরী,—‘কি স্মৃতি আইলে
 রাখি দৌহে সিদ্ধুতীরে, রক্ষঃকুলপতি ?’—
 কি ক’য়ে বুঝাব তারে ? হায় রে, কি ক’য়ে ?
 হা পুত্র ! হা বীরশ্রেষ্ঠ ! চিরজয়ী রণে !
 হা মাতঃ রাক্ষসলক্ষ্মি ! কি পাপে লিখিলা
 এ পীড়া দারুণ বিধি রাবণের ভালে ?”

অধীর হইলা শূলী কৈলাস-আলয়ে !
 নড়িল মস্তকে জটা ; ভীষণ গর্জনে
 গর্জিল ভুজঙ্গবৃন্দ ; ধক ধক ধকে
 জ্বলিল অনল ভালে ; ভৈরব কল্লোলে
 কল্লোলিলা ত্রিপঙ্কগা, বরিষায় যথা

বেগবতী শ্রোতস্বতী পর্বতকন্দরে !
কাঁপিল কৈলাসগিরি থর থর থরে ।
কাঁপিল আতঙ্কে বিশ্ব ; সভয়ে অভয়া
কুতাজ্জলিপুটে সাধবী কহিলা মহেশে ;—

“কি হেতু সরোষ, প্রভু, কহ তা দাসীরে ।
মরিল সমরে রক্ষঃ বিধির বিধানে ;
নহে দোষী রঘুরথী ! তবে যদি নাশ
অবিচারে তারে, নাথ, কর ভস্ম আগে
আমায় ।” চরণযুগ ধরিলা জননী ।
সান্নিধ্যের সতীরে তুলি কহিল ধূর্জটি ;—
“বিদরে হৃদয় মম, নগরাজবালে,
রক্ষোহুঃখে । জান তুমি কত ভালবাসি
নৈকষেয় শূরে আমি ! তব অহুরোধে,
ক্ষমিব, হে ক্ষেমকরি, শ্রীরাম-লক্ষ্মণে ।”
আদেশিলা অগ্নিদেবে বিষাদে ত্রিশূলী ;—
“পবিত্রি, হে সর্বশুচি, তোমার পরশে
আন শীঘ্র এ সূধামে রাক্ষস-দম্পতী ।”

ইরন্দরূপে অগ্নি ধাইলা ভূতলে !
সহসা জ্বলিল চিতা । সচকিতে সবে
দেখিলা আগ্নেয় রথ ; স্তবর্ণ-আসনে
সে রথে আসীন বীর বাসববিজয়ী
দিব্যমূর্তি ! বামভাগে প্রমীলা রূপসী,
অনন্ত যৌবনকান্তি শোভে তরুণেশে
চিরসুখহাসিরামি মধুর-অধরে ।

উঠিল গগন-পথে রথবর বেগে ;
 বরষিলা পুষ্পাসার দেবকুল মিলি ;
 পুরিল বিপুল বিশ্ব আনন্দ-নিনাদে !
 ছন্দধারে নিবাইল উজ্জ্বল পাবকে
 রাক্ষস । পরম যত্নে কুড়াইলা সবে
 ভস্ম, অমুরাশিতলে বিসর্জিলা তাহে ।
 ধৌত করি দাহস্থল জাহ্নবীর জলে
 লক্ষ রক্ষঃশিল্পী আশু নিখিল মিলিয়া
 স্বর্ণ-পাটিকেলে মঠ চিতার উপরে ;—
 ভেদি অত্র, মঠচূড়া উঠিল আকাশে ।

করি স্নান সিঙ্কুনীরে, রক্ষোদল এবে
 ফিরিলা লঙ্কার পানে, আর্দ্র অশ্রুনীরে—
 বিসর্জি প্রতিমা যেন দশমী দিবসে !
 সপ্ত দিবানিশি লক্ষা কাঁদিলা বিষাদে ।

মাইকেল মধুসূদন দত্ত



বৃত্ত-সংহার

(ষষ্ঠ সর্গ)

বেষ্টিয়াছে ইন্দ্রপুরী দেব-অনাকিনী,
চৌদিকে বিস্তৃত যেন সাগর-সিকতা,
যোজন যোজন ব্যাপ্ত, প্রদীপ্ত তানুতে—
দেবকুল সেইরূপ দিক্ আচ্ছাদিয়া ।
দূরস্থিত, সন্নিহিত যত শৈলরাজি
অস্তোদয়-গিরিশৃঙ্গ প্রভায় উজ্জ্বল
অনন্তের সমুদয় নক্ষত্র বা যথা
বিস্তীর্ণ হইয়া দীপ্তি ধরে চতুর্দিকে ।
প্রাচীরে প্রাচীরে দৈত্য ভীষণদর্শন—
পাষাণ সদৃশ বপু দীর্ঘ, উরস্বান—
নানা অঙ্গ ধরি নিত্য করে পরিক্রম
ভীমদর্শে ভীম তেজে গর্জিয়া গর্জিয়া,
জাগ্রত, স্তম্ভজ, সদা যুদ্ধের সজ্জায়,
ভ্রমে দৈত্য বস্ত্রে বস্ত্রে, স্বর্গ আন্দোলিয়া,
আচ্ছাদি স্তম্ভের-অঙ্গ, বৈজয়ন্ত ঢাকি,
ঘোর শব্দ সিংহনাদ, অশ্বর বিদারি !
অঙ্গবৃষ্টি, শৈলবৃষ্টি, প্রতি-অহরহঃ,
অনন্ত আকুল করি উভয় সৈন্তেতে ;

রাজি-দিবা যেন শূন্তে নিয়ত বর্ষণ,
 বিদ্যুৎ-মিশ্রিত শিলা দিকে দিকে ব্যাপি ।
 ত্রিদশ-আলয়ে হেন অমর-দানবে
 জলিছে সমরবহি নিত্য অহরহঃ ;
 বেষ্টিত অমরাবতী দেব-সৈন্তদলে ।
 সূদৃঢ়সঙ্কল্প উভ দেবতা-দমুজে ।
 অর্গবের উন্মিরশি যথা প্রবাহিত
 অহর্নিশ, অমুক্ষণ, বিরতি-বিশ্রাম,
 শ্রোতস্বতী বিধাবিত নিয়ত যজ্ঞপ
 ধারা প্রসারিয়া গতি সিদ্ধ-অভিমুখে :—
 সেইরূপ অবিশ্রাম দানব-অমরে
 হয় যুদ্ধ অহরহঃ, স্বর্গ-বহির্দেশে,
 জয় পরাজয় নিত্য নিত্য অনিশ্চয়—
 দৈত্যের বিজয় কভু, কখন ত্রিদেশে ।
 সভাসীন বৃত্তাস্ত্র স্তমিত্রে সন্তাষি
 কহিছে গর্জ্জন করি বচন কর্কশ—
 “যুদ্ধে নৈল পরাজিত এখন(ও) দেবতা !
 এখনও স্বরগ বেষ্টি দৈবত সকলে ?
 সিংহের নিলয়ে আসি শৃগালের দল
 প্রকাশে বিক্রম হেন নির্ভয়-হৃদয়ে ?
 মত্তমাতঙ্গের শুণ্ডে করিয়া আঘাত
 স্বাপদ বেড়ায় হেন করি আশ্ফালন ?
 দ্বিক্ আজি দৈত্য নামে ! হে সৈনিকগণ !
 সমরে অমর ত্রস্ত করিলা দানবে !

কোথা সে সাহস বীৰ্য্য শৌৰ্য্য পরাক্রম,
 দম্বজ যাহার তেজে চির-রণজয়ী ?
 সমাগরা বসুন্ধরা যুদ্ধে করি জয়,
 প্রকাশিল কতবার অতুল বিক্রম,
 নাহি স্থান বসুন্ধার কোথাও এমন,
 কম্পিত না হয় আজি দানবের নামে—
 পশিলা অমরাবতী জিনিয়া অবনী,
 বিস্মিত করিয়া বসুন্ধরাবাসিগণে,
 জিনিল স্বরগ যুদ্ধে অদ্ভুত প্রতাপে
 মহাদম্বা সুরকূলে সমরে লাঞ্ছিয়া ;
 খেদাইলা দেববৃন্দে পাতালপুরীতে—
 শশকবৃন্দের মত—দৈত্য-অজ্ঞাঘাতে
 অচৈতন্য দেবগণ ব্যাপি যুগকাল
 হুণিবার দৈত্যতেজ না পারি সহিতে !
 সেই পরাজিত তিরস্কৃত সুরসেনা
 আবার আসিয়া দণ্ডে পশিল সংগ্রামে ;
 না পারি জিনিতে তায় স্নজিষ্কু হইয়া
 রে ভীৰু দানবগণ ! নামে কলঙ্কিলা !
 আপনি যাইব অশ্রু পশিব সমরে ;
 ঘুচাইব অমরের সময়ের সাধ । ”

বলিয়া গর্জিলা শিব বৃত্ত দৈত্যপতি,
 ধরিলা শিবের শূল সিংহের বিক্রম ।
 দেখিয়া ত্রাসিত যত দানবসৈনিক,
 বৃত্তাসুর-আশ্র হেরি নিস্তক সকলে ।

“আন্ রে সে শিবশূল—আন্ রে অমর
 বিজয়ী ত্রিশূল বাহা দানিলা শঙ্কর।”
 নিরখে মাতঙ্গযুথ যথা গজপতি
 বিশাল বৃক্ষের কাণ্ড উপাড়ি, শুণ্ডেতে
 তুলিয়া গগনমার্গে বিস্তারে যখন,
 স্রু-উচ্চ শব্দের নাদে বৃংহতি করিয়া।
 তখন বৃদ্ধের পুল বীর রুদ্রপীড়—
 শোভিতমাণিকশুভ্র কিরীট যাহার,
 অভেদ্য শরীর যার ইজ্ঞাজ ব্যতীত,
 কহিলা পিতারে চাহি হ’য়ে কৃতাজ্জলি ;—
 কহিলা—“হে তাত জিষ্ণু দৈত্যকুলেশ্বর !
 অভিলাষ নন্দনের নিবেদি চরণে,
 কর অবধান পিতঃ, পুরাও বাসনা,
 দেহ আজ্ঞা আমি অগ্ন যাই এ সংগ্রামে
 যশস্বিন্ ! যশঃ যদি সকলি আপনি
 মণ্ডিবেন নিজ শিরে, কি উপায় তবে
 আত্মজ আমরা তব হব যশোভাগী ?
 কোন্ কালে আমরা তবে লভিব স্মৃত্যতি,
 কীর্তি বাহা—বীরলক বীরের আরাধ্য,—
 বীরের বাঞ্ছিত যশঃ ত্রিভুবনে বাহা,
 সকলি আপনি পিতা কৈলা উপার্জন,
 কি রাখিলে রণকীর্তি মণ্ডিতে তনয়ে ?
 ভাবিতে ত হয় তাত, ভবিষ্যতে চাহি,
 সন্ততি পিতার নাম রাখিবে কিরূপে ?

আলিলা যে যশোদীপ, প্রদীপ্ত কেমনে
 রাখিবে তব অঙ্গজগণ অতঃপরে ?
 জন্ম বৃথা ! কৰ্ম্ম বৃথা ! বৃথা বংশখ্যাতি !
 কীর্ত্তিমান্ জনকের পুত্র হওয়া বৃথা ।
 স্বনামে যদি না ধন্য হয় সৰ্ব্বলোকে—
 জীবনে জীবন-অস্ত্রে চিরস্মরণীয় !
 বিভব, ঐশ্বর্য্য, পদ সকলি সে বৃথা !
 পিতৃভাগ্য হয় যদি ভোগ্য তনয়ের,
 পূজ্য সেই কোন কালে নহে কোন লোকে,
 জলবিম্ববৎ ক্ষণে ভাসিয়া মিশায় !
 বিজয়ী পিতার পুত্র নহিলে বিজয়ী,
 গৌরব সম্পদ তেজঃ নাহি থাকে কিছু,
 ত্রিমিতে পশ্চাতে হয় ফেরবৃন্দবৎ,
 দানব অমর যক্ষ মানব স্থগিত !
 স্মরবৃন্দ পুনর্বার ফিরিবে এ স্থানে,
 তব বংশজাতগণে ভাবি তুচ্ছ কীট,
 না মানিবে কেহ আর বিশ্ব-চরাচরে,
 তেজস্বী দৈত্যের নামে হইয়া শঙ্কিত ।
 যশোলিপ্সা কদাচিত্ত ভীরুর(ও) অন্তরে
 উদ্দীপ্ত হইয়া তারে করে বীর্য্যবান্ !—
 বীরের স্বর্গই বশঃ, যশই জীবন ;
 সে যশে কিরীট আজি বান্ধিব শিরসে ।
 - কর অভিষেক, পিতঃ, এ দাসেরে আজ
 সেনাপতি-পদে তব, সমরে নিঃশেষি

ত্রিংশৎত্রিকোটি দেব, আসিয়া নিকটে
ধরিব মস্তকে দেখে এই পদরেণু।

জানিবে অসুর সুর—নহে সে কেবল
দানবকুলের চূড়া দানবের পতি,
অজের সংগ্রামে নিত্য—অনিবার্য রণে
অন্ত বীর আছে এক—আত্মজ তাহার।”

চাহিয়া সহর্ষচিত্তে পুত্রের বদনে,
কহিলা দমুজেশ্বর বৃত্তাসুর হাসি ;—
“রুদ্রপীড় ! তব চিত্তে যত অভিলাষ,
পূর্ণ কর যশোরশ্মি বান্ধিয়া কিরীটে ;
বাসনা আমার নাই করিতে হরণ
তোমার সে যশঃপ্রভা পুত্র যশোধর !
ত্রিলোকে হয়েছ ধন্ত, আরও ধন্ত হও
দৈত্যকুল উজলিয়া দানব-তিলক !
তবে যে বৃত্তের চিত্তে সময়ের সাধ
অত্মাপি প্রোজ্জ্বল এত, হেতু সে তাহার
যশোলিপ্সা নহে পুত্র, অন্য সে লালসা,
নারি ব্যস্ত করিবারে বাক্য বিস্তাসিয়া !
অনন্ত তরঙ্গময় সাগরগর্জন,
বেলাগর্ভে দাঁড়াইলে যথা সুখকর ;
গভীর শরীরীযোগে গাঢ় ঘনঘটা
বিদ্যতে বিদীর্ণ হয়, দেখিলে সে সুখ—
কিংবা সে গঙ্গোত্রী-পার্শ্বে একাকী দাঁড়ায়ে
নিরখি যখন অম্বুরাশি ঘোর নাদে

পড়িছে পর্কতশৃঙ্গে শ্রোতে বিলুপ্তিয়া
 ধরাধর ধরাতল করিয়া কম্পিত !—
 তখন অন্তরে যথা দেহ পুলকিত
 দুর্জয় উৎসাহে হয় স্মৃতিবিমিশ্রিত
 সমর-তরঙ্গে পশি, খেলি যদি সদা
 সেই স্মৃতি চিন্তে মম হয় রে উত্থিত ।
 সেই স্মৃতি সে উৎসাহ হায় কত কাল
 না ধরি হৃদয়ে, জয় স্বর্গ যে অবধি,
 চিন্তে অবসাদ সদা—কোথাও না পাই
 দ্বিতীয় জগৎ যুদ্ধে লভি পুনর্বার,
 নাহি স্থান ত্রিভুবনে জিনিতে সংগ্রামে,
 ভাবিয়া বৃত্তের চিন্তে পড়িয়াছে মলা ;
 দেখ এ ত্রিশূল-অঙ্গে পড়িয়াছে যথা
 সমর-বিরতি-চিহ্ন কলঙ্ক পতীর !
 যাও যুদ্ধে তোমা অস্ত্র করি অভিষেক
 সেনাপতি-পদে, পুত্র, অমর ধ্বংসিতে
 যাও, যশোবিমণ্ডিত হইয়া আবার
 এইরূপে আসি পুনঃ দাঁড়াও সাক্ষাতে ।’
 রুদ্রপীড় প্রফুল্লিত, পিতৃ-পদধূলি
 সাদরে লইলা শিরে গুনিয়া ভারতী,
 এ হেন সময়ে দূত নৈমিষ হইতে
 প্রত্যাগত, সভাস্থলে হইল উপনীত ।
 দূরে দেখি নৈত্যপতি উৎসুক-হৃদয়,
 কহিলা, “সন্দেশবহ, কি বারতা কহ ?

কিরূপে এ পুরীমধ্যে প্রবেশিলে তুমি ?
কোথা ইন্দ্রজায়া শচী কোথা বা ভীষণ ?”

আশ্বস্ত হইয়া দূত কিঞ্চিৎ তখন
কহিতে লাগিল পুরী-প্রবেশ-উপায়,
বাঘুতে চঞ্চল যথা বিমুগ্ধ পলাশ,
রসনা তেমতি দ্রুত বিকম্পিত তার ।
কহিলা, “প্রথম যবে আইলু এ স্থানে,
স্বর্গ হ’তে বহুদূর হিমাচলপথে
উত্তুঙ্গ পর্বত-শৃঙ্গে প্রথম সাক্ষাৎ
হইল আমার দেব-অনীকিনী সহ ।
নানা ছল নানা বেশ বিবিধ কৌশল
আশ্রয় করিয়া পরে হইলু অগ্রসর,
চিনিতে নারিলা কেহ ; অতঃপর শেষে
পুরী-প্রান্তভাগে আসি হৈলু উপনীত ।
প্রাচীর-নিকটে আসি অনেক চিস্তিয়া
উদয় হইল চিন্তে, জাগরিত যথা
মূৰ্খা আদি দেব যত নিত্য অঙ্গধারী,
ব্রমে নিত্য অবিরত দ্বার নিরখিয়া ।
আসন্ন বিপদ চিন্তে হইল উদয়,
জটিল কৌশল এক গূঢ়প্রতারণা—
ঐন্দ্রিলার পিতৃভূমি হিমালয়-পারে,
হয় যুদ্ধ সেইখানে গন্ধৰ্ব্ব-দানবে,
সেই সমাচার ল’য়ে দ্বরিত-গমনে
ঐন্দ্রিলা-নিকটে যাই, পিত্রাদেশে তার,

দৈত্যকুলেশ্বর বৃত্র মহাবলবান্
সমরে সহায় হন এ তাঁর প্রার্থনা ।—
এ প্রস্তাবে দেবগণ গুভ ভাবি মনে
আদেশ করিল মোরে পুরী প্রবেশিতে ;
আদেশ পাইবামাত্র পুরীতে প্রবেশ
করিয়া প্রভুর পদে আসি উপনীত ।”

গুনিয়া দূতের বাক্য কহে বৃত্রাস্বর ;—
“এ বারতা দূত তোর অলীক কল্পনা
সঙ্গে শচী ইন্দ্রপ্রিয়া ভীষণ সংহতি—
শচী কি সে সূর্য্য আদি দেবে অবিদিত ?”

দানবরাজের বাক্যে দূতের রসনা
হইল জড়তাপূর্ণ কম্পবিরহিত—
যথা নব-কিশলয় বরষার নীরে
আর্দ্রতম্বু, বিলম্বিত তরুর শাখায় ।
স্মিত্র দানব-মন্ত্রী কহিলা তখন,—
“দৈত্যেশ্বর, দূত বুঝি হৈলা অগ্রগামী,
পশ্চাতে ভীষণ ভাবি আ(ই)সে শচী সহ
মঙ্গলবারতা নিত্য তড়িৎ-গমনা ।”

নতমুখ নিম্নদৃষ্টি দূত ক্ষুধমতি,
কহিলা,—“না মস্ত্রি, ব্যর্থ আশ্বাস তোমার
নৈমিষ-অরণ্যে শচী জয়ন্তের সনে
করিছে নির্ভয়ে বাস—ভীষণ নিহত ।”

“ভীষণ নিহত !”—গর্জিলা দানবপতি ।
“হা রে রে বালক—জয়ন্ত ইন্দ্রের পুত্র,

আমার সংহতি সাধ বিবাদে একাকী ।—
 দস্ত তোর এত ?” বলি ছাড়িলা নিশ্বাস ;
 “রুদ্রপীড় পুত্র, গুন কহি সে তোমারে,”
 কহিলা তনয়ে চাহি গাঢ় নিরীক্ষণে—
 “যশোলিপ্সা চিতে তব অতি বলবতী,
 কর তৃপ্ত জয়ন্তেরে করিয়া আহুতি ;
 শচীরে আনিতে চাহ অমরাবতীতে,
 অন্তথা না হয় যেন যাহ ধরাধামে ;
 শত যোদ্ধা স্ত্রৈসৈনিক বীর-অগ্রগণ্য
 লহ সঞ্চে অচিরাৎ পালহ আদেশ ।”

কৃতাজ্জলি হ’য়ে মন্ত্রী স্মিত্ত তখন
 কহিলা,—“দৈত্যোদ্ধ, এবে দেব-পরিবৃত্ত
 বিস্তীর্ণ এ স্বর্গপুরী, কি প্রকারে কহ
 কুমার ভেদি এ ব্যূহ হবেন নির্গত ?
 যুদ্ধে পরাজয়ি যদি দেব-অনীকিনী,
 নির্গত হইতে হয় আনিতে শচীরে,
 না বুঝি তবে বা সিদ্ধ সত্ত্বর কিরূপে
 করিবে কুমার কহ, তব অভিপ্রেত ।
 অসংখ্য এ দেব-সেনা দুর্জয় সংগ্রামে,
 অমর তাহাতে সবে সুদৃঢ়-প্রতিজ্ঞ,
 শঙ্কিত নহেক কেহ অন্ত-অজ্ঞাঘাতে,
 মুচ্ছিত না হবে শিব-ত্রিশূল বিহনে ।
 তবে কি আপনি যুদ্ধে করিবেন গতি
 কুমার সংহতি অস্ত্র, দানব-ঈশ্বর ?

বিমুক্ত করিয়া পথ পাঠান যন্তপি,
কি প্রকারে পুনঃ হেথা হবে বা নিবেশ ?”

দৈত্যেশ কহিলা ;—“মস্ত্রি, সেনাপতি-পদে
বরণ করেছি পুত্র, না যাব আপনি,
রুদ্রপীড়ে দিব এই ত্রিশূল আমার,
যাইবে আসিবে শূলহস্তে অবারিত ।”

নিষেধ করিলা মস্ত্রী তেয়াগিতে শূল,—
“পুরী-রক্ষা না হইবে অভাবে তাহার,
উপস্থিত হয় যদি সঙ্কট তাদৃশ
সমূহ দৈত্যের বল হবে নিঃসহায় ।”

অকুটি করিয়া তবে ললাট-প্রদেশে
স্থাপিয়া অঙ্গুলিহয়, গর্ভ প্রকাশিয়া
কহিলা দানবপতি ;—“সুমিত্র হে, এই—
এই ভাগ্য যত দিন থাকিবে বৃত্তের,
জগতে কাহার সাধ্য নাহি সে আমায়
সমরে পরাস্ত করে—কিংবা অকুশল ;
অনুকূল ভাগ্য যার অসাধ্য কি তার—
ধর রে ত্রিশূল, পুত্র, বীর রুদ্রপীড় !”

রুদ্রপীড় কহে “মস্ত্রি, কেন ত্রস্ত এত ?
জান না কি অভেদ এ আমার শরীর ?
বাসবের অঙ্গ ভিন্ন বিদীর্ণ কখন
না হইবে এই দেহ অন্ত প্রহরণে ।
ইন্দ্র নাহি উপস্থিত, চিন্তা কর দূর,
যাইব অমর-বৃহ ভেদিয়া সঙ্কর,

আসিব আবার ব্যূহ ভেদিয়া তেমতি
 শচীরে লইয়া সঙ্গে এ স্বরগপুরে ।
 হে তাত, ত্রিশূল রাখ, নাহি রুদ্রতেজ
 দেহেতে আমার, উহা নারিব তুলিতে ;
 বীর কভু নাহি রাখে নিষ্ফল আয়ুধ
 বিব্রত হইতে পশি সংগ্রামের স্থলে ।”

এইরূপে করিয়া ক্ষান্ত মন্ত্রী, বৃত্তাস্তরে,
 শত সূসৈনিক দৈত্য সংহতি লইয়া
 অসুর-কুমার শীঘ্র প্রাচীর-সন্নিধি
 উপনীত হৈলা স্মৃথে স্মসজ্জিত-বেশে ।
 অম্লসঙ্গী বীরগণ সহিত মন্ত্রণা
 করিতে, কহিলা কেহ যুদ্ধ অবিধেয়,
 কহিলা বা অন্য কেহ সময় উচিত—
 রুদ্রপীড় নিপতিত উভয়-সঙ্কটে ।
 নিজ ইচ্ছা বলবতী, যশোলিপ্সা গাঢ়,
 ঘটনা দুর্ঘট আর স্বেযোগ ঈদৃশ ;
 যুদ্ধই তাঁহার ইচ্ছা একান্ত প্রবল,
 ছল কি কৌশল তাঁর নহে অভিপ্রেত ।
 নিরুপায় কোন মতে সমরে সম্মত
 না পারি করিতে অন্য সঙ্গিগণে সবে,
 অগত্যা সম্মতি দিলা অবশেষে তবে
 অন্য কোন সহপায় করিতে স্তব্ধির ।
 স্থির হৈল অবশেষে কাহার বচনে,
 ভীষণের সহচর দূত যে কৌশলে

পশিলা নগরীমধ্যে, অবলম্বি তাহা,
 নির্গত হইয়া গতি কর্তব্য নৈমিষে ।
 কল্পনা করিয়া স্থির, দ্বারদেশে কোন,
 আসি উপনীত দ্রুত—আসিয়া সেখানে
 তুলিলা প্রাচীর-শিরে সুগুহ পতাকা,
 দানবের যুদ্ধ-চিহ্ন শূল বিরহিত ।
 উড়িল কেতন গুহ শূন্যে বিস্তারিত ;
 প্রকাণ্ড অর্ণবপোত ছিঁড়িয়া বন্ধন,
 বাদাম উড়িল যেন আকাশমার্গেতে,
 সমরকেতন অগ্নি হৈল সঙ্কুচিত ।
 বাজিল সম্ভাষ-শব্দ, দূত কোন জন
 বার্তা ল'য়ে প্রবেশিলা অমর-শিবিরে ;
 কহিলা সেনানীবর্গে উচ্চসম্ভাষণে,—
 “বৃত্তাস্তুর দৈত্যপতি যে হেতু প্রেরিলা
 ঐন্দ্রিলার পিতৃরাজ্য হিমালয়পারে,
 গন্ধর্ব্ব-সমরে তাঁর বিপন্ন জনক
 দৈত্যেশ বৃত্তের ইচ্ছা প্রেরিতে সহায়
 শত যোদ্ধা সেই স্থানে শীঘ্র অবিরোধে ;
 দেবকুল তাহে যদি থাকহ সম্মত,
 সংগ্রামে বিশ্রাম তবে দেহ কিছুকাল,
 বহির্গত হৈতে তবে দেহ শত যোদ্ধে,
 ঐন্দ্রিলার পিতৃরাজ্যে করিতে প্রস্থান ।”
 বার্তা শুনি দেবপক্ষ সেনাধ্যক্ষগণ—
 বরুণ, পবন, অগ্নি, ভাস্কর, কুমার—

মিলিত হইয়া সবে করিলা মন্ত্ৰণা,
 কি কর্তব্য দানবের এবিধ প্রস্তাবে ।
 নিষেধ করিলা পাণী—প্রচেতা স্বধীর,—
 “উচিত না হয় পথ দিতে দৈত্যযোদ্ধে,
 কপট, বঞ্চক, ক্রুর, দিতিসুত অতি,
 নহেক উচিত বাক্যে প্রত্যয় তাদের !
 ঐন্দ্রিলার পিতৃরাজ্য হৈতে দূত কেহ
 যদিও আসিয়া থাকে অজ্ঞাতে আমার,
 বিশ্বাস কি তথাপি সে দূতের বচনে ?
 সেখানে থাকিলে পাণী না ছাড়িত তায় ।”

সূর্য্য-অভিপ্রায়—“দৈত্য যোদ্ধা শত জন
 ঐন্দ্রিলার পিত্রালায়ে যাক অবিরোধে,
 দেব-যোদ্ধা কিন্তু কেহ পশ্চাতে তাদের
 গমন করুক যেন না পারে ফিরিতে ।”

অগ্নি কহে—“তুই তুল্য আমার নিকটে,
 নিষেধ নাহিক তার নাহি অনিষেধ,
 অমর দৈত্যের সনে যেইখানে যাক,
 সন্মুখে পশ্চাতে শত্রু কি তাহে প্রভেদ ?”
 সতত অস্থিরচিত্ত পবন চঞ্চল,
 কভু অভিমতে এর, কভু অন্তমতে,
 অভিমতে দিলা তার—সদা অনিশ্চিত—
 যে কহে যখন মিলে তাহার(ই) সহিত ।
 মহাসেন, সেনাপতি, সকলের শেষে
 কহিলা পার্শ্বতাপুত্র—“বিপক্ষে দুর্বল

করাই কর্তব্য কার্য যুদ্ধের বিধানে ;
 দৈত্যের প্রস্তাব দেবপক্ষে শ্রেয়স্কর ।
 স্বর্ণ ছাড়ি মহাযোদ্ধা বীর শত জন
 ধরাতে করিলে গতি দেবেরই মঙ্গল,
 হীনবল হবে পুরী রক্ষক বিহনে,
 শ্রেয়ঃকল্প ছাড়িবারে অভিপ্রেত তাঁর ।”

সেনাপতি-বাক্যে অস্ত্র দেবতা সকলে,
 সন্মত হইলা—ধীর প্রচেতা ব্যতীত ;
 বার্তা ল’য়ে বার্তাবহ প্রবেশি নগরে
 রুদ্রপীড়-সন্নিধানে নিবেদিল দ্রুত ;
 মহাহর্ষ হৈল সবে ; দৈত্য যোধ শত
 নিজ্ঞাস্ত হইলা শীঘ্র ছাড়িয়া অমরা,
 আহ্লাদে করিল গতি পৃথিবী-উদ্দেশে,
 নৈমিষ অরণ্যে যথা শচী নিবসতি ।

হেমচন্দ্র বন্দ্যোপাধ্যায় ।

পাণ্ডব-গৌরব

দ্বারকার কক্ষ

(শ্রীকৃষ্ণ ও ভীম)

কৃষ্ণ । এস ভাই, এল বৃকোদর !

দণ্ডীরে এনেছ সঙ্গে লয়ে ?

ভীম । না জানি কি গুরু অপরাধে,

বহু লজ্জা দিয়েছ শ্রীহরি !

ত্রিভুবন অযশ গাহিবে,

হর্যোধান সহায় হইলে

অগ্নিকুণ্ডে ঝাঁপ দিতে হয় সা ।

হে মুরারি, তব পদ স্মরি করিয়াছি পণ,

রণে হর্যোধনে করিব নিধন,—

গদাঘাতে ভাঙ্গি উরু ।

মরমে দহিয়ে, তোমারে স্মরিয়ে,

পাঞ্চালী খুলেছে বেণী ;—

যা'ক মম প্রতিজ্ঞা অতলে,

রহক দ্রৌপদী এলোকেশী চিরদিন,

কুশলে কোরব রহক হস্তিনাপুরে,

খেদ নাহি করি ।

কিস্তি আশ্রিতে ত্যজিব,

এ কলঙ্ক অর্পিতে মাথায়,
ইচ্ছা কি হে তব ইচ্ছাময় ?
সন্ধি হেতু আসি নাই চক্রধারী ।

কৃষ্ণ । কহ বীর কিবা প্রয়োজন ?

কহ তব কিবা হেতু আগমন ?

ভীম । মিনতি দাসের এই রাখ যত্নপতি,

উপস্থিত রণ, আমার কারণ—

আমি তব অরি,

নহে আর চারি পাণ্ডব বিরোধী তব ;

বধিয়া আমায়—বিবাদ যুচাও প্রভু ।

আসিয়াছি দ্বৈরথ-সমর আকিঞ্চনে,

অকিঞ্চনে করো না বঞ্চনা,

বাজ্রাকল্লতরু তব নাম ।

কৃষ্ণ । বুঝিয়াছি বৃকোদর তব অহঙ্কার ;

তুমি বলবান্,

বাহুবলে নাহিক সমান তব,

তাই চাও যুদ্ধ মম সনে ।

বুঝেছি কৌশল,

কিন্তু তুমি মদধিক ছল,

তা হ'তে অধিক ছল আমি ।

বুঝাও আমায়,—

শত্রু নহে আর চারি ভ্রাতা তব !

বুদ্ধিহীন হেন কি ভেবেছ মোরে ?

প্রশ্রয় তোমায় নাহি দিলে যুধিষ্ঠির,

বল না কেমনে,
 দণ্ডী সহ কর বাস বিরাটনগরে ?
 কেন বা অৰ্জুন ভ্রমিয়া ভুবন,
 সহায় করিবে যত ক্ষত্র রাজগণে ?
 সহদেব নকুল হ'জনে,
 প্রাণপণে যুদ্ধ-আয়োজন কেন করে ?
 কহি আমি শুনেছি যেমন ।

ভীম । গিরিধারী,
 নাহি বাহুবল তব,
 চাহ বুঝাইতে,
 তোমা হ'তে আমি বলাধিক ।
 ক্ষত্রিয়সমাজে,
 কথা বটে সম্মানস্থচক—
 ছল নহি আমি—অতি ছল তুমি,
 মুক্তকণ্ঠে করি হে স্বীকার ।
 ছলে চাহ ভুলাইতে,
 ছলে কহ আশ্রিতে ত্যজিতে,
 চতুরের চূড়ামণি তুমি !
 কিন্তু শুন চিন্তামণি,
 কল্লতরু ধর নাম,—
 মিথ্যাবাদী নহে যুধিষ্ঠির !—
 অনল সমান হৃদি দগ্ধ হয় অপমানে,
 সে অনল নির্বাপ কারণে,—
 স্থান চাই তোমার চরণে ।

হৃতপুত্র কোরবের ক্রৌতদাস,
 তাহারে সাধিল মাতা সাহায্য কারণ ;
 স্বচক্ষে নেহারি—তবু প্রাণ ধরি,
 করি নাই আঁখি উৎপাটন !
 দেহ রণ—লজ্জা রাখ লজ্জানিবারণ !
 কণ্ঠে প্রাণ থাকিতে আমার,
 হৃথ্যোধন-মৃত্যু নাহি হয় ।
 গদাধর, বধিয়া আমায়,
 অপমানে কর ত্রাণ !

কৃষ্ণ । সমবল সহ রণ ক্ষত্রিয় নিয়ম,
 যেই জরাসন্ধ সহ রণে
 ভঙ্গ দিছি কতবার,
 তৃণবৎ ছিঁড়িলে তাহারে !
 ধরেছিহু স্কুদ্র গোবর্দ্ধন—
 কিন্তু তব চরণের ঘায়,
 গিরিশির চূর্ণ শত শত ।
 নাহি হেন শক্তি মম জিনিব সবায়,
 লব তুরঙ্গিণী এই প্রতিজ্ঞা আমার,
 ছলে বলে কোশলে রাখিব সেই পণ ।
 পাইয়াছ অপমান চাঁহ বুঝাইতে,
 কিন্তু কোন মতে
 স্থান মম নাহি পায় চিতে ।
 জানিতাম সরল তোমায়,—
 দেখি তুমি আমা হতে অধিক চতুর !

ভাল,

বল দেখি কিসে তুমি হতমান ?

ভীম । বুঝেও না বুঝে যেই জন,
কথার শক্তি নাহি বুঝাতে তাহায় ;
রাধার নন্দন কর্ণ শত্রু বাল্যাবধি,
করিল পাণ্ডব-মাতা তাহারে মিনতি ।
পাণ্ডবের কুলনারী আনি কেশে ধরি,
যেই অরি উরু দেখাইল,
সভামাঝে বসন হরণ—
করেছিল আকিঞ্চন,—
তারে পাণ্ডব-প্রধান, করিয়ে সম্মান,
আবাহন করিল সমরে হ'তে সাথী ;
হা কৃষ্ণ এ হ'তে কিবা
হবে হে দুর্গতি ?
জানা'ব কাহায়, দার্ষাস ঢালি তব পায়,
সেই তপ্ত স্বাসে—
দধি হোক চরণ তোমার !

কৃষ্ণ । ভাল ভাল শঠ বুকোদর,
ঘুচাইলে চতুরালী অহঙ্কার !
কর্ণ সহ কুন্তীদেবী কি কথা কহিল,
জানি আমি সে শুহবারতা ;
শত্রু তুমি কি হেতু তোমারে কব ?
মাতৃজ্ঞান করে কর্ণ তারে,
আসন্ন-সমরে, পদ বন্দিবারে,

করেছিল আকিঞ্চন,
 দরশন পেয়েছিল সে কারণে তাঁর ।
 কৌরব-পাণ্ডবে যদি মিলে এ আহবে,
 তাহে তব কিবা অপমান ?
 বাড়িবে কেবল ভারতবংশের মান ;
 তোমার সম্মান অধিক বাড়িবে তাহে ।
 মম ডরে দণ্ডীরে ত্যজিল হর্য্যোধন,
 কিন্তু যথা—
 অনল-সদনে উত্তাপিত হয় কায়,
 সেইরূপ তোমার প্রভায়,
 প্রভাবিত হর্য্যোধন ।
 অতুল বীরত্ব তব কল্মষ ব্যভার—
 পশিয়াছে হৃদয়ে তাহার ;
 কলধর্ম্ম শিখিয়াছে কল্মষ-সমাজ,
 তব উচ্চ আদর্শ হেরিয়ে ।
 তাই ভয়ে যারে করিল বর্জন,
 তাহার রক্ষণে পুনঃ প্রবেশিল রণে ।
 যাও যাও—কি বুঝাও ভীমসেন ?
 চাহ বধিয়া আমার বিপদ করিতে দূর,
 চাহ ভ্রাতৃগণের কল্যাণ ।
 ভাব মনে ত্রিভুবন আমার সহায়,
 পাছে হয় অকল্যাণ ভ্রাতার কাহার ;
 তাই ছল করি আসি দ্বারকায়
 পুরাইবে অভিলাষ ।

বাও বাও—

ঈশ্বর তোমা সহ কভু না করিব ।
 ভীম । অতি ছিল, অতি খল, অতীব কুটিল,
 তুমিই তোমার মাত্র উপমা কেবল !
 তুমি লজ্জাহীন,
 তোমাতে কি লজ্জা দিব ?
 সম তব মান-অপমান,
 নহে ক্ষল হ'য়ে কহ কৃষ্ণ ক্ষত্রিয়-সদনে,
 পরাজয় ভয়ে রণে হও পরাঙ্গুথ ।
 নিন্দা-স্তুতি সমান তোমার,
 কি হইবে রুষ্ট কথা ক'য়ে ।
 কিন্তু নাম ধর ভক্তাধীন,
 কায়মনপ্রাণ, অর্পণ করেছি রাজা পায়,
 তথাপি যত্নপি তুমি না বুঝ বেদনা—
 রণস্থলে দেবতামণ্ডলে,
 উচ্চকণ্ঠে করিব প্রচার—
 নহ তুমি লজ্জানিবারণ,
 নহ কভু ভক্তাধীন !
 নহে কেন কর হতমান ?
 হ'লে কণ্ঠাগত প্রাণ,
 কৃষ্ণনাম আর না আনিব মুখে ।

গিরিশচন্দ্র ঘোষ

বঙ্গভূমি

প্রণমি তোমারে আমি, সাগর-উষিতে
ষড়ৈশ্বর্যময়ী, অগ্নি জননি আমার ।

তোমার শ্রীপদ-রজঃ এখনো লভিতে
প্রসারিছে করপুট ক্ষুদ্র পারাবার ।

শতশৃঙ্গ-বাহু তুলি' হিমাদ্রি—শিয়রে
করিছেন আশীর্বাদ—হিরনেত্রে চাহি' ;

গুহ্র মেঘ-জটাজাল ছলে বায়ুভরে,
স্নেহ-অশ্রু শতধারে ঝরে বক্ষঃ বহি'

অলিছে কিরীট তব—নিদাঘ-তপন,
ছুটিতেছে দিকে দিকে দীপ্তরশ্মি-শিখা ;

অলিয়া—অলিয়া উঠে—গুরু কাশবন,
নদীতট—বালুকায় সুবর্ণ-কণিকা ।

গভীর সুন্দর-বনে তুমি শ্রামাঙ্গিনী,
বসি' স্নিগ্ধ বটমূলে—নেত্র নিজাকুল !

শিরে ধরে ফণা-ছত্র কাল-ভুজঙ্গিনী,
অবলেহে পা-ছ'খানি আগ্রহে শার্দূল !

নব-বরষার চূর্ণ জলদ-কুস্তল,
উড়িয়ে—ছড়িয়ে পড়ে শ্রীমুখ আবরি' !

চাতকী ডাকিছে দূরে, শিখিনী চঞ্চল,
মেঘমন্ড্রে কুবকের চিস্তা যায় ভরি' ।

বিস্তীর্ণ পদ্মার ভূমি ভগ্ন উপকূলে
 বসে' আছ মেঘস্তুপে অসিত-বরণা !
 নব্রুকুল নত-ভুঞ্জ পড়ি' পদমূলে,
 তুলি' শুণু করিয়ুথ করিছে বন্দনা ।

সরে মেঘ, ফুটে ধীরে বদন-চন্দ্রমা !
 বিভোর চকোর উড়ে নয়ন-সোহাগে ;
 লুটে ভূমে শ্রীঅঙ্গের শ্রামল সুধমা,
 চরণ-অলক্তরাগ তড়াগে তড়াগে ।

মূর্তিমতী হ'য়ে সতী এস ঘরে ঘরে,
 রাখ' ক্ষুদ্র কপর্দকে রাজা পা-ছ'থানি !
 ধাত্ত-লীষ স্বর্ণকাপি লও রাজা করে—
 ভুলে' বাই—সর্ব দৈন্ত, সর্বহুঃখ-গ্লানি !

ছুটি নবোৎসাহে মাঠে ল'য়ে গাভীদলে,
 হিমসিক্ততৃণভূমি শুষ্ক পদ্মদল ;
 হরিত ধাত্তের ক্ষেত্রে, পীত রৌদ্রতলে
 বিছায়ে দিয়েছ তব স্ববর্ণ-অঞ্চল !

কুস্মাটি-সায়াকে হেরি—স্বগয়ুথ সাথে
 ছুটিছ নিবারণ-তীরে চকিতা চকলা ।
 মদির মধুক বনে, ম্লান জ্যোৎস্না রাতে
 ল'য়ে তুমি ঋক-শিশু ক্রীড়ায় বিহ্বলা !

নিস্তরু জয়ন্তী-চুড়ে সাজ অঙ্ককার,
কণ্টকৌলতায় গেছে গিরিভূমি ভরি' ;
গহ্বরে গহ্বরে বস্ত্র-বরাহ-যুৎকার,
বহিছে উত্তর-বায়ু শিহরি' শিহরি' ।

হেরি—তুমি সাশ্রুনেত্রে অবনত-শিরে
পরিত্যক্ত গ্রামে গ্রামে ভ্রমিছ হুঃখিনী !
ভগ্নস্তূপে, শিলাখণ্ডে, বিনষ্ট মন্দিরে,
খুঁজিছ পুত্রের কীর্তি—অতীত কাহিনী !

অশোকে কিংগুকে গেছে ছাইয়া প্রান্তর,
পিককণ্ঠ-কলতান উঠে দিকে দিকে ;
চ্যুত-মুকুলের গন্ধে মরুত-মহুর,
এস হৃৎ-পদ্মাসনে, সর্কার্থ-সাধিকে !

এস—চণ্ডিদাস-গীতি, শ্রীচৈতন্য-প্রীতি,
রঘুনাথ-জ্ঞানদীপ্তি, জয়দেব-ধ্বনি !
প্রতাপ-কেদার-বাঙ্গা, গণেশ-স্মৃতি,
মুকুন্দ-প্রসাদ, মধু-বক্ষিম-জননী !

ধাত্রী পান্না

দশ মাস গর্ভে তোরে করেছি ধারণ,
 স্নেহের পুতুলি তুই, তুলি তোরে বুকে,
 করিয়েছি স্তন্যপান, লালন পালন ।
 কত যে করেছি, নিজে কি বলিব মুখে ।
 সমুদ্রের পার আছে, তল আছে তার ।
 অতল অপার মাতৃস্নেহ-পারাবার !

অগাধ সে স্নেহসিদ্ধি, অভাগী পান্নার
 নিয়তির ফলে আজি শুধু মরুস্থল !
 মন্দাকিনী-নীরধারা, স্বাছ দেবতার,
 বৈতরণী-শ্রোত তাহে বহিল প্রবল ।
 শিরীষকুসুম আজি কঠিন কুলিশ,
 মলয়জ পঙ্ক হ'লো হর্গন্ধ পুরীষ ।

বাঘিনী, রুধির পানে নিয়ত লোলুপা,
 আপন সন্তানে তারো প্রবল মমতা ;
 পরসুত-ঘাতিনী পুতনা গোপীরূপা,
 নিজপুত্রে স্তনদানে করেনি খলতা ;
 বাঘিনী, রাক্ষসী, বড় নির্দয় জগতে,
 তারা কিন্তু শতশৃণে ভাল আমা হ'তে ।

হায় বৎস এ বাতৎস কার্য সম্পাদনে
পান্নীরসী পান্না বই সাধ্য আর কার ?

পরলোকগত পতি, তাঁর স্থাপ্য ধনে
ডাকাতি করিতে আজি প্রবৃত্তি আমার !
পতিকূলে দিতে, বাপ ! নিবাপ-অঞ্জলি,
কেহ না রহিবে, তোরে যমে দিলে বলি !

কেন রে অজস্র অশ্রু হৃদি বজ্রসারে
পড়িস্ বহিষা, পান্না পাশরিবে স্নেহ ।

‘অশ্বখামা হত’ এই মিথ্যা সমাচারে
কুরুক্ষেত্র রণে দ্রোণ ত্যজিলেন দেহ ;
মহারথ তিনি, তবু বাৎসল্যের দাস !
নারী হয়ে বীরধর্ম করিব প্রকাশ ।

স্বার্থত্যাগ মহামন্ত্রে দীক্ষা যার আছে,
কঠোর বীরের ধর্ম পালে সেই জনে,
আত্ম-পরিজন-স্নেহ তুচ্ছ তার কাছে,
স্থিরলক্ষ্য একমাত্র সঙ্কল্পসাধনে ।

ভীরুতা মমতা, ছুয়ে নিকট সম্বন্ধ,
কাপুরুষ ক্ষুদ্র-চেতা সদা স্বার্থে অন্ধ ।

কুলপাণ্ডুলার গর্ভে জনম যাহার,
সেই দাসী-পুত্র হবে মিবারের রাজা ?
খণ্ডোতে হরিয়া লবে ছাতি চক্রমার ?
মুগেন্দ্র-বিক্রমে বনে বিচরিবে অজ্ঞা ?

অশ্বরে অমৃতভাণ্ড করিবে হরণ ?
কুকুরে যজ্ঞের হবি করিবে লেহন ?

না দিব ঘটিতে হেন, বাঁচাব কুমারে ;
হিন্দুর গৌরব-রবি রাণাবংশধর
রহিবে অক্ষত দেহে, বলুক আমারে
অপত্যঘাতিনী লোকে, তাহে নাহি ডর ।
দাতাকর্ণ লভে পুণ্য, বধি বৃবকেতু,
আমার অপত্যবধ হবে ধর্মহেতু ।

এস পুত্র ! পরাইব রত্ন-আভরণ,
সাজাব তোমারে স্বর্ণ-খচিত স্রবেশে,
পালঙ্কের অঙ্কে তোমা করিয়া স্থাপন
কাঁপাব চামর-বাতে কাকপক্ষ-কেশে ।
নির্জল নিশ্চল নেত্রে চাব মুখপানে,
যাবৎ না হও ছিন্ন ঘাতক-রূপাণে ।

পলাও উদয়সিংহ, সিংহের শাবক,
শৃঙ্গালের বৃন্তি এবে আশ্রয় তোমার ;
জলিবে যখন তব পৌরুষ-পাবক,
উৎপাত-পতঙ্গ গুড়ে হবে ছারখার ।
ঢাকুক প্রভাত-রবি কুহেলী-তিমির,
অচিরে প্রদীপ্ত তেজে উঠিবে মিহির ।

যজ্ঞগোপাল চট্টোপাধ্যায় ।

যমুনা

গৌরবে, যমুনে ! তুমি কলকল স্বনে,
 নবীন-নীরদ-কাস্তি নিন্দি নীল নীরে,
 তরঙ্গ-বিভঙ্গে নাচি সমীরণ সনে,
 ফেনপুঞ্জ-পুষ্পদাম-মণ্ডিত শরীরে,
 গৌরবে, যমুনে । তুমি আছ প্রবাহিনী,
 কোটি-কোটি-জীবকুলকল্যাণ-দায়িনী ।

পুণ্যতোয়া নদী তুমি ; দক্ষ-কথা সতী
 পতি-নিন্দা শুনি যবে ত্যজিলেন প্রাণ,
 পত্নী-শোকানলে দগ্ধ যবে পশুপতি
 হিমাচ্ছন্ন হিমাদ্রির ভ্রমি সর্বস্থান,
 কোথা না তাপিত তম্বু জুড়াইতে পারি,
 নিলেন শরণ শেষে তব হিম-বারি ।

পবিত্র তোমার তীরে করি যোগাসন,
 সহিতে না পারি বিমাতার বাক্যবাণ,
 তপঃসিদ্ধ প্রব, স্বর্গে করি আরোহণ,
 সপ্তর্ষিমণ্ডল-শীর্ষে লভেছেন স্থান ;
 যেমতি নিশ্চলা ভক্তি ছিল ব্রহ্মপদে,
 তেমতি নিশ্চলভাবে আছেন স্বপদে ।

রমণীয় তীরে তব হইয়া রাখাল,
 গোলোক-বিহারী হরি ভুলোক-নিবাসী
 চরাতেন চরাচর-পালক গোপাল,
 গোপ-সীমন্তিনী-দন্ত নবনী-প্রয়াসী ।
 যার পাদোদক গঙ্গা, তাঁর অঙ্গগ্নানি
 হরেছ যমুনে ! তব বহু ভাগ্য মানি ।

শ্রামল পুলিনে তব তমালের তলে
 বনমালী বেণুযন্ত্র বাজাতেন যবে,
 উর্দ্ধমুখে অর্দ্ধগ্রস্ত ত্যজিয়া কবলে
 ধেমুবন্দ পুলকিত হইত সে রবে ;
 আনন্দে, কালিন্দী ! তুমি বহিতে উজ্জান,
 পবন, পালটি ধেয়ে ঘুরিত সে স্থান ;

নাচিত আভোরবালা গভীর উল্লাসে,
 মিশায়ে মঞ্জীর-ধ্বনি বাঁশরী-নিশ্বনে ;
 ললিত পঞ্চম রাগ শিখিবার আশে
 কুহরিত পিক নিত্য নিকুঞ্জ কাননে ;
 অলি মুরলীর ধরি রঞ্জে র আকার,
 অশ্রয়ার পরবশে করিত ঝঙ্কার ।

অবগাহি তব তীরে, বীর বৃকোদর,
 বিকোভিত করি বারি গাত্র মার্জনার,
 বিনা বাতে বিরচিয়া উর্দ্ধি বহুতর
 তীরভূমি অভিহত করেছে লীলায় ।

সহেছ দৌরাভ্যা তুমি, জননী যেমন
তনকর শিশুকৃত সহেন পীড়ন ।

অর্জুন গাণ্ডীবধরা, খাণ্ডব দাহনে
বজ্রধর ইন্দ্র যারে নিবারিতে নারে,
সমর-নৈপুণ্যে যার কুরুক্ষেত্র রণে
বৈরি-বনিতার অশ্রু পড়ে শতধারে,
সেই বীরশ্রেষ্ঠ সেবা করেছে তোমারে ;
পড়ে কি, যমুনে, মনে গঙ্গার কুমারে ?

গঙ্গার কুমার, চিরকুমার ধার্মিক,
সত্যবতী হেতু সত্য পালনে অটল,
শৌর্য্য, ব্রহ্মচর্য্য যার দেখি অলৌকিক,
বিশ্বয়ে বলিল ‘ভীষ্ম’ ভূপতিমণ্ডল ?
স্মরি যার গুণগ্রাম হিন্দুর সম্মান,
এখনো তর্পণে করে তোয়াঞ্জলি দান ?

যদুগোপাল চট্টোপাধ্যায় ।



পুণ্ডরীক

বিশাল ক্ষীরোদ সরঃ পদ্মসমাকুল,
 সৰ্ব্ব ঋতু ভরি লক্ষ্মী নিবসেন যথা
 সেই সরে একদিন পদ্মদল-মাঝে,
 তাঁরে যবে ঋষিগণ নিমগন ধ্যানে,
 সহসা কাঁদিল এক শিশু সন্তোজাত ।
 বৃদ্ধ দ্বিজ এক জন কহিয়াছে শেষে,
 দেখেছে সে বাহ এক মৃণাল-নির্মিত,
 অক্ষুট-কমল সম কর স্নকুমার,
 *রাখি' শিশু ফুল্ল-সিত-অরবিন্দ-দলে,
 লুকাইতে সরোজলে পলকের মাঝে ।
 শিশুর কাতর রবে পূর্ণ পদ্মবন ;
 ধ্যানমগ্ন ঋষিগণ সমাধি-বিহ্বল,
 কেহ না জ্বলিলা কর্ণে, ইন্দ্রিয় সকল
 ছাড়ি নিজ অধিকার, প্রভুর আজ্ঞায়
 মিলিয়াছে অন্তর্দেহে ।

একা শ্বেতকেতু
 সহসা মেলিলা আঁখি, অতি ক্ষুদ্র চিতে ।
 তপোধন ঋষিগণ, মূর্ত্ত ব্রহ্মতেজঃ,
 তপোভঙ্গে মেলি আঁখি নয়ন-শিখায়

করেন অঙ্গার-শেষ ধ্যান-বিষাতকে ।
 দয়ার আধার দেব-ঋষি ষ্ঠেতকেতু,
 অমুকুণ আর্দ্রভূত স্নেহল নয়ন,
 প্রশান্ত আননে তপঃ-প্রভা স্নমধুর,—
 শারদ আকাশে যথা পূর্ণ স্নুধাকর,—
 মেলি আঁখি, দেখিলেন ষ্ঠেত শতদলে
 অসহায় ক্ষুদ্র শিশু কাঁদে ক্লীণরবে ।
 “কার চেষ্টা ধ্যানভঙ্গ করিতে আমার ?
 কার মায়া ? ইন্দ্র সদা ভীত তপোভয়ে
 কি ভয় আমারে ? আমি আকাজ্জাবিহীন,
 নাহি চাহি স্বর্গ-স্নুধ তপস্তার ফলে ;
 আপনার প্রভু হ’তে চাহি নিরন্তর,
 উৎসর্গিতে প্রাণ মন চাহি ব্রহ্মপদে ;
 আমারে ছলিছ কেন ত্রিদশের পতি ?”
 মৃদুস্বরে বলি হেন, আরস্তিলা পুনঃ
 ধ্যান-যোগ ; কর্ণে পুনঃ করিল প্রবেশ
 শিশুর রোদন ধ্বনি, অক্ষুট, কোমল ।
 আবার মেলিলা আঁখি ঋষি পুণ্যবান,
 কহিলা, “আকাজ্জাহীন হৃদয় আমার,
 নাহি চাহি তপঃফল ; কিসের লাগিয়া
 উপেক্ষা করিব হেন শিশু অসহায় ?
 ব্রহ্ম-দর্শন মাত্র আকাজ্জিকত মম ;
 হৃদয় চঞ্চল এবে বাৎসল্যের ভরে,
 চঞ্চল হৃদয়ে ছারা পড়িবে কি তাঁর ?

অথবা এ চঞ্চলতা প্রেম-জলধির .
 একটি বৃষুদ-লীলা হৃদয়ে আমার ।
 ঈষৎ সমীরে যদি দোলে পদ্মদল,
 অমনি অতল হ্রদে হারাব জীবন
 ক্ষুদ্র শিশু, বিধাতার হস্ত-নিরমিত ।”
 সস্তুরিয়া মধ্যজলে আইলা তাপস,
 ধীরে ধীরে এক হস্তে তুলি শিশুতনু,
 আর হস্তে সঞ্চালিয়া শুভ্র বারিচয়,
 উত্তরিল সন্ন্যাসী ।

প্রবেশিলা যবে
 তপোবনে তপোধন, নিরখি কোতুকে
 প্রতিবেশী মুনিগণ হাসি জিজ্ঞাসিলা—
 “কার পরিত্যক্ত শিশু আনিলা যতনে,
 খেতকেতো ? চিরদিন ব্রহ্মচারী তুমি,
 তুমি স্পৃহাবর, মার ঋষিক্রপী,
 অথবা কুমার, দেব-কুমারী-বাস্তিত ।
 তপঃপ্রিয়, গৃহস্থে নহ অভিলাষী,
 না লইলে দারা তেঁই ; নহিলে এখন
 কুলের রক্ষক পুত্র, নয়নাভিরাম,
 বাড়াইত আশ্রম-শোভা । এতদিনে বুঝি
 স্নানুমারী স্নেহলতা লভিল জনম
 দ্রুতর তপস্তা-শুষ্ক হৃদয়েতে তব ;
 আনিলে পরের শিশু করিতে আপন ।
 কহ, এ কাহার শিশু, পাইলে কোথায় ?”

কহিল। তাপসবর—

“রমার আলয়,
 নিত্য প্রস্তুতিত পদ্ম ক্ষীরোদ সরসে
 পুণ্ডরীক শয্যোপরি আছিল শয়ান
 অলৌকিক শিশু এই ; রোদনে ইহার
 চঞ্চল হইল হিয়া বাৎসল্যের ভরে ।
 সস্তরি’ ইহারে বক্ষে ধরিমু যখন,
 শুনিমু মধুর বাণী—প্রেমে পুলকিতা
 লজ্জাবতী বধু যথা প্রথম তনয়ে
 আরোপি প্রাণেশ-অঙ্কে কহে ধীরে ধীরে,
 ‘মহাত্মন, লহ এই তনয়ে তোমার ।’
 নিরখিমু চারিদিক, স্বচ্ছ নীররাশি
 হাসিছে অরুণালোকে, স্থির পদ্মবন
 আমার উরস-ভারে পীড়িত ঈষৎ
 দেখিলাম ; না দেখিমু নারী বা পুরুষ
 জলমাঝে ; তীরে মগ্ন ধ্যান-আরাধনে
 ঋষিবৃন্দ নেত্র মুদি’ । উত্তরিয়া তীরে
 দেখিলাম পরিচিত বৃদ্ধ এক দ্বিজ,—
 জানি তাঁরে সত্যবাদী, জ্ঞানী, পুণ্যবান,
 বিশ্বয়-স্ফারিত নেত্রে নেহারিছে মোরে ।
 জিজ্ঞাসিমু, ‘দ্বিজবর, বাণী স্মমধুর
 অমিয়-প্রবাহ-সম শুনেছ বহিতে
 নীরব ক্ষীরোদ-তটে, অথবা গগনে ?’
 ‘শুনি নাই বাণী, কিন্তু অলৌকিকতর

দেখিয়াছি দৃশ্য এক । দেখ নাই তুমি,
হ্রাতিময় কর শিশু ধরি পদ্মোপরি ?’—
কহিলা ব্রাহ্মণ । যবে ফিরি তপোবনে,
শুনিলাম অস্তঃকর্ণ প্রীতিধ্বনিময়,
‘মহাত্মন, লহ এই তনয়ে তোমার’—
ঋষিগণ, নহে একি দেবতার লীলা ?’

সবিস্ময়ে ঋষিগণ আসি শিশু-পাশে
নেহারিলা মুখ তার, আশিসিলা সবে,
কহিলা, “সামান্য নহে এ শিশু-রতন ;
গঠেছেন পদ্মাসনা মাধব-বাসনা
বিজনে নলিনীবনে মানসকুমার ;
ভাগ্যবলে পুণ্যফলে পাইয়াছ তুমি ।”

বাড়িতে লাগিল শিশু পুণ্ডরীক নামে,
স্নেহে শতদলে জন্ম তেঁই অভিধান ।
“স্নেহের শীতল উৎস, আনন্দ কিরণ
উচ্ছ্বসিত যুগপৎ আশ্রম-কাননে,”—
কহিতেন ঋষিগণ,—“ধন্য স্নেহকেতু,
জীবন্ত সৌন্দর্য্য-তরু শূন্য তপোবনে
স্থাপিলা যতনে যেই, সরসী মরুতে ।”
“হেন শোভা,” শুনিয়াছি, কহিতেন তাত,
“শোভা পায় রমণীরে ; কাস্তি পুরুষের
হইবেক ভীমকাস্ত, বজ্র-তড়িৎময় ;
জ্যোৎস্না আর ফুলদলে গঠিত এ শিশু,
অতি রমণীয়, যেন অতি স্নকুমার ।

নেহারি এ মুখ যবে, ভয় পাই মনে,
—সৌন্দর্য আত্মার ছায়া শরীর-দর্পণে—
অসহিষ্ণু মূরছিবে স্বলপ ব্যাধায় ।”
“পূর্ণ সৌন্দর্যের শিশু, ইন্দিরা-তনয়,
রমণী-মানসজাত, তাই হেন রূপ ;
কি আশঙ্কা, শ্বেতকেতো মূর্ত তপঃ তুমি
শিক্ষক পালক যবে, শোভায় প্রভাব,
মধুরে ভীষণ, পুষ্পে বজ্রের মিলন
দেখাইবে,—একাধারে লক্ষ্মী-শ্বেতকেতু ।”
তবুও বিষাদ-ছায়ে আবৃত বদন,
চিস্তায় আবিল আঁখি থাকিত তাঁহার ;
হুর্ভাগ্যের ভাগ্যবান্ দূর ভবিষ্যতে
পাইতেন দেখিবারে দূরদর্শী তাত ।

কেমনে কাটিত দিন কহিব কেমনে ?
মধুর স্বপন সম স্মৃতি শৈশবের,
নয়নেতে আসে জল স্নির সে সকল ;
পি তার সে স্নেহময় প্রশান্ত বদন,
মধুর গম্ভীর স্বর—মহাশ্বেতে, প্রাণ,
ভুঞ্জিয়াছি জন্মান্তর, নিত্য দুঃখময় ;
শিশুত্ব লভিতে যদি পারি তপোবলে
সেই অঙ্কে, সে পবিত্র চারু তপোবনে,
তা’হলে তপস্তা সাধি পুনর্জন্ম লাগি ।
অধীত-সমগ্রবিশ্ব পিতা পুণ্যবান্
খুলি দিলা আপনার জ্ঞানের ভাণ্ডার,

পিতৃধনে অধিকারী হইলাম কালে ।
 বাখানিত সবে যবে প্রতিভা আমার
 পিতার স্নেহলকান্ত হইল উজ্জল ।
 সহাধ্যায়িগণ মোরে কহিত আদরে
 পুণ্ডরীক লক্ষ্মী-হৃত, বীণাপাণি-পতি ।
 গেল হেন জীবনের প্রথম অধ্যায় ।

শ্রীকামিনী রায় ।

স্বদেশ আমার

স্বদেশ আমার ! নাহি করি দরশন
 তোমা সম রম্যভূমি নয়ন-রঞ্জন ।
 তোমার হরিত ক্ষেত্র, আনন্দে ভাসায় নেত্র,
 তটিনীর মধুরিমা তোষে প্রাণ মন ।
 প্রভাতে অরণ-ছটা, সায়াক্-অশ্বরে
 সুরঞ্জিত মেঘমালা কান্ত রবিকরে,
 নিশীথে সুধাংসুকর, তারা-মাথা নীলাশ্বর,
 কে ভুলিবে, কে ভুলিবে থাকিতে জীবন !
 কোথায় প্রকৃতি এত খুলিয়ে ভাণ্ডার
 বিতরেন মুক্ত করে শোভারশি তাঁর ?
 প্রতি ক্ষেত্রে, প্রতি বনে, প্রতি কুঞ্জ উপবনে
 কোথা এত—কোথা এত বিমোহে নয়ন ?

বাসন্ত কুমুমরাজি বিবিধ বরণ
 চুম্বি কোথা এত স্নিগ্ধ বহে সমীরণ ?
 তরুরাজি তব সম, . কলকণ্ঠ বিহঙ্গম,
 পাইব না, পাইব না খুঁজিয়া ভুবন !
 কোথাকার দৃশ্যাবলী সূচারু এমন ?
 স্বপ্নায় যাইব আমি, তোমারে জনমভূমি,
 ভুলিব না ভুলিব না জীবনে কখন ।

দ্বিজেন্দ্রলাল রায় ।

ভারতবর্ষ

যে দিন সুনীল জলধি হইতে উঠিলে জননি ! ভারতবর্ষ !
 উঠিল বিশ্বে সে কি কলরব, সে কি মা ভক্তি, সে কি মা হর্ষ !
 সে দিন তোমার প্রভায় ধরার প্রভাত হইল গভীর রাত্রি ;
 বন্মিল সবে, “জয় মা জননি ! জগত্তারিণি ! জগদ্ধাত্রি !”
 ধন্ত হইল ধরণী তোমার চরণ-কমল করিয়া স্পর্শ ;
 গাইল, “জয় মা জগন্মোহিনি ! জগজ্জননি ! ভারতবর্ষ !”

শঙ্ক-স্নান-সিক্তবসনা, চিকুর দিঙ্কশীকরলিপ্ত ;
 ললাটে গরিমা, বিমল হস্তে অমলকমল-আনন দীপ্ত ;
 উপরে গগন ঘেরিয়া নৃত্য করিছে—তপন তারকা চন্দ্র ;
 মঙ্গলমুখ, চরণে ফেনিল জলধি গরজে জলদমন্ত ।
 ধন্ত হইল ধরণী তোমার চরণ-কমল করিয়া স্পর্শ ;
 গাইল, “জয় মা জগন্মোহিনি ! জগজ্জননি ! ভারতবর্ষ !”

শীর্ষে শুভ্র তুষারকিরীট ; সাগর উর্মি ঘেরিয়া জঙ্ঘা ;
 বক্ষে ছলিছে মুক্তার হার—পঞ্চসিদ্ধ যমুনা গঙ্গা ।
 কখন মা তুমি ভীষণ দীপ্ত তপ্ত মরুর উষর দৃশ্যে ;
 হাসিয়া কখন শ্রামল শস্ত্রে, ছড়ায় পড়িছ নিখিল বিশ্বে ।
 ধন্য হইল ধরণী তোমার চরণ-কমল করিয়া স্পর্শ ;
 গাইল, “জয় মা জগন্মোহিনি ! জগজ্জননি ! ভারতবর্ষ !”

উপরে, পবন প্রবল স্বনে শূন্যে গরজি’ অবিশ্রান্ত,
 লুটায় পড়িছে পিককলরবে, চুষ্টি তোমার চরণ-প্রান্ত ;
 উপরে, জলদ হানিয়া বজ্র, করিয়া প্রলয়-সলিল-বৃষ্টি—
 চরণে তোমার, কুঞ্জকানন কুসুমগন্ধ করিছে সৃষ্টি ।
 ধন্য হইল ধরণী তোমার চরণ-কমল করিয়া স্পর্শ ;
 গাইল, “জয় মা জগন্মোহিনি ! জগজ্জননি ! ভারতবর্ষ !”

জননি, তোমার বক্ষে শান্তি, কণ্ঠে তোমার অভয়-উক্তি,
 হস্তে তোমার বিতর অন্ন, চরণে তোমার বিতর মুক্তি ;
 জননি ! তোমার সম্মান তরে কত না বেদনা কত না হর্ষ ;
 —জগৎপালিনি ! জগত্তারিণি ! জগজ্জননি ! ভারতবর্ষ !
 ধন্য হইল ধরণী তোমার চরণ-কমল করিয়া স্পর্শ ;
 গাইল, “জয় মা জগন্মোহিনি ! জগজ্জননি ! ভারতবর্ষ !”

দ্বিজেন্দ্রলাল রায়

বঙ্গভাষা

আজি গো তোমার চরণে, জননি ! আনিয়া অর্ঘ্য করি মা দান ;
 ভক্তি-অশ্রু-সলিল-সিক্ত শতেক ভক্ত দীনের গান !
 মন্দির রচি মা তোমার লাগি', পয়সা কুড়ায়ে পথে পথে মাগি',
 তোমারে পূজিতে মিলেছি জননি স্নেহের সরিতে করিয়া স্নান !
 জননি বঙ্গভাষা এ জীবনে চাহি না অর্থ চাহি না মান,
 যদি তুমি দাও তোমার ও হু'টি অমল-কমল-চরণে স্থান !

জান কি জননি জান কি কত যে আমাদের এই কঠোর ব্রত !
 হায় মা ! বাহারা তোমার ভক্ত নিঃস্ব কি গো মা তারাই যত !
 তবু সে লজ্জা তবু সে দৈন্ত, সহেছি মা স্নেহে তোমারি জন্ত,
 তাই হু'হস্তে তুলিয়া মস্তে ধরেছি যেন সে মহৎ মান ।
 জননি বঙ্গভাষা এ জীবনে চাহি না অর্থ চাহি না মান,
 যদি তুমি দাও তোমার ও হু'টি অমল-কমল-চরণে স্থান !

নয়নে বহেছে নয়নের ধারা জলেছে জঠরে যখন ক্ষুধা,
 মিটায়েছি সেই জঠর-জ্বালায় পিইয়া তোমার বচন-সুধা ;
 মরুভূমি সম যখন তৃষায়, আমাদের মা গো ছাতি কেটে যায়,
 মিটায়েছি মা গো সকল পিপাসা তোমার হাসিটি করিয়া পান ।
 জননি বঙ্গভাষা এ জীবনে চাহি না অর্থ চাহি না মান,
 যদি তুমি দাও তোমার ও হু'টি অমল-কমল-চরণে স্থান !

পেয়েছি যা কিছু কুড়ায়ে তাহাই তোমার কাছে মা এসেছি ছুটি',
 বাসনা তাহাই শুছায়ে যতনে সাজাব তোমার চরণ ছ'টি ।
 চাহিনাক কিছু, তুমি মা আমার—এই জানি শুধু নাহি জানি আর,
 তুমি গো জননি হৃদয় আমার, তুমি গো জননি আমার প্রাণ !
 জননি বঙ্গভাষা এ জীবনে চাহি না অর্থ চাহি না মান,
 যদি তুমি দাও তোমার ও ছ'টি অমল-কমল-চরণে স্থান !

ছিক্কেল্ললান রায় ।

শেষ

গোকুলে মধু ফুরায়ে গেল আঁধার আজি কুঞ্জবন ।

(আর) গাহে না পাখী, ফুটে না কলি, নাহিক অলি-শুঞ্জরণ ।
 ছলাতে যুহু লতিকা বনে, খেলিতে নব কলিকা সনে,
 মধুপতর নাহি সে আর সমীর ধীর সঞ্চরণ ॥

কাননে ঢালি ছোঁছনারাশি, ভাসে না চাঁদ গোকুলে আসি,
 নাহি সে হাসি প্রমোদরাশি নাহি সে সুখ-সন্মিলন ।
 জলদে শিশি-মাধুবী ঢাকা, বিষাদ যেন সকলে মাথা,
 শ্রীহীন তরু, শ্রীহীন লতা, শ্রীহীন চারু পুষ্পবন ॥

অমির-স্বর-লহরে মাখি, স্তবধ করি পশু পাখী,
 মধুরভাবী আর সে বাঁশী গাহে না গীত সন্মোহন ।
 যমুনা পানে চাহিলে ফিরে, কপোল ভাসে নয়ন-নীরে,
 পরাণে শুধু উছলি উঠে সুনীল জলে সঞ্চরণ ।

নিবিড় বনে তমাল-ছায় কোকিল বধু গীত না গায়,
সারিকা-শুক বিরস-মুখ—বিগত প্রেমসম্ভাষণ ।

অধীর ব্রজ-বালক-দল, না খায় দেখু—তৃণ কি জল,
সজল আঁধি উরধ মুখে করিছে কি যে অন্বেষণ ॥

প্রেমিক কে সে মধুরভাষী বধিরে গেল গোকুলবাসী,
ব্রজে কি আর বাশরী তার গাবে না গীত সজীবন ।
অধীর প্রাণে বিষম ক্লেশ, কেমনে করি এ দুখ শেষ,
বিনে শ্রীহরি কেমনে করি নয়ন-বারি সম্বরণ ॥

শ্রীনবকৃষ্ণ ভট্টাচার্য্য ।

ব্যোম

[পুরীর উপকূলে আকাশ-দর্শনে]

হে আকাশ ! হে বিরাট ! হে মহান্ ! হে অনন্ত ব্যোম !

হে অখণ্ড ! পরিপূর্ণ ! মহাশূন্ত ! হেরি' প্রতি রোম

হয় কণ্টকিত !

সমুদ্ভ-মেখলা মরি সুবিপুলা এই বহুকরা

অসীমতা মাঝে তব বিন্দু সম আপনারে স্বরা

করে লুকায়িত ।

সচক্ৰা ধরণী সম সচক্ৰম অস্ত্র গ্রহচয়

গ্রহরাজে ঘিরি' যথা নিরন্তর বিদ্বর্জিত হয়,

তথা ভাঙ্গু সম

কত শত গ্রহ ঘুরে বৃহত্তর সূর্য্য চারিধার,
এই মত চলিয়াছে সৌরচক্র বর্ধিত-আকার
অম্লসরি' ক্রম ।

কিন্তু এই সুবিপুল বিচক্রিত নক্ষত্রনিকর
বিরাট শরীরে তব অণু হ'তে অতি অণুতর,
ক্ষুদ্র লোম-কূপ !

সৃষ্টির সে আদি হ'তে কত বিশ্ব উঠিল, টুটিল
তোমারি অনন্ত গর্ভে,—কিন্তু তাহে নাহি বিবর্তিল
তোমার স্বরূপ !

২

অতিনিম্নস্তরে তব স্থূল বায়ু সূক্ষ্ম-কলেবর
ঝঙ্কার মুরতি ধরি' নামে যবে নিম্ন সিদ্ধু'পর
নর্ভন-লীলায়,

আতল-সাগর-বক্ষ আন্দোলিত হয় সে নর্ভনে,
উত্তুঙ্গ অচলাকৃতি লক্ষ লক্ষ তরঙ্গ সন্ধনে
উন্মত্তের প্রায়

লাগে হাগে মহোজ্জ্বলে তুলে খণ্ড তমাক প্রলয়,
কাঁপে তাহে থর থর জীবময়ী পৃথ্বীর হৃদয়,
ঘন বহে শ্বাস ;—

কিন্তু সে ঝটিকা-রঙ্গ অতি ক্ষুদ্র জ্জ্বলন্ত তোমার,
জনমি' তোমাতে পুন কোন্ নিম্নে লুকায় আবার,
না মিলে আভাস !

হে বিরাট-বপু ! তব জাহ্নু, জজ্জ্বা, উরু, কটিতল—
 মহাতল, রসাতল, তলাতল, পাতাল, সূতল ;
 অশ্বধি উদর ;
 ভুলোক তোমার নাভি, ভুব কুক্ষি, স্বর্লোক হৃদয়,
 মহর্লোক গ্রীবা তব, জন কণ্ঠ, তপস ক্রম্বয়,
 সত্য শির-স্তর ।

৩

দীর্ঘায়ত দিক্-চক্র—অতি দীর্ঘ শ্রবণ তোমার,
 রবি-চন্দ্র—নেত্র তব, রাত্রি-দিবা—পদ্ম-পত্র তা'র,
 নিঃশ্বাস—অনল ;
 বিরাট পুরুষ তুমি অহর্নিশ লোল রসনায়
 অনন্ত জগৎ-পুঞ্জ আশ্বাদিছ, তৃপ্তি তবু তায়
 নাহি এক পল ।
 যেমতি নাহিক সীমা, শেষ, অন্ত, তেমতি তোমার
 দ্বিতীয় না হেরি কোথা, নাহি গতি, নাহিক বিকার,
 নাহি বিবর্তন ;
 হে স্বচ্ছ নির্মল ব্যোম ! বর্ণ-হীন ! অঙ্ক-লেখা-হীন !
 বক্ষে তব মেঘরাশি নাহি আঁকে রেখামাত্র ক্ষীণ,
 তুমি নিরঞ্জন ।
 ওহে মহাশঙ্কর ! মহদগু সর্ববিধ স্বর
 তোমাতে উদ্ভবি' পুন লভি' লয় তোমারি ভিতর
 রহে পুঞ্জীকৃত ;

গ্রহ-চক্র হ'তে উঠে ঐক্যতান অনাহত স্বর
ওঙ্কার তোমারি মাঝে, কিন্তু তুমি নিজে নিরন্তর,
স্তব্ধ, অক্ষোভিত ।

৪

যদিও বিরাটমূর্তি নির্ঝিকল্ল নির্ঝল মহান্
তুমি নভ ! তোমা চ'তে আছে কিন্তু সত্তা মহীয়ান্,—
আত্মা সে আমার ।

সৃষ্টির আদিতে যদি, কিন্তু তুমি সৃষ্ট বিধাতার,
ত্রিগুণের সমবায়ে দেহ তবরচনা মাগার,
মূর্তি জড়তার ।

মহান্ প্রলয় যবে সমুদ্রবে, খেলা সাজ করি'
স্বরূপ লইবে যবে মহাশক্তি সৃজন-লহরী
অব্যক্ত-গুহায়,—

চূর্ণ হ'বে গ্রহ-তারার, নির্ঝাপিত হ'বে রবি-সোম,
ও বিরাট কায়ার তব লুকাইবে ওহে মহা ব্যোম !
প্রলয়-সঙ্কায় ।

স্বাবস্থিত আমি কিন্তু নহি কভু মাগার অধীন,
অনন্ত-অনাদি-কল্ল আমি মাত্র সৃষ্টি-লয়-হীন,
একক, অদ্বয়,

পূর্ণতায় পূর্ণাভীত, শূন্যতায় শূন্যের অতীত,
তোমার সৃজন লয় হেরি আমি সাক্ষিরূপে স্থিত,
সন্ময়, চিন্ময় ;

অহেতু আনন্দ মম না আশ্বাদে তোমার হৃদয় ।

শ্রীভৃঙ্গধর রায়চৌধুরী :

করাদু *

কার তরে এই শয্যা দাসী, রচিস্ আনন্দে ?
 হাতীর ঝাঁতের পালঙ্কে মোর দেরে আগুন দে ।
 পুত্র যাহার বন্দীশালার শিলায় গুয়ে হায়,
 যুম্ যাবে সে ছুধের-ফেনা ফুলের বিছানায় ?
 হুলাস যাহার শিকল-বেড়ীর নিগ্রহে জর্জর,
 জন্তলিকা । রত্ন-মুকুট তার শিরে হুর্ভর !
 কবীর মন্তন রাজার দেওয়া দংশে মণিহার,
 যম-যাতনা এখন এ মোর রম্য অলঙ্কার !
 কেয়ুর-কাঁকণ শিথলে দেরে, খুলে দে কুণ্ডল,
 শিথলে দে এই মোতর সৌখি শচীর আঁখিজল !
 রাণীকে আর নাই রে রুচি—নাই কিছুই সাধ,
 যে দিকে চাই কেবল দেখি লাক্ষিত প্রহ্লাদ ।
 যে দিকে চাই মলিন অধর, উপবাসীর চোখ,
 যে দিকে চাই গগন-ছোয়া নীরব অভিযোগ,
 যে দিকে চাই ত্রতীর মূর্তি নিগ্রহে অটল.
 সাপের সাথে শিশুর খেলা,—মন করে বিহ্বল ।
 মারণ-পটু মারছে বঁটু—মারছে বাছারে,
 শত্রুপাদি দিচ্ছে হানা বালক নাচারে,

* [বিতি ও কস্তপের পুত্র অম্বর-সম্রাট হিরণ্যকশিপুর পত্নী করাদু
 ইনি জম্বাহুরের কস্তা ও মহিষাসুরের ভগিনী । ইহার চারি পুত্র—প্রহ্লাদ-
 সংহ্লাদ, হ্লাদ ও অম্বহ্লাদ ।]

কাঁটায় গড়া মারছে কোড়া হুধের ছেলের গায়,
 ছাথ্রে রাঙা দাগড়াতে ছাথ্ আমার দেহ ছায় !
 প্রাণের ক্ষতে লোহুর ধারা ঝরছে লক্ষ ধার,
 আর চোখে নিদ্ আস্বে ভাবিস্ পালকে রাজার ?
 গুমে গুমে পুড়ে যেন যাচ্ছে শরীর মন,
 ক্লাস্ত আঁখি মুদলে দেখি কেবল কুস্বপন,
 পাহাড় থেকে আছড়ে ফেলে দিচ্ছে পাথরে—
 প্রহ্লাদে মোর ; দিচ্ছে ঠেলে সাপের চাতরে ।
 জগদলন পাষণ বুক ফেলছে তরঙ্গে,
 চোরের সাজে সাজিয়ে সাজা চোরেরি সঙ্গে !
 নির্দোষেরে খুনীর বাড়া দিচ্ছে রে দণ্ড
 কালনেমি, কবন্ধ, রাহু দৈত্য পাষণ্ড ।
 কভু দেখি ফেলছে বাছায় পাগুলা হাতীর পায়,—
 বিদ্রোহীদের প্রাপ্য সে আজ নিরীহ জন পায় !
 চর্ম্মচোখে রক্ত ঝরে দারুণ সে দৃশ্যে,
 মর্ম্মচোখে কেবল দেখি.....নৃসিংহ বিশ্বে !

* * * * *

হায় ক্ষমতার অপপ্রয়োগ !.....হাহা রে আক্ষৌষ,
 অপ্রযুক্ত দণ্ড এসে,.....জাগায় বিধির রোষ !
 কি দোষ বাছার বুঝতে নারি, অবাক চোখে চাই,
 ইচ্ছা করে এদেশ ছেড়ে অস্ত্র কোথাও যাই—
 অস্ত্র কোথাও—অস্ত্র কোথাও—এ রাজ্যে আর নয়,
 ভাগ্যে আমার স্বর্গপুরী হ'ল ভীষণ-ভয়,

চোখের আগে কেবল জাগে ছেলের মলিন মুখ,
 খড়্গে জেতা স্বর্গপুরে নাইরে স্বর্গ-সুখ ।
 বুঝ্তে নারি কি দোষ বাছার,.....ভাবি অহনিশ,
 ষণ্ড গুরুর শিক্ষা পেয়েও ষণ্ডামি তার বিষ,—
 এই কি কসুর অপাপ শিশুর ? হায় রে কে জানে,
 বিহ্বলতায় বিকল করে এ মোর পরাণে ।.....
 ফিরে এল শিক্ষা-শেষে শিশু পুলক-মন,
 ভীষণ সাপের আবর্তে হায় এই সমাবর্তন !
 প্রশ্ন হ'ল—“কি শিখেছ ?” রাজার সভা-মাঝে
 কয় শিশু—“তঁার নাম শিখেছি রাজার রাজা যে ;
 যার আদি নাই, অন্তও নাই, যে-জন চিরন্তন,
 সত্য-মূর্তি স্বতঃস্ফূর্তি অরূপ নিরঞ্জন,
 তিন ভুবনের প্রভু যিনি, প্রভু যে চার যুগে,
 শিখেছি নাম জপ্তে তাঁহার, গাইতে সে নাম মুখে ।”
 ছেলের বোলে রুষ্ট রাজা দেবদ্ব-লোভী,
 ছেলের দেব-প্রেমে ছাথেন বিদ্রোহ-ছবি ।
 বিধির বরে দেবতা-মানুষ-পশুর অবধ্য
 মাতেন পিয়ে অহঙ্কারের অপাচ্য মদ্য ।
 ভাবেন মনে “হইছি অমর” অবধ্য ব'লেই !
 পরের বধ্য নয় ব'লে, হায়, মৃত্যু-যেন নেই !
 দেবতা-মানুষ-পশুর বাইরে কেউ যেন নেই আর
 বলের দর্পে দণ্ড দিতে ; এমনি ব্যবহার !
 দাবী করেন দেবের প্রাপ্য যজ্ঞ-হবির ভাগ,
 ভগবানের জয়-গানে হায় বাড়ে উ'হার রাগ !

উনিই যেন রুদ্র মরুৎ, উনিই স্বর্ঘ্য, সোম,
 ঋণস্থায়ী রাজ্যমদে দণ্ডকারী যম ।
 ইন্দ্র উনি ইন্দ্রজয়ী, জয়ন্ত, জিষ্ণু,
 একলা উনি সব দেবতা, নাসত্য বিষ্ণু ।
 ছেলের বোলে ক্রোধোন্মত্ত দৈত্য ধুরন্ধর,
 “আমার আগে অগ্নে বলে ত্রিভুবনেশ্বর ।
 রাজহুঁয়ী অমন ছেলে, ফল বা কি ভীয়ে ?
 ডুবিয়ে দেব নির্ঘাতনের নরক সৃজিয়ে ।
 খর্ব্ব করে রাজ্য য়ে তার রাখ্বে না মাথা,
 দণ্ডবিধান কর্বে, স্বয়ং আমিই বিধাতা ।”
 বাক্য শুনে বালক বলে বিনয় বচনে—
 “হৃদয় আমার নিরত য়ার অর্ঘ্য-রচনে,
 পিতার পিতা মাতার মাতা রাজ্যার রাজা সেই,
 সত্য তি’ন নিত্য ত্রিনি তাঁর তুলনা নেই ;
 পিতা গুরু,...মাত্র করি,...শ্রদ্ধা দিই ভূপে,...
 তা’ই ব’লে হয় ভুলতে নারি সত্য-স্বরূপে ।
 আত্মা...আপন বিশিষ্টতা...কর্বে না ক্ষুধ,...
 স্মরণে য়ার মরণ মরে,...কীর্তনে পুণ্য,...
 সে নাম আমি ছাড়্বে নাকো, ছাড়্বে না নিশ্চয় ;
 অগ্নে যিনি, অগ্নে তিনি,—শান্তিতে কি ভয় ?”
 কথার শেষে কোটাল এসে বাধ্লে ক’সে তায়,
 শান্ত শিশু হাদ্লে শুধু শিষ্ট উপেক্ষায় ।
 চলে গেল শান্তি নিতে নিরীহ প্রহ্লাদ—
 আত্মলাভের মূল্য দিতে প্রহারে সাহ্লাদ ।

'মিনতি-বোল্ বন্তে গেলাম দৈত্যপতিরে,...
 বিমুখ হ'য়ে,...আঁকড়ে বুকে নিলাম ক্ষতিরে,
 ছেড়ে এলাম সভ'গৃহ বাক্য-যজ্ঞণায়
 সিংহাসনের আসনে ভাগ ঠেলে এলাম পায়,
 ভাব-দেহে যাই লাগল আঘাত, হায়রে কয়াধু,
 স্থূল-শরীরও মরিয়া হ'ল, টিকল না যাহ।
 চলে এলাম রাজ্য বাজা ডুবিয়ে উদ্বেক্ষায়,—
 সত্য যেথা পায় না আদর চিত্ত বিমুখ তায়।
 আসার পথে দেখে এলাম কেবল অলক্ষণ,—
 বিম্বিল মোর বিধবা-বেশ স্তম্ভ অগণন।
 ব্যাকুল চোখে চাইতে ফাঁকে চোক হ'ল বন্ধ,
 মশানে স্ব-মুণ্ডে লাথি ঝাড়ছে কবন্ধ !
 ক্ষিপ্ত-পারা আকাশে চাই, সেথায় দেখি হায়,
 রক্ত-স্নাত সিংহ-শীর্ষ পুরুষ অতিকায়,
 অঙ্গে তাহার লুটায় কে রে মুকুট-পরা শির,
 সিংহনখে ছিন্ন অস্ত্র চৌদিকে রাখির।
 হু'হাতে চোক ঢেকে এলাম অন্ধ আশঙ্কায়
 ভিত্তি-'পরে কপাল ঠুকে কেবল প্রীতি পায়।
 সেই অবধি শুন্ছি কেবল অন্তরে গুণ্গুর্
 বিসর্জনের,বাজনা বাজায় বিখ্যায়ের মূর,
 টলছে মাটি নাগ বাসুকী অধম্মেরি ভার
 হাজার ফণা নেড়ে করে বইতে অস্বীকার।
 যে বিধি নয় ধর্ম্ম্য, বুঝি, তার আজি রোখ-শোধ ;
 বিধির টনক নড়ায় শিশুর শিষ্ট প্রতিরোধ।

বিধি-বহিষ্কৃতের বিধি মান্বে না কেউ আর,
 ওই শোনা যায়, জন্তলিকা ! নৃসিংহ-হুকার !
 রেখে দে তোর শয্যা-রচন রাণীর পালঙ্কে,
 হৃষীকেশের শাঁখ হৃদে শোন্ হর্ষে—আতঙ্কে ।
 ভীষণ মধুর রোল উঠেছে রুদ্র আনন্দে,
 স্নুথের বাসায় স্নুথের আশায় দে রে আগুন দে ।
 দুঃখ বরণ করেছে মোর নির্দোষী প্রহ্লাদ,
 সেই দুখে আজ আঁকড়ে বুকে চল্ করি জয়নাদ ।
 আত্মা চাহে শিশুর রূপে প্রাপ্য যাহা তার,—
 বিদ্রোহ নয় বিপ্লবও নয় ত্রাণ্য অধিকার ।
 উচিত ব'লে দণ্ড নেবার দিন এসেছে আজ,
 উচিত ক'য়ে পরতে হবে চোর-ডাকাতির সাজ,
 চিত্ত-বলের লড়াই সুরু পশু-বলের সাথ,
 বত্মা-বেগের হানার মুখে কিশোর-তম্বুর বাঁধ ।
 প্রলয়-জলে বটের পাতা ! চিত্ত-চমৎকার !
 তীর্থ হ'ল বন্দীশালা, শিকল অলঙ্কার !
 খেদ কিছু নাই, আর না ডরাই, চিন্তে মাঠেঃ রব ;
 উচিত ব'লে বন্দী ছেলে এ মম গৌরব !
 কয়াধু তোর জনম সাধু, মোছ রে চেখের জল,
 রাজ-রোষেরি রোশ্নায়ে তোর মুখ হ'ল উজ্জ্বল ।

সত্যেন্দ্রনাথ দত্ত ।

স্বাগত

(কলিকাতা সাহিত্য-সন্মিলন উপলক্ষে)

স্বাগত বঙ্গ-মনীষি-সম্মত ভূষিত অশেষ মানের হারে !
 এ মহানগরে এস—আজি এস ভাবের জ্ঞানের সস্তাগারে ।
 এস প্রতিভার রাজটাকা ভালে, এস ওগো এস সর্গোরবে,
 এস পুষ্পক-পুষ্প পূজারী সারদার উপাসকেরা সবে ।
 ফুল মনের অম্লান ফুল ঝরে তোমাদের সম্মুখে পিছে,
 শ্রীতির আরতি দিকে দিকে দিকে, উলু উলু উলু উল্লসিছে ।
 জলধি-গভীর জাতীয় জীবন,—তার প্রতিনিধি শঙ্খ ঘোষে,
 অমৃতের ধারা সঞ্চরে মুহু নাড়ীতে দেশের হৃদয়-কোষে ।
 এস নিতি নব-নব-উন্মেষ-শালিনী বুদ্ধি করিয়া সাথী,
 নূতন নগরী এই কলিকাতা আন হেথা নবীনতার ভাতি ।
 গোড় আজিকে গৌরব-হারা, যশোহরে নাই যশের আলো ।
 অল্প বয়সী এই কলিকাতা প্রবীণেরা এরে বাসে না ভালো ;
 বিদেশী ইহারে করেছে লালন ; স্বদেশের যত তরুণ হিয়া
 ইহারে ঘিরিয়া গুঞ্জে তবু এরি নয়নের কিরণ পিয়া ।
 এনেছে তরুণী চন্দন মালা, দাঁড়ায়েছে আঁখি করিয়া নীচে,
 নব বঙ্গের নবীনা নগরী তোমাদের সবে আহ্বানিছে ।

* * * *

এই কলিকাতা—কালিকা-ক্ষেত্র, কাহিনী ইহার সবার শ্রুতি,
 বিষ্ণু-চক্র ঘুরেছে হেথায় মহেশের পদধূলে এ পূত ।
 ধাত্রী ইহার ভাগীরথী-ধারা, সতী-পঙ্কজ বুকে এ বহে,
 পুরাণ-স্মৃতির জড়োয়া-জড়িত এ ঠাঁই কখনও হেলার নহে ।

হেথা প্রকাশিল অনুরূপ অরুণ অকালে মাতার চক্ষুধাতে,
 আলোকের রথে সারথি যে আজ অশ্রুট-আঁখি ধূসর প্রাতে ।
 মহা-ভারতের কল্পনা-পুত মহাজীবনের কেন্দ্র ইহা,
 মস্তরে এর মঞ্জরে মন, অন্তরে এর আলোর স্পৃহা ।
 হিন্দুর কালী আছেন হেথায়, মুসলমানের মোলা আলি,
 চারি কোণে সাধু পীর চারিজন মুক্তিলাসান চেরাগ আলি' ।
 অভিষেক হয়ে গেছে এ পুরীর স্বর্গ-নদীর হেমাধুতে,—
 প্রসাদ-পরমহংস-কেশব-কালীচরণের প্রেমাশ্রুতে ।
 জন্মিল হেথা বিবেকানন্দ দেশ-আত্মার কুণ্ডা হরি' ;
 এ পুরীর রাজপথের ধূলিরে মোরা কহি রাজরাজেশ্বরী ।
 সকল ধর্ম মিলেছে হেথায় সমন্বয়ের মন্ত্র-সুরে,
 স্বাগত সাধক-ভক্তবৃন্দ মরতের বৈ-কুণ্ঠপুরে ।

* * * *

এই কলিকাতা ব্যাঘ্র-বাহিনী ছিল এ একদা বাঘের বাসা,
 বাঘের মতন মানুষ যাহারা তাহাদেরি ছিল যাওয়া ও আসা ;
 প্রতাপের সেনা পৌরুষ-ভরে গিয়াছে ইহার বক্ষ দিয়া,
 দক্ষিণে এর দক্ষিণরায় বেড়েছে বাঘের স্তম্ভ পিয়া ।
 কালা পল্টন গোরা কোম্পানী একদা ইহারে করিল রাণী,
 কালা ও গোয়ার স্বতির অঙ্কে বাঘ-ডোরা এর আঙিয়া খানি !
 স্বত গোড়ের অমর জীবন বিরাজিছে আজ ইহার দেহে,
 সপ্তগ্রামের লুপ্ত বিভব গুপ্ত রয়েছে এ মহা গেহে ।
 নাহি কলঙ্ক-কালিমা অঙ্ক, সাত সাগরের সলিল আনি'
 করেছে কালন মৈত্র ইহার অঙ্ককূপের মিথ্যা গানি ।

জগতের সেরা ষাটশ নগরী, গণনা ইহার তাদেরি সাথে,
স্বাগত স্বদেশ-ভক্তবৃন্দ এরি রাখিডোর পর গো হাতে ।

* * * *

নবীন বঙ্গে এ মহা নগরী মজ্জ জপিছে মুহূর্ত্তজয়ে,
পূর্বে পছিমে ঘেঁথে সে তুলিছে একটা বিপুল সময়ে;
দানে ও পুণ্যে ত্যাগে মহাশ্বে গড়েছে গড়িছে ঋষির ছবি,
“তত্ত্ববোধের” “প্রচারে” চলেছে “নবজীবনে”র “সাধনা”-হবি ।
এই নগরীর জন-অরণ্যে ওঠে নৈমিষ-বনের গীতি,
সত্যনিষ্ঠ ঋষি দেবেন্দ্র সত্য যুগের জাগায় স্মৃতি ।
রামমোহনের ঐক্যমন্ত্র এ মহানগরী শুনেছে স্মৃতে,
বিজ্ঞানাগর দয়া-সাগরের ঢেউ খেলে গেছে ইহারি বুকে ।
অক্ষয় হেথা ধর্ম্মের সোনা আঙুনে পোড়ায় করিল খাঁটি,
জগদীশ হেথা জড়ের জগতে ব্লাইয়া দিল সোনার কাটি ।
রমেশ হেথায় প্রচারিল বেদ সব বাঙালীরে শুভাল শ্রুতি ।
হেথায় সিংহ ভাষায় রচিল ভারতের মণি ভারত পুঁথি ।
দীপঙ্করের দীপখানি হেথা চির-উজ্জ্বল প্রাণের ব্যয়ে ;
নব রসায়নে এ মহানগরী—নদীয়া যেমন নব্য জ্বায়ে ।
রামগোপালের কর্ম্মভূমি এ, কৃষ্ণদাসের হৃদয়-প্রিয়,
হেথা বিতরিল প্রাণদ মজ্জ বাগ্মী বন্দ্য বন্দনীয় ।
নীল-বানরের বদনবিষ দর্পণে হেথা উঠিল ফুটে,
চরণে দলিল বুটা সম্মান আটাশ নগর-জ্যেষ্ঠ জুটে ।
হারামণি যারা খুঁজিয়া এনেছে তাহাদেরও এই লীলাস্থলী,
“স্বাগত কর্ম্মী ! বাগ্মী ! মনীষী ! স্বাগত সত্যসন্ধ ! বলী !

* * * *

ভাব-ভারতের সারনাথ এই, হেথায় কি এক শুভক্ষণে
 চলিল নূতন বোধিচক্র সে নূতন বোধের উদ্বোধনে ;
 সমন্বয়ের অভিনব সাম খনিয়া ইহার উঠেছে প্রাণে,
 ঐষ্টপন্থী ভারত-ভক্ত—তারে এ হিন্দু বলিয়া টানে !
 আচারে হয় তো ক্রটি আছে এর, বিচারে হয় তো রয়েছে মানি,
 তবু নবযুগে এ নব তীর্থ, নব সাধনার পীঠ এ জানি ।
 সনাতন রীতি মানে না এ সব, নূতনেরি যেন পক্ষপাতী ;
 ক্রমা কোরো ওগো ক্রমা কোরো তবু যৌবন আজ ইহার সাথী ।
 তরু-লতিকার সনাতন রীতি পত্র গজানো সকাল সাঁঝে,
 মৈবে রঙীন পুষ্প উপজে রাজ্যাসনে যবে ফাঙন রাজে ;
 ফুল মাঝে ফল থাকে লুকাইয়া নব জীবনের বীজ সে ফলে,
 মুকুলে লাগুক ব্যাকুল বাতাস, সনাতন সে তো আপনি চলে ।
 নিতি নব নব নব উন্মেষে নবীন জীবন করুক লীলা,
 রসাল মুকুলে না লাগে যেন গো অকাল মেঘের দারুণ শিলা ।
 বুলবুল আনো ফাঙন-বারতা, পেচকের বুলি ভুলিতে চাহি,
 স্বাগত ভাবুক ! ভাবে স্মতরুণ আশা আশাবরী রাগিনী গাহি ।

*

*

*

*

সাধনার পীঠ সাধের আসন শিল্পের নব জীবন-ধারা,
 এ মহানগরী ভারত-আকাশে সাতাশ তারার নয়নতারা ।
 একদা যে দীপ জালিল ধীমান সে দীপ আজি এ নগরে জ্বলে
 পঞ্চপ্রদীপ—অবনী-গগন-অসিত-মুকুল-নন্দলালে ।
 মাইকেল মধু যেথা সমাহিত, বঙ্কিম-হেম-ভদ্রকণা
 ধূলিতে ইহার রয়েছে মিশায়ে কত না ভাবুক রসিক জনা ।

হেথা “মহীয়সী মহিলা”র কবি গাহিল মধুর মায়ের স্তুতি ;
 বিহারী “বঙ্গমুন্দরী”-ভালে সঁপিল শ্লোকের গুরু যুথী ।
 কবির “স্বপ্ন-প্রয়াণ” তুরগী, রবির প্রভাত-গীতির শ্রোতা
 এই কলিকাতা কোলাহলময়ী, এর ভাগ্যের তুলনা কোথা ?
 কবিগুঞ্জে এ ধূলিপুঞ্জ ধরেছে কুঞ্জবনের ছিরি,
 জগৎ উজ্জল যার প্রতিভার এ সেই রবির উদয়গিরি ।
 হেথা আশুতোষ আশু নিরমিল নব নালন্দা শিক্ষা-গেহ,—
 দেশের কিশোর হৃদয়গুলিতে বিধারি পক্ষি-মাতার স্নেহ ।
 এরি উপাস্তে বৈষ্ণব লাল্য লভিল প্রথম অমৃত-ছিটা ;
 প্রত্ন-প্রেমিক রাজা রাজেন্দ্র,—এইখানে তার আছিল ভিটা ।
 হেথা পরিষৎ অশথের চারা দিকে দিগন্তে পসারে শাখা,
 টেকচাঁদ আর গুপ্তকবির প্রকাশে এ ঠাঁই পুলকে মাখা ।
 গিরিশ হেথায় রঞ্জে মাতিল, রায় দ্বিজেন্দ্র হাসিল হাসি !
 স্বাগত কাব্য-কোবিদ ! হেথায় উজ্জয়িনীর বাজিছে বাঁশী ।

* * * *

ভারতের শেষ বয়সের মেয়ে এ নগরী আজ অর্থ্য নিয়া,
 বঙ্গবাণীর সকল ভকতে বন্দনা করে ফুল হিয়া,
 চন্দন-রসে পুষ্প ডুবায়ে পরায় তিলক উজ্জল ভালে,
 মালা-চন্দন ছায় জনে জনে পিরীতি পরশমণির থালে ;
 প্রসন্ন মনে লও যদি সবে সোনা হ’য়ে যাবে এ ক্ষুদ্র কুঁড়া,
 দোষ ধর যদি, রোষ কর মনে, কুবেরেরও হয় গরব শুঁড়া ।
 মানস-ভোজের আছে আয়োজন যার যাহা রুচি, যার যা প্রেয়,—
 চীৎকারি ভাঙারী বাঁটিছে মনের চর্ক-চোয়-লেখ-পেয় ।

তোমরা সাধক বাণী-উপাসক তোমরা মনীষী ভাবগ্রাহী,
 অতিথি ! দেবতা ! মোরা তোমাদের প্রসন্নতার প্রসাদ চাই ।
 চণ্ডীদাসের দায়াদ তোমরা, কবিকঙ্কণ-ধনাধিকারী,
 ভারতচন্দ্র-সুধার চকোর, মধুচক্র সে তোমা সবারি ;
 রবির রশ্মি তোমাদেরি হিয়া রসে লাবণ্যে দিতেছে ভরি,
 ভাব-ভুবনের প্রদীপ তোমরা তোমাদের মোরা প্রণাম করি ।
 ভাষায় তোমরা সঞ্চার কর প্রাণ-সঞ্চিত আশার জ্যোতি,
 তোমাদের সমবেত সাধনায় জাগিছেন মহা-সরস্বতী ।
 ভাবের মূলকে তোমরা মালিক, মালিক ভবিষ্যতের ভবে ;
 ভাব-লোকে যাহা সত্য আজিকে জীবনে তা কালি সত্য হবে ।
 স্বাগত ! স্বাগত ! হে মধুভ্রত ! মনীষিবৃন্দ ! মনের মিতা !
 তোমা-সবাকার প্রতিভার দীপে আজি এ নগরী দীপাযিতা ।
 স্বাগত জ্যেষ্ঠ ! স্বাগত শ্রেষ্ঠ ! স্বাগত প্রমুখ ! সভাধিপতি !
 স্বপ্ন-সারথি ! সত্যের রথী ! তোমাদের মোরা জানাই নতি ।

সত্যেন্দ্রনাথ দত্ত ।

দুর্বাসা

কোথা যাজ্ঞিক আজি অজ্ঞানে ভুলেছ নিত্যধাগ
 কোথা ঋত্বিক কর'নি সাধন আত্মকর্ম্মভাগ ।
 কোথায় শিষ্য ভুলেছ ভাষ্য মাধবীর সৌরভে
 দুর্বাসা আসে দুর্বাসার বেগে, অবহিত হও সবে ।

কোথা ঋষিবালা পুষিছ পরাণে মোহারুণ কামনায়
অতিথি আসিয়া ফিরে যায় তবু হয় না চেতন তার ।
তরুলভাগুলি পায় নি পানীয়, হরিণী শম্পদল
দুর্কীসা আসে দুর্কীচ লয়ে', কোথায় পাপ জল ?

কোথা নরপতি লালসালালিত, পুষ্পবাটিকা-মাঝে,
বিলাসবাসনে আছ সারা বেলা, হেলা করি রাজকাজে ।
কোথা সুবরাজ ভুলেছ সমর প্রেমিকার কর ধরি' ?
দুর্কীসা আসে, দুর্কীচলিত ! জাগো মোহ পরিহারি' ।

ভুলি দেবদ্বিজপূজা, ব্রত, নরজনমের তিন ঋণ,
কোথা গৃহী হায় শফরীলীলায় বিলসিছ নিশিদিন ?
গৃহকাজ কোথা ভুলিয়াছ বধু বিরহের বেদনায়,
দুর্কীসা আসে, জাগো জাগো সবে নিজ নিজ সাধনায় ।

আসিছে মূর্ত রুদ্রশাসন, ক্রকুটীকুটিল মুখ,
শিরে জটাজাল, নয়নে দহন, অশ্রুগহন বুক ।
সাধনার ভার বহ আপনার, মোহের আধার নাশি'
জাগ্রত হে, উগ্রতাপস কখন পড়িবে আসি ।

শ্রীকালিদাস রায় ।

লক্ষ্যপথে

দৈন্ত যদি আসে, আশ্রুক, লজ্জা কিবা তাহে ?

মাথা উচু রাখিস্ ।

স্বথের সাথী মুখের পানে যদি নাহি চাহে,

ধৈর্য্য ধরে' থাকিস্ ।

রুদ্ররূপে তীব্র হুংখ যদি আসে নেমে,

বুক ফুলিয়ে দাঁড়াস্ ।

আকাশ যদি বজ্র নিয়ে মাথায় পড়ে ভেঙ্গে,

উর্কে হ'হাত বাড়াস্ ।

চোখের জলে ভিজে আওয়াজ কেউ যেন না শোনে,

মাকে যখন ডাকিস্ ।

ঠাঁর-ই দেওয়া অন্ধকারের গাঢ়তম কোণে,

মুখখানি তোর ঢাকিস্ ।

আধি-ব্যাধির ধান-দুর্কা পূর্ণ আশীর্ব্বাদে,

মাথায় ঝরে' পড়ুক্ ।

বাসা-ভাঙ্গা স্বথের আশা জীর্ণ জরার সাথে,

স্তব্ধ হ'য়ে মরুক্ ।

কোথায় তুমি তথাগত ব্যাধি-জরা-জয়ী ?

দাঁড়াও এসে কাছে !

নিত্য উৎসরিত তোমার আলোর ঝরা কই

অন্ধকূপের মাঝে ?

ভগ্ন স্তূপের জীর্ণ মঞ্চের স্তম্ভ ছায়া জুড়ে
 মৃত্যু বাসা বাঁধে ।
 অমানিশার রুদ্ধকারায় ক্লান্ত বায়ু ঘুরে
 নিঃশ্বাসিয়ে কাঁদে ।
 বিশ্বপটের চারুদৃশ্য মুছে গেল বলে'
 বুক যেন না দমে ।
 নির্ভয়ে তুই রাখ রে মাথা কালরাত্রির কোলে ;
 করবে কিবা যমে ?
 থাকবে হঃখ, দৈন্ত, জরা শুকিয়ে ঘাটের পাড়ে,
 তুচ্ছ করিস্ তাকে ।
 ঐ শোন্ রে বাজিয়ে বাঁশী নদীর পরপারে,
 কে যেন রে ডাকে ।
 সুর বেঁধে নে ওরে আতুর, পরপারের গাথার
 মধু-ঝরা সুরে ।
 ক্রান্তি-ভরা শান্তি-হরা গুরু বোঝা মাথার
 ফেলে দিয়ে দূরে,
 গাওরে প্রীতির নবগীতি ! মৃত্যু মরুক কেঁদে,—
 কেউ পাবে না সাড়া ।
 যাক না ডুবে রূপের জগৎ ! নূতন বিশ্ব বেঁধে
 সোজা হয়ে দাঁড়া ।
 শ্রীবিজয়চন্দ্র মজুমদার ।

বিজয়া *

বিনামেঘে বজ্রাঘাত,
 অকস্মাৎ ইন্দ্রপাত,
 বিনাবাতে নিভে গেল মঙ্গল-প্রদীপ ।
 শমন পাইত শঙ্কা,
 সম্মুখে শোনাতে ডঙ্কা,
 প্রবাসে তঙ্করবেশে হইল প্রতীপ ॥

হৃদম প্রতাপে পুষ্ট,
 স্পষ্টবাদে স্তব্ধ হুষ্ট,
 অশিষ্ট-শাসনপটু শিষ্টের সহায়
 বিজ্ঞাপীঠে গোষ্ঠীপতি,
 একচেষ্ঠ হৃষ্টমতি,
 জয়পত্র লিপ্ত ভালে সর্বত্র সভায় ॥

দ্বিজবুদ্ধি, তেজে ক্ষত্র,
 কৰ্ম্মক্ষেত্রে যত্র তত্র,
 অধিপতি একছত্র জন্ম অধিকার ।
 প্রতিভার পূর্ণদৃষ্টি,
 করিত নূতন সৃষ্টি,
 ধ্বংসমুখী নহে মাত্র চিত্ত অবিকার ॥

* সার আশুতোষ মুখোপাধ্যায়ের মৃত্যু উপলক্ষে ।

কেশাগ্র নখাস্তে দীপ্ত,
জাগ্রৎ জীবন লিপ্ত,
স্বহ দেহ দীপ্ত মন সুবিরাহি কাষ ।
মরণের হোলো বস্ত্র,
মুহুর্তে হইল ভস্ম,
অধরের চিরহাস্ত নিমেষে শুথায় ॥

বজ্র-কণ্ঠ শূন্য করে,
বিহার কি হার করে,
অগ্নি জ্বলে দিলি ঘেঘে ভগ্নীর অন্তরে ।
অহিংসার জন্মভূমি,
বুদ্ধের জননী তুমি,
বিশ্বতিতে বিসর্জিলি গৌতম-মন্তরে ॥

ধ্যানে বীর ছিল দৃষ্টি,
নবীন নাগন্দা সৃষ্টি,
ভারতের ভারতীরে জাগাতে আবার ।
আলো দিতে এ জগতে,
জ্ঞান-জ্যোতি প্রাচ্য হ'তে,
পুনরায় বাস যাতে বারিতে আঁধার ॥

না হইতে কস্ম সাঙ্গ,
মধ্য পথে ব্রত ভঙ্গ,
বজ্রের বরাজ বীর লুকাল কোথায় ।

তজ্জাহীন কস্ম-রঙ্গে
বিরোধ বিশ্রাম সঙ্গে,
আলস্ত উপাস্ত চির হোলো ছলনায় ॥

সার্থক পুরুষ নাম,
পৌরুষের পূর্ণধাম,
ক্ষমবান্ দস্তি-দর্প করিবারে চূর্ণ ।
দীনজনে আশুতোষ,
বিদ্রোহীয়ে রুদ্ররোষ,
বিদ্বানে বন্ধুত্ব-বঁধে বেঁধে নিতে তূর্ণ ॥

এ বঙ্গের যত ছাত্র,
ছিল তব স্নেহপাত্র,
তারাই তো পুত্র মিত্র স্বাগত অতিথি ।
অনর্গল গৃহদ্বার,
ঢল ঢল হৃদাধার,
কত অশ্রুজল দেব মুছায়েছ নিতি ॥

মাতৃ-গোত্রে প্রীতি অতি,
আশুতোষ সরস্বতী—
উপাধি-ভূষণ তব বিজয়-নিশান ।
দেখিতে দেখিতে হায়,
সরস্বতীপূজা সায়,
বিষাদের বিজয়ায় প্রতিমা ভাসান ॥

এ নগরী নিরানন্দে,
সাজাইয়া পুষ্প-গন্ধে,
দেব দেহ স্বন্ধে লয়ে করিল বহন ।
জগত জাগায়ে নামে,
ফিরে গেলে নিজ ধামে,
আদিগঙ্গা-তীর্থ তীরে দেহের দাহন ॥

শ্রীঅবুতলাল বসু ।

অন্তর্যামী

যখনি দেখিতে নারি, অন্ধকার আসে,
পথ খুঁজে মরে প্রাণ, তারি চারি পাশে !
কোথা হ'তে জ্বল দীপ, সন্মুখে তাহার ?
নয়নে দৃশ্য আসে, চলে সে আবার !

যখনি হৃদয়-বস্ত্রে ছিঁড়ে যায় তার,
স্বরহীন হ'য়ে আসে সঙ্গীতের ধার—
কোথা হ'তে অলঙ্কিতে তুমি দাও সুর ?
মহান্ সঙ্গীতে হয় প্রাণ ভরপুর !

চিত্তরঞ্জন দাশ ।

গঙ্গার কলিকাতা-দর্শন

“নগরী-ভিতর, মাতা, অতি চমৎকার,
 মন্ডাকিনী-রূপ ধরে দেখ শোভা তার ;
 কত বাড়ী কত বস্ত্র-সংখ্যা নাহি হয়,
 নিবসে বিবিধ-দেশ-মানবনিচয় ।
 ভাল জল লালদীঘি হিম-সরোবর,
 চারি ধারে ফুল-বন শোভা মনোহর,
 দুই ধারে দুই ঘাট সুন্দর সোপান,
 চৌদিকে লোহার রেল শুলের সমান ।
 তার পর রাজপথ অতি পরিসর,
 তার পরে হস্ত্যমালা দীর্ঘ-কলেবর,
 চারিদিকে অট্টালিকা মধ্যে সরোবর,
 অপরূপ-দর্শন অতীব সুন্দর ।

“প্রকাণ্ড প্রাসাদ উচ্চ জর-হীম্পাতাল,
 ছাদে উঠে ছোয়া যায় আকাশের গাল,
 সুন্দর সোপান থাম ঘর-পরিকর,
 নির্মাণ করেছে যেন খোদিয়ে ভূধর ।
 দেখ মাতা, গোলদীঘি, বড় রক্ত জোর,
 বিরাজে দক্ষিণদিকে হেয়ারের গোর,
 দীন দুঃখী শিশুদের পরম আশ্রয়,
 বঙ্গের বদমাশ বহু প্রাতঃস্মরণীয়,

বাঙ্গালীর উন্নতির নিশ্চল নিদান,
যার জন্তে করেছেন সর্বস্ব প্রদান ।
উত্তরে বিরাজে হিন্দুকালেজ গম্ভীর,
গৌরবে উজ্জ্বল মুখ, উন্নত শরীর,
বিদ্যা-প্রবাহের মূল, সভ্যতা-আকর,
দিয়াছেন তেজঃপুঞ্জ রতন-নিকর ।
দেয়ালে রয়েছে ওই হেমারের ছবি,
তারক দাঁড়িয়ে কাছে জ্ঞানালোক-রবি,
লায়ালের ট্যাবলেট দয়া-পরিচয়,
উ(ই)ল্‌সনের ছবিখানি যেন কথা কয় ;
হেমারের শুভ্র মূর্তি প্রস্তরে খোদিত,
কালেজের প্রাঙ্গণের মধ্যস্থলে স্থিত ।

“এইবার কর মাতা, স্মৃথে নিরীক্ষণ,
কালেজ-রতনচয় মহা মহাজন—
সুবিজ্ঞ রসিককৃষ্ণ ইষ্ট অভিলাষ,
মনোবৃত্তি-শাস্ত্রবিদ অধর্মের ত্রাস,
প্রণয়ে হৃদয় পূর্ণ, সহাস আনন,
কীর্তিধ্বজ স জীবতি, কর দর্শন ।
প্রবল-রসনা রামগোপাল গম্ভীর,
স্বদেশ-রক্ষার ভীম, সদা উচ্চ-শির,
অসমসাহস-ভরা অস্ত্রায়ের অরি,
সভ্যতার সেনাপতি, কল্যাণ-কেশরী ;
প্রসন্নকুমার ধীর বিজ্ঞ মহাশয়,
মজুর ব্যবস্থা-বেস্তা মঙ্গল-আলয় ;

নিরপেক্ষ হরচন্দ্র জানা নানা মতে,
সুবিজ্ঞ বিচারপতি ছোট আদালতে ।”

বাণের বচনে গঙ্গা হয়ে হরষিত,—
জিজ্ঞাসিল মধুস্বরে ব্যগ্রতা-সহিত,—
“বল বাণ বিচঞ্চল-ভয়ঙ্কর-কায়,
স্বাধীন-স্বভাব বিজ্ঞ পণ্ডিত কোথায় ?
পরশর-অমুরাগী রম্য-রীতি-পাতা,
না দেখিলে তাঁরে বুথা আসা কলিকাতা ।

গঙ্গার বচনে বাণ আনন্দে হাসিল,
ধীরে ধীরে জাহ্নবীয়ে বলিতে লাগিল,—

“পূর্বদিকে একবার ফিরায়ে নয়ন,
দেখ ওই গুটিকত অমূল্য রতন,—
বিষ্ণুর সাগর বিষ্ণুসাগর-প্রবর,
দীনজন-লালন-পালন-তৎপর,
মাতৃভক্তি-ভরা-চিত্ত, কাছে গিয়ে মার
অস্ত্রাপি শিশুর মত করে আব্দার ;
বিধবা-বিবাহ-বিধি-যুক্তির বিচার,
খণ্ডাতে পারেনি কেহ শাস্ত্রমত তাঁর ;
অমিয়া-লহরীযুত রচনা-নিচয়,
ললিত মালতীমালা কোমলতাময়,
সাহিত্য-সহজ-পথ উপক্রমণিকা,
পড়িয়া পণ্ডিত কত বালক-বালিকা,
সংস্কৃত-কালেজ যার যতন-কৌশলে,
লভিয়াছে এত যশঃ মানব-মণ্ডলে ;

দেশ-অমুরাগ-শ্রোত বহিছে হৃদয়ে,
'বেঁচে থাক বিজ্ঞাসিদ্ধ চিরজীবী হ'য়ে।'

“সুবিজ্ঞ ভরতচন্দ্র স্মৃতিশাস্ত্রবিৎ,
বক্ষেতে ধাহার সম নাহিক পণ্ডিত,
প্রাচীন নবীন স্মৃতি ধার কণ্ঠহার,
কাস্তিপুষ্ট কলেবর ঋষির আকার।
ধীর প্রেমচাঁদ তর্কবাগীশ মহান,
অলঙ্কার-গৃহে বিজ্ঞা করিতেছে দান,
সুকঠিন নৈষধ রাঘবপাণ্ডবীয়,
করেছেন উভয়ের টীকা রমণীয়।
সুতীক্ষ্ণ-মেধাবী তারানাথ মহাশয়,
শব্দশাস্ত্রে সুপণ্ডিত বিচারে দুর্জয়,
কাব্য ত্রায় স্মৃতি আদি শাস্ত্র আছে যত,
সকল সংগ্রহ আছে দেখ নানা মত।
ওই জয়নারায়ণ তর্ক-পঞ্চানন,
দর্শনেতে সুদর্শন, বিচারে শমন,
ত্রায় সাঙ্খ্য পাতঞ্জল আর বৈশেষিক
মীমাংসা বেদান্ত-শাস্ত্রে দ্বিতীয় নাহিক।
সাহিত্য-শোভিত কবি মদনমোহন,
মরিয়্য জীবিত দেখ কীর্ত্তির কারণ,
বিজ্ঞাসাগরের বন্ধু, বিজ্ঞার মিলন,
বাসবদত্তার পিতা রসিক-রতন।
সাহিত্য-সবিভা ত্রীশ স্মৃতিপাঠক,
বিধবা সধবা-করা পথ-প্রদর্শক,

লভিয়াছে পাঠালয়ে খ্যাতি চমৎকার,
 কবিতার পুস্কার একায়ত্ত তার ।
 বিজ্ঞাবিশারদ বিজ্ঞাত্বগণ গম্ভীর,
 সোমবারে সূধা স্করে বার লেখনীর !
 গিরিশচন্দ্র বিজ্ঞারত্ন বিজ্ঞারত্নাকর,
 দশকুমারের অনুবাদক প্রবর ।
 সুপণ্ডিত বিজ্ঞ তারাশঙ্কর সুশীল,
 কঠিনতা সনে যার মধুরতা মিল,
 চন্দ্রাপীড় সম শব প'ড়ে ধরাতলে,
 কাঁদিতেছে কাদম্বরী ভাসি আঁখি-জলে ।
 লক্ষ্মান মৃত দেহ গলায় বন্ধন,
 মেধার সাগর রামকমল রতন ।
 সুযোগ্য অনুজ কৃষ্ণকমল তিলক,
 বিশ্ববিদ্যালয়ে সংস্কৃতির অধ্যাপক ।
 সহকারী রাজকৃষ্ণ কাঞ্চন-বরণ,
 যার করে জলে টেলিমেকস রতন,
 হান্তমুখ বিজ্ঞাবস্ত কিবা অধ্যাপক,
 একবৃন্তে যেন দুটি বিজ্ঞান-চম্পক ।
 মহামতি প্রসন্নকুমার মহাশয়,
 বিজ্ঞা বিস্তারিতে দেশে প্রফুল্ল-হৃদয়,
 মিষ্টভাষা বিচক্ষণ স্বভাব গম্ভীর,
 বাঙ্গালায় অক্লান্ত করেছে বাহির,
 যোগ্যবর প্রিন্সিপাল সংস্কৃত-কালেজে,
 দেবগণ-মাঝে যেন দেবরাজ সাজে

ষ্টুডেন্টে মতি কৃষ্ণমোহন পবিত্র,
 বিদ্যাবিশারদ অতি বিস্কন্ধ-চরিত্র,
 স্বদেশের হিতে চিন্ত প্রফুল্লিত হয়,
 লিখিয়াছে নীতিগর্ভ প্রবন্ধ-নিচয় ।
 বিজ্ঞেন্দ্র রাজেন্দ্রলাল বিজ্ঞান-আধার,
 বিলাত পর্য্যন্ত খ্যাতি হয়েছে বিস্তার,
 ভূতপূর্ব-বিবরণে দক্ষতা অক্ষয়,
 ক্ষত্রবংশে তুলেছেন সেনরাজচয়,
 রহস্যসন্দর্ভ-পত্র-যোগ্য-সম্পাদক,
 পিতৃহীন ধনশালী শিশুর শিক্ষক ।
 সুভাব্য ভূদেব বিজ্ঞ পণ্ডিত সুজন,
 গুরুমহাশয়-গুরু গুণ-দরশন,
 বঙ্গদেশ সাহিত্যের উন্নতি-সাধক,
 কাটিতেছে সুযতনে অজ্ঞান-কণ্টক ;
 রবি শশী ছাত্রদ্বয় অতি উচ্চ মন,
 ক্ষেত্রনাথ বীর, ধীর শরৎ রতন ।
 চোরবাগানের পুষ্প পিয়ারীচরণ,
 যাহার ইংরাজী বই পড়ে শিশুগণ,
 করিতেছে সুযতনে ভাল নিবারণ,
 হীনমতি সুরাপান—বিষম শমন ।

“সহজ ভাষার পাতা পণ্ডিত বিশাল,
 প্যারীচাঁদ ‘আলালের ঘরের দুলাল’ ।
 সাহসী কিশোরীচাঁদ ফীল্ড-সম্পাদক,
 লিখিতে বলিতে পটু স্বদেশ-পালক ।

কনক-কন্দর্প-কান্তি দক্ষিণারঞ্জন,
 স্নলেখক সাহসিক মধুর-বচন,
 তাঁহার প্রদত্ত স্থানে দেখ বিরাজিত,
 বালা-বিদ্যালয় সহ অশোক লোহিত ;
 বেধুন-স্থাপিত ওটি—দাতা, মহাশয়,
 হেয়ারের তুল্য বন্ধু, স্মরণ, সদয় ।
 জগদীশ পুলিশ-রতন বিজ্ঞবর,
 তান লয়ে গাইতেছে গীত মনোহর ।
 মহাকবি মাইকেল গান্ধীর্ষ্য-মণ্ডিত,
 প্রবল-কবিতাস্রোত বেগে প্রবাহিত,
 যত্নশৈলে শঙ্কসিদ্ধ করিয়া মছন,
 অমিত্রাক্ষরের সুধা করেছে অর্পণ,
 ‘তিলোত্তমা’ ‘মেঘনাদ’ কাব্য চমৎকার,
 ‘ব্রজাঙ্গনা’ কাব্যে বাজে মধুর সেতার ।
 রাজেন্দ্র সুধীর বিজ্ঞ দত্তকুল-কেতু,
 হোমিওপেথির বৈদ্য বিপদের সেতু ।
 জ্ঞানাগার কালীকৃষ্ণ স্বভাব বিনত,
 বারাসতে প্রাণরক্ষা করে শত শত ।

“মেডিকেল কলেজে নিদান অধ্যয়ন.
 প্রজ্জলিত দেখ কত ভিক্ষু-রতন,—
 প্রবীণ নবীনকৃষ্ণ শ্রেষ্ঠ কবিরাজ,
 ষার করে মহারোগ পেয়ে যায় লাজ ।
 প্রাণদানে দক্ষ দুর্গাচরণ প্রধান,
 বিচক্ষণ কবিরাজ, জিহ্বায় নিদান,

শিখেছিল হৃদয়মতি বিনা উপদেশ,
 রোগব্যূহ-ব্যূহভেদ-কারণ উদ্দেশ ।
 গুণবস্ত চন্দ্রদেব রোগীর নিস্তার,
 জরম্যান্-বৈজ্ঞান্য অল্পবাদকার ।
 জগদ্বন্ধু গুণসিদ্ধ সুদক্ষ ভিষক্,
 সুপণ্ডিত কবিরাজ কালেক্স-তিলক ।
 নানা বিজ্ঞা-বিশারদ মহেন্দ্র প্রবর,
 নয়ন-রোগের শাস্তি দয়ার সাগর,
 উষায় বসিয়া ঘরে করে বিতরণ,
 অকাতরে দীনজনে ঔষধ-রতন ।
 হর্গাদাস ব্যাধিজ্ঞাস অধ্যাপকবর,
 পালায় পরশে যার জ্বর ভয়ঙ্কর ;
 বাঙ্গালা সাহিত্যে ভাল আছে অধিকার,
 ‘সুবর্ণ-শৃঙ্খল’ নামে নাটক তাহার ।
 দেয়ালে রয়েছে মধু ছবিতে চাহিয়ে,
 শিখেছিল এনাটমি আগে জাত দিয়ে ।”

দানবন্ধু মিত্র ।



শ্রাম সলিল তব, লোহিত ছিল কভু,
 পাণ্ডব-কুরুকুল-শোণিতে ও ।
 কাঁপিল দেশ, তুরগ-গজ-ভারে,
 ভারত স্বাধীন যে দিন ও ।

তব জল-তীরে, পৌরব ষাদব,
 পাতিল রাজ-সিংহাসন ও ।
 শাসিল দেশ, অরিকুল নাশি,
 ভারত স্বাধীন যে দিন ও ।

দেখিলে কি ভূমি, বোদ্ধ পতাকা,
 উড়িতে দেশ-বিদেশে ও ।
 তিক্ত-চীনে, ব্রহ্ম-তাতারে,
 ভারত স্বাধীন যে দিন ও ।

এ জল-ধারে, ধীরে বহিল কভু,
 প্রেম-বিরহ-আঁখিনীর ও ।
 নাচিল গাইল, কত সুখ সম্পদ,
 এ তব সৈকত-পুলিনে ও ।

এ তনু-মুকুরে, আসি পূর্ণশশী,
 নিরখিত মুখ যবে শরদে ও ।
 ভাসিত দশ দিশি, উৎসব-রঙ্গে,
 দ্রাবিত চিত সুখ-উৎসে ও ।

সে তুমি, সে শশী, ধীর অনিল সে,
 তবু সব মগন বিষাদে ও ।
 নাহিক সে সব, প্রমোদ উৎসব,
 গ্রাসিল সকলে কালে ও ।

যে মুরলী-রবে নিবিড় নিশীথে,
 উন্মাদিত ব্রজবালা ও ।
 আকুল প্রাণে তব তট-পানে,
 ধাইত রব সন্ধানে ও ।

বর্দ্ধিত বিরহে, শ্বাস-পবন কত,
 বিরচিত বলি তব হৃদয়ে ও ।
 স্নহদ-সমাগমে, পুন এই দর্পণে,
 প্রতিবিম্বিত সিত হাসি ও ।

সে সব কোতুক, কাল-কবল আজি,
 লেশ না রাখিলে শেষ ও ।
 কই সেই গৌরব, নিকুঞ্জ-সৌরভ,
 হ'ল পরিণত শত কাহিনী ও ।

কছু শত ধারে, এ উভ পারে,
 পাঠান, আফ্গান, মোগল ও ।
 ঢালিল সেনা, জ্বাসি নিবাসী,
 বাধিল ভারতে বন্ধনে ও ।

অহো ! কি কু-দিবসে, গ্রাসিল রাহ,
 মোচন হইল না আর ও ।
 ভাঙ্গিল চূর্ণিল, উলটি পালটি,
 লুটি নিল যা ছিল সার ও ।

সে দিন হইতে, অন্ধ মনোগৃহ,
 পরবল-অর্গল-পাতে ও ।
 সে দিন হইতে, শ্মশান ভারত,
 পর অসিদ্ধাত-নিপাতে ও ।

সে দিন হইতে, তব জল তরলে,
 পরশে না কুলবালা ও ।
 সে দিন হইতে, ভারত-নারী,
 অবরোধে অবরোধিত ও ।

সে দিন হইতে, তব তট-গগনে,
 নৃপুন্ন-নাদ বিনীরব ও ।
 সে দিন হইতে, সব প্রতিকূলে,
 যে দিন ভারত-বন্ধন ও ।

এ পরঃ-পারে কত কত জাতীর,
 ভাঙিল কত শত রাজা ও ।
 আসিল, স্থাপিল, শাসিল রাজ্য
 রচি ঘর কত পরিপাটী ও ।

রাখিত পাশে, সে তরবারি,
কাফর-কণ্ঠ-বিদারী ও ।

কৈ ? সব আজি, সময়-সমুদ্রে
মজ্জিত সহ শত আশা ও ।

দেখিল শত শত, হ'ল না নিবারিত,
নিজপ মল্লজ-পিপাসা ও ।

সে গৃহ-পাশে কাঁপিত জ্বাসে,
ভূপতি-পদবিক্ষেপে ও ।

সে সব ভবনে, কত শত অধমে,
পুরিছে মূত্র পুরীষে ও ।

যে ঘর-মধ্যে, সুরভি-সমুদ্রে,
সম্মোহিত-চিত কালে ও ।

সে সব সদনে, উদ্ভবে বমনে,
পুতিগন্ধ বিকিরণ ও ।

যে গৃহ-অঙ্গে, বহুবিধ রঙ্গে,
বিখচিত ছিল মণিরাজি ও ।

সে সব কালে, হরি এক কালে
ঢাকিল লুতা-জালে ও ।

ঐ তব তীরে, শুভ্র শরীরে,
দণ্ডায়িত গৃহ-রাজ ও ।

যার সুরূপে, দিক্‌দিক্‌ হইতে,
কর্ষে মল্লজ-সমাজে ও ।

কত নর-পঞ্জরে, নির্মিল ইহারে,
শোষি শোণিত কোষে ও ।
দর্শাইতে সব, দর্শক লোকে,
প্রমদা-গৌরব শেষে ও ।

অহো ! কত কাল, রবে এ জীবিত
তটিনি ! তট তব শোভি ও ।
ভূষণ হইয়ে, তব জল নীলে,
ব্যঞ্জিতে মন-অভিলাষে ও ।

হবে কোন কালে, হত ঘোর কালে
পরিমিত সুর-পরমায়ু ও ।
রহিবে শেষে, এ গৃহ-দেশে,
আকাশে শুধু বায়ু ও ।

যদি এই শেষ, রবে সব শেষ,
জীবন-স্বপন প্রভাতে ও ।
তহু মন করিয়ে, হুথ শত সইয়ে,
চরিছে লোক কি আশে ও ।

গোবিন্দচন্দ্র রায় ।

স্মার আশুতোষ

(জীবদ্দশায় লিখিত)

অলজ্যোতি কলাযুতা শেমুখী কার,
 ছুরিত বিভায় যার বঙ্গ আলোকিত ?
 বিজ্ঞাতপে সিদ্ধকাম অলস্ত পাবক ;
 গরিমার আসনেতে সদা সমাসীন,
 তেজবস্ত্র মহাতপা দুর্কাসা সমান ।
 এই প্রতিভায় যদি আকাশ-উপর
 স্থাপিতেন মহাধাতা, জ্যোতিতে ইহার
 চিত্রাঙ্ক্যতি ত্রিয়মাণ হইত আপনি ।
 স্বাধীন রাজ্যেতে যদি জাতিতে জনম,
 বিস্মার্ক বা ডিস্ট্রেলির প্রতিভা-আলোক
 বিবর্ণ হইয়া যেতো ও-প্রভা হেরিয়া ।
 যুক্তি তব তর্কসহ কেশরীর হ্যায়
 চলে যবে, মহিমার তুলিয়া হিল্লোল,
 সত্যের সন্ধানে,—গতিভঙ্গী তার
 কত যে মাধুর্য্যভরা, বুঝে সেইজন—
 চিত্ত যার যুক্তিরসে সদা পরিপ্লুত ।
 বীরস্ব উঠে না জাতি, যে বীরস্ব মাঝে
 জাতির আলোক-ভাষা না থাকে জড়িত ;

জাতীয় চিন্তায় সিক্ত নহে সে বীরতা,
 সে বীরত্বে সিংহবীৰ্য্য না হয় প্রকাশ,
 সে বীরত্বে ভীষ্মশৌৰ্য্য উঠে না ফুটিয়া ;
 মনোরমা বাংলার মনোরমা ভাষা,
 তোমার উৎসাহে আজ সে যে জ্যোতির্শ্রয়ী ;
 মন্দাকিনী ব'হে যায় কলুষ নাশিয়া
 বঙ্গভাষা-ধুনী চলে মাতায়ে হৃদয় ।
 ঋষিবর ও-নদীর সৈকতে বসিয়া
 রম্য গীতাঞ্জলি-গাথা উদাত্ত আরাবে
 উচ্চারিয়া, মস্তমুগ্ধ করিছে জগৎ ।
 শ্রামল বন্ধের শোভা অতুল জগতে ;
 বাঙ্গালীর গীতিগাথা তুলনা ইহার
 নাহি 'হায়েনে'র কুঞ্জে—'দাস্তে'র বিপিনে ;
 তুমি সে ভাষার প্রাণ করেছ প্রতিষ্ঠা ;
 গর্বিত বাঙ্গালী আজি তোমার প্রভায় ।
 লবণাক্ত সিদ্ধুবারি, শশাঙ্ক-লাহন,
 দীপমূলে অঙ্ককার, তথাপি ইহার
 প্রত্যেকেই রমণীয়, প্রত্যেকে মহান ;
 দোষ যদি থাকে, থাক ; দীর্ঘ বিশালতা,
 ক্ষুটিক-নির্মল চিত্ত, উদাত্ত চরিত—
 গর্বের জিনিষ উহা, সাধনার ধন ।

শ্রীবনোয়ারীলাল গোস্বামী ।

